

**PETRI BEMBI EPI
STOLARVM LEONIS**

DECIMI PONT. MAX.

Nomine scriptarum.

LIBER IX.

FEDERICO LANDO

Placentino.



AVDIVI de ijs, qui te amant, ciuibus
tuis, qui Romæ sunt, te ex interitu
Baptista Landi filij tui Romæ à Petro
Francisco Maluicino ciue Placentino
proximis diebus interfecti, permotum
atq; perturbatum, reliquosq; liberos tuos iraminiariq;
percitos parare arma in Maluicinarum familiam, vt de-
functi mortē modis omnibus vindicetis. Ea in re tamen si
tuo tuorumq; dolori iusto præsertim facile ignosco, mole-
stissimeq; fero ea, quæ acciderunt: te tamen, quæ quidem
certe in primis diligo, cuiusq; & prudentiam et tempe-
rantiam omnibus in rebus semper probavi, moneo paterne
atque hortor, vt quam adhuc quidem moderationem a-
nimi tui vitæq; rationem es complexus, ea posthac etiã
vtare, teq; ipse primum, deinde tuos contineas, nequid
Placentiæ tumultus vstra causa exoriat: quod plane
fiet, si & ipse quiesceris, & quiescere iusseris tuos. Id vt
facias etiam atque etiam abs te peto. Erit & mihi gra-
tum, & tua ætate, integritate atq; prudentia dignum.
Equidem quæ cogitari atq; statui à me debent, vt dolo-
ri tuo atque iniuria pro iustitia satisfiat, in ijs tibi eo mi-

q. 111

nus deero, quo te magis intellexero meis monitis præ-
ceptisq; paruisse. Da. 18. Cal. Aug. Anno secundo. Roma.

CANONICIS ET SOCIETATI

Ecclesiæ Veronensis.

2

INTELLEXI vos emphiteoscos nomine villam
atque agrum, Cederelli qui fuerat, Domitio Pomedello
dedisse. Qui quidem Domitius cum alumnus sit Antonij
Thebaldei, quem ego virum propter eius præstantem in
optimarum artium studijs doctrinam, pangendisq; car-
minibus mirificam industriã vnice diligo, grata hercule
mihi ea vestra liberalitas fuit. Itaque certior factus su-
peresse etiam vobis portionem quandam ex illis ipsis Ce-
derelli bonis, quam nemini adhuc quidem donauistis,
has ad vos literas dedi, vt sciretis, si, quod est reliquis
eorum bonorum, eo à vobis Domitius augebitur, mihi id
per quam gratum futurum. Vos autem in eo præterea
& modesti ac probi adolescentis arctam angustamq; re-
vestra liberalitate explicabitis, & virum egregium ac
per elegantem, deq; vestra ciuitate optime meritum eius
patronum eo beneficio vobis deuincietis. Dat. XVI. Cal.
Aug. Anno secundo. Roma.

SIGISMUNDO REGI

Poloniæ.

3

PERFERTVR ad me, seditionibus non negligen-
dis in Pannonia per factiosos homines & scelestos exci-
tatis arma temere tractari, ac trucidari passim pluri-
mos, & intestinum quoddam quasi bellum existere contra
Vladislai Regis Pannonia fratris tui voluntatem. Itaq;
timendum esse, nisi ei rei quam celerrime occurratur, ne
fieri ac permoti ea occasione Turce Regnum illud

N. 4 con

G

1327

F 5 2

Carolus Rnostrus
Lantiscang



2599 - 1920.

В 1324

PETRI BEMBI
CARDINA=
LIS PATRITII VE
NETI EPISTOLARVM
LEONIS DECIMI PONTIFI-
cis Maximi nomine scriptarum
libri sexdecim:

AD PAVLVM TERTIVM PONT.
MAX. ROMAM MISSI.

EX
Emendatis codicibus, descripta omnia.

Adiunctus est Index, qui nomina eorum, quibus
epistolæ sunt missæ, exhibet.



COLONIAE AGRIPPINAE,
Excudebat PETRVS HORST
Anno cl. b. LXXXIIII.

THE HARBOR

CARDINAL

THE FIRST OF JANUARY

THE HARBOR

THE HARBOR

THE HARBOR

THE HARBOR

THE HARBOR

3

PETRVS BEMBVVS
PAVLO TERTIO

PONT. MAX.

S. P. D.



VM Latinus Iuuenalis internuntius apud Rempub. nostram tuus his proximis brumæ diebus Patauium venisset: proque iure vetustæ nostræ necessitudinis apud me diuertisset, iucundissimis inter nos sermonibus percunctationibusque habitis, & curato corpore bibliothecam est ingressus: erat enim eius cubiculo proxima. Itaque libros singulos excutiens in volumen incidit sepositum, nec satis explicatum Epistolarum, quas quidem ego in Leonis Decimi Pontificatu maximo eius nomine conscripseram, non planè omnium: nam tot exempla difficile fuisset vno volumine includere: erant enim prope innumerabilia: sed illarum tantummodo, quas porro propterea quòd erant multorum euentuum & rerum variarum pleniores, in arculam aliorum scriptorum Roma proficiscens cōieceram. Earum ille aliquot non sine voluptate, vt videbatur, perlectis: illius enim temporis libenter reminiscebatur, quo & ipse Leoni decimo perfamiliaris fuit: reliquarum autem congerie inspecta: Quid tu, inquit, Bembe has lucubrationes tuas prodire in manus hominum non sinis? Debueras profecto. Nam & eius muneris, quo apud Pontificem illum maximum fungere, erunt illæ quidem semper testes: & rerum ab illo gestarum memoriam continebunt: vt eius ipsius regni tanquā historiam videri possis, si eas edideris, confecisse. Te autem vnum maxime omnium conuenit, qui res Venetas posteris tradendi laborem suscepisti, tui etiam Pontificis partem illam vitæ in illustri orbis terrarum theatro positā, cursumque

muneris omnium maximi cognoscendum his tuis literis posteritati mandauisse. Equidem fateor, is amici hominis & prudentis viri sermo me magnopere commouit. Cumque multa ea de re inter nos essent dicta: addidissetque ille, existimare sese tibi eam scribendi rationem valde placitum & probatum iri: pollicitus es, me, quod suadebat atque hortabatur, breui facturum: quod quidem nunc facio. Eas autem ad te Paule potissimum literas mitto: qui & Pontifex Max. es, vt Leo Decimus fuit, & in optimarum artium disciplinis multo, quàm ille, habitus doctior. Vera enim fateri omnes non solum honeste possumus, sed etiã debemus. Præter hæc vt meæ perueteris in te obseruantia, pietatis, cultus, hos sexdecim epistolarum libros: tot enim sunt: tanquam indices & quasi prædes tu à me primū, deinde cæteri abs te habeant, valde cupio: eaque me cogitatio vehementer delectat. Qui etiam eo iustius ad te libri veniunt omnibus politioribus literis & doctrinis perornatum: quo magis ipsi ea Latine loquuntur: quæ adhuc quidem satis vel inepte, vel etiam perperam, nulla quidem cæce cum dignitate, more exemploq; urbana forensis disciplinæ solita sunt scribi ab epistolarum Pontificalium magistris: qui triginta esse consueverunt. Hæ quoniam epistolæ multas ad exterarum persæpe nationes perferuntur: esse vsui nostra hæc diligentia poterit non hominibus solum nostris, sed illis etiam, ad quos ea non Romane scribendi consuetudo, quod à Romanis Pontificibus proficiscitur, contagionem quandam affert tradentium maiestate fultam & comprobata: vt errare se sic scribentes non existiment. In eo si quid ipsi profuerimus: tibi id vni maxime acceptum referri oportebit: cuius autoritate moti hos & digessimus libros & edidimus. Vale. Idib. Ian. M. D. XV. Patauius.

PETRI

5

PETRI BEMBI EPI
STOLARVM LEONIS DECL
MI PONT. MAX. NOMINE
scriptarum.

LIBER PRIMVS.

LEONARDO LAVREDANO
REIP. VENETORVM
Principi.



T si non dubito, quin ab Legato tuo ho-
mine & prudente & diligente ea liben-
ter intellexeris, quæ hic proxime accide-
runt: tamen illa ipsa si meis etiam literis
ad te perferentur, multo tibi iucundiora
putaui fore. Nam cum Iulius secundus Romanus Pont.
quem quidem iam ad se reuocare Deus Opt. Max. con-
stituerat, rebus omnibus, quæ ad breui morituros perti-
nent, sanctè compositis, ad extremum vnctus Nono Cal.
Martias de vita placidè constanterq; decessisset: atque
ego, qui tum Cardinalem gerebam, ceteriq; ex eodem
collegio principes eius funeri celebrando præstitutum le-
ge tempus dedissemus, diuinæ mentis auram suppliciter
precati, quæ incepta nostra cogitationesq; prouoheret,
vnum in locum in Vaticano conuenimus, vt nouū Ponti-
ficem more maiorum legeremus. Itaq; quemadmodum
ei placuit, qui Petrum legit, vt suum vicarium in terris
gereret, cuius deinceps munus reliqui summi Pontifices
gereremus, omnium Cardinalium suffragio me in de-
mortui locum ad diem quintum Idus Martias legerunt,

Et summum Pontificem creauerunt. Quæ cum ita se habeant, hæc ad te scripsi, non solum vt scires me, qui profecto quamdiu inter Cardinales fui, te, remq; istam publico magno amore sum complexus, à paterni animi beneuolentia atq; officio posthac non discessurum: sed etiã vt te certiozem facerem, magnam me iam spem recte atque cum dignitate rem Romanam administrandi in Senatus tui, qui grauisissimus semper est habitus, sapientia, consilijs, equitate, quodq; omnium est maximum, erga nos perueteri constantiq; amore posuisse. Datum prid. Id. Mart. M. D. XIII. Ante coronationem. Roma.

FRANCISCO GONZAGÆ

MARCHIONI MANTVÆ, 2

Iulio secundo Pontifice Max. ex hominibus compositæ sancteq; abeunte, cœlestemq; in patriam à summo reuocato ac restituto Deo, quod quidem Nono Calend. Martias ante lucem fuit, ego & reliqui fratres mei ecclesiæ Romanæ Cardinales, cum ei funus concelebrauissemus, in conclaue vnâ omnes secessimus: vbi sacris factis adhibitisq; precibus more institutoq; maiorum, omnibus ad vnum suffragijs ad diem quintum Idus Martias me in eius locum sublegerunt, Pontificemq; Max. declarauerunt. Cuius te rei certiozem facere volui, vt quoniam quo tempore in Cardinalium ordine versatus sum, te amari semper equidem plurimum, planè scires atq; consideres, me in posterum etiam omnibus in rebus, quæ ad tuam dignitatem pertinebunt, propensum animum & paternam voluntatem allaturum. Dat. Idib. Martijs. M. D. XIII. Ante coronationem. Roma.

PETRO BIBIENÆ. 3

CVM

CUM ingenium, probitatem, moresq³ optimos, tum fidem & obseruantiam erga me tuam & iam inde à te sub maiorum meorum clientela susceptam, & post magna cum tua laude multis in rebus declaratam atq³ adhibitam qui ignoret, nosq³ cognouerit, esse neminem existimo. Sed quoniam inter reliqua tua in me Cardinalem periucunda perq³ grata officia ea mihi optatissima fuerunt, quæ apud Venetos, quorum præclara vrbs multos iam annos te continuit, plurima & maxima mihi atq³ meis præstitisti: nunc quidem, cum summi Dei largitate ac munere ad Petri nauis gubernacula regenda euocatus atq³ constitutus sum, virtutem & fidem eandem tuam, quas plurimi semper feceram, honestandas mihi esse atque ornandas putavi. Itaq³ internuntium te meum atq³ interpretem apud Leonardum Lauredanum Venetorum Principem remq³ istam publicam atq³ senatum facio: cui te muneri diligenter administrando, idoneum propter tuam prudentiam, propter verò consuetudinem multorum annorum, quam habes cum ista ciuitate, illi etiam Reipublicæ gratum & optatum magnopere confido fore. Dat. XVI. Cal. April. M. D. XIII. Ante coronationem. Roma.

LEONARDO LAVREDANO

VENETORVM PRINCIPI.

4

IVSSIMVS interpretem apud te remq³ pub. tuam esse nostrum Petrum Bibienam cum prudentia & rerum gerendarum vsu praditum hominem, tum in primis nobis & probatum & gratum: scripsimusq³ ad illum ea de re. Quamobrem abs te petimus, vt omnibus in rebus, quas is nostro nomine ad te perferet, eandem illi fidem

AA 4

habeas,

habeas, quam haberes nobis ipsis, si te coram alloqueremur. Dat. 16. Cal. Apr. 1513. Ante coronationem. Roma.

SIGISMUNDO POLO-

NIAE REGI.

INTELLEXI magna quidem cum molestia inter te atque Albertum Marchionem, ut appellant, Brandenburgensem societatis Marianorum Theutonicorum in Prussia magistrum, plurimas atque maximas iam inde à vestris maioribus ortas atque traditas dissensiones extitisse: eamque ob rem omnes homines, quibus vestra utriusque rationes atque causa cognita essent, magnopere vereri, ne post eum diem, qui dies erit pridie Id. Maias, magnum atque apertum bellum inter nos commouetur, maximisque cum gentium & populorum, qui vestro in imperio sunt, detrimentis atque cladibus, exerceatur: qui dies praestitutus à vobis fuit, quo die ille statueret utrum à te imperata faceret, an se in libertatem vendicaret. Itaque vel pro mea in omnem Christi populum cura et studio, vel maxime pro ea voluntate, quam quidem erga te beneuolam et propensam in primis habeo, grauiter tuli hoc ingressu atque initio mei Pontificatus certiore me fieri, noua iam iamque à vobis bella imminere, novos armorum motus, noua incendia excitari: cum illud in primis cupiam, eique rei omnem meam curam & cogitationem adhibendam statuerim, ut ea quae dudum succensa ardere adhuc flagrareque videntur, bella inimicitiaeque magnorum principum, modis omnibus restinguantur. Quod quidem Dei Opt. Max. auxilio, qui ad se tendentes, seque vnum respicientes conatus hominum consiliaque non deserit, breui fore confidebam. Quamobrem paterno te & amore

amore & studio esse hortandum putavi, vt cursum atq;
 impetū irarum tuarum tātisſper ſuſtineres, dum à me le-
 gatus ampliſſima cū poteſtate iſtuc venit: qui veſtris cau-
 ſis et controuerſiſ cognitis, quæ aqua ſint, amice ſtatuat,
 cōcordesq; vos, ſi fieri poteſt, & pacatos reddat. Decre-
 ui enim meos legatos magnos viros ad plurimas quam-
 primū nationes mittere. Vel tu, ſi id tibi erit antiquius,
 rem totam integrasq; parteis tuas Lateranenſi concilio
 iam incepto agi remittas atq; reiicias: à quo porrò ma-
 xime conuenit Regum & Ducum & magnorum prin-
 cipum contentiones controuerſiasq; terminari. Quod &
 nobis erit gratius, vt cauſa ipſa, cuius nōnullas ſæpius par-
 tes aliquot ante me Romani Pontifices recte vtrique ve-
 ſtrum conſulentes attigerunt, Roma per conciliū transi-
 gatur: & tibi certe cum ad rerum tuarum ſtatum ſecu-
 ritatemq; conducibilius, tum ad animi tui quietem &
 tranquillitatem longe aptius, non vnum modo Ro. Pon-
 tificem, ſed vnā cum ipſo etiam reliquos omnes vniuer-
 ſamq; Remp. veſtrarum litium, expoſtulationum, diſcor-
 diarum diſceptatricem extitiſſe: cum exiſtimandum ſit,
 q̄ totius Reip. oculis perſpecta decernantur, ea et rectiſi-
 me conſci, & firma atq; ſolida plane fore. Iniquum eſt
 etiam et proſecto miſerum, optimas populoliſſimasq; na-
 tiones, quæ ad Chriſtiana ditionis atq; gloria terminos
 propagandos vel propter fortitudinē animorumq; robur
 omnium aptiſſimæ, vel propter locorum naturam oppor-
 tuniſſimæ videantur eſſe: ſuis inter ſe odijs conteri, ſuis i-
 pſarum ſimulatibus infringi & debilitari. Tum illud ve-
 hementer timeo, ne ſi vos magnos principes hoſtes perpe-
 tui noſtri Turcæ, quos habetis finitimos, conuerſis contra

vos armis concurrere male animatos senserint, magna ipsi ex ea re letitia voluptateq₃ percepta opperientes; dum vestris cladibus vires opesq₃ vestra fracta ac debilitata sint, vnanimis atq₃ integri vos adoriantur, & magno vestro cum malo, quod Deus omen obruat, Christiano nomini notam aliquam insignem atq₃ perpetuam inurant. Hoc cauere ipse, cui quidem vniuersi gregis mandata cura atq₂ sanatio est, maxime omnium debeo: & profecto cauebo, si te de me, deq₂ re Christiana publica bene merendi studium cogitatioq₃ excitabit: qua nulla esse regibus magis propria, nulla honestior ac plane laudabilior potest. Quod quidem te facturum tua virtute atq₂ prudentia fretus sanè confido. Atq₃ id quo lubentius facias, scire te volo eadem me de re ad Albertum literas daturum, ab eoq₂ postulaturum, vt se contineat. Verum quo tu propter Regiam dignitatem atq₃ amplitudinem apud omnes homines maior excelsiorq₃ es, eo te cupimus priorem facilioremq₃ meis hortatibus praesto esse. Quanto enim te ipse leniorem & placabiliorem mihi & Reip. praestiteris, tanto se Deus omnibus tuis aggrediendis tractandisq₂ rebus magis beneuolus atq₃ propitius adiunget. Dat. 15. Cal. April. M. D. XIII. Ante coronationem. Roma.

EPISCOPO ESERMIAE DESIG.

IULII PONT. MAX. APVD VENETOS internuntio.

6

NE ad te de eo, quod Pontifex Max. factus sum, more maiorum scriberem, nuntij, qui de tua morte ad me allati sunt, sanè fecerunt: quos fuisse falsos, lator, deq₂ incolumitate tua voluptatem magnam capio. Qua
scribis

scribis de tui gaudij magnitudine, deq³ istius vrbis letitia ex summo pontificatu meo percepta, ea nobis gratissima fuerunt: itaq³ fore pro tua in nos obseruantia, proq³ eo amore & charitate, quibus semper erga illam Remp. fuimus, certum exploratumq³ habebamus. Reliquas de quibus scribis, res in tuum aduentum reuicimus. Poteris autem, quoniam audita morte tua Petrum Bibicnā veterem clientem et familiarem meum apud istam Remp. meum internuntium esse volui, ad urbem atq³ ad me duce isto & Senatu salutato redire. Datum 15. Cal. April. M. D. XIII. Ante coronationem. Roma.

RAIMUNDO CARDONAE

PROREGI, RELIQUISQVE MAGISTRATIBUS regni Neapolitani.

7

CERTIORES facti sumus Selinum Maumethem Turcarum regem classē validam & terrestres copias permagnas, quibus transmisit Rhodum insulam innadat, summa diligentia comparare: praemississe etiam iam nunc naues longas, quas habebat paratas, ad tentandos eius insulae aditus, portusq³ idoneos capiendos: vt bellum ex sententia conficere facilius atq³ celerius possit. Quibus rebus cum in tempore occurrere, & societatis Hierosolymitanae de re Romana deq³ Christiana vniuersa optime merita consulere incolumitati magnopere statuerim, te magistratusq³ istius regni omnes diligentissime hortor, vt Guidonis eius societatis magistri, & Ludouici Galliae Cisalpinae Prioris eiusdem societatis promagistri, & Fabritij Legati procuratoribus commzatum omnis generis, armamenta, reliquasq³ res ad munitiōnem & tutelam eius insulae opportunas atque idoneas vestris

vestris ex locis exportare libere permittatis: auxilio etiam, si opus erit, vestro ac diligentia ipsos ad ea quæ volent transportanda iuuetis: vt citius comparare se ad propulsandum bellum possint. Datum 11. Cal. April. M. D. XIII. Anno primo. Roma.

D V C I E T D E C V R I O N I -
B V S G E N V A E. 8

MAGNOPERE vos hortor: vt Hierosolymitanis militibus, qui duas naues ad bellum idoneas comparandi causa istuc veniunt, omnem vestram operā, curam, studium, auxilium prabeatis, vt celeriter eas naues cōemere, atq; omnibus & ad nauigandum & ad bellum gerendū opportunis rebus ornare atq; instruere possint, seq; ijs insulamq; Rhodum tueri: quam ad opprimendā Turcarum Rex ingentem classem atq; exercitum comparat. Quod quidem eo etiā diligentius facio, vt vos commoneā, quod cognoui fœdere vos atq; sanctionibus inter illam societatem ciuitatemq; vestrā interpositis ad id teneri. Quamquam quidem, quæ rei magnitudo atq; periculum est, ac certe vestra in me obseruantia, planè confido etiam sine vllis fœderibus sponte vos ac libere nobis id petentib; tributuros. Dat. 11. Cal. April. M. D. XIII. Anno 1. Roma.

PROSPERO COLUMNAE. 9

QVOD antea tuo nomine fecerat Fabritius Columna frater tuus, vt mihi, q̄ Pontifex Max. declaratus essem, gratularetur, te etiam per literas fecisse, animiq; tui lætitiā ostendere cumulate voluisse, mihi certe gratissimum fuit: qui & te amaui, & virtutem tuam feci semper plurimi: quæ quidem te in primis virtus clarum apud omnes homines facit. Itaq; istam tuā in me obseruantia
reperi-

repetitā testificationem lato animo accipio. Quod autem scribis te nobis præstò semper futurum, offersq; mihi te amantissimis verbis, velim sic existimes, mihi te & fuisse antea omni tempore charissimum, et nunc ista tua in nos voluntate cogita esse etiā chariorem. Potes igitur, vel debes potius confidere, q̄ ad tuam dignitatem conseruandam augendamq; pertinebunt, ea tibi à me pro mea in te voluntate, proq; mei muneris ratione semper fore paratissima. Dat. 8. Cal. April. M.D.XIII. Anno 1. Roma.

PROLEGATO PICENI. 10

RENVTIATVM mihi est, Efinos his proxime præteritis interregni diebus cōtra bonos mores, contraq; iudicia à fratribus meis Bernardino sanctæ Crucis et Antonio sancti Vitalis Cardinalibus facta atq; à Rom. Pontifice comprobata, armatos in agrum Anconitanum hostiliter irruisse, crassatosq; quandiu libuit domum reuertisse: Anconitanos autem & ipsos arma sumpsisse, seq; vlcisci, controuersiasq; cum Efinis suas ferro decernere tentauisse. Quarum rerum indignitatem pro huius imperij maiestate grauitè, vt debui, tuli. Mando igitur tibi, vt magistratui & 10. ciuibus Esina vrbs abs te appellandis denunties, ad nos se vt conferant: Anconis item sex, quos voles, ciuibus imperes vt idem faciant, die vtrisque præstituta ad nos veniendi, ac pœna, quanta tibi videbitur, committenda, si non venerint. Dat. 8. Cal. April. M. D. XIII. Anno primo. Roma.

PAVLO CAPELLO

V E N E T O.

II

ET si etiam sine tuis literis me ad summum pontificatum Dei Opt. Max. aura prouectū esse te magnopere letari,

latari, pro tua in me vetere beneuolentia facile existi-
mare potuissem: tua tamen per literas ea de re volupta-
tis abs te percepta tam illustris significatio mihi gratissi-
ma iucundissimaq³ sanè fuit. Et amaui enim te omni
tempore, dum Cardinalem gessi, & abs te amari volui:
tuq³ omnibus in me studys atq³ officijs functus es et opti-
mi amicissimiq³ hominis, & grati viri. Illud etiam per-
gratum nobis accidit, quod scribis ciuitatem istam ve-
stram & Senatum eum nuntium hilari animo priuatim
publiceq³ accepisse. In quo cum ipsi illud egeritis, vt no-
stro erga vos beneuolo atq³ propenso animo pares officiũ
ac pietatis partes attulisse videamini, nos id curabimus,
quoad Romanæ rei dignitas rationesq³ patientur, vt nec
frustra nec immeritò nos ad nostri Pontificatus nuntium
gausos fuisse perpetuo cognoscatis. Dat. 7. Cal. April.
Anno primo. Roma.

GVIDONI MAGNO MAGI-
STRO, ET CONVENTUI
RHODIO. 12

AD diem nonum Cal. Marty Iulio secundo Pontifi-
ce Max. cœlestibus restituto, quam quidem ille migra-
tionem omnibus sancte obeundi muneribus perfunctus
placide atq³ constanter pertulit, fratres mei Ecclesiæ Ro-
manæ Cardinales, quorum ipse in collegio tunc eum ma-
gistratum exercebam, cunctis suffragys demortui mihi
locum atq³ munus detulerunt, Pontificemq³ maximum
fecerunt. Quæ de re dandas ad vos esse literas duxi, non
solum vt de mea declaratione certiores ipse vos face-
rem, sed etiam vel maxime vt illud sciretis, me pro anti-
quo perpetuoq³ vestro in re Christiana conseruanda stu-
dio

deo diligentia laboribus atq; in Romanos Pontif. pietate & fide vobis ordinig; vestro nulla in re, que ad vestram incolumitatem dignitatemq; pertineat, defuturum. Caterum ex ijs literis, quas Iulio Pontif. Max. 4. Non. Febr. dedistis, ea, quae Selinus Turcarum rex contra vos insulamq; vestram cogitet, facile cognosci, quantumq; iam longarum nauium, quantum militum habeat in vicinis vobis portubus & locis. Quam quidem vt debui rem grauitur molesteg; tuli. Itaq; cum vestra postulata mihi maxime probarentur, omnibus vestra societatis militibus, qui Rhodi non essent, imperaui, vt ante Cal. Mai. vel ad summum ante Id. Maias se ad vos conferant. Omnes etiam Christianos homines aliquid hoc in bello muneris vobis defendendis hostibusq; vestris propulsandis obeuntes omni animorum contracta labe purgauimus, literasq; ea de re dedimus cōceptis verbis: quos quidem fore permultos, expectationemq; hominum longe superaturos puto. Legatum praterea vestrum cum duabus nauibus magnis commeatu, armamentis, rebus bellicis omnibus, et bono in primis milite optime instructis ad vos propediem transmittam. Hortor aut vos, vt forti atq; inuictō animo huius belli rationē administretis, memineritisq; quantam quamq; veram gloriam maiores vestri Rhodo insula ab exercitibus classibusq; Sultani huius Selini aui defensa sint consequuti. Quo in bello quoniam pietatem, quoniā Christi rem, quoniam Dei Opt. Max. causam defenditis, sperandū certe est, omnia vobis prospere atq; feliciter euētura. De me verō ita vobis ipsi pollicemini, vel potius plane recipite, pro istius insula vestraq; societatis defensione me omnes meas vires, opes, omnium

omnium studia prompturum, in vnumq³ collaturum. Extremum illud est, vt me de rebus singulis, quæ istic agantur, certio rem quam creberrime quamq³ diligentissime faciat. Dat. 7. Calen. April. M. D. XIII. Anno primo. Roma.

THOMAE CAMPEGIO

EPISC. FELTRINORVM DESIG.

internuntio apud Ducem Mediolanensem.

ET magna nobis beneuolentia Cardinalem gerentibus cum Palauicinorum familia intercessit: & nunc Dei benignitate ac munere ampliori loco positi eius ipsius gentis erga nos Romanosq³ pontifices egregia promerita memoria repetentes, illud in primis magnopere confidimus, ad nostrorum oppidorum Parmæ Placentiaq³ conseruationem & incolumitatem eam familiam magno esse vsui semper posse, magnoq³ ea de causa eius familiae fidem & diligentiam nobis aduumento futuras. Itaq³ Galeatium Palauicinum in nostris nobis militibus placet esse, & cataphractis equitibus centum præesse: eiq³ ea stipendia dari volumus, quibus eum militum numerum alat, quæ dari nostris totidem equitum præfectis consueuerunt. Quos quidem centum equites celeriter ab illo confici magnopore cupio: vt minus moræ sit, dum se vtiliter gerere, nobisq³ præstare esse possit. Hanc tu illi rem significabis meis verbis: quemadmodum etiam Iulius Medices Archiepiscopus Florentinorum designatus & Bernardus Bibiena Quaestor noster his de rebus diligentius ad te perscribent. Dat. 4. Cal. April. M. D. XIII. Anno primo. Roma.

MARCO

ET animi tui præstantiam & fidem erga me Romanosq; Pontifices tuam, omnibus in rebus facile cognoui. Itaq; te de altera facio equidem plurimi, virtusq; tua nobis antea probata & cognita eo nunc & optatior est & iucundior, quo ad voluntatem illam meā, quam tibi dudum perspectam esse non dubito, amplificandi dignitatem tuam, Deus Opt. Max. etiam facultatem adiunxit. De altera nihil miror, qui antehac & huius rei publicæ maiestatem omni semper studio ac pietate fueris prosequutus, & nos amaueris, eandem te habere nunc, vel etiam propensiores in utrosq; voluntatem: cum & tui amantes nos ampliori loco positos, et illam ad hominis tibi amicissimi curam, & procurationē videas peruenisse. Ceterum de militum numero in ista vrbe nobis charissima retinendo, reliquisq; de rebus, quæ scribis: ea nobis omnia valde probantur. Iis de rebus quoniam literas ad Episcopū Polæ Bononiæ magistratū dedi: eas ad literas te remitto: ex quibus ea, quæ per vos curari atq; administrari volumus, perspicias. Dat. V. Calend. April. CIO. IO. XIII. Anno primo. Roma.

RAIMUNDO CARDONAE

Proregi Neapolis.

15

INTELLEXIMVS oppidum nostrum Regium Lepidi de re Romana optime meritū propter plurimas grauissimasq; ea in vrbe atq; agro multorū exercitiū moras, quas aliquot annos pertulit ita fessum laboribus, ita iam exhaustum impensis ac prope consumptum esse: tuos vt milites, quos Regij & in Regiensi habes, a-

B lere

lere ulterius non queat. Quamobrem ego? Qui eam civitatem valde diligo, incolumemque esse, quanquam hoc quidem fieri iam vix potest, maxime cupio: te etiā atq; etiam hortor, vt ad tua erga nos nondum hoc loci postos plurima illustra^q, promerita hoc etiam adiungas: quod quidem nobis erit maximum atque luculentissimū vt ex eo oppido atq; agro tuos milites deducas: ne Regienses pro suo erga nos studio vltima se damna pati sentiant: difficilimoque tempore suis precibus apud me nullum esse locum conquerantur. Id tu si feceris, tam nobis erit gratum, quā sit antundem atque etiam eo amplius oneris Romæ ipsi detraxisses. Dat. tertio Cal. April. M. D. XIII. Anno primo Roma.

MAGISTRATIBVS RE-

gij Lepidi.

16

ET fides ergo Romanos Pontifices, & pietas erga nos vestra, quas quidem multis in rebus perspeximus, nobis gratissima iucundissima^q, ceciderunt. Itaq; scire vos volumus, istam nobis civitatem vosq; singulos plane charissimos esse: incolumitatemq; vestrā, & fortunas omneis eò à me studio defensum iri, vt vos vestri officij nunquam pœniteat. Quod cum faciam, ad eam procurationem, quam præstare omnibus ijs, qui ad huius rei pub. fidem se contulerunt, eiúsque sub tutela sunt, pro cura magistratus mei magnopere debeo, propriam etiam voluntatem erga vos amorēque præcipuum & germanum adiungam. Quod attinet ad Neapolis proregis milites à vestra vrbe vestroque agro deducendos, scripsimus ad illum hac de re diligenter: confidōque vos ea, quæ vultis, consequuturos. Prid. Cal. April. An. i. Ro.

ANTO-

EPISTOL. LIB. I.
ANTONIO CARDONAE

Marchioni Padulæ.

79

17

PROCVRATORES Regiensium, quorum ciuitatem optime de rep. esse promeritā omnes homines intelligunt, apud me conquesti sunt, propterea quod annos alii quot plurimorum exercituum, & impressiones exceperunt & moras pertulerunt, ita se nunc attritos, ita plane confectos esse, ut Proregis Neapolitani milites ferre alereque nullo modo possint. Itaque à me precibus omnibus orantes obsecrantesque contenderunt, ne pro suis erga nos fidei, obseruantia, studiorum, laborum meritis damna ultima perpeterentur dare operam, eam urbem atque agrum uti Prorex suis militibus subleuaret. Id ille nisi faceret, quo pacto quaque via tantum ipsi oneris sustinere, tantum perferre calamitatis possent, plane affirmarunt se nescire. Eas ego preces, ut debebam, pro cura pontificatus mei proque mea in illos charitate neque inanes esse neque irritas cum magnopere cupere, acquisitima. n. postulabant, literas ad Proregem dedi ea de re quam potui studiosiores & diligentiores. Quam quidem tametsi confido, quemadmodum saepe mihi alias, dum Cardinalem gerere, plurimis maximisque in rebus satisfecit, ita nunc etiam pro sua in me obseruantia facile, qua volo, esse facturum: cupio tamen, magnopereque abs te peto, ut rem apud illum iuues tuamque illa mirifica prudentia incredibilique lenitate, quibus quidem virtutibus magnopere abundas, hac in re sic utare, ut quae ipsum per se facturum puto, te hortatore libentius atque celerius faciat: praedemque te illi des, in ab eo si consequemur, permagni nos eam rem beneficii loco esse habituros. Tibi quidem certe tantum debebo

B 2 ut ad

vt ad meum pristinum erga te amorē necessitudinemq;
nostram magnus cumulus sit accessurus. Dat. Prid. Cal.
April. M. D. XIII. Anno primo. Roma.

IULIANO MEDICI

Fratri Florentiam,

18

EX tuis literis intellexi, te à legato istius Reip. atq;
tuo, qui apud Ludouicum Regem Gallorum est, certio-
rem esse factum, de summi pontificis munere mihi cre-
dito Regem illum magnā letitiam cepisse: deq; me mul-
ta grauissimis amantissimisq; verbis fuisse loquutum.
Quaq; idem Rex de te cum illo egerit summa cum tua
dignitate & illustri testificatione amoris erga te sui,
quantumq; tibi tribuerit, libentissime cognoui. Iucunda
etiam mihi fuit voluntas, quā prae te fers, gratum te ei
atq; memorem illius in te beneuolentiae ostendendi: ra-
tionesq; tuae, quibus me de tractanda pace vti cogitem
hortaris, multae illae quidem prudenterq; collectae, mihi
magnopere probantur. Quibus de rebus omnibus hoc te
primum scire volo nullam me ad rem tā prouum tamq;
propensum esse, quā ad omniū Christianorū principū
animos sanctissimis concordiae vinctis colligandos inter
seq; cōglutinandos, nihil plane tam cupere, quā pacē.
Quā quidem si pacem omni tempore humelioriq; in for-
tuna summopere cōcupiui, cuius tu mea voluntatis opti-
mus atq; locupletissimus esse testis potes, certe nūc Pon-
tifex maximus, cum Christi vicariū gero, qui pacis fons
atq; autor pacē hominibus diligentissime cōmendauit,
multo magis eam velle, multo curare impensius debeo.
Neq; mea ē memoria excidit, quantum Rex te amaue-
rit, cū in Galliam turbulentis illis nostris temporibus te

con-

contulisses, quòue loco apud se habuerit: quanta semper etiā in Gallorum reges cū patriā, tum familia in primis nostrā obseruātia exstiterit: in qua manere te, modo cū dignitate fiat, nō solum volumus, sed etiā optamus. Eorundem Regū quanta fuerint in rem Romanā merita, quanta huius ipsius, non sum oblitus. Ipse quoq³, si per illum non steterit, omnia ei paterna officia ita sum praestaturus, vt quae tu, quae familia nostra reliqua illi debet, etiā persolvere videamur voluisse. Quod si, vt scribis, eius animus ea quae recta sunt cogitat, facile et ipsi inter nos conueniemus, & tu, quae vis hac in re quaq³ optas, assequere: tuamq³ apud me autoritatē, tuas cohortationes plurimū valuisse cognosces. Vnum illud cogitare te est aequissimum: vt quoniā rex te internuncio vti apud nos voluit, non tu illum minus ad bene de nobis merendum tuis literis excites, quā me ad illum amantiſſime complectendum es cohortatus. Extremū est, de quo te regē certiorē facere plane volo, vt intelligas me daturū operā, vt illum de pontificatu meo gauisum fuisse, nunquā poeniteat: praesertim si aequas atq³ honestas, hoc est cum huius reip. maiestate coniunctas pacis condiciones proponet. Dat. prid. Cal. April. M. D. XIII. An. primo Ro.

ANTONIO CARDONAE

Marchioni Padulae.

19

TV I praesentis ijs tractandis rebus, quae ad te magna ex parte pertinent, valde egeo. Itaq³ te hortor, quod bona cū venia Proregis Neapolitani fieri possit, ad nos venias. Dat. Cal. April. M. D. XIII. Anno primo. Roma.

RAIMUNDO CARDONAE

Proregi Neapolis.

20

B 3

Quo-

QVONIAM cum Antonio Marchione, sic enim appellant, Padula quædam nobis tractanda sunt rationem stipendiorū & conditiones ab eo cum Florentinis ineundas firmandasq; spectantia, te hortamur, quatenus sine tuo incommodo fiat ei permittas, vt ad nos se conferat. Dat. Cal. Apr. M. D. XIII. An. primo Roma.

VLADISLAO PANNONIAE

Boemiæq; Regi.

21

NVNTIATVM nobis est, certos Boëmorum militum duces magnis pollicitationibus per fautores scismatis excitatos bellum cogitare: quo bello scismaticis auxilio sint, cumque ijs coniuncti populos recte sentientes, quiq; nobis parent, aggrediantur, remq; Christianam exagitent atq; perturbent. Id ipse agre molesteq; ferens, qui quidem à Deo vocatus, vt Christi vicarium geram, Christiani gregis incolumitati salutique consulere in primis debeo, magnopere te hortor, abs te que amanter ac vere paterne peto, vt eos Boëmorum motus comprimas, ardoremque animorum malis artibus sollicitatū restringas, ducesq; illos in officio contineas. Nā si se scismaticis adiunxerint, præterquam quod pœnam à Iulio secundo Pont. max. scismaticis constitutam ipsi committent, ego etiam pro mei officij ratione, quin eos sacris interdiciam, pœnisq; grauissimis dedam, facere nō potero. Erit itaq; optimum, ac propter tuā & eximiam in rebus omnibus prudentiā & perpetuā in Roma. Pont. pietatem expectatum abs te, vel plane etiam postulatū, & tum illis salutare, tum tibi ad laudem & gloriā amplissimum, des operam, vt Boëmis meliora cogitantibus facilius cōtra hostes Christiani nominis vestra arma cō-

uerit

ueriti possint. Id si feceris, cum nobis, qui propenso animo erga te atque beneuolo sumas rem gratissimam facies, omniaq; ad tuā dignitatem atq; amplitudinem ornandam nostra studia confirmabis: tum de hac Repub. cuius nomen regibus precipue sanctissimum debet esse, longēque commendatissimum, bene ampliterq; promerebere.

Dat. Cal. April. M. D. XIII. Anno primo. Roma.

SIGISMUNDO POLO-

niæ Regi.

22

POST eas literas, quas proxime ad te dedi, Maxilianus designatus Romanorum imperator mihi per literas & per legatū suum significauit, Regni sui ac totius Germania permagni interesse, ne Marianorum Theutonorum societas vlla in re vel armis vel etiā concordia nomine abs te laedatur. Itaq; à nobis petijt, quorū auctoritatē apud omnes nationes maximi fore non dubitabat, curaremus eam rem, utq; ea controuersia, quæ inter vos sunt, aut iudicarentur, aut certe suscinerentur, efficerentur. Quamobrē ego, qui antea illis tantummodo de causis, quas ad te perscripsi, vehementer optabā, ut vel meo Legato, quem istuc mittere decreui, vel sacro Lateranensi consilio, quod mihi magis probabatur, causam totā cognoscendam terminadāq; remitteres: nunc quidem, cum à Maximiliano certiores facti sumus ad se suūq; imperiū atq; ad omnes Germanos eas controuersias pertinere, petatq; à nobis ut pro nostra officij cura demus operā, ne quid ex ijs cōtrouersijs detrimenti Christiana Resp. capiat, te magis magisq; hortari et monere volui, abs teq; pro meo in te amore, proq; tua in eū quem gero Christi vicariū obseruantia iā & petere, &

liberius contendere, velis tuam causam, vt maiori cum dignitate transigatur, à Lateranensi consilio cognosci & terminari. Primū enim tua, deinde imperatoris totiusq; Germania demum etiā nostra maxime interest, quibus quidē ea societas præcipue subest, ei societati præiudiciū nō inferri vllō modo. Cogitare etiā illud debes, firmā quidem inter vos concordia rationē posse nullam inueniri, uellam esse pacē, nulla fœdera diutius perman- sura, quæ non in eorū omnium, quorū interest, consensu voluntateq; sanciantur. Id autem, nisi Romæ confici- tur, quo pacto fieri apte possit, plane non video. Quam- obrem si in eam cogitationem diligentius incubueris, vt des operam, ne frustra scripsisse, ac temere in nostris hortationibus spem hac vt volumus transigendi posuisse videamur: de ipsa certe Repub. deq; nobis bene te esse meritum, & ipse profitebor, & tu senties. Dat. Calend. April. M. D. XIII. Auno primo. Roma.

HENRICO REGI

Britanniæ.

23

ET sic ea, quæ de tua religione atq; in hanc Rempub. nosq; ipsos propensa præstantiq; voluntate, deq; tuis plurimis egregijsq; virtutibus Episcopus Vnigormiensis Legatus tuus quotidie cōmemorat, mihi per se gratissi- ma iucundissimaq; sunt: tamen illa ipsa gratiora etiā et iucundiora efficit eiusdem oratoris probitas, prudentia, virtus, atq; is, quo illum amplexus magnopere sum, a- mor charitasq; mea prope singularis. Itaq; cum de te ea, qua volo; quæq; de Rege præstātissimo magnaq; spei adolescente possunt dici, libenter ex audio: tum propte- rea, quod ab homine nobis amicissimo, & virtute prædi-
to tua

to tua virtutes predicantur, vberiore eares nostram
eam voluptatem facit. Spem enim capio fore, vt, quo-
niam, animi tui magnitudinem atq; praestantiam cum
egregia in Deum Opt. Max. pietate, in Romanos Pon-
tiffices obseruantia maxime coniunctam & consociatā
esse intelligo, & tu de tuis virtutibus vberrimos iucun-
dissimosq; fructus, & Christiana Resp. de te magnos pro-
uentus, egregia incrementa, illustres vtilitates sit per-
ceptura. Quam te cogitationē incumbere noctes atque
dies decet, vt in ista adolescentia florentiq; tua aetate
ea fundamenta iacias virtutis & probitatis tuae, quibus
reliqua aetas omnis egregie praeclareq; nitatur. Quod e-
rit, si in huius pontificatus obseruantia non modo perma-
nebis, sed etiā in dies singulos magis magisq; te accen-
des ad eius dignitatē maiestatē gloriā tūendam, & au-
gendam. Id cū vt spero, ipse feceris, curabo profecto ego
enitarq; vt ea tibi à me ornamenta proficiantur, qui-
bus latari facile possis te eiusmodi cogitationes suscepisse.
Hac autē, atq; his lōge plura, de q; mea nō solum spe,
sed etiā erga te mente, quanquā multa cum oratore
tuo egerim, in meas tamen etiā ad te literas partim eo-
rum aliquā facile conieci, vt ibi ipse omnia de me pater-
na officia polliceri vberius, & cumulatius posses. Reliquū
est, vt intelligas, eundem ipsum oratorem tuum, quem tū
etiā, cum fortuna leuiore nitebamur, vnice semper dile-
ximus, nunc, quia is egregiā tibi singularemq; operam
praestat, à nobis etiā impensus amari. Eius enim & pru-
dentiam atq; agendis rebus probitatem cognitā perspe-
ctamq; habuimus iam inde ab illis temporibus, cū is viri
clarissimi patris tui istiusq; regni res negatioq; procu-
rabat

rabat summa atque mirifica diligētia: & postea ex aduersis eius turbulentisque rebus, quæ sunt illa tempora consecuta, magnam molestiam cepimus: ut q̄ hominis plane probi et nobis amicissimi agre molestē que tulimus illam calamitatem. Quas ob res atque causas omnis cū eum tibi esse charissimum existimem, illud magnopere cupio, ut mea commendatione tibi sit etiā charior, omnibus q̄ in rebus, quæ ad eius dignitatem pertinebunt, quibus in rebus ei asperare prouehere q̄ illum possit aura studij & fauoris tui, quæ quidem res erunt semper plurima atque maxima, & fidem illius erga te & meam in illum beneuolentiam charitatemq̄ recordere. Dat. 3. Non. April. M. D. XIII. Roma.

SACRIS VIRGINIBVS

muratarum Florentiæ.

24

NVMMOS aureos ducentos procuratori vestro curari iussi, munus quidem pro mea in vos voluntate sane pusillum: sed hoc leuius initium meā erga vos liberalitatē promendi vberiores in dies largitiones consequentur. Vos tantū & hortor singulas, et amanter ac paterne rogo, Deo opt. max. beatissimāq̄ matri semper virgini, quibus quidam vestras preces esse gratas, et probatas puto eo nomine gratias agatis, quod me nihil omnino de sese meritum sui vicariū filij gerere in terris voluerunt, atq̄ in huius pontificatus tam illustri fastigio collocauerunt. Qua quidem in statione atque munere me ut exultent ad ea & cogitanda, & procuranda, quæ sua maxime voluntati consentanea sciunt esse, ut ab ijs suppliciter petatis, ego à vobis diligenter peto, & postulo. Dat. 3. No. April. M. D. XIII. Anno primo. Roma.

RAI-

EPISTOL. LIB. I.
RAIMVND O CARDONAE

27

Proregi Neapolis.

25

GAL EATIV M, Antonũ Mariam, Octavianũ, & Christophorum fratres Marchiones Palauicinos, quorũ egregiam erga Romanos Pontifices fidem, & obseruatiam plurimis in rebus perspexi, tibi magnopere commendando: hortorq; te, vt omnibus in rebus, quæ quidem ad dignitatem eorum commendaq; pertineant, eos eorumq; necessarios tue are: cogitesq; si vniuersam illam familiam charissimã habueris, teque illi commodum beneuolumq; prabueris, te mihi rem gratissimã esse facturum. Dat. 3. Non. April. M. D. X I I I. An. primo. Roma.

MAXIMILIANO MARIAE.

Mediolanenſium Duci.

26

ET antehac Galeatij, Antonij Mariae, Octavianij fratrum Marchionum Palauicinorum, vniuersaq; eorum familia in hanc Rempub. pietas perspecta et cognita nobis fuerat, cum in Cardinalium collegio versaremur: et nunc plane illam illustriorem fecit Christophorus eorũ frater: qui accepto de Pontificatu nostro nuncio ad nos se contulit: ostenditq; quanti nos faceret multis amantissimisq; verbis. Itaq; eos ipsos, necessariosq; eorũ omnes summo opere diligimus, charissimosq; habemus, & certe sumus habituri. Hac ideo scire te volui, vt tametsi considerem vel propter familiae splendorem, vel per sese charos tibi eos fratres esse, haberes tamen ipsos multo etiam meo nomine chariores, omnib;que eorum in rebus amoris erga illos meo tantum tribueres, quantum pro ea, quæ te amplector, charitate ij, qui mihi sunt charissimi, expectare à te non temere possunt. Itaque eos
tibi

tibi omnes commendo maiorem in modum: vt q₃ ipsos
mea causa perhumaniter amplectare, plane abs te peto.
Erit id mihi sane gratissimum. Dat. tertio Non. April.
M. D. XIII. Anno primo. Roma.

Ferdinando Hispaniæ Regi.

27

PRAETER eam, quam tu quidem omni tempore
Romanæ Reip. fidem pietatemq₃ præstitisti, pro cuius au-
toritate maiestatiq₃ defendēda plurimas grauißimasq₃
contentiones non es veritus subire atq₃ suscipere: præ-
terq₃ illam singularem beneuolentiā, qua nos à mea, fa-
miliā vero nostrā ab ineunte tua ætate es prosequutus:
ea etiam res non delectat, quod qui me leuioribus in for-
tunis degentem semper iuisti, maioremq₃ esse voluisti,
eundem te nunc, cum quidem hoc in statu & dignitate
summi Pontificatus Dei Opt. Max. clementia nos collo-
carit, libentiori animo confidimus omnia curaturū, quæ
ad nostram cum huius imperij maiestate consociatā di-
gnitatē tuendam amplificandamq₃ pertinebunt. Itaq₃
inter alia, quæ mihi quidem pro mea pietate voluptati
atq₃ lætitiæ sunt, tuū & in Romanos Pontifices animū,
& in me amorē in primis pono. Sed & hæc, & alia plu-
ra cum Hieronymo Vicco Legato tuo homine singulari
prudētia prædito nobisq₃ gratissimo communicauimus,
qui ad te omnia diligenter perscribet. Ea tu intelliges:
& abisq₃ operam, vt quæ ad Petri nauis tranquillum pro-
sperumq₃ cursum pertinent, ita cogites, vt tuam veterē
in Christi vicarios pietatem nobis in puppi sedentibus e-
tiam auxisse videare. Ego certe nulla in re dignitati,
amplitudini, gloriaq₃ tua deero. Dat. prid. Non. April.
M. D. XIII. Anno primo. Roma.

Ber-

EPISTOL. LIB. I. 29
BERNARDINO SEVERINI

Bissinianorum Principi. 28

QVAM mihi tuo nomine reddidit Manna pixidem
miles Hierosolimitanus Vincentius, ea sanè munus qui-
dem & per se elegans, & mihi gratum fuit Vincentiū
etiam, vt veterem familiarem meum, quemq; inprimis
diligō, & vidi ipsum libenter, & quæ abs te attulit co-
gnoui diligenter. Quibus in rebus ab eo meum consiliū
intelliges. Dat. 8. Id. April. M. D. XIII. Anno. 1. Roma.

IOANNI BOIARDO

Regiensi. 29

EA quæ tu his diebus proximis & amanter, & forti
magnoq; animo egisti ista in ciuitate mihi charissima,
deq; me optime merita in officio retinenda, mihi sanè
gratissima ceciderunt. Itaq; te de hac tuâ tã præstanti
voluntate vehementer laudo, fidemq; & probitatē tuā
facio plurimi: scireq; te volo, tuam mihi rem, dignitatē
familiam, tuos omnes magna cura et esse nunc, & sem-
per fore. Modo tu, quod reliquum est, eundem te in po-
sterum, qui quidem adhuc fuisti, tuūq; similem & ger-
manum præsta. Porro beneficium optime te posuisse co-
gnosces. Dat. VII. Id. April. Anno primo. Roma.

THOMAE CAMPEGIO FELTRI-

morum episcopo, & Cornelio Galanti
meis apud Ducem Mediolanen-
sium internuntijs. 30

MANDAVI Bernardo Bibiena Quæstori meo,
scriberet ad vos ea, quæ scribenda erant hoc tempore:
& erant illa quidem non minimi ponderis. Quamobrē
eius literis fidem omnem habebitis: quæq; volo per vos
fieri

fieri, sic ea conficietis, vt de vestra diligentia & studio
vos & laudandos & ornandos putem. Dat. VI. Id.
April. M. D. XIII. Anno primo. Roma.

PETRI BEMBI EPI
STOLARVM LEONIS
DECIMI PONT. MAX.
Nomine scriptarum.

LIBER SECVNDVS.

PETRO BIBIENAE NO-
stro apud Venetos internuntio.



ALLATVM ad nos est, Senatū istum
Venetum remq₃ public. cum Ludouico
Gallorum Rege fœdus percussisse, pa-
ctionesq₃ inter se atq₃ illum firmanis-
se. Ea de re quoniam neque ab Legato
Veneto neque abs te verbum vllum: esse autē ita de ista
Rep. meriti videbamur, vt celari ab illa tantis de rebus
non debuissimus: vera esse qua feruntur non existimo.
Quia verò à multis magnis illis quidem & probandis
aut oribus nuntiantur, nullam illis fidem adhibere plane
non queo. Itaque, quoniam res est eiusmodi, vt maxima
momēta videatur habitura, maximasq₃ & periculosissi-
mas rerū conuersiones allatura, has ad te litteras per
meū tabellariū magnis itineribus perferri volui: tibiq₃
mando, vt ab isto Senatu, in cuius quidem & erga Ro-
manam Remp. illustri obseruantia, & erga me spectato
perueteriq₃ amore multū confido, cures ea te de re fieri
quàm diligentissime certiorē: ipsumq₃ horteris ad om-

nes suas cogitationes nobiscum communicandas. Esse enim illi exploratissimū debet, suam sibi incolumitatē dignitatē prope nō maiori curæ esse, quā sint mihi. Quibus de rebus omnibus per eundē tabellariū ad me rescribes, quæ cognoueris: dabisq; operam, ut is ad nos quāmo-
ocissime reuertatur. Dat. quinto Id. April. M. D. XIII. Anno primo. Roma.

GVIDONI MAGNO MAGI-

stro & conuenrui Rhodio.

2

VINCENTIVM equitem Hierosolimitanum veterem familiarem meum vnice diligo: eius etiam, & opera & fide, & vtor multis in rebus hoc tempore, & vti in posterum cogito. Itaque esse illum iussi apud me. Qua de re certiores vos fieri volui, ut, si is cum reliquis vestrae societatis militibus, qui quidem ad defendendam Rhodum praesto vobis esse compelluntur, non erit, culpam in ipsum ne vertatis, neue poenis in illos à vobis constitutis, qui edictis vestris non paruerint, eum multandum statuatis, sed potius vti mea causa manere hic iusso a quos vos illi atque beneuolos praebeatis. Erit id nobis gratum. Dat. quarto Id. April. M. D. XIII. Anno primo. Roma.

RAPHAELLO BESALV ET

socijs apud Venetos Mercatoribus.

3

MANDO vobis, ut omnem pecunia summam quā habetis ex rationibus Michaëlis episcopi Menopolitani, eam Petro Bibiena internuntio meo quāprinimum cur-
retis. Dat. 3. Id. April. M. D. XIII. Anno primo. Roma.

ANTONIO MARIAE

Marchioni Palauicino.

4

TVAM

TVAM quidem & fratrum tuorum atq; vniuersa prope familia gentisq; vestra in summos Pont. fidem & pietatē, multis illam quidem in rebus mihi antea plane cognitam, nuper ex oratione Christophori fratris tui etiam libenter agnoui. Amorem autē & beneuolentiam officiaq; vestra, quæ quidem in me nondum Pontificem max. multa et præclara contulistis, non tã ex ipsius verbis, parce enim et pudenter eam rem attigit, quàm meo more illum intuens sum recordatus. Itaq; vos omnes, teq; in primis cū propter meas rationes, tum vestra ipsorum causa valde amo, habeo que charissimos. Tuã verò præcipue virtutem etiam ornare magnopere cupio. Itaq; cū primū se occasio dederit, vt militum res Romana indigeat, te vocabo, & in nostris exercitibus loco egregio habere, tuamque dignitatē amplificare in primis curabo, quanquàm etiam fratres tuos eo tempore inornatos non relinquam. Hanc meam voluntatē latere te volui, vt scires non solum amari te à me, sed etiã tuos omneis, teq; in primis magna mihi cura esse. Dat. tertio Id. April. M. D. X I I I. Anno primo. Roma.

Ioanni Paulo Balioni.

§

MITTIMVS Perusiam Mathæum familiarem, nostrum ad perquirendum Nicolaum Foroliuiensem, quē isthic latere certiores facti sumus, curandumq; vt is in custodia quàm primū fieri potest, habeatur. Quamobrem magnopere te hortor, pròque nostra dignitate etiam atq; etiam moneo, vt Mathæum cura, studio, fauore tuo iuues, omnib;que in rebus illi præsto sis, vt facilius atq; celerius, ea, quæ volumus, curare atque consicere possit. Dat. Prid. Id. April. Anno primo. Roma.

Frav

ET diligentia tua in nostris mandatis peragendis,
& Bretinori Decurionum alacritas & fides in illis ac-
cipiendis, mihi probatur. Quamobrem ad eas, quas ad
me dedisti literas ita tibi respondeo, vt si tibi à Bretino-
rianis satisfactum abunde est, culpamq; ab ijs ex eo tē-
pore, quo te Bretinorum misimus, abesse cognoscas, Pra-
fecto nostrorum militum, ipsisq; militibus mandes, vt
ad Bretinorum ne accedant, neue in agrum Bretino-
rianum impetum faciant: & si qui in eo nunc sunt, vt
inde quàmprimum decedant, eorumq; res intactas post
hac, atq; ipsos incolumes sinant esse. Id ni fecerint,
multam, quàm voles, eis statuendi tibi ius facultasq;
esto. Quod verò attinet ad priorem eorum in nos man-
dataq; nostra temeritatē, & arrogantiam, ea de re vo-
lumus, vt Episcopus Polæ Bononiæ magistratus iudicet,
condemnetq; illos, vt i sibi equū, & iustū videbitur. Ale-
xandrum autē, quem istic in custodia scribis esse, eidem
magistratui mittes, vt is de eo modis omnibus querere
possit, quæ sunt quærenda, & statuere, quæ statuenda
sunt. Quibus tu confectis rebus, & rectè vt volumus cō-
stitutis ad nos te referes. Dat. Id. April. M. D. X I I I.
Anno primo. Roma.

ALTOBELLO EPISCOPO

Polæ Bononiæ Magistratui.

7

DE Alexandrō Nauio, quem ad te in custodia mitti
iussi, diligenter abs te questionem haberi volo, ad veri-
tatem admissi facinoris inuestigandam: quo rectius qua
aqua sunt, decernere atq; statuere possis. Eius potestas
tibi fiet à Francisco Pulica internuntiō apud Bretino-

Ec Mand

rianos meo: ad quem literas dedi ea de re. Id tu pro tua diligentia curabis: meq³ facies de eo, quod egeris certior rem. Præterea quomā Nicolaū Foroliuiensem esse Perusia intellexi, isq³ se vnā cum Ioanne Paulo Balione, qui est propediem ad Venetorū castra profecturus, fortasse in viam dabit, vt se in tutū recipiat, iterq³ ista faciet: mando tibi, vt diligenter illum inuestigare ac perquiri cures. Qui si in illius comitatu erit, des operam, vt vel à Balione ipso tibi dedatur, vel à te intercipiatur. omnibusq³ modis caueas, ne elabi subterfugereq³ te possit. Caterū tua prudentia permitto, vt prioris Bretinorianorū in nos audacia & sceleris deipsis sumere pœnas possis. Aequū est autē, illud te prius diligenter inspicere, metūne illi nostrorū militū tuos admittere ad sese homines, tua facere mandata recusarint. Id si ita est, ignoscere te eis volo, nec seuerius quicquā in eos decernere. Sin aliter se res habet ex nostra dignitate negotiū administrabis, quemadmodum tibi æquū & iustum esse videbitur. Dat. Id. April. M. D. X I I I. Anno primo. Roma.

FRANCISCO MARIAE, VRBINATIUM Duci Urbis & Reipub.

militum Præfecto,

8

ET virtus & diligentia in regendis exercitibus tua, egregiaq³ in nos obseruantia, amor etiam erga familiā nostram tuus, qui profectō dum nos ipsi in collegio Cardinalium versaremur, omnibus in rebus semper enituit, nunc quidem, cum Dei Opt. Max. benignitate summus nobis Pontificatus creditus delatusq³ est, nos admonent, vt te ijs ornamentis afficiamus, quibus à nobis non præteritus hoc ingressu nostri muneris videri possis. Itaque nobis-

nobismet ipsi pollicentes, eundem tuum animū, eandem nobis fidem posthac non solum præstitum abs te, sed augmentum etiam & cumulatū iri, neq; modo adolescentiā, sed virtutes etiam tuas suū certe robur incrementūq; capturas, quo eras loco & statu apud Iulium patrum tuum, qui Pontifex Max. ante nos fuit, in eodem etiam apud nos esse te volumus, tibiq; imperium nostrorū exercituum, quo cum imperio nunc es, in annum quidem proximum certe, in alterum autem, quoad nobis libet extendimus & prorogamus, cum eadem, quam habes, turma ducentorum equitum cataphractorum, & levis armaturæ equitum centum, eodemq; ad eos alendos stipendio tibi solito dari nummū aureorum tricies mille, ad te verò ipsum decies & ter mille atq; octingentorum quadraginta quatuor. Quod quidem certe munus meæ in te benevolentia si vt libenti animo tibi à me defertur, ita tu eo munere gnaviter atq; strenuè fueris usus, quemadmodum planè confidimus te facturum, non vereor, ne ad veterem meum vere paternum in te amorem adiunctis in dies singulos recentibus tuis in reipub. meritis à nobis omnia sis impetraturus, quæ ad tua commoda, dignitatem, amplitudinem ab huius Pontificatus maiestate nō abhorrentia pertinebunt. Dat. XVI. Cal. Maias. M. D. XIII. Anno primo. Roma.

PETRO BIBIENAE

internuntiō.

36

SCRIPSIMVS de mense Martij Leonardō Landerdano Venetiarum principi, mandaret vt fructus ecclesiæ Adrianae, qui per ipsius ministros contra fas impediri dicebantur, Beltrandi Episcopi Adriæ procuratoribus

restituerentur. Id quoniā factum adhuc nō est: causam autem eius rei dicunt esse, quōd quibusdam sacris Virginibus Venetijs in Ferrariensi agro sui item fructus iniuste detinentur, mando tibi, vt eundem Leonardum horteris, quæ Episcopo Adriano cōtra ius detenta sunt, quoniam is nihil habet cū illis virginibus commune, ea reddi aliquando tandem eius procuratoribus imperet. Qui vero illarū virginū fructus à Ferrariensibus intercepti dicuntur esse, de ijs me confidat esse in petentibus administraturū. Dat. 12. Cal. Mai. M. D. XIII. Anno. 1. Roma.

OCTAVIANO EPISCOPO

Laudis Pompeiæ designato. IO

CVM pluribus te de causis alloqui magnopere cupiā valde te hortor, vt ad urbem venias vt possim corā tecū agere, quæ volo. Erit id mihi vehementer gratum. Dat. IX. Cal. Maias. M. D. XIII. Anno primo. Roma.

MAXIMILIANO MARIAE

Mediolanensium Duci. II

QVONIAM Octavianum Episcopum Laudis Pompeiæ Designatum pluribus de causis esse hic magnopere cupio, peto abs te vt illi ad nos vt veniat, non permittas solum, sed etiam suadeas: quem quidem sum, si venerit, amanter paterneq; suscepturus. Dat. IX. Cal. Maias. M. D. XIII. Anno primo. Roma.

Magistratibus Ariminensium. 12

MANDO vobis, vt Achillem Taurellium cum suis equitibus omnibus vestrum in agrum recipiatis, & quæ dari nostris militibus solita sunt, ei militibusq; eius dari iubeatis: neq; difficiles vos prabeatis ea in re, quemadmodum quidem mihi demonstratum est solere vos persape

sape facere. Id autem eo vobis erit leuius, quo isti ipsi paucos apud vos dies sint milites commoraturi. Dat. IX. Cal. Maias. Anno primo. Roma.

THOMAE EPISCOPO

Feltrinorum internuntio.

13

EXEMPLVM *literarū, quas ad Maximilianū Mariam Ducem Mediolanensium dedi de restituenda Marco Cardinali Senogallienſi oppidi Cugnoli possessione, habebis cum his literis. Tibi verò mando, vt cum ipso Duce agas curesq; diligenter eā rem, quā tu ijs ex literis velle me magnopere cognosces: vt Cardinalis ius suum obtineat: ne iam mihi sapius eadem de re sit scribendum. Dat. VI. Cal. Maias. Anno primo. Roma.*

ALFONSO ATESTINO

Ferrariensium Duci.

14

FRANCISCVM & Pasotum Fantutios *ciues Bononienses bene de nobis meritos captos à tuis ministris complures iam menses in custodia magistratus tui habent. Eos quoniam & amo ipsos & mihi admodum indecorum est meos homines honestos viros sic affectos & captos abs te detineri: constitutū mihi erat cum hic esses, te praesentem alloqui ac planè abs te petere, vt eos permitteres domū redire. Veruntamen id facere antequam ea, quam habes mecum, magni ponderis causa componeretur, haberetq; finem suum, sane nolebam: ne qua leuiora essent, grauioribus anteferrentur. Itaq; tu quia confecta nondum re Roma discedere voluisti. Fantutiorum liberationem etiam differre aliud in tempus statueram: & profecto distulissem, nisi, vt postea intellexi, tantula illis mora quorū mihi salus charissima de-*

bet esse, magnum esset detrimentum, magnam calamitatem allatura. Nam praterquam quod in custodia esse atq; in carcere per se miserum calamitosumq; est: permagni eorum interest ipsos hoc tempore cum domi esse posse, tum vel maxime ad nos accedere suarū fortunarum prope omnium constituendarum causa. Quamobrener rei eiusmodi tā per se pia, tam mihi debita, tam illi? salutaris confectio diutius proferatur, te iam nunc etiā atq; etiam hortor, vt eos missos facias, vt redire in patriā, atq; ad me venire possint. In eo tamet si boni principis munere eris ipse functus, qd per te facere semper debes, tuū tamentū facilem & liberalem, tū verò propensum ad bene de merendum animum etiam libenter agnoscam. Dat. quinto Cal. Maias. Anno primo. Roma.

FRANCISCO GONZAGAE

Marchioni Mantuæ.

15

INTELLEXIMVS de Alexandro Gabloneta procuratore tuo certiorē te esse factum, quosdam principes in Italia viros contra te cogitare, armaq; ab ijs comparari, quibus te ditionemq; tuam aggrediantur. Itaq; te precibus omnib. petere, ne tuos populos tuasq; fortunas vllorum hominū cupiditate atq; libidine turbare diuexariq; pateremur. Quas ad res ita illi respondimus, existimare nos neminē quidem in nostri Signiferi ditionem armis inuasurū, praesertim nobis charissimi, atq; in nostra beneuolentia tutelā & curā amantissime recepti. Veruntamen si quis erit tā à nobis alienus, in te vt sit atq; in tuos eiusmodi quidpiam moliturus, polliciti illi sumus, nos tibi praesto futuros, eiq; interminaturus, vt se contineat. Quod si ij nostri monitus atq; minae

nihil

nihil proderunt: exercitus ipsos nostros Franciscumque Mariam, Vrbinatiū Ducē, generū tuum cū imperio ad te defendendum, hostesq; tuos, quos esse nostros existimabimus, propulsandos & profligandos mittemus. Itaq; te volumus bono animo esse, atque existimare urbē istā nobis tuā tuosq; populos nō minori cura esse, quā quā vrbes quicq; populi sub nostra ipsorum ditione sunt: eandem vtrosq; fortunam, idem periculum subituros. Quā quidem omnia tametsi Alexandrā ipsum ad te scripsisse diligenter existimo: volui tamen nostris etiā literis ad te perferri: vt per me quoque de meo in te animo ac voluntate fieres certior. Dat. 3. Cal. Maias. anno 1. Roma.

S. DACIAE REGI.

16

PERLATVM est ad me, quod quidem mihi iacūdisimum fuit, magno te istarum nationū fauore incredibiliq; voluntate Regem Daciae salutatū, illustris viri patris tui loco bene atque laudabiliter regnare, adolescentiaq; tua annos egregia spe tuorū de te populorum firmare: itaq; eiusdem patris tui desiderium praesenti tua praestantiq; virtute facile leniri. Quā nos rē euentumq; tum fortuna tum prudentiae in primis tuae animi erga te nostri propensione sociantes, te paterna nostra charitate ac pietate amantissime complectimur: omniaq; tibi, quā quidem ad Regium honorem dignitatemq; tuā confirmandam augendamq; pertinebunt, quoad nostra rationes patientur, libentissime polliceor. Quoniā autē ea nostra mens est is animus, vt Christiani reges atq; Principes, qui dissentiunt inter se, concilientur, vt ad Christiani hostes nominis repellendos, suscipiendumq; contra Turcas bellū cōuertere cogitationes nostras possimus, &

Cc 4 hortor.

hortor, vt hanc nostram voluntatem iuues. Id optime fiet, si in Reges Christianos, quique sunt, tua arma non mouebis, tuasq; vires non exercebis. Quorum quidem quod vnus in primis Henricus Britannia Rex multis de causis mihi esse charissimus debet: illud abs te impensius peto & postulo, ne eum Regem eiusq; populos aut lacestas & perturbes ipse, aut id fieri permittas à tuis, hoc nobis gratius facere nihil potest. Dat. tertio Calend. Maias. M. D. XIII. Anno primo Roma.

HIPPOLYTO CARDINALI

Atestino.

17

EX tuis literis intellxi id, quod etiam sine ijs exploratum mihi erat, Pontificatus mei nuntio audito te magnam latitiam cepisse. Itaq; mihi ea de re officiosissime amantissimisq; verbis gratularis. Aegre fers etiam suffragiorum ferendorū tempore te non affuisse. Quae quidem mihi omnia optatissima legenti iucundissimaq; fuerunt: ex animo enim beneuolentissimo mihi dudum perspecto & cognito sanè proueniunt. Magnopere autem vellem eo te tempore Roma fuisse: rem enim nostram, qui tuus est in me amor, profecto in primis iuuisses. De meo verò in te animo ita te volo existimare: amorem meum, qui quidem antea erga te atq; Alphonsum ducē Ferrariensem fratrem tuum eximius semper fuit, hac in me Dei Opt. Max. benignitate ac manere etiam auctum multiplicatumq; esse: vt quo maior ipse sum, eo vterq; vestrum & coniunctior mihi sit, & certe charior. Quod autem mihi eundem fratrem tuum commendas: voluit is iustis quidem de causis, quas ab ipso intelliges, infectis rebus suis Roma proficisci. Spero tamen, quoniam

eius.

ius rei fundamenta iecimus, quod superest, me daturū
operā, vt intelligatis vos mihi ambos incolumitatemq;
vestrā magna cura esse. Dat. M. D. XIII. An. 1. Roma.

PAULO GERMANO MIGDEL-

burgensi Forosempronienſiū Episcopo. 18

EGREGIAM in omni prope disciplina doctrina
tuam, plurimarumq; optimarum artium scientiam ma-
ximi semper feci. Quamobrem excellens tuum ingeniū
studio ac fauore meo commendare aliqua nunc iam in
re atq; prosequi cupiens, libros de Pasce obseruatione,
ac mortis Dominica die, quos nouissime confeciſti, volo,
atq; igni & aqua interdico, et mando, ne quis imprime-
re possit, imprimere facere, aut impressos venundare,
quoad vixeris, prater te, vt vsum aliquem ex tuis labo-
ribus hac etiam ex parte percipias, ipsiq; tui libri dili-
gentius impressi in lucem prodeant. Dat. prid. Calend.
Maias. M. D. XIII. Anno primo. Roma

SIGISMUNDO REGI

Poloniæ.

19

PROXIMIS diebus te hortari vnus atq; alteris
literis non destitimus, controuersiam, quā cum Alberto
Prusiæ Magistro aliquot iam annos habes, habuisti que
cum eorum nonnullis, qui ante illum Magistri fuerunt,
vt aliquando tandem terminari sine armis posset, velles
eam sacro Lateranensi Concilio remittere, à quo quidē
maxime conuenit Regum causas disceptationesq; iudi-
cari. Qua in re si meis hortationibus animū adhibuisti,
quāq; te facere ipse æquum, & iustum putabam, ea cō-
cordi inter te atq; illum voluntate es iā ita complexus,
vt ei Concilio vterq; vestrū suam causam remittendam.

CC 5 statuer

statuerit, eiusmodi nuntium leto animo accipiam: teq;
 de tua ista lenitate atque in Rempub. obseruantia ma-
 gnopere commendabo. Sin autē, quemadmodum & à
 Thoma sancti Martini, & ab A. sancti Sixti Cardinali-
 bus, qui te summopere diligunt, & quibus incolumitas
 tua, dignitas, amplitudo magna cura est, nuper intelle-
 xi, lubens ipse paratusq; es ad ea pacta foederaq; seruā-
 da, quae quidem solenniter inter vos nouissime statuta,
 sanctaq; sunt, quaeq; propediem sunt sancienda, tua ista
 voluntas etiā atque ad pacē propensus animus mihi pla-
 ne vehemēter probatur. Teq; magnopere hortor, ab il-
 lis ipsis, quas commemorauī, tum factis tū sunt pactio-
 nibus ne recedas: modo eiusmodi sint, quibus arma &
 discordia auferātur, pax atque trāquillitas exoriat. Si
 enim is exitus istic aut partus iam est, aut cōparari,
 modo velitis, potest, quid attinet noua iudicia querere:
 quae quidem vt suū ad finē perducī possint, neque breuis
 temporis, neq; parui sumptus propter locorū longinqui-
 tatem indigcant necesse est? Quamobrē abs te nunc qui-
 dem vehementer quaeso & opto, primū vt in eadem sen-
 tentia tete confirmes ac plane perstes, deinde vt nullam
 prorsus ansam Prusiae Magistro des, à pacto inter vos
 foedere de sciscendi: vel potius vt omnia cogites, omnia
 premunias, omnia moliare, quibus ille nihil queri de te,
 nihil inuenire causa possit ad pacē concordiaq; reijciē-
 dam. Hoc nos hortari monereq; te nō magis nostrū est,
 quanquā id quidem nostrū maxime: pacē .n. à Domino
 relictā nobis atq; traditā cū alijs velle cōmunicare ma-
 gnopere omnes debemus, quā tuū etiā modis omnibus
 prestare atq; efficere, ne te frustra monuisse videamur.

Qua

Qua in re præterquã quod tuæ tuorūq; populorū quieti optime abs te consulatur, nobis etiam rem gratissimam facies. De re autem P. cuius te obseruantissimū semper fuisse omnes prædicant, etiã bene merebere. Dat. prid. Cal. Maias. M. D. XIII. Anno primo. Roma.

ALBERTO SOCIETATIS

Marianorum Theutonicorum

magno Magistro.

20

SVPERIORI epistola te etiam atque etiã monui, velles eã controuersiam, quã cum Sigismundo Rege Polonia multos iã annos habes, vt aliquando res ipsa atque causa confici sine armis posset, vel tantisper sustinere, dum noster Legatus ad istas regiones mitteretur, qui quæ aqua essent, inter vos statueret: vel sacro Lateranensi Concilio remittere: à quo maxime cõuenit magnorum Principum causas disceptationesque iudicari. Nunc autem quoniã ijs de rebus diligentius perquirentes intelleximus proxime inter vos pactum sanctumq; esse quid vterq; vestrū facere, quibus stare cõditionibus debeat: quo ex fœdere erat statutū, vt quæ superessent cõtrouersia inter vos pactis eã atque fœderibus ad octauum Idus Maias terminarentur: quanto maiore possum studio ac diligentia te plane hortor, quæ sollemniter celebrata inter te & Regē Polonia pacta conventionesq; sunt, eas ne reijcias, celebresq; quæ sunt celebranda, sic plane, si erūt eiusmodi, vt bella cõtentionesq; deponantur, securitas atque ociū subsequatur. Nã si is istic finis vel paratus iã est, vel parari vobis volentib; potest: quid opus est nouorū iudiciorū: ad quæ quidē terminanda neq; breuissimi tēporis, neq; minime impensæ propter

propter regionum longinquitatem vterque vestrum indigebit? Quanquā vt verū fatear, pupugit me rumor quidam tibi plane non honorificus mihi etiam per molestus, qui multorū iā vocibus & sermone percrebuit instantium, per te fieri, abs teq₃ impediri, ne res ad exitū perducatur. Quare his quidem literis impensius etiam abs te postulo & peto, vt quibus pactionibus pollicitus es te staturū, ijs ne te laxes fidemq₃ tuam praestes, omniaq₃ agas, coneris, efficias deniq₃ vt pax inter vos conficiatur: neq₃ Rex Polonia conqueri de te apud nos vllō modo possit. Quam planē te ad rem vel hortari vel monere, non magis mei muneris est, quod tamen est in primis meū, quā tui etiā efficere, ne frustra operā posuisse nos appareat. Ita enim & tua tuorumq₃ quieti magnopere consules, & tua in nos praeclare officia constabunt. Dat. Frid. Cal. Maias. M. D. X I I I. Anno. i. Roma.

CONVENTVI ET SOCIETA-

ti Marianorum Theutonicorum.

21

SCRIBIMVS Alberto Marchioni Brandeburgensi societatis vestrae Magistro, eumq₃ etiam atq₃ etiā hortamur, vt ei controuersia, quā cum Sigismundo Rege Poloniae habet, finem atq₃ modum adhibeat, quantumq₃ in se est efficiat, vt ad pacis tandem studium res consensumq₃ perducatur. Tum illud addimus, vt quoniā nobis renuntiatum est per illum stare, quominus causa eū quem commemorauimus exitū habeat, det operam ne quis ipsum nolle pacē atq₃ concordiam apud nos queri iure possit. Quae quidem omnia vobis etiam perscribere volui: cum quia exploratum habeo conuentum istum vestrū magna apud illum auctoritatis esse, eaq₃ ferē cogitare

gitare ipsum atq; agere, quæ vobis vnīs probantur: tum quod intelligo huius ipsius culpā rei, quod adhuc confecta non sit, in vos reijci. Itaq; vos vniuersos & hortor & paterne moneo non id solum, vt Magistrum vestrum ad pacem atq; concordiam cum Rege Polonia ineundā ne impediatis, sed vt omni etiā vestra diligentia & auctoritate compellatis ad ea pacta fœderaq; quæ confecta proxime inter illos sunt, amplectenda atq; seruanda: quæ vero conficienda sunt, ea vt conficiat vt discordia omnis atq; dissensio tam vtriq; eorū detrimentosa, tã indigna Christianis Principibus, tam nobis molesta aliquem aliquando tandem exitum nanciscantur: ne dissentientibus studijs nationes istæ, quæ ad Christianam gloriam augendam atq; propagandam sunt aptissimæ, similitates inter se atq; odia semper exerceant, suis semper viribus conterantur. Id si vos in animū induxeritis, communiq; consilio effeceritis, egregie de me atq; ampliter vos esse meritos profitebor: rem verò atq; operā ipsis vobis magnopere debitam, & virtute dignam vestra bonitateq; nauabitis. Dat. prid. Cal. Maias. M. D. XIII. Anno primo. Roma.

MAGISTRATVI BONONIAE. 22

DEMONSTRATVM mihi est nostra interesse vt Regij Lepidi forum aliquot peditum tutela muniat. Quamobrē mando tibi, vt ex ijs militibus, qui apud te sunt, viginti quinque pedites, qui præfectum suum habeant strenuum aliquem ac idoneum virum, illò mittas. Ante tamen quàm id facias, nostrum hoc consilium cum Rufino Regiensium Magistratu communicabis. Qui si etiam equitatu peditatq; opus esse duxerit ad reliquū
oppi-

oppidum, eiusq³ agrum muniendum, XXV. equites le-
uis armatura cum peditibus alteris totidem eorūmq³
praefectis ad eum mites. Dat. Cal. Maij. M. D. X I I I.
Anno primo. Roma.

R V F I N O R E G I I L E

pidi Magistratui.

23

I N T E L L E X I opera pretium esse, istius oppidi
forum aliquo militum numero praemuniri. Quamobrem
mandavi Bononia Magistratui, vt XXV. pedites ad
te mitteret cum eorum praefecto. Quibus tu stipendium
dari solitum ex istius ararij prouentibus conficies. Ce-
terum si ad reliquum oppidum eiusque agrum tuendū
vel peditatus alicuius vel equitatus indigebis, eos à Bo-
nonia Magistratu, cum erit opus, petes. Dat. Calend.
Maij. Anno primo Roma.

M A R C O M A R T E L L O R E

gij Lepidi Quaestori.

24

M A N D O tibi, vt quae Iulij secundi Pont. Max.
tempore ex salis aliarumq³ rerum vectigalibus arario
isti nostro publicanorum reliqua debebantur, ea omnia
cures atque exigas. Quā quidem tu ad rem istius ma-
gistratus opis atque auxilij si indigebis, volo, hisq³ ipsis
litteris ei mando, vt te omnibus in rebus ita iuuēt, vt ne-
gotium recte atque celeriter conficiatur. Dat. Calend.
Maij. M. D. X I I I. Anno primo. Roma.

C I V I B V S E T M E R C A T O

ribus Lucensibus tribus.

25

F I D E atque integritate vestra optimorū hominū
ac praestantiū virorū testimonio praeclare cognita vni-
cuique vestrum largior, vt & merces vestras omnis ge-
neris

neris in Galliam transalpinā mittere, & in Gallia quicquid libuerit mercium emere, & emptum in Italiā transportare, summatimq; mercaturam exercere, omniaq; agere vt soliti estis, & vobis vsui venerit, libere atque secura liceat duobus anni temporibus & mercatibus, qui Lugduni fiunt ad Augusti atque Nouembris Cal. Dat. XII. Cal. Iun. Anno primo. Roma.

EVANGELISTAE TARASCO-

nio, & Iacobo Gambaro, meis apud

Placentinos internuntijs.

26

MANDO vobis, vt si Raimundus Cardona noster foederatorumq; nostrorum Imperator exercitum sibi à Ferdinando Hispaniarum Rege creditū educere e Gallia citeriore voluerit, ipsum exercitumq; eius nostro nomine recipiatis, atq; à Placentia quo ei libuerit versus per loca prouinciasq; nostras comitemini: curamq; & diligentiam adhibeatis, vt qua solita sunt per nostros homines amicissimis exercitibus parari, ea ipsi militibusq; eius per vos parentur: quos quidem meos internuntios procuratoresq; hac in re atque illo traducendo exercitu volo esse. Dat. X. Cal. Iunias. M. D. XIII.

Monachis Neapolitanis.

17

INTELLEXI velle vos Gasparis Hispani praefecti militum cadauer ab illo, quo illatū consentientibus vobis fuerat, loco in alium minus idoneum locum transferre. Quam rem quoniā eos, quorū interest, agre molesteq; ferre audio: vos hortor, ne eorū animos ea de causa mœrore afficiatis, cadauerq; ne amoueatis. A quo si religione impedimini, vel aliqua alia mutandi loci satis iusta causa vos mouet, id omne ad nos defertote: qui, q̃

eri

erit æquum atque iustum, statuemus. Dat. VII. Cal.
Iunias. M. D. XIII. Anno primo. Roma.

ANNIBALI, ANTONIO GA-
leatio, Alexandro, Hermeti Bentiuo-
lis germanis fratribus.

28

OBSEQUIVM humilitasq₃ vestra, quam ad me
partim ipsi accedentes pedibusq₃ meis aduoluti, partim
per internuntios idem agentes modis omnibus supplices
præstitistis, precesq₃ interpositæ vestræ atq₃ effusa la-
chryma largiter, quibus quidem subiectissime petijstis,
vt vestras, qualescunq₃ essent, in Romanos Pontifices
culpæ errataque ne plecterē, ignosceremq₃ vobis neces-
sitate potius & vi, quàm vel sponte, vel villo certo consi-
lio compulsis ea facere, quæ fecistis, me in eam cogita-
tionem adduxerunt, vt vos non indignos venia ducerē.
Quare sic existimans, vobis mala multa aliquod perpes-
sis annos nihil esse antiquius, quàm sub hoc imperio posse
honeste pacateq₃ viuere, vestrum istum bonum, vt vide-
tur, perhumilemq₃ animū fauore, vel amore potius am-
plectens meo, nec tam pœna, quàm pœnitentia vestra
contentus, primum quidem vobis cum vestra in eos, qui
ante me fuerunt, Romanos Pont. omnis generis delicta
tum pœnas ob id lege Iulia cōstitutæ remitto, atq₃ ab-
oleo ita quidem, si mihi prædes dederitis sestertium duū
militum, vos à meo & eorum, qui mihi successuri sunt,
Pontificum Maximorum imperio mandatisq₃ non dis-
cessuros, neq₃ quicquam vnquam contra me atque illos
tentaturos. Domos deinde, villas, fundos, bonaq₃ omnia
sacerdotijs exceptis, quæ quidem bona ante diē Calend.
Noeuembr. M. D. XI. Ioannes Bentiuolus & Geneueræ
parentes

rentes vestri vestrumq³, singuli quocunque nomine habebatis, possidebatis, ea nobis vniuersa, etiam si in alios translata sint, condono ea lege, dum quæ à vobis rerum & pecuniarum summa debentur, quibus de summis liquet, earum creditoribus antea satisfactum sit: quibus verò de summis nondum liquet, de ijs vos omnibus, cum liquebit satisfacturos: deq³ iuri stando prædes à vobis cautionesq³ sint data quos prædes quasq³ cautiones esse idoneas magistratibus sit probatum. Deniq³ vniuersam vestram familiam atque eos omnes, qui aut vobiscum exilio multati sunt, aut quoniam vestrarum partium sunt habiti, postea in exilium sunt missi, quiq³ vos sequuti sunt, eundem ad statum conditionemq³ repono atq³ restituo: & præter hac ad patriam etiam reditum illis omnibus tutum atque liberum mando esse, ijs exceptis, qui hominem occiderint: quos quidem volo in eo quo nunc sunt, exilio, priuatione, interdictis manere, utpote mala fidei homines, atque immeritos, quibus quicquam tale res hac publica largiatur. Volo item, ut illi, quorum nomina in nostris ad Episcopum Polæ Bononiæ Magistratum dandis propediem literis ex eo numero excipiemus, ad patriam ne redeant, neue recuperationem bonorum suorum adipiscantur, quoad aliter iussero. Quoniam autem per difficile, admodum vobis futurum intelligo, duum milium sestertium prædes ærario dandos nostro reperire, qui perpetui maneant: satis habebimus eos à vobis per triennium duraturos & valituros dari quo in tempore aut rem totam terminabo, aut alteros à vobis prædes datum iri, quoad opus erit, iubebo. Quæ quidem omnia de plena Christi gratia munificoq³ sinu deprom-

pta collatag³ in vos si ad bonam mentem reuersos perinde accepisse vos intellexero, vt propensa perpetuag³ vestra in nos obseruantia, cultu, studijs, officijs, diligentia huius vos nostri muneris in posterum esse meriti atque grati videamini, voluntas erga vos mea promulg³ ad incolumitatem vestram animus etiam augebitur: deq³ vestro ipsorum ad patriam atq³ lares vestros reditu, quem adhuc vobis liberuq³ vestris precludimus, ea, qua à nobis precibus omnibus petistis, quag³ vultis aliquando statuemus. Dat. VII. Cal. Iun. Anno primo. Roma.

Bononiæ magistratui.

29

MAXIMILIANVM, Romanorum Imperatorem designatum summo opere amo: eiq³ maiestas, amplitudo, dignitas, resq³ omnes mihi magna cura sunt. Itaq³ cum intelligam in illius oppido A. uina periculum esse, ne, per seductos homines tumultus a'iquis excitetur, qui in eius fraudem vergat, inclinationemq³ afferat eius rebus, quibus de omnibus valde quidem sollicitus sum: mando tibi, vt si Vitus Frustrò, qui eius nomine ei oppido præest, seditionum & nouarum rerum causa, quis is commoueri videat, abs te auxilium petierit, omnem eam armatorum hominum & militum nostrorum manum illi mittas ad urbem tuendam tumultuq³ compescendos, quam is volet: curesq³ omni studio, vt Imperatoris res tam sint tuta, quam huius reipub. atq³ nostræ. Dat. Prid. Cal. Iun. Anno primo. Roma.

Heluetiorum pagis duodecim.

30

LECTIS vestris literis, quibus à me petitis, vt declarationem vestram de Episcopo Gebennensi faciam velim ratam probatamq³ esse. Equidem libenter hac in re vestris

re vestris postulatis annuissem, nisi Duci Allobrogum ante scripsissem mihi statutum esse, cuius nomen ad Episcopatum illum sim sublecturus. Itaq³ vos potius hortor, ut eum ipsum, quem nominabo, gratum optatumq³ habeatis. Id si feceritis, & erit mihi sane gratum, & reip. dignitatis per vos ratio habebitur. Dat. prid. Cal. Iun. M. D. XIII. Anno primo. Roma.

Magistratui Regij Lepidi, & M.

Marcello Quæstori.

31

VOLO & vobis mando, ut omnes istius ararij proventus & vectigalia pristinum ad statum et rationem, atq³ eam, quam lege Iulia formam acceperant, reuocetis: eaq³ deinceps utamini. Calend. May. M. D. XIII. Anno primo. Roma.

PETRO BIBIENAE IN-

TERNUNTIO.

32

EXEMPLVM literarum, quibus literis ad Leonardum Lauredanum Venetiarum Principem scribimus Franciscum Marchionem Mantua in nostram fidem esse receptum, ipsasq³ literas cum his ad te literis mitto, ut & nunc quidem eam illi rē meo nomine significes, reddasq³, quas ad eum literas dedi, & posthac quibuscunq³ in rebus Francisco ipsi apud istum senatum esse vsui possis, eum iuues, uti & hominem de nobis optime meritum nobisq³ charissimum, & signiferum nostrum, & in fidem nostram receptum. Dat. VI. Non. Maias. Anno primo. Roma.

LONARDO LAVREDA-

NO VENETIARVM

Principi

Dd 2

33

FRAN.

FRANCISCVM Gonzagam Marchionem Mantua urbemq₃ eius & ditionem in benevolentia nostra fidem & patrocinium recepi. Nam & amavi hominem, cum inter Cardinales essem, omni tempore: & amari me ab illo plane perspexi: plurimaq₃ eius in nos familiamq₃ nostram egregia officia & studia extiterunt. Eam rem tibi esse cognitam volui, primum vt ipse pro eo, quo te remq₃ istam publicam amore charitateq₃ amplector, mea omnia, benevolentiaq₃ in primis rationes tibi senatuiq₃ tuo notas atq₃ declaratas facerem: deinde vt tu illum eiusq₃ oppidum, populos, reliqua omnia omnibus posthac in rebus ita tractares, vt intelligeret, cuius ipsius tuendi nos curam studiumq₃ suscepimus, cum non solum propter huius imperij maiestatem Signiferiq₃ officium, quem gerit, sed etiam quod à nobis vnice diligitur, abs te tuaq₃ Repub. esse tutissimum. Dat. 6. Non. Maias. M. D. X I I I. Anno primo Roma.

Magistratibus Parmæ.

34

OPTIMUM vestrum in nos alacremq₃ animum, quem quidem mihi Benedictus Rubeus vestro nomine detulit, libenter agnosco. Et quoniam diligentiam adhibui, vt sub Reip. imperium rediretis, redeuntes nunc vos paterno amore charitateq₃ amplector atq₃ recipio: dabiturq₃ à me quidem opera, vt vos ciuitatemq₃ istam perinde tractem, vt neq₃ mea me diligentia in ea recuperanda, neq₃ vos vestri in rep. recolenda studij obseruantiaq₃ perniteat. Dat. tertio Non. Maias. Anno primo Roma.

Magistratibus Placentiæ.

35

ET obsequium vestrum & cultus, quem mihi La-

ZATIUS

ZARUS Maluicinus & Nicolaus Scottus Interpretes vestri diligenter præsiterunt, gratus mihi atq; optatus accidit. Itaq; de eo vos studio, quod quidem maximum, ut sub huius reipub. imperium rediretis, communi omnium consensu adhibuistis, & laudo, & redeuntes in fidem meam clientelamq; recipio: daboq; operam, ut magis magisq; in dies singulos id voluisse vos atq; fecisse late-mini. Dat. tertio Non. Maias. Anno primo Roma.

Thomæ Episcopo Feltrinorum apud

Mediolanenses Internuntio.

36

MANDO tibi, ut oppida Placentiam & Parmam sub reip. imperium redeuntia nostro nomine recipias liberaliterq; tractes, quemadmodum quidem eorum civium erga nos voluntas, studium, pietasq; postulat. Dat. tertio Non. Maias. Anno primo Roma.

M. Antonio Columnæ.

37

MANDO tibi, ut Cotignolam oppidum in deditio-nem nostro nomine recipias, itaq; tractes, ut eius muni-cipibus atq; incolis nihil detrimenti tuis à militibus infe-ratur. Caterum quod ad arrogantiam ipsorum attinet, multamq; ea de causa Decurionibus statuendam, quid fieri oporteat, scribam ad Bononiæ Magistratum prope diem. Dat. tertio Non. Maias. Anno primo Roma.

Magistratui Bononiæ.

38

MANDO tibi ut Achillis Taurellij, cui nuper præse-cturam militarem contuli eiusq; militibus statua des eo in loco, qui tibi esse opportunior videbitur: eisq; dari mandes tectum, lignum, stipulam, vti solitum est, ma-ximeq; conuenit. Dat. quinto Id. Maias. Anno primo. Roma.

C V M tibi certum statutumq₃ sit Roma discedere, idq₃ vt nobis volentibus tibi facere liceat, precibus omnibus petieris: vti de Iulo Secundo, cuius stipendia annos aliquot multa cum laude fecisti, opime merito tibi quod petis, do atque tribuo. Itaq₃ & Roma proficiscendi, & ad quasvncq₃ nationes Reges populos te conferendi, atque vbi volueris gentium commorandi, harum literarum significatione tibi facultas esto: teq₃ illis ipsis, ad quos accesseris, quemadmodum quidem de viro egregie spectataq₃ virtutis, deq₃ homine meis omnibus valde amico mihiq₃ percharo facere me conuenit, studiose diligenterq₃ commendo. Dat. tertio Id. Maias. Anno primo. Roma.

Francisco Marchioni Mantuæ.

I N T E R Petiliani Comites, quemadmodum appellat, et meâ familiam meq₃ ipsum in primis, quo tempore Cardinalem gessi, plurima beneuolentia necessitudinisq₃ officia parua & mutua extiterunt: vt nihil nolle nos eorum causa, nihil ipsi nostra potuerint, quod ab amantissimis coniunctissimisq₃ hominibus esset petendum. Ea necessitudo à maioribus nostris constituta eo nunc quidem cum ijs, qui superstites sunt, seruatur à me diligentius, quo ipsi magis de rep. benemerentur, cui præesse me Dei largitas atq₃ benignitas voluit. Quamobrem etiam abs te peto, vt Cola Chiappino bonorum, qua ab egregio viro patre suo amantissimo tui sibi relicta in Brixiano habet, Asulanam possessionem ne perturbes: sed ipsum patris sui hereditate optime parta frui permittas, vel quia ita te velle æquum honestumq₃ est, vel quod in eo
mibi

mihī ipsi gratissimum feceris. Dat. prid. Id. Maias.
Anno primo. Roma.

Magistratui Bononiæ.

41

Ex tuis literis intellexi Cotignola oppidum sese nostris militibus deditisse. itaque postulas ut tibi mentem meam in eo significem. Quam re volo, & tibi mando, ut oppidanos ita multes itaq; punias, ut arrogantia, qua in nos sunt vsi, eos pœniteat, discantq; se gerere reuenter, exemploq; ceteris sint, nihil temere faciendi. Dat. prid. Id. Maias. Anno primo. Roma.

Magistratui Foroliuiensium.

42

MANDO tibi ut quicquid stipendij nomine M. Antonio & Mutio Columnæ Praefectis equitum nostris ab ista ciuitate dudum instituti atq; recepti debetur (Debetur autem, ut mihi demonstratum est. Mutio quidem prope integrum solidum, M. Antonio verò non nomina certe portio) id eis omne subductis rationibus curari iubeas sine vlla mora. Dat. quarto Non. iun. Anno primo. Roma.

Alfonso Atestino Ferrariensium Duci. 43

SUPERIORIBVS diebus te sum per literas hortatus velles Franciscum & Pasottum Fantutios ciues Bononienses huius Reipub. homines captos à tuis liberos missosq; facere, sperans me id abs te pro Reip. dignitate facile impetraturum. Postea verò quàm ab Hadrianorum Episcopo legato tuo cognoui te laxiorem quidem illis commodioremq; carceris conditionem mea causa dedisse: de libertate verò eis restituenda tempus ad deliberandum sumpsisse, dum Hyppolitus Cardinalis frater tuus Romam accederet: iterum te atq; sapius & horro-

D d 4

& moneo,

& moneo, cogites, quàm sit honestum nostros municipes, honestissimos viros abs te captos tamdiu detineri. Quæ quidem res quoniam sine nostra dignitatis diminutione differri diutius non potest, præterquam quod illis nihil tale meritis mora omnis laboriosissima ærumnossimâq; est, abs te magnopere peto, ne Fantutiorum liberationi tempus vllum vltterius des: vt gratus erga Deum humilisq; animus, atque officiosa in eius viciarium mens esse tua facile appareat: quo nihil potest esse laudabilius. Dat. octauo Id. Iun. Anno primo. Roma.

Leonardo Lauredano Venetiarum

Principi.

44

VENIT ad me Hercules Atestinus, narrauiq; mihi ab Augustinis ciuibus tuis ad sestertium ducenties sibi iampridem deberi: proq; ea summa adamantem eum, quem ab ipsis Iulio Secundo diuenditum nos habemus, obligatum sibi esse affirmavit. Itaq; petijt agerem tecum, vt Augustinis mandares, sibi quod debent, persoluerent: id ni facerent, à me cuius in potestate adamas est, eos nummos sese dixit petiturum. Quamobrem quoniam Iulio nihil omnino harum rerum denuntiatum fuit, usq; gemmam eam aperte mercatus omne illis pretium persoluit, quo de pretio atque summa pacta inter ipsos stipulationesq; extiterunt: ego sanè, qui nihil eius rei habeo, quod non sit Reip. pecunia comparatum, te etiam atq; etiam horror, cogas ipsos ciues tuos Herculi fidem soluere, vt & is perspicua in re neque sanè noua perueniat ad suum, & mihi molestia ea de causa non exhibeatur. Dat. octauo Id. Iun. Anno primo Roma.

Magistratui Bononiæ.

45

Et si

ET si mihi dubium non est, quin omnes nostri Praefecti militum paratissimi sint, quocumq; oporteat proficisci: volo tamen, ut ijs omnibus eorumq; vicarijs qui istic sunt, significes, sese mihi rem gratissimam esse saluturos, si quamprimum cum suis militibus Parmam Placentiamq; se conferent tantisper, dum ea municipia in ijs bellorum motibus, quos illis in locis excitari audio, se à me deserta esse destitutaq; ne arbitrentur: quae quidem certe mèrita de nobis sunt, ut eorum incolumitatem salutem fortunas non negligamus. Id ut libentius faciât, recipere te eis volo, quartam alteram vnius anni stipendiorum partem, quam adhuc non merent: à Quastoribus representatum iri. Quod si nihilominus profectionis excusationem aliquam quispiam afferet, ei te volo dicere, abunde me ea incommoda repositurum: non enim facti modo pradiationem atq; laudem, sed etiam laborum suorum praeium consequetur. Dat. quinto Id. Iun. Anno primo Roma.

Praefectis militum eorumq; vicariis. 46

CUM magnopere vos cupiam, cum ea manu, quam habetis Parmam atque Placentiam accedere ad ea municipia nobis quidem charissima tuenda atq; munienda, ne se illi à me ciues atq; municipes in his rerum motibus turbulentisq;, temporibus vel obliuione praeteritos, vel amore ac studio destitutos putent, scripsi ea de re ad Magistratum Bononia pluribus verbis: quas ad literas vos reijcio. His tantum vobis literis exploratum esse cupio, si eam profectionem alacri animo atq; studio susceperitis, apud me praeclare posueritis. Dat. quinto Id. Iun. Anno primo. Roma.

Dd s PETRI

PETRI BEMBI EPI
STOLARVM LEONIS DECL
MI PONT. MAX. NOMINE
scriptarum.

LIBER TERTIVS.

MAXIMILIANO MARIAE
MEDIOLANENSIVM DVCI.



ILLATVM est Heluetios pro tua ditio-
nisq; tua propugnatione cum Gallis apud
Novariam conflixisse, eosq; superavisse,
ac prope ad internitionem pulsos fuga-
osq; redegissee. Ea res tamen si propter
eorum magnum numerum, qui quidem Christianae
Reip. esse vsui aliquando potuissent, meum animum do-
lore admodum perculit, tamen pro tua in nos obseruan-
tia & meo in te tuosq; omneis veteri singulariq; amo-
re magnopere gausus sum, qui de te statuerum tua-
rum deturbare atq; expellere sunt aggressi, eorum co-
natus cogitationesq; non solum irritas & inanes fuisse,
sed ipsis etiam insignem cladem attulisse. Cuius quidem
euentu atq; victoria Deo Opt. Max. qui te tueri atq; de-
fendere voluit gratias agere, tantorumq; beneficiorum
summam illi acceptam referre te in primis decet: vt pius
in illum esse, ac dignus eo munere maxime fuisse videat-
re. Quod quidem fiet, si duci efferriq; te victoria dulce-
dine non sines, neq; statues eos omnes, qui contra te ali-
quid conati sunt, vsquequaque velle te perdere ac per-
sequi. Quam incogitationem vt incumbas, lenissimeq;
agas,

agas, eodem illo meo te amore beneuolentiâq; admonitus vel potius impulsus te rogo, & quidem valde rogo: atq; vt si quid à quoquam erratum peccatumq; est, est autem fortasse à multis, venia id magis, quàm vindicta dignum existimes, à te peto. Sic enim melius eorum, qui ab alienati sunt animos tibi beneuolos reddes, neque infirmabis vllam rerum tuarum partem. Quis enim potes in vltos animaduertere, quin ditionis tuæ homines multes ac punias? Quod si saepe facias, tuas ipsius opes debilitaueris. Accidet enim id, quod esse tibi exploratissimum debet, vt minus multa perficias, cum timore, non beneuolentia, erunt negotia constituenda. Extremum illud adiungitur, quod quidem haud scio, an omnium primum atque maximum sit, quod si parces multis, si veniam pluribus dabis, imitatus Dominum fueris, qui tibi vires subministravit ad tui nominis hostes fugandos atq; propulsandos. Nihil enim illo mitius, nihil iniuriarum minus retinens, nihil ad parcendum, ad miserandum pronius atque profusus vnquam fuit. Quamobrem redeo ad illud, vt te amantissime hortor, vt tua victoria quàm moderatissimo quàmq; leuissimo animo vtare. Quod si feceris, neq; aures maleuolis hominibus præbueris, id quod solet esse difficillimum, efficies, prudentiamq; cum fortuna coniunges. Dat. tertio. Id. Iun. Anno primo. Roma.

Raimundo Cardonæ Proregi

Neapolis.

2

HELVETIORVM contra Gallos victoria: de qua nuntij nuper ad me sunt allati, non solum propter Maximiliani Insubrū Ducis incolumitatem fortunâq; eo pralio restitutas plane atque confirmatas, sed etiam
quia

quia tu pro illo laborasti, mihi gratissima atq; iucundissima accidit. Quanquam sanè tot fortes homines, tot claros viros, tantam tamq; bellicosam manum, quæ quidē reip. Christiane dignitatem tueri facile propagareq; potuisset, funditus perisse non molestissime ferre non potui. Pacem enim maxime, non bella, hominumq; in Deum pietatem, non iacturam Christiani sanguinis, aut praelij dimicationem cupere singuli exoptareq; debemus. Quoriam autem ad Maximilianum dedi literas, quibus literis hortatus eum sum ne omnes illos, qui aliquid in se conati molitue sunt, dignos putaret quos vsque ad internitionem persequeretur, peto abs te, quem quidem scio plurimum apud ipsum valere, vt autoritate tua studium meum iuues ostendasq; ei nihil esse viro Principe dignius, nihil omnino laudabilius placabilitate, lenitate, misericordia, nihil contra detestabilius inclementia iracundia, crudelitate. Itaq; velit iniuriarum obliuisci, mitemq; se atque flexibilem ad humanitatem præbere: vt & dignus eo munere, & optimi tranquilliq; animi atq; in primis Deo grati esse maxime videatur. suorumq; populorum non tam fortunas, quam etiam animos possidere. eisq; amicisimis & beneuolentissimis vti possit. Id si feceris, et ipsi optime consulueris, et certe mihi, qui summa illum beneuolentia sum complexus, quietemq; & multorum finem laborum cum omnibus, tum illis maxime populis aliquando tandem dari cupio feceris gratissimum. Dat. tertio Id. Iun. Anno primo. Roma.

Maximiliano Mariæ Mediolanensium

Duci.

3

H E R I pro me singulari in te amore & studio te
sum

sum per literas hortatus, velles in ista tua recenti contra Gallos victoria moderatissimo animo vti, neq³ duceres eos vniuersos, qui quidem aliquid in te conati sunt esse vsquequaque persequendos: rationesq³ quæ me ad eas hortationes impellebant, illis in literis exposui. His autem literis Gulielmum Marchionem Montis ferrati eadem de causa tibi magnopere diligenterq³ commendo. Qui quoriam tenuem ditionem, neque opibus neq³ viris præstantem habet; non potuit se inimicis tuis opponere, eisq³ interdicare ne per ipsius fines contra te copias suas ducerent, aut etiam ne illis ex locis secum traherent, quos vellem: tibi idem permissurus, si tu in Galliam exercitum ducere voluisses. Quamobrem cum mihi omnium Principum Christianorum, omnium populorum salus incolumitasq³ curæ esse maxime debeat, existimaui esse te commonefaciendum, malles in eum, qui præterea nobis familiæq³ nostræ omne est necessitudine coniunctissimus liberalitatem & beneuolentiam, quam vel odia vel crudelitatem exercere. Sic enim & quæ te digna sunt, statues, & ditionem tuæ ditioni proximam eo tibi officio magnopere deuincies, & mihi erit gratissimum, si te in illum mitissimo esse animo atque amicissimo intellexero. Deus etiam, qui tantum in te præsidij tantum gloriæ contulit, ea de re atq³ clementia magis magisq³ te in dies & amabit & tuebitur. Dat. secundo Id. Iun. Anno primo. Roma.

Raimundo Proregi Neapolis.

4

GULIELMUM Marchionem Montis ferrati virum probum & spectata virtute hominem, & cum mihi plane charissimum, tum meis prope omnibus veteri beneuolentia

uolentia & necessitudine coniunctissimum commendo tibi sane quàm diligenter: Petoq; abs te, vt Maximiliano insubrum Duci persuadeas, ne in eum ditionemue eius velit quicquam durius aut acerbius cogitare, propterea quod is Gallorum rebus non auersissimus fuerit. Is est enim eius regni status atq; conditio, vt inimicus esse Gallis etiam si velit non possit. sed quoquo modo se res habet, mihi gratissimum feceris, & Dei Opt. voluntati maxime consentaneum, qui suas iniurias obliuisci, quàm vindicare mauult, quemq; imitari nos oportet, si Gulielmum cura, ope studio, autoritate tua inueris. Idq; vt facias te plane rogo ipsum autem gratissimum & tua beneuolentiâ dignissimum cognoscies. Dat. 1d. Iun. Anno primo Roma.

Maximiliano Mariæ Duci Mediolanensium.

PALAVICINORVM gentem tibi quidem magnopere aednam tuq; nominis obseruantem omni tempore fuisse non dubio. Ego certe vniversam singulati beneuolentia sum complexus. Itaq; te plane hortor, vt in hac tua illustri contra Gallos victoria Palauicinos omnes liberaliter tractes habeasq; meo nomine commendatissimos. Quorum si quis etiam in his rerum mutationibus animorumq; fluctibus, quos hac tempora tulerunt, à te alienior fuit, quanquàm id quidem credere vix possum, sed tamen si fuit, eam tu rem ne vindites, neue propterea in illum animaduertas, abs te peto: sed vt lenissimo animo sis, atq; vt Principem virum decet, plane mitissimo ac liberalissimo. Dat. 1d. Iun. Anno primo Roma.

Maxi-

Maximiliano Mariæ Mediolanensiu Duci. 6

CONSTANTINVM Cominatum Acheorum Ducem Macedoniaq, Principem & Consiliij Lateranensis custodem, quem propter eius plurimas egregiasq, virtutes, atque in Romanos Pont. merita perq, veterem observantiam tuendum mihi atq, ornandum suscepi, auxilio tuo ijs in rebus, quas in Monte ferratensi habet, egerem magnopere intellexi. Eum igitur tibi commendo in maiorem modum. Rem profecto mihi gratissimam feceris: si omnibus in rebus, in quibus illi esse vsui poterit studium & liberalitas tua, Constantinum iuueris. In quo certe tuam in me observantiam maxime agnoscam. Id vt facias, pro meo quidem in te amore paterne, pro nostra vero in illum beneuolentia studiose diligenterq, abs te peto. Dat. Id. Iun. Anno primo. Roma.

Magistratui Parmensium. 7

CONTVLIT se ad militiam nostram Benedictus Rubens Parmensis, cum levis armatura equitibus L. LX cuius fide egregiaq, voluntate ac virtute locupletissimos testes habeo nuncipes eius prope vniuersos. Quamobrem mando tibi, vt ei statua tribuas, quo in loco agri Parmensis aptius quoq, commodius id fieri posse constitues: stipendiumq, des, que admodum solum est dari. Et praeter hac eum ita tractes, vt mihi esse plane charus videatur. Dat. xv. Cal. Iulij. Anno primo. Roma.

Guidoni Magno Magistro & conuentui Rhodio. 8

SCRIPSIT ad me Aconitanorum ciuitas nauentorum permagnam Byzantium euntem, cui Vincentius Aconitanus praeerat, mercibus Florentinorum et Pice-

tium onustam apud Melum insulam à Santolino Rhodio pirata nulla Reip. Florentinae, nulla huius imperij ratione habita captam atque abductam fuisse. Eam ego rem, ut debui agre molesteq; tuli, à vestris scilicet ciuibus, qui quidem omni tempore Christianae Reipub. propugnatores acerrimi omnibus ab hominibus sunt habitati, cum amicos & socios, tum etiam neccigales meos ita turpiter esse violatos. Itaq; te Conuentumq; istum tuum diligenter maximopereq; hortor, des quo celerius fieri potest operam, ut ea naus cum mercibus omnibus, quae quidem merces in ea erant tum cum est capta, earum dominis sine vlla impensa restituatur. Aiunt enim piratam illum sestertia centum sexaginta captiuis dimittendis, naus mercibusq; reddendis petisse. Id tu cum pro Reip. dignitate efficies, ut ea quae omnium Christianorum communis est mater, laesa proditaq; à tuis te, quasi gratum filium sui defensorem habeat: tum certè ut iustitiae seruias, ne cuiquam quicquam per tuos contrafas, contra equum, contraq; bonos mores auferatur. Sed omnino etiam ea te causa mouere debet maxime, ne istius societatis optimum sanctissimumq; adhuc nomen illustrisq; gloria notam hanc ignominiae contrahat. Quibus quidem causis rationibusq; omnibus illud adiunges, te in eo mihi, qui te summopere diligo, rem gratissimam esse facturum. Dat. xvi. Calend. Iul. Anno primo. Roma.

Magistratui Bononiensi.

9

MANDO tibi, ut Petro Flisco Cesena Magistratui cum militum numerum mittas, quem is abs te petierit, ad factiosos sceleratosq; latronum duces, quos illis in locis impune versari audio, compescendos & comprehendendos

dendos. Is enim animi nostri sensus est, vt qui male viuunt flagitiosiq; sunt, suorum scelerum pœnas luant.

Dat. XII. Cal. Iul. Anno primo. Roma.

Guid. Magno Mag. & Conuentui Rhodio. 10

SCRIPTIS prioribus literis, quibus tecum egeram de nauī Anconitanorum, quam Santolinus Rhodius interceperat, restituenda, certior factus sum præter eorum, quos commemorauī, Senensium etiam ciuium sericas laneasq; merces magni pretij ea in nauī fuisse. Quānobrem vt idem illud conficias, eo maiori studio te nunc hortor, quo nobilissimæ vrbis & nostri studiosissimæ deq; nobis optime merita ciuium damna detrimētaq; adiuncta sunt cum Florentinorum & Picentum iacturis. Itaq; ad eas hortationes, quas illæ meæ literæ continebant, magnum vt cumulum his additum literis existimes ad te Conuentumq; istum accendendum, vt eam curam procurationemq; suscipiatis, magnopere à vobis peto. Erit id mihi supra quàm dici possit gratum.

Dat. XIII. Cal. Iul. Anno primo. Roma.

Alfonso Duci Ferrariensium.

II

SItē non amarem, neq; tua mihi dignitas curæ esset, tamen pro reipub. maiestate te hortarer, velles Franciscum & Paulum ciues Vicetinos ex nobili portorum familia honestos homines quodq; maxime ad rem pertinet, sacerdotio adlectos, quos quidem ad urbem venientes captos in mari multos iam menses in custodia istic habes, aliquando tandem missos facere. Aequum est enim, vt qui omnium Christianorum omnibus in terris curam tuendorum conseruandorum gero, eorum, qui Romana in Cardinalium familijs, in ore Pontificum Maxi-

Et

morum,

morum, in sacerdotum collegio plures sunt annos laudabiliter versati, iacturas, incommodaq; non negligam. Nunc autem, cum ea beneuolentia erga te sit nostra, ut tuarum actionum fama nominis rationem habeamus, te etiam atque etiam eadem de re his duxi literis esse commonefaciendum. Peto igitur abs te, ne id viterius malum sinas progredi, quod cum tibi in primis dedecori est, dum quos vbique gentium tutos esse conuenit, ij abs te violantur, tum reip. fraudem indignitatemq; continet: quæ probos & egregios viros ac diu Romæ multa cum laude versatos sacris præsertim addictos male abs te haberi aut negligat, aut si non negligit, tamen ferat. sed ipsos quamprimum in libertatem restituas. Neq; enim qua fortasse ratio illos capiendi tunc fuit, quanquā quidem nulla adduci ratio eius rei satis iusta potest, ea nunc est etiam retinendi: cum non solum commercia cum nostris hominibus & locis tuæ oppida tuæq; populi habeant, sed tu ipse quoque fauore meo studio beneuolentia tuis iam in rebus non semel vsus fueris. Quamobrem nō vel Pontificis Max. ratio, vel meus in te amor parum apud te habere ponderis videatur, erit tuæ et prudentiæ ei probitatis, dare operam, ut ij ad urbem venire quamprimum possint. Dat. XII. Cal. Iul. Anno primo. Roma.

Magistratui Bononiæ.

— 12

QVONIAM satis confidimus omnes nostros militum præfectos paratissimos esse, quocunq; opus est, sine vlla mora proficisci: mando tibi, ut eos omnes eorumq; vicarios, qui istic sunt adhibeas, eisq; meis verbis denunties, ut ad urbem Veronam Maximiliano Imperatori contra Venetos defendendam se quamprimum conferant:

rant : qui quidem meritis de nobis est , ne eius ditionem
vllis ab hominibus vexari deripiꝫ permittamus . Quod
vt etiam facere libentius aggrediantur , recipere te eis
volo quantam alteram vnius anni stipendiorum partem
per Quastores eis nostros propediem datum iri . Dat.
XIIII. Cal. Iul. Anno primo. Roma.

Magistratui Rauennæ.

13

ALLATVM ad nos est Federicum Gonzagam
Francisci Marchionis Mantue filium , dum à me , ad
quem quidem officij causa venerat , in patriam rediens
iter per agrum Rauennatem faceret , ab agricolarum
magna manu , qui se in insidijs locauerant , ita exceptum
fuisse , vt parum abfuerit , quin ab illis trucidaretur : an-
cipitiꝫ fuga atque cursu extra illius agri fines se celeri-
ter eripientem , equos , vestem suam atque suorum vi ab
armatis interceptam direptamꝫ amisisse . Quod quoni-
am indignissimum factu est , et a nostra dignitate meoꝫ
studio alienissimum : qui non illum modo optime de me
meritum , sed omnes etiam , qui bene viuunt , homines
in huius reip. ditione tutos esse magnopere volo , mando
tibi , vt super ea re queras diligentissime , perscrutereꝫ
eius sceleris omnes partes , atque in reos animaduertas ,
quemadmodum tibi æquum & iustum videbitur : in pri-
misꝫ vt ablata omnia restitui cures Federici procurato-
ribus , si reperiri poterunt : vel eorum pretium , si distracta
fuerint . Quibus in rebus omnibus administrandis consi-
ciendꝫ ita te geres , vt egregij adolescentis , qui qui-
dem à me propter suam iam indolem & mores regio
nobilitatemꝫ generis paterna diligitur , detrimentis per
te atꝫ iniuria recte atꝫ abunde consulatur . Dat. VIII.
Cal. Iul. Anno pri. Roma.

Es 2

Maxi-

Maximiliano Mariæ Duci Mediolanenſium.

CERTIOR factus ſum Scipionem Eliſcum & Hieronymum Adornium at te atque ad Heluetios ſöderatos meos ex agro Genuenſi magnis itineribus contendiſſe vt te atque illos ad Octauiani Fregosij Genuenſium Ducis nuper lecti res cogitationesq; perturbandas excitarent. Quamobrem ſtatui has ad te literas quamprimū dare: vt intelligeres eum me virum propter eius plurimas excellentesq; virtutes magni ſemper feciſſe, atque vniuerſa noſtra cum gente atque familia omni officio neceſſitudinis coniunctiſſimum habuiſſe. Quas ad res acceſſit cum ipſius Octauiani, tum etiam Federici Archiepiſcopi Salernitanorum eius fratris viri omnium virtutum genere perornati, quem etiam inter ſacrorum noſtrorum miniſtros domeſticos aſciuiſſimus, in Romanos quidem Pontifices perpetuus cultus, in me verò egregia præter id ſingulariſq; obſeruantia & ſtudio: vt nihil ab illis vnquam prætermiſſum ſit, quod ab optimis ſpectatiſſimisq; hominibus & Pontificum maximorum ſtudioſiſſimis optari expectariq; potuiſſet. Itaque illos in fidem clientelamq; meam libentiſſime ſuſcepi, animoq; meo gratiſſimos ſanè atque chariſſimos habeo. Quapropter non ſolum te hortor, ſed etiam magnopere abſ te peto, vt cum his de cauſis omnibus, quas commemorauī, tum vel maxime, ne vltorius ea ciuitas tam egregia tamq; illuſtris nouis rebus excitandis perturbetur. Scipionem & Hieronymum contra Octauianum aliquid abſ te poſtulantēs ne audias, neue eos, quantū in te erit, impetrare ab Heluetijs quicquam ſinas hac in re: ſed perſuadeas
quieſce-

quiescere, tranquillitatemq₃ suā potius amare patria,
quod bonos viros facere egregiosq₃ ciues decet, quam
sua ipsorum desideria & cupiditates sequi. Quod si fece-
ris: tua in me obseruatiua consuetudine atque officio ma-
xime vsus fueris: remq₃ feceris tum & rectam per sese
& honestam, tum in primis & gratam & iucundam et
optatam: quemadmodum etiam tecum aget Fabritius
familiaris meus: quem ad te hac de causa his cum literis
misi. Dat. VIII. Cal. Iul. Anno primo. Roma.

Alfonso duci Ferrariensem.

15

MAGNOPERETE hortor, vbi si Raimundus Nea-
polis Porrex, qui exercitum fœderatorum cum imperio
habet, tormenta vlla bellica, quæq₃ ad ea exercendâ vsui
sunt, abs te petierit, eum tua ope iuues, commodessq₃ ei
quibuscunque in rebus poteris. Quod eo facere libentius
debebis, quod is tormentis illis ad defendendum Maxi-
miliani Imperatoris oppidum Veronam vti vult. id si
feceris quemadmodum te facturum confido, cum Ferdi-
nando Hispania Regi, tum erit mihi plane gratissimum.
De Maximiliano vero ipso optime præclareq₃ merebere.
Dat. VIII. Cal. Iul. Anno primo. Roma.

Eidem.

16

RES rationesq₃ omnes Archiepiscopi Rauenna com-
mendo tibi sane per diligenter, eaq₃ præsertim, quæ ad
immunitates eius pertinent. Is quoniam in primis cupit
possessiones emphyteoticas, quæ quidem ad Ecclesiam
suam reciderunt propterea quod qui eas habebant, pen-
sionem quam tenebantur, non persoluerant, neq₃ pactio-
nibus steterant, recuperandi sibi ius et potestatem dari, te
hortor, vt ei te tam facilem hac in re tamq₃ beneuolum

præbeas, ut quæ à religioso Principe impetrari fas est, ea
is abs te commendatione mea impetret. Dat. septimo
Cal. Iul. Anno primo. Roma.

Francisco Mariæ Urbinatium duci. 17

SCRIPSIMVS ad eam nostram militum equi-
tunq; manum, quæ Bononia atq; illi in locis hyemant,
ut quamprimum Veronam se conferrent, eamq; urbem,
quam velle aggredi Venetos intelligo, tueantur & mu-
niant. Quoniam autem puto fore, ut te quoq; cum tua
manu illuc accedere oporteat, volo ut te tuosq; omneis
viæ atq; itinere compares, ne quid more per te sit, quin
ei profectio, cum adnuero, præstare esse possit. Dat. quin-
to Cal. Iul. Anno primo. Roma.

Heluetiis, 18

SCRIPSI nudiustertius ad vos, quantoq; amore
Octavianum Genuensium Ducem complecterer, sanè
ostendi. Quem quoniam cum ipsum maxime, tum etiam
Federicum Archiepiscopum Salernitanorum eius fra-
trem familiarem meum mihiq; in sacrificijs assidentem
in meam fidem tutelamq; receperam, hortatus sum vos,
ne ullos homines contra eos quippiam apud vos molien-
tes audiretis, neque permetteretis eam urbem tam e-
gregiam tamq; illustrem bellis civilibus diu vexatam,
quæ sibi finem beliorum et laborum omnium in illo Duce
creando magnopere speravit fore, posthac ulterius novis
rebus excitandis conflictari: eaq; de causa Fabritium fa-
miliarem meum ad vos cum mandatis misi, qui vobis
mentem super ea re meam, quam ipsi aperueram, latius
atq; commodius explicaret. Nunc autem tametsi pro mea
in vos singulari beneuolentia, proq; vestro in Romanos
Pontifi-

Pontifices cultu existimem, planè vos quæ volo esse facturos: tamen quia certior factus sum, eosilem illos, de quibus ad vos scripsi, à suis apud vos postulatis non recedere, sed omni conatu contendere, vt Fregosios fratres & à re p. administratione prohibeatis, & domo expellatis: iterum vos hortandos monendosq; esse magnopere existimaui, nè quid omnino contra illos susciperetis. Ego enim qui quidem mores eorum & virtutes optime cognitas & perspectas habeo, vobis polliceor & spondeo, si id, quod peto feceritis, vos apud ipsos præclarissime posituros, suamq; illos beneuolentiam, si um nobis studium cumulatissime præstaturus: eiusq; rei vadem me pro illis apud vos constituo, nequid amplius dubitare possitis, quin si à vobis contra illos quis impetrare quippiam voveret, causam reijciatis. Nemo enim vobis illis fratribus amicior, nemo fide præstantior, nemo certe in officio constantior atque perseverantior est futurus. Quare totam hanc rem atq; causam ita vobis commendo, vt maiore studio & diligentia commendare nihil possim. Magni enim & nostra, & vestra, atq; in primis Maximiliani Mariæ Insubrum Ducis interest, eos fratres, de quorum fide probitate constantia magnopere confido, ei vrbi præesse: quæ magni sanè monenti ad res Italiæ vel turbandas, vel confirmandas semper fuit. Dat. quarto Calend. Iul. Anno primo. Roma.

Maximiliano Mariæ Insubrum

Duci.

19

[E]t si existimem ijs te literis lectis, quas Fabritio familiari meo ad te dedi, psoq; audito in causa Fregosiorum ea quæ volo est facturum: tamen quoniam postea in-

tellexi te arcem Genuæ ab Octauiano petere, eamq³ vel-
le tuis militibus communire, vt securus esse possis eum te-
cum in officio futurum : has alteras etiam dandas ad te
litteras duxi, quibus te commonefacerem, nequid animi-
no contra Octavianum statueres propter eam causam.
Ego enim, cui tota eius viri vita, natura, mores omnes
perspectissimi sunt, quique tum ipsum, tum Federicum
Archiepiscopum Salernitanorum eius fratrem mea fide
& clientela sum complexus, spondeo tibi, meq³ recipio,
fore vtrunque tui studiosissimum : ne quid tibi posthac
dubitandum sit, quin omnes contra illos quippiam abs te
postulantes reijcias. Nemo enim illis tibi vel in bene-
uolentia officiosior, vel in fide atque perseuerantia con-
stantior, vel in reddenda gratia diligentior, vel in
vicinitate vtilior & fructuosior est futurus. Itaque
non iam nostra modo & Reipubl. dignitatis maiesta-
tisq³ interest Octauiano & Federico nihil abs te labo-
ris nihil molestiæ adhiberi: sed maxime etiam tua, qui ab
optimis illis fratrib. et magni erectiq³ animi viris et sum-
ma prudentia summaq³ integritate præditis hominibus,
quodad illi ciuitati perunt, sperare debes plurimas te vi-
litates adiumentaq³ esse maxima atq³ firmissima pceptu-
rū. Quas ob res omnes si non solū mihi rem grauissimā,
sed tibi quoq³ maxime cōmodā maximeq³ salutarem fa-
cere vis, eos fratres ad illius Reipub. administrationem à
suis ciuib. vocatos non modo non vexabis ipse: sed si qui
erunt, qui id facere quoquo modo animati sint, etiam de-
fendes. Dat. quarto Cal. Iul. Anno primo. Roma.

Francisco Mariæ Metaurensum

Duci,

20

DECURA

DE cura studio diligentiaq³ tua in Fani Fortune
 municipiū sedandis factionibus adhibita, de qua certior
 factus sum multorum sermonibus & literis, epistolāq³
 tua grauitē & prudenter scripta: scire te volo, mihi in
 eo rem gratissimā te fecisse. Nihil enim aq³ cupio,
 quā ut populi, quibus præsū nulla inter se odia, nullas
 simultates exerceant: sed mutuis animorum studijs &
 beneuolentia coniungantur. Verum quia non solum bo-
 narum rerum fundamenta iacere, sed eas etiam altius
 construere ac plane perficere oportet, etiam atq³ etiam
 te hortor, ut adhibitis, si tibi videbitur, ad consiliorum
 tuorum administrationem teq³ leuandum laboribus E-
 piscopo Polycastrensi & Bernardo Cardulo familiari
 meo, opus iam abs te præclare inceptum erigas, produ-
 casq³ ad summum: desq³ operam, ut illius oppidi ciuium
 omni ex parte odia simultatesq³ sedentur ipsos quibus-
 cunq³ voles luendis pœnis dandisq³ cautionibus obstrin-
 gendo. Volo enim tibi liceat omnia facere atque consti-
 tuere super ea re, perinde atq³ mihi si adessem liceret:
 non solum ratum, sed plane etiam gratum habiturus,
 quicquid statueris, egeris, iusseris: dum id vnum abs te
 contendatur, ut earū inimicitiarum et factionum, quas
 extinguere et aboleri cupio, nulla porro semina, nulla rena-
 scendi facultates relinquantur. Quod si quemadmodum
 de tua virtute confido, ita rē confeceris: præterquam q^d
 erit id mihi supra quā dici possit gratum, Resp. tibi et-
 iam multum debebit. Quarto Cal. Iul. Anno primo. Ro.

Maximiliano Romanorum Impera-
 tori designato.

21

HERI quemadmodum Deo Opt. Max. placuit, qui

Ee 5

delin-

delinquentium interitum non vult, sed vt eos pœniteat
 & viuant, Bernardinus Caraiialis Episcopus et Federi-
 cus Seuerinus Diaconus Cardinales, quos antea propie-
 rea quod in Dei Ecclesia sacrosancta atram pernicio-
 sang, scismatis nebulam excitauissent, Pisannūq, Con-
 cilium constauissent, Iulius Secundus Pontifex Max.
 Cardinalatus amplitudine ac munere sacerdotijsq, om-
 nibus multauerat, priuatosq, reddiderat, aura Zephiri
 cœlestis afflati ad veram pœnitentiam reuertentes fre-
 quenti fratrum meorum Cardinalium Conuentu popu-
 lari in veste ad pedes se nostros demissi supplicesq, pro-
 iecerunt, veniamq, suorum erratorum & delictorum
 precibus omnibus petuerunt, paratosq, se dixerunt esse,
 quam ipsis cunque pœnam statuissimus, eam luere &
 perpeti animis libentissimis: pollicitiq, sunt se post hac sa-
 cro Lateranensi Consilio semper ad hâsuros, semper mea
 fratrumq, meorum voluntati mandatisq, obtemperatu-
 ros. Quod ipsum tamen si antea per eam schedam manu
 sua scriptam fecerant, quæ in postremo eiusdem Concilij
 die perlecta pœnitentiam eorum humilitatemq, decla-
 raunt: idem tamen multo quidem clarius atq, apertius
 presentes egerunt: Pisanoq, Concilio repudiato altera
 à se perlecta scheda pleniore scilicet expressiorisq, sen-
 tentis planeq, submissioris, quæcunque in ea acta essent,
 damnauerunt magnopereq, improbauerunt. Quam-
 obrem, nos quos quidem ea lege vniuersæ Christianæ
 Reip. Deus proposuit, vt nemini vere pœnitenti pietatis
 suæ, cuius nos ministros esse voluit, fores occluderemus,
 humilitatem eorum, confessionem, pœnitentiam gratif-
 simum Deo sacrificium sperantes futurq, eos ambos pa-
 terne

terne quidem antea reprehensos atq; castigatos eorundē
Cardinalium cōsensu ad Cardinalatus officium dignita-
tem sessionemq; qua prius utebantur, restituiimus. Quod
eo libentius feci, quod perniciosum illud scismatis vulnus,
quo tunc Ecclesia Dei scissa disiecta q; ab illis nō solus fuit,
eorum duorum ad verā poenitentiam reditu coire plane
iam sanariq; videbatur. Ad cuius quidē scismatis nomen
extinguendum atq; delendum ipse certe negligetior ac
dissolutior si fuisset, tuæ tamē prudentes hortationes me
in primis excitare potuissent, ut nihil pratermitterem, qd
ad negotium consiciendum ad exitumq; perducendum
posse aliqd afferre opis ei facultatis videretur. Itaq; cum
per me ipse nihil aequē vnquā optauissem, q̄ in Dei sponsa
vultu eam notā cicatricemq; aboleri, te hortatore liben-
tius atq; proclivius in eam cogitationē incubui, ut eos vi-
ros, quos cōmemoravi, ab alienatos dudum à Rep. descen-
sentesq; ad veritatis fontem recta redeuntes via amice
paterneq; exciperem. Qua omnino de re non solum nos,
sed vniuersa vrbs visa est magnam voluptatem cepisse,
se q; admodum audito eiusmodi humilitatis poenitentia
restitutionisq; nuntio exhilarauisse. Ipse autē maximas
Deo gratias cum egissem, qui suos de alienis facit, quiq;
nobis dedit tanti sceleris comprimendi facultatem, hac
tibi omnia in primis duxi esse significāda: quem quidem
pro tuo in Remp. conseruandam atq; amplificandam cu-
ra studio diligentia labore plane scio libenti animo has
litteras perlecturum: in quibus erit vtrarumq; de quibus
mentionem feci, schedarum & cum ijs abolitionis no-
stra eorum peccati, restitutionisq; ad priorem statum ex-
emplum: quo cognoscere singula melius atque facilius
possis.

possis. Te verò: tametsi minus id quidem necesse est facere me, sed pro meo in te studio mihi tamen faciendum puto: amantiſſime ſanè hortor, vt, quod adhuc quidem ſemper feciſti, poſt hac etiam facias, piamq; matrem omnium Deum amantium Eccleſiam, cuius proteſtenda cauſa poſt Chriſti vicarios maximum ipſe in terris ma-
giſtratum geris, ab omnibus eius pacem atq; concordiam perturbantib. vindices atq; defendas. Dat. quarto Cal. Iul. Anno primo. Roma.

Petro Bibienæ apud Venetos

Internuntio.

22

INTELLEXI Pontechianos, qui vicus in Rodi-
gienſi eſt Hadriana diœceſcos, nolle Aloſii Durantis
ipſorum phano præfecti procuratoribus eo fructus deci-
masq; perſoluere, qui fructus quæque decime ad eum iu-
reſpectant, idq; pernegare ſe facturos. Quod quoniam et
periniquum quidem eſt, & à noſtra dignitate valde a-
lienum, inando tibi, vt Leonardum Lauredanum Vene-
tiarum Principem meis verbis moneas, ne permittat ad
templi ſui fructus percipiendos ullis ab hominib. Duranti
moram fieri: mandetq; magiſtratibus, dent operam, vt
nihil poſthac moleſtiæ Pontechiani eius procuratoribus
exhibeant. Ea in re tota omne tuum ſtudium ſic adhibe-
bis, vt non videar fruſtra ſcripiſſe. Erit & hoc honeſtum
ipſum per ſe, & mihi in primis gratum: illi autem etiam
neceſſarium, qui ex ijs prouentibus ſe ſuſtentat. Dat.
prid. Cal. Iul. Anno primo. Roma.

Maximiliano Mariæ Mediolanenſium

Duci.

23

ALLATVM ad nos eſt, ſebaſtianum Bonum, Vin-
centium

tium Venerium, & Bernardinum Taiapetram ciues Venetos, cum captiui apud Gallos quatuor ipsos annos fuissent, missos tandem factos, e^q₃ Gallia in patriam redeunt in tuo regno iterum captos fuisse, esse^q₃ nunc apud Iacobum Galeranium Mediolanensem ciuem in custodia. Quod quoniam per se quidem illiberale admodum est, à tui vero nominis gloria etiam abhorrens, eos, qui nullam partem militia attigerunt, qui^q₃ per tua loca, quo magis tui essent, iter faciebant pacis & quietis homines à tuis male haberi: etiam at^q₃ etiam te hortor, velis eos sine vlla mercede quam primum missos facere. Quæ res eo etiam erit iustior, quod Mediolanenses ciues tui apud Venetos tam secure tam^q₃ libere degunt, quàm Mediolani: neque illos quisquam captiuos vllis in eorum locis facit. Vterer pluribus verbis nisi res satis per se ipsa loqueretur. Vnum addam, quod quanti tibi faciendum sit, statues ipse: si Venetos liberaueris, occasionem eorum reipub. eripies male in tuos cogitandi. Dat. quinto Non. Iul. Anno primo. Roma.

IOACHIMO MARCHIO-

NI BRANDEBVR-

genſi.

24

LITERAE tuae, quibus mihi de Pontificatu Maximo gratularis pergrata mihi per^q₃ iucunda fuerunt. Nam et tuum in remp. obsequium at^q₃ cultum, & in me ipsum veterem obseruantiam & studium præ se tulerunt. Itaq³ si quid erit, in quo amplificare tua commoda tuam^q₃ dignitatem possim, meam tibi operam in eo libentissime polliceor. Quod autem mihi Ioannem Plancheselem iurisperitum procuratorem tuum doctum sane homi-

hominem, & prudentem virum, & agendis rebus in primis idoneum diligenter commendas, facis & ex more boni Principis, & ex ipsius, ut mihi videtur, meritis. Quamobrem & complector iam illum libenter per me ipse, & posthac tua commendatione mihi erit etiam charior. Dat. v. Non. Iul. Anno primo. Roma.

MAXIMILIANO MARIAE IN-

SVBRVM DVCI.

25

IOANNIS Galeatij Corrigijus, quod super oppido Castellatio, cuius est ipse dominus, vel, ut vulgo dicitur, Comes, ratione dotis avita habet, tibi magnopere commendo. Is eo oppido à Gallis vi atq; iniuria expulsus, quo primum tempore rebus Mediolanensibus sunt patiti, nunc, cum tu illos è tuo Regno expulisti, restitui per te in eius oppidi possessionem cupit: speratq; fore: ut id, quod optat, nobis commendantibus facile assequatur. Ea opinio ne eum fallat: abs te peto cum ipsius, quem vnicè diligo, causa: tum maxime tua: ut in ista tua surgenti adhuc atate ea fundamenta iacias optimi iustissimiq; Principis ut à te quilibet, quod sui iuris sit, facile se obtenturum existimet, eaq; de causa et hominibus omnium Principum charissimus, & Deo Opt. Max. omnium hominum gratissimus esse possis. Dat. Non. Iul. An. 1. Rom.

FRANCISCO MARIAE ME-

TAVRENSIVM DVCI.

26

CONCESSERAM superioribus diebus Ioanni Mariae Germano viro artis musices peritissimo meoq; familiari sane perueteri arcem Verruchianam per Vicarium custodiendam. Nunc autem quoniam certior factus sum veterem arcis praefectum oppidanosq; ipsos omne studium

dum adhibituros esse, ne is aut eius Vicarius ad arcis custodiam admittatur, te hortor, vt Ioanni Maria tantum auxilij tui des, quantum ei satis sit ad ineundam illius arcis custodiam. Datum octauo Idib. Iulij. Anno primo. Roma.

MAGISTRATIBVS BONO-

NONIENSIBVS.

27

Ad ea, quæ nouissime Bernardo Bibienæ Quaestori meo scripsistis de ijs, qui se defendunt moramq; faciunt restitutioni de rebus Bentinolorum fiendæ, appellationibus Romæ interpositis, alijsq; eiusdem modi adminiculis nixi, ita vobis & respondeo breuiter, & mando, vt ea tantum vobis curanda esse tractandaq; statuatis, quæ in nostris ad ipsos Bentinolos fratres literis, quarum exemplum ad vos misimus, continentur: neq; vllius hominis tergiversationes & mora, quæ contra eas concessiones fiant, vobis impedimento sint, quo minus quæ imperaui, per vos consiciantur, ad exitumq; perducantur. Datum 7. Id. Iul. Anno primo. Roma.

MAXIMILIANO MARIAE ME-

DIOLANENSIVM DVCI.

28

GRAVITER ac permolesce accepi, te Fabritio familiari meo ad te propterea misso, vt tum Episcopo Comensi, tum Petro & Augustino & Philippo Riultijs fratribus possessiones bonorum vel hereditatum creditone vel alijs nominibus iure quasitorum per te illis impedita restituerentur, respondisse te, quæ feceris, iure fecisse, scireq; te nos ita iudicatuos fuisse, si rem atq; causam intellexissemus: misisse autem te magnis itineribus Romam cum literis certum hominem, qui me omnibus de rebus

rebus doceret. Nam neq³ vllas abs te literas accepi, neq³ tuorum vidi quempiam : qui etiam si nulla itineris celebritate vsus esset, Roma tamen esse hoc temporis potuisset. Vereor autem, ne dum abs te facti rationem expecto, frumenta eorum interea per tuos & messes, quæ adhuc quidem in agris sunt, & diripiantur, & distrahantur, eaq³ de causa sint ista interposita moræ. Quid enim in te admittere ij, qui apud nos viuunt, qui nobis præsto sunt, qui Reip. operam suam dant, fratres Episcopu³ potuerunt? De eorum propinquis & necessarijs, si in aliquo deliquerunt, nihil tibi mando, quo minus in eos animaduertas, vt voles. Tametsi nihil Principe viro dignius, nihil est altis erectisq³ animis magis proprium liberalitate atq³ clementia. Hos, qui Romæ degunt, qui nostros ob oculos quotidie versantur, quiq³ in Dei Ecclesia, in ipsa Petri puppe nostro se ministerio dediderunt, eos quidem & tuendos mihi esse magnopere existimo, & nisi per tuos impediri rectas & cogitationes, & actiones meas pateris, sane tuebor. Nam velle te eis ire ipsum obuiam, existimare nullo modo possum. Veruntamen quoquo modo se res habet, non hortor modo, sed etiam atq³ etiam abs te peto, vt vel iustitiæ inductu, quam quidem tueri ipse omnibus modis debes, vel meo, qui tuas res omnes paterno amore charitateq³ sum complexus, atq³ ita complexus, vt nullas magis, sine vlla excusatione aut mora eorum, quos commemoravi, bonorum possessiones vniuersas atq³ integras ipsorum procuratoribus mandes restitui, tum etiam reponi, siquid ablatum interea fuerit. Ne ipse, qui pro tuo statu dignitateq³ tuenda, atque conseruanda nihil pratermitto aut cogitationis, aut studij,

aut laboris, aut certæ benevolentia, homines honestissimos mihiq; charissimos ac bene de me meritos male à tuis habitos tueri apud te atque defendere non possim: nèue mihi toties eadem ad te de re sit scribèdum. Quod quidem quam indignum sit, existimare per te ipse facile potes, atque vt existimes sane velim: quàm verò agre à me molesteq; feratur, idem tibi Fabritius exponet: quem ad te propterea remitto. Sexto Id. Iul. Anno primo. Roma.

Altofaxo exercitus Heluetio-
rum Duci.

29

C V M de tuo forti magnog; animo & in nos propensissimo, & à M. Cardinali Seduno, qui de te nobiscum saepe summa cum tua laude ac dignitate est loquutus, & fama ipsa ac rumore nuntio, ea quæ de claro & excellenti viro dici possunt, auribus libentissimis audierim, & virtutem tuam plurimi facio, & te magnopere diligo. Itaque filium tuum ab eodem Cardinali mihi tuo nomine diligenter commendatum in ipso iam paterna nostræ charitatis sinu collocatum esse existimare te plane volo, ornaturus iuuenem, cum primum se occasio nobis dederit, ijs ornamentis, quibus perspicere possis quantum te amen. Neque tamen non te ipso etiam multo maioribus aliquando præmijs atque muneribus afficiam, vt agnoscere meam erga te voluntatem omnibus in rebus facile possis. Horror autem te, vt quem adhuc quidem te in Dei ecclesiam Romanosq; Pontifices præbuiisti, eundem posthac etiā præstes: gloriamq; tuam, q̃ es pie fortiterq; agendo consequutus, eisdem artib. non conserues solum, sed etiam augeas. Dat. quarto. Id. Iul. Anno pri. Roma.

Ff

Ansell-

PETRI BEMBI
ANSELMO GRAFESIO

ACOLYTO.

30

STVDIVM & diligentia in rem Romanam atq;
nos tua mihi sane gratissima accidit: quemadmodum
cum M. Cardinali Seduno loquutus sum, qui mihi saepe
de te honorifice multa narravit. Itaque te sublegi ad ea
sacerdotia, qua putavi ex tuo usu animoq; salute tibi
fore: cuius rei literas ad te confectas mitimus, ut & be-
ne sperare de nobis possis, & in tuo erga nos officio post-
hac libentius constantiusq; permaneas. Dat. quarto Id.
Iul. Anno primo. Roma.

PETRI BEMBI EPI
STOLARVM LEONIS DECL
MI PONT. MAX. NOMINE
scriptarum.

LIBER QVARTVS.

HELVETIIS LIBERTATIS EC-
CLESIASTICAE DEFENSORIBVS
fœderatis nostris.

I



QVIDEM cum in ea victoria, quam
superioribus diebus maximam estis atq;
clarissimam consequuti, vnum illud vel
pro natura mea sensu & lenitate, vel
pro credito mihi communis parentis atq;
Pontificis munere doluerim, tantum scilicet humani san-
guinis effusum esse, tantam Christianorum hominum

manuum

manum tamq̃ fortem cecidisse: valde tamen vehemen-
terq̃ later, vos, qui Ecclesia Romana libertatem defen-
dendam tuendamq̃ suscepistis, vestros eiusdem liber-
tatis hostes fugauisse propeq̃ deleuisse. Qua ex rema-
gna vos gloria magnaq̃ vtilitates sunt subsequuta.
Neq̃ enim minorem ex vestris commodis honoribus in-
crementis voluptatem capio, quam par est patrem cape-
re in optimorum & charissimorum filiorum prosperis fe-
licibusq̃ rebus. Illud etiam me voluptate magnopere af-
ficit, quod qui legitimam Dei sponsam vexare, inconsu-
tilemq̃ Christi tunicam scindere sunt aggressi, quos
quidem antequam in eam cogitationem atq̃ scelus ani-
mum induxissent, omnium rerum florere videbamus, vt
primum se malis conatibus dediderunt, infeceruntq̃
scismaticis prauitatibus, imprecationumq̃ Iulianarum
iustissimis vocibus tacti percussiq̃ sunt, statim illis amare
omnia infelicerq̃ ceciderunt: partaq̃ ab ipsis gloria si-
mul cum regno ad eos, qui aut Ecclesia Romana pa-
rent, aut eam tuentur, facile transit. Quibus de re-
bus omnibus ago maximas immortalis optimoq̃ Deo
gratias, agamq̃ diu viuam: qui ab alienatos a se de-
sciscientesq̃ respuit: suos aut iacentes subleuat, aut
stantes non deserit. Vos autem, quos idem Deus sua
voluntatis esse ministros voluit, charissimos animoq̃
meo sensibusq̃ omnibus planè habeo coniunctissimos.
Neq̃ vos moueant improborum voces, quæ vt intelligo
iactantur temere illa quidem atq̃ iniuste, nos reliquosq̃
fœderatos nostros compositis & pacatis rebus, vestrum
praterea nomen vestramq̃ beneuolentiã non curaturos.
Nam me quidem ab eo fœdere, quod mihi vobiscum est,

quo ad vos non pariterbit, nihil profecto abducat. Quin illud et adies noctesq; cogito ac verso, quonā vos pacto cum omnibus fœderatis mihi regibus ac populis commun-ctos facere atque fœderatos possim: ut & securiores esse maiori fultiprasidio possitis, & eorum omnium adiu-mento & conspiratione ornatiores. Quod Dei benigni-tate brevis futurum confido. Itaque hoc sic habetote, ut de mea prona propensaq; ad vos amandos ornandosq; voluntate studio beneuolentia vobismetipsi omnia polli-ceamini, quæ expectari possunt ab huius reipub. Prefecto vestri nominis amantissimo vobiscumq; consociatissimo. Hortor autem vos, planeq; à vobis etiam atq; etiam pe-to & postulo, ut quemadmodum adhuc quidem egregie laudabiliterq; fecistis, seduci vos ab alienariq; à nobis quorundam maleuolorum artibus posthac ne permitta-tis: sed contra erigatis potius diligentiamq; vestram ea in re etiam adaugeatis. Quibus de rebus omnibus Ennius Episcopus Verulanus aget vobiscum latius. Dat. Prid. Id. Iul. Anno primo. Roma.

MAXIMILIANO MARIAE IN-
SVBRVM DVCI.

INTELLEXI, quod quidem mihi permolestum accidit, te quorundam non optimorum hominum horti-ationibus Augustinum Panigarolam Genuensem virum egregia virtute et iuris civilis scientia in primis clarum, vna cum eius filio comprehendi à tuis custodiriq; iussisse, cum existimares vera esse posse, quæ de eo iactabantur, ipsum scilicet contra te ditionemq; tuam cogitauisse fa-cereq; voluisse. Quam rem cum melius intellexisses, ne-que quicquam vere ab eo contra te perpetratum compe-risses,

visse, laxiorem ei te carcerem dari mandavisse: fortasse etiam nihil in illum durius atq; acerbius præterea cogitare. Id autem non statim ab initio intellectum est. Itaque primus eius rei nuntius mihi, ut dixi, molestissimus fuit. Secundus aliquantum de mea priore molestia detraxit. Verum quoniam cum virum propter eius egregias plurimasq; virtutes & excellentem doctrinam & amavi multum quidem antequàm essem Pontifex Maximus, eiusq; in me benevolentia opera studio multis in rebus usus sum, & nunc etiam, uti certis in causis maximis atque gravissimis cogitabam, eramq; ad illum ijs de rebus literas iam daturus: te quantum consequi amore erga te meo possum, hortor, ut quicquid illud est, quod superest aut suspicionis aut cause, quin illum missum facias, id omne, mihi remittas & condones, ipsumq; Augustinum & eius filium rogatu meo statim non solum restitui mandes suis, sed etiam eo loco habeas apud te, quo habebas antea, tuamq; illi benevolentiam integram atq; solidam reddas: quemadmodum & ipsius virtus meretur, & mea in te charitati largiendum est: ut eo viro uti, atque illi ea, quæ volo, curanda tractandaq; mandare quamprimum possim. Erit id mihi tam gratum, ut nihil gratius. Dat. xv. Cal. Aug. Anno primo. Roma.

LVCRETIAE DVCI FER-

RARIENSIVM.

3

COGITATIONES tuas ardoremq; mentis & propensum ad religionem studium & amavi antea, plurimiq; semper feci, pulchrum atq; arduum existimans te in magna deliciarum omnium affluentia propter domesticam amplitudinem splendoremq; positam contine-

re in timore Dei cogitationes tuas, dareq; te in omnia pietatis officia, erectoq; animo cœlestia aternaq; spectare. Et nunc studium idem tuum prosequi amplectiq; favore aliquo meo capiens, id, de quo me diligentissime rogas, feci ut quaecunq; tibi & Alexander VI. & Iulius Secundus Pontifices Maximi ad tuae animae salutem spectantia suis ad te datis literis concesserunt, aut etiam quoquomodo tibi condonauerunt, ea omnia vi recte rationabiliterq; concessa magnopere probarem. Quod quidem & si erat ipsum satis amplum per sese ad id, quod optas consequendum: tamen quo melius atq; facilius voluntatem erga te meam perspicere possis, quatenus opus sit, eadem illa tibi ipse etiā concedo & largior. Quorum omnium sensum non secus, atq; si cum his in literis expressissem, certum & ratum haberi volo: deleoq; quicquid officere huic meae vel confirmationi, vel concessioni atq; muneri potest. His autē ad te dandis literis eo pronior fui, quod te spero de cœlesti Dei gratia deq; bonitatis eius fonte vberius haurientem in illius purum cultum, atq; in omnia laudabilia et illi grata studia animaeq; tuae salutaria libentius etiam posthac atq; ardentius quotidie ituram. Reliquum est, ut tibi persuadeas, me earum rerum omnium, quae honestam tui animi voluptatem, commoda praeerea incolumitatemq; tuam contineant, nihil tibi vnquam negaturum. Dat. XIII. Cal. Aug. Anno primo. Roma.

Herculi Marefcotto Bononiensi. 4

GRATAE mihi tua litera fuerunt: & amo enim te quidem ipse: & ex te mihi omnia sunt iucunda. Itaq; velim tibi persuadeas carissimum te mihi esse. Quoniam
autem

antem certior factus sum Iohannem Aloisium & Aemilium liberos tuos haud ita moderate temperatèrque vivere, ut ex te natos decet: de quib. meminisse potes quem tecum sermonem habuerim, dum Bononia Legatum agerem: volo ut illos Romam mittas tantisper, dum continere discant sese, paternamque atque virtutem atque molestiam imitari, quos quidem pro eo, quo te complector animo, & libenter videbo et tuebor diligentissime. Dat. X. Calend. Aug. Anno primo. Roma.

MARCO ANTONIO

C O L U M N A E.

5

ALLATUM ad nos est, te certis hominibus locum ad certamen singulare, tuis in oppidis, quae oppida in huius reipub. imperio sunt, concessisse. Id quoniam est contra Iulij Secundi Pontificis Max. literas, quibus in literis eam certaminis rationem gravissimis poenis interdictum: mando tibi ut nullo pacto tuis in oppidis atque locis certamen aliquod singulare permittas fieri: easque de quibus dixi, Iulianas literas omni ex parte & ipse per te ratas habeas, & haberi mandes à tuis quarum exemplum his cum literis ad te misi. Dat. VIII. Cal. Aug. M.D.XIII. Anno primo. Roma.

MAGISTRATVI ET XL.

VIRIS BONONIENSIBVS.

6

QUONIAM & urbem Bononiam singulari benevolentia sum complexus, & eius urbis ciues incolasque omnes pacate atque tranquille posse degere maxime cupio: eos homines abesse ab ea urbe volui, quibus praesentibus vos minus odijs civilibusque seditionibus vacuos putabam fore. Nunc autem cum intelligam

Ff 4

redire

redire Bononiam quotidie sine venia concessioneq³ nostra nonnullos ex illis ipsis, quos dico: ea res cum propterea quod contra voluntatem meam in primis est, tum vel maxime quod sine fraude istius ciuitatis & bonorum offensione accidere non potest, ferenda mihi esse nullo pacto videtur. Itaq³ volo edicoq³, vt qui dolo malo non datis cautionibus, spretusq³ eis conditionibus, quæ in nostris de Bentiuolorum restitutione scriptis literis continentur, ad urbem istam reuertuntur, ij animaduersionibus per magistratum adhibitis puniantur, vt & ipsorum retundatur audacia, & reliqui discant nihil contra concessiones nostras audere. Eorum si quis erit, qui non tam malitiose, quàm inconsideranter, neque malo animo redierit ad suos: is exire confestim iubeatur de Bononia finibus. Præterea quoniam certior factus sum illis plane absentibus, quos abesse in primis volui non de fore in ista ciuitate, qui sese in eorum locum ipsi subrogent, libidinemq³ pro temperantia, audaciam pro virtute exercentes sibi vnus omnia licere arbitrentur: his vos literis commonefacio, vt eam animorum improbitatem esse vobis comprimendam statuatis modis omnibus, qui a iustitia proficiantur, idq³ in primis curandum, vt quæ iustis de causis à magistratu imperantur, ea quamprimum explicentur, consicianturq³ non secus, ac si essent me præsentem imperata: neque aliquis sit, qui ea negligat: quos quidem esse sæpe multos intelligo. Id si feceritis, temeritatemq³ certorum hominum vestrorum ciuium surgentem ac iam plane nimium lasciuientem compescueritis mos certe, consuetudo, lenitasq³ mea nihil immutabitur. Sin autem, quod vereor, indulgentia vestra de sua insolentia,

lencia, vestri, qui male viuunt, ciues nihil remittent, cogar ipse ea, quæ mihi opportunior esse videbitur, ratione publicæ istius vr̄bis indemnitati salutiq; consulere: Ea enim mens est nostra, vt paucorum hominum causa populorum pax atq; tranquillitas ne impediatur. Dat. VIII. Cal. Aug. Anno primo. Roma.

MAXIMILIANO MARIAE

INSVBRVM DVCI

7

EXISTIMABAM te & meo rogatu & publicæ vtilitatis causa permotum Octauiani Fregosii Genuensium Ducis rebus nullum negotium, nullam omnino molestiam allaturum, vt primum certior factus esses, illum fratremq; eius Federicum Salernitanorum Archiepiscopum in meam societatem esse receptos: illosq; & fuisse antea mecum & cum mea familia vniuersa omni necessitudinis genere coniunctissimos, & nunc amari à me ita paterne, vt eos apud me in optimorum et charissimorum filiorum loco positos habeam. Putabam enim eos omnes, quos amarem tuererq; ipse, eosdem abs te non minus tutos esse, quam sint à me vel tui omnes, vel ipse tu: cuius incolumitas quantæ mihi cura semper fuerit, non dicam, ne videar, beneuolentiam erga te meam verbis repetens, de tuo in me studio minus liberali velle conqueri. Nunc autem cum intelligam ipsum Octavianum sollicitari à tuis posteaquam non vnas à me ys de rebus literas acceperis, petiq; tuo nomine quandam pecuniæ summam ab eius legatis, si se tutum esse à tuo imperio vult, non potui non a gre molesteq; ferre istam indignitatem: quam tamen ipsam proficisci abs te vix adduci possum vt existimem. Itaq; illam in tuos ministros libenter reocio.

Ff 5

Verum

Verum utcumque se res habet, te quo maiore studio possum, hortor, neq; solum hortor, sed plane etiam commonefacio, vel mando potius, eo more scilicet, quo qui amant, ijs, quorum amantes sunt, mandandi ius habent æquisimum atq; optimum, ne permittas Octavianus rebus tua causa quicquam molestie adhiberi: quæ tam mihi cura nunc quidem sunt, quàm res Florentiæ atque nostræ, neq; minus cordi vnquam fuerunt, quàm ipsa tue semper fuerint. Sed potius si qui sunt, qui id facere conentur, eis tu aut persuadeas ne faciant, aut quantum in te est, prohibeas: existimesq;: si modo ea cogitatio mouere animū tuum potest, vt Octauiano etiā amicus auxiliatorq; velis esse: nulla te in re æquè de me mereri posse, ac si illi te beneuolum beneficiumq; prabueris. Iis autem virtutibus cum Octavianus ipse, tum eius est frater præditus, nullum vt officium ponere melius queas, quàm quod in eorum beneficio posueris, etiam si socij nostri non essent, nosq; ipsi pro eorum incolumitate dignitateq; vel cōseruanda vel etiam augenda non laboraremus. Quod si vnquā quicquam operæ in eorum commodum quietemq; adhibuisti, quod ab initio ex ipsis intelligebā fecisse te scire te plane volo, id mihi tam esse gratum, quàm quod gratissimum.

Dat. IX. Cal. Aug. M. D. III. Anno primo. Roma,

MARCO MVSURO

CRETENSI.

8

Cum magnopere cupiam Græcorum sermonem & Græcas disciplinas iam prope abolitas atq; deperditas restituere, & quantum in me positum est, consulere bonis artibus: exploratumq; habeam et præstanti te doctrinæ & iudicio esse præditum singulari: mando tibi, vt suscipias

suscipias diligentem curam adducendi ad nos è Gracia decem aut duodecim aut sane quod voles ipse, liberalis ingenij bonaq; indolis pueros: vnde Latinis hominibus lingua illius verus germanusq; vsus, rectaq; cognitio, & tanquam seminarium quoddam bonorum studiorum commode confici & comparari possit. Quae de re Ioannes Lascaris vir propter suas virtutes & multam ijs in literis doctrinam mihi valde charus scribet ad te pluribus verbis. Te verò pro tua vetere in me obseruantia, quae opus esse ad eorum studiorum rationem & hanc rem, quam paro, cognoueris, sanè confido summa diligentia curaturum. Dat. VIII. Id. Aug. M. D. XIII. Anno primo. Roma.

VERRUCHIANAE AR-

CIS PRAEFECTO.

8

CUM mea voluntas sit vt te tibi de salario, quod ex custodia arcis Verruchiana debetur, integre satisfiat: itemq; siquid aliud est, quod ad te iure aliquo spectet, de eo tibi pro iustitia consulatur, vt sine tuo damno arcem ipsam vel Ioanni Mariae familiari meo, cui eam arcem concepsi, vel eius procuratori tradere possis: mando tibi, vt sine vlla excusatione aut mora ad nos venias: vt ex te intelligere possim, quae volo: dabitur autem à me, opera, vt rebus tuis compositis Roma proficiscare, Dat. tertio Id. Aug. Anno primo. Roma.

MAXIMILIANO IMPE-

RATORI DESIGNATO.

ANTONIVM Cominatum, quem ad me misisti, & vidi & audiui libentissime cum propter ipsius virtutem & in rebus, quas mecum egit, enuntiandis miris-

cant

cam prudētiam, tum vel maxime quòd abs te veniebat, à quo nihil mihi esse non gratissimum potest: Eum autem cum celeriter confectis constitutisq³, de quibus agendum erat, rebus ad te remittere maxime cuperem, tamen ea fuerunt eiusmodi vt is propter temporum difficultatem, dum diem ex die ducimus spe expectationeq³ ea, quæ volebamus, ex sententia conficiendi, suum ad te reditum meo iussu ad hoc die distulerit. Quanquam quidem non illum idcirco nunc ad te remitto, quod omnia, quæ per me confici cupiebas, confecta iam explicataq³ sint, de certis enim adhuc rebus constituere ea, de qua dixi, temporum difficultate impediēte sanè non potui. Sed volui, vt & rerum non confectarum causas, & reliquarum rationem & statum mentemq³ super ijs meam eodem internuntio cognoscendi diutius tibi facultas ne deesset. Itaq³ illum ad te remitto: cui animum meum aperui: eius omnem sensum, quæ est probitate, ipsum ad te diligenter perlaturum plane confido. Dat. Id. Aug. Anno primo. Roma.

Angelo Cospo.

II

A C C I P I O excusationem tuam: quam affers de aduentus Vlyssis fratris tui ad nos dilatione & mora, ægram scilicet ipsius valetudinem: quæ quidem mihi per molesta est: amo enim te atque illum, vt scis, charosq³ habeo. Itaq³ illi meis verbis denuntiabis, curet valetudinem suam: quam quidem cum recuperarit, det se itineri, ad nosq³ veniat: quemadmodum Bononiæ Magistratui etiam scribimus hac de re: quas ad litteras te atq³ illum reijcio. Dat. 18. Cal. Sept. Anno primo. Roma.

Herculi Marefcotto.

12

AD

AD tuas literas, quibus excusas te ad ea, quæ scripsi de mutendis Romam liberis tuis, breuiter sic respondeo amari te à me, excusationemq; tuam accepi bonam in partem: Verum velle me, te omnino eos Romam mittere: vt etiam Magistratui Bononia scripsi. Dat. XVIII. Cal. Sept. Anno primo. Roma.

Laurentio Maluitio.

13

EXCUSATIONEM tuam, quæ mecum per litteras vteris de tuo ad nos aduentu, eatenus admitto, vt te bono in me animo esse planè existimem. Volo autem, & tibi mando, vt reiectis omnibus impimentis Romam venias. Caterum ad eas literas, quas hac de re tota Magistratui Bononia dedi, te referes: quæque tibi is meo nomine mandauerit, ea facies sine vlla tergiversatione aut mora. Dat. XVIII. Calend. Sept. M. D. XIII. Anno primo. Roma.

Annibali Bentiuolo.

14

ALLATVM ad nos est te quadam contra meam & reip. dignitatem libertatemq; moliri: quod quidem vt crederem, non potui adduci. Excidisse enim ex animo tuo qua in te liberalitate vsus sim, non existimo. Itaq; petitus à maleuolis hominibus ea iactari et fingi putavi. Verum ne illis, si qui sunt, tui vltius criminandi des locum, tuq; eas calumnias diluas, te hortor, vt vnà cum filio tuo Constantio ad me quamprimum venias: te enim ego atq; illum amico, vt soleo, animo paternoq; videbo: tuq; ijs de rebus, quæ tibi obijciuntur, presens melius & facilius nobiscum transiges. Dat. quinto Cal. Sept. Anno primo. Roma.

Magistratui Perusiæ.

15

HERI

HERI media in vrbe Carolus Gratianus, scariq³,
 qui cum eo erant quinque, Gentilem Martianum distri-
 ctis gladijs aggressi trucidauerunt. Quae res tam mihi
 molesta accidit, vt omnem curam adhibendam statue-
 rim, vt illi latrones sui sceleris poenas luant. Quamobrem
 mando tibi cum indignationis nostrae, tum aquae & ignis
 interdicti poena, vt nihil pratermittas eorum, quae ad il-
 los omnes capiendos conferre iuuareq³, te poterunt. Ita-
 que si de me bene mereri postulas, cura, enitere, confice,
 primum vt Carolum ipsum tanti facinoris caput, deinde
 reliquos quinque comprehendas tradasq³ custodia. Id si
 assequi poteris, statim ad me ea de re mittito. Scribo au-
 tem in hanc ferè sententiam Malatesta Balioni: qui
 cum rem omnem cōmunicabis. Spero enim ipsum pro ea,
 qua illum prosequor, charitate, proq³ eius in me studio
 omnia facturum, quae ad ea, quae volumus, conficienda
 pertinebunt. Tu verò si vlla in re alia studium diligen-
 tiaq³ in me tuam ostendisti, aut ostendere, concupiuisti,
 hanc ipsam mihi te in posterum commendandi occasio-
 nem ne pratermiseris. Dat. 4. Cal. Sept. Anno primo.
 Roma.

MALATESTAE BALIONI. 16

QVO te amore complexus semper fuerim, quantoq³
 studio ornandi tui, tuasq³ fortunas dignitatemq³ ampli-
 ficandi teneam, profecto tibi esse debet exploratissimum.
 Multa enim atq³ illustria mea in te paterna officia et stu-
 dia extiterunt. Hanc beneuolentiam voluntatemq³ er-
 ga te meam longe maiorem atq³ in tua commoda para-
 tiorē & prouiorē efficiendi pulcherrima tibi sese fa-
 cultas obtulit. Heri media in Vrbe Carolus Gratianus
 socij³.

socij^q, qui cum ipso erant, quinque Gentilem Martiannum multis vulneribus confossum turpiter sœdeq³ interfecerunt. Quæ res ita me vehementer commouit, ut omnem curam adhibendam statuerim, ut illi sicarij pro sui sceleris atrocitate puniantur. Quid enim vlli tutum, aut quis esse locutus securus potest. si talia Romano prope in foro moliri atq³ patrare homines audeant: Quamobrem mando tibi atque impero, ut vna cum Persia magistratu des operam, ut Carolum sociosq³, quibuscunq³ modis atque artibus comprehendatis. Quam sanè rem eo curare diligentius debebis, quod eius sceleris perpetratio notam atque ignominiam affert Gentili Balioni propinquo tuo, qui cum nefarius ille trucidator Romam venerat. Itaq³, ut mentis animiq³, mei sensum melius atq³ apertius intelligas, scire te plane volo si mandatis imperioq³ meo ea in re obtemperaueris, Carolumq³ ipsum & socios captos comprehensosq³ Magistratui tradideris, me daturum operam ut intelligas te mihi rem gratissimam fecisse, melioreq³, quàm adhuc fueris, loco apud me futurum. Sin aliter, ac spero deq³ studio diligentiaq³ tua confido, tibi statues esse faciendum, hoc est, si latrones illi tua cura tuoq³ studio fulti non capientur, quo te magis amo, charioremq³ habeo, fortunâq³ tuas dignitatemq³ amplificare magis cupio, eo te grauioribus indignationis odijq³ mei stimulis insectabor. Dat. quarto Calend. Sept. M. D. XIII. Anno primo. Roma.

MALATESTAE BALIONI. 17

INTELLEXI profectum te in Volscos esse, ut id municipium Hyppolito Atestino Cardinali traderes. In quo tametsi gratius mihi fecisses, si eâ profectiõnẽ mihi antea

antea per literas significauisses, meq^{ue} vel mandante vel admonito suscepisses: te tamen de eo adhuc officio non culpo. Mando autem tibi atq^{ue} ijs, qui tecum sunt, vt domum quamprimum redeatis, neue vllum aliud munici-
pium aggrediamini. Quod si, antequam haec tibi literae sint reddita, locum iam aliquem fueris aggressus, impetro, vt eo statim relicto omnib^{us}q^{ue} tuis abductis militibus ab eo recedas. Id qui non fecerint, ea poena, quae est de laesa maiestate, teneantur. Caterum quoniam heri ad te scripsi de scelere per Carolum Gratianum sociosq^{ue} perpetrato, te hortor, vt cura studio diligentia labore deniq^{ue} omni tuo mandata nostra explices. Nihil enim mihi aut gratius potest facere, quam si rem confeceris, aut molestius, quam si mihi non parueris praesioq^{ue} fueris, quodq^{ue} magis indignationem in te meam excitare possit. Dat. tertio Cal. Septemb. Anno primo. Roma.

Magistratui Foroliuiensium.

18

ATTULERUNT mihi non mediocrem molestiam ea, quae scribis de parricidio isto in agro perpetrato. Quamobrem non diligentia solum tua, quam adhibes in conquirendis eius sceleris sicarijs mihi magnopere probatur: sed mando etiam tibi, vt in illis puniendis, si eos comprehendes, nihil remittas seueritatis: quae cum iustitia coniuncta sit: sed ita agas, vt id, quod egeris exemplum ceteris praebeat, quo exemplo ab eiusmodi concipiendis facinoribus absterreantur. Dat. prid. Cal. Sept.

M. D. XIII. Anno primo Roma.

SIXTO CARDINALI SANCTI

PETRI AD VINCULA PRO-
cancellario.

19

SIGNI-

SIGNIFICAVIT mihi Bernardus Bibiena
 Quæstor meus Nicolai fratris tui nomine, Episcopatū te
 Lucensem Andrea Franciotto velle tradere. Quæ quidē
 mihi res vehementer probatur. Amō enim valde hominē
 cum mea quidem sponte, tum vel maxime, quod is cha-
 rissimus fuit Galeotto Cardinali fratri tuo, qui cum mi-
 hi, vt scis, summa necessitudo singularisq; beneuolentia
 intercesserat. Itaq; non solam ea de re te magnopere
 laudo: sed hortor etiam, vt quod semel in annum indu-
 xisti tuum velle facere te, id re efficias. Quod vt commo-
 dius facere possis, polliceor tibi, me & Episcopatus tui
 tibi quādiu vixeris, & Præfecturarum militum Hie-
 rosolimitanorum, quas ille possidet, fructus ipsi Andrea
 reseruaturum. Quin etiā, si erit opus, tuq; ita statues
 esse faciendum, Episcopatus tui fructus aliorum sacerdo-
 tiorum fructibus, qui tantidem sint, tibi facile compen-
 sabo, nihilq; prætermittā earū rerum, quas tu fieri vo-
 les, vt id iā ipsum libentius facias. Dat. prid. Non. Sept:
 M. D. XIII. Anno primō. Romā.

REGII LEPIDI ET

Parinæ Magiltratui.

26

DE istarum ciuitatum nostrarum nobisq; multas
 ob causas charissimarum ac Parma ac Regij propenso
 spectatoq; in me animo quæ scripsisti multa cum ipsarū
 laude municipūq; prope omnium commendatione, ea
 mihi optatissima fuere, nihil enim a quē cupio; quā eos
 qui hoc in imperio sunt, cū esse ipsos egregia probataq;
 virtute, tum nostrā in eos beneuolentiæ atque amoris cu-
 mulate respondere. Dabo autem operā, vt sese bene pō-
 sse cogitationes suas eiusmodiq; officia cognoscant:

Eg

meq;

meq₃ eorum commodis vtilitati dignitati neq₃ negligētem, & certe gratum experiantur. Quo enim ipsi ad huius Reipub. imperium & ardentius se contulerunt, et in eo constantius permanent, eo magis conuenit me omnia cogitare, & statuere qua quidem aut hanc ipsorum egregiam voluntatem augeant, aut certe perpetuam faciant. Quain re nihil omnino vel studiū pratermittam vel laboris. Itaque vtrunque ciuitatem meis verbis bono animo iubebis esse, tuq₃ eas iuste continenterq₃ reges. Quod facies, si te non tanquam ad tempus prapositum istis ciuitatibus, sed quasi verum atq₃ à natura institutum vniuscuiusq₃ ciuis esse te parentum existimabis. Dat. prid. Non. Septemb. Anno primo. Roma.

Regij Lepidi Magistratui.

21

LEGI permolestē tuas literas, quibus me de duobus ciuibus isto ipso in foro trucidatis certiore facis. Itaque quoniam municeps istos & magnopere diligo, et esse cupio quàm tutissimos, ages contra illos, qui tam audax tamq₃ atrox facinus atq₃ scelus perpetrauerūt, non solum iuste, sed etiam seueritate summa: vt exemplum ceteris statuas ab eiusmodi facinoribus se continēdi. Reliquis de rebus proximis ad te literis scripsi. Itaq₃ nihil addam nūc quidem. Tu verò mandata nostra conficies curabisq₃ diligenter, quae curanda sunt. Dat. prid. Non. Sept. Anno primo Roma.

VLADISLAO PANNONIAE

Boemiæq₃ Regi.

22

LECTIS tuis ad me fratresq₃ meos Cardinales literis, quae quo in discrimine tuum Pannonia Regnum ob Turcarum apparatus versaretur, significabant, &

Mar-

Martino Colocensis Ecclesia custode internūtio tuo auditō, statim vnā omnes totare diligēter atq; amanter cogitata statuiamus, vt nihil eorum, quæ ad ditionē tuendam, communesq; Christiani nominis hostes hoc tempore à tuis sinibus repellendos esse vsui possent à nobis prætermitteretur. Existimabamus enim & pro tua maiorumq; tuorum in Romanos Pontifices obseruantia, & pro gentiū, quæ tuo in imperio sunt, fortitudine bellandiq; vsu prope assiduo quotidianoq; cū Turcis, siquo incommodo tuū istud Regnū tuiq; populi afficerentur, id omne huius certe Reip. nostrumq; singulorū incommodū plane futurū. Itaq; quod primū petisti de tributi auxilio, quantū quidem presentium rerū status atq; hac tēpora tulerūt, tibi id permisimus, ijs vt opibus ad te leuandum bellumq; administrandū vti posses. Deinde, quod nos rogas, vt sedandis Christianorū Regum & Principum inter se dissidentium animis, atq; ad cōmune bellū contra Turcas incitandis curā & studium adhibeamus: in eo dies ac noctes cogitationes meas plane consumpsi. Mitto autem nunc quidem ad illos ea de causā internuntios meos Episcopos viros auctoritate experientia doctrinaq; præstantes, qui eorū controuersias componant, ipsosq; concilient. Quos quidē singulos tandiu hortari vrgereq; per eosdem internuntios nō desistā, quoad res ad eū, quē volumus exitū perducatur. Id si consieri per illos minus commode poterit: aliquot: ex meis fratribus E. R. Cardinalibus legabo, qui ad illos properē se conferāt, rēq; consiciāt. Quæ cōfecta, fœdereq; ab Regib. inito tributū ipsum per vniuersum Christianū orbē edictis amplissimis promulgabo: sacerdotibusq; cū sanctissimis

tum eloquentia clarissimis mandabo, vt omnes homines ad id non minus pium, quàm necessarium bellum accendant: vt celerrime periclitanti sane, totq̃ iam damna, tot porro calamitates perpeſſe Christiana Reipub. tuoq̃ in primis Regno optime de ea merito succuratur. Quod quidem certe bellum hoc si tempore à nobis susciperetur, irritos conatus nostros omnes atq̃ inanes ipsa tempora facerent. Quis enim pecuniam, quis militem remotissimis à se gentibus tribuat, qui pro patria, pro liberis, pro salute sua arma domi tractare cogatur, hostemq̃ intra lares suos habeat? Neq̃ principes sane ipsi, etiam si populi sui velint, in praesenti rerum perturbatione militem egredi, pecuniam erogari, arma opes vllas exportari suis è sinibus patiantur. Nos verò ipsi per nos mouere aggrediq̃ tantam rem fortasse possumus: sustinere atq̃ perficere non possumus. Quae cum ita sint, confido tamen, & pacem eam, quam omnes votis omnibus concupiuimus, Christianus inter Principes mature posse cōfici, & tua incommoda, de quibus ad nos scripsisti, vel cum fœnore celerrime reponi. Deus enim Opt. Max. qui ob eximium rerum optimarum euentum praclarosq̃ exitus interdum malum finit aliquod non maximum existere, istos tuos labores, eum Turcarum apparatum ad conciliandos Christianorum Regum animos quasi molitionem quandam adhibet, quae infectas odijs malisq̃ cupiditatibus obstructas eorum mentes ad eā, quam volumus, coitionem consensumq̃ attrahat, impioq̃ illorum adhuc quidem arma ad mutuam aliquando tandem pietatem communemq̃ cum vtilitatem, tū etiam dignitatem conuertantur. Quamobrem fili mihi

quidem

quidem charissime atq³ optatissime erit tuae fidei atque prudentia in Domino atq³ in eius viribus confidere. Neque enim à militum robore & numero, aut ab apparatu vlllo bellico, sed à Dei virtute, sed à Domini nutu de tuis atque nostris hostibus tibi victoria est expectanda. Recordare, quæ is quondam facinora, quas res quamq³ magnas per Gedeonis, per Iephta, Ionatha, Dauidis, per Iuda Machabæianus confecerit: quarum rerum memoriam antiquæ literæ sempiternam esse voluerunt. Quæ profecto omnia maximam tibi asferre spem debēt, eodem à Domino nihil omnino tuis conatibus in tempore defuturum. Atq³ vt aliena vetustissimaq³ pratereantur, ea repete, quæ ipso tuo in Regno Dominus apud Taurunum oppidum paucos ante nostram ætatem annos per Ioannem Capistranum confecit plebeium prope hominem, quem ad maximas tractandas res suæ porro voluntatis & interpretem esse voluit & administrum. Nostra verò ætate Rhodij perexiguo militum numero gloriabundum iam ac prope victorem Turcarum exercitum numerosissimum instructissimumq³ fugauerunt. Nō est debiliior nunc, quàm olim fuerit, Dei Dominiq³ nostri dextera: neque tu Vladislæ fili Ioanne Vaiuoda, qui vnà cum Capistrano Turcas superauit: es inferior. Id ex eo intelligi potest, quòd dum hæc ipsa, quæ supra scripta sunt cogitationes nostras exhauriunt, exercitاسq³ habent, tuæq³ nos res maxime commouent: allatum ad nos est à tuorum militū pusilla sanè manu multa millia Turcarum militum, quæ Illyricum vastabant, cesa ad vnum interisse. Ita qui tibi semel affuit Deus, confidere profecto debes eam tibi posthac rite præfer-

fertim atque suppliciter precanti nō defuturum. Cuius ego in terris vicarium gerens, fratresq₃ mei Cardinales, vt ad id redeā, quod initio dixi, nihil eorum, quæ ad tui, qui nobis es charissimus, Regnorumq₃ tuorum, quæ profecto totius Christianæ Reipub. quasi valli quidam et muri sanè solidi contra illorum impetum semper fuere, propugnationem & defensionem attineat, omitemus. Creaueramus autē iam ante, quàm tuas ipsas literas accepissemus, rumore tantū eius rei audito, qui ad nos incertis autoribus & priuatorū literis afferebatur, vtpote tuis de rebus etiā, ad primas eiusmodi voces planè solliciti, Thomam Cardinalem Strigoniensem: qui Legatum nostrum tuis in regnis ageret, cuius tu prudentiam diligentiam fidelitatē erga te plurimis maximisq₃ in rebus optime omnium cognouisti: vt is: quæ nutiabatur, de imminente Regnis tuis periculo obuiā celeriter iretur. Is tamen si iā se ad iter explicabat per sese, mandauit tamē ei acceptis tuis literis, vt id etiā diligentius maturiusq₃ contenderet. In quo quidem ita nobis morē gerit, vt nihil illo fieri possit ardentius. Ex eo plenius meā in te tuasq₃ res paternā voluntatē & studiosissimū bene consulendi Christianæ Reipub. animū cognosces, pro qua tuenda, atq₃ in ea, in qua oportebat, pace tranquillitateq₃ restituenda neq₃ opera, neque vigilijs: neq₃ laboribus parcā: libentissimeq₃ in ea cura & administratione vitā posuero. Vale. Dat. No. Sep. 1513. Anno 1. Roma.

ANTONIO ABBATI

sancti Bertini.

23

VOLVPTAS, quam ex eo, quod Pontifex Max. declaratus sum, accepisse te mirificam atque incredibilem

lem scribis, & si ea ni hil mihi noui attulit: amoris enim erga me tui abundantiam dudum cognitam atque perspectam habeo: mihi tamen sanè gratissima iucundissimaq; accidit. Visus enim mihi ipse sum, dum tuas literas legerem, illo ipso tuo vultu atque conspectu suauissimo & liberalissimo perfrui, quo me olim per Germaniam atque ista per loca iter facientē amantissime suscepisti. Itaque mihi in memoriam reuocasti eos ipsos dies, quos vnà fuimus: qui quidem tamen dies nunquam ex animo meo exciderunt. Quamobrem scire te plane volo, et amari te à me vnice, charissimumq; mihi esse ac semper fore: & si vnquam occasio dabitur videndi tui, quod sine tuo incommodo posse fieri sane peraelim, id mihi non minori voluptati fore, quàm si in eo um quempiam mihi sanguine coniunctissimum vsu & consuetudine optatissimū longo non visum tempore conueniendi amplectendiq; potestas fieret. Quo fit, vt ijs qua scribis, teneri te scilicet incredibili desiderio videndi mei, facile fidem adhibeam. Reliquum est, vt si quid erit, quod impetrare à me vel tibi cupias, vel tuis, scribas id ad nos certa cū spe, nihil te frustra petiturum. Vale. Dat. 7. Id. Septemb. Anno primo. Roma.

Ioanni Saxatello.

24

INTELLEXI te ab Annibale Bentiuolo possessiones cum molis fumentarijs, quas illi in Rheno vico habet, nuper emisse, aut certe emere statuisse. Eam emptiōnem contra Bononiensium decreta esse certior factus sum. Itaque quoniā noto vlla in re eorum legibus prauiudiciū fieri, mando tibi, vt ab ea emptiōne prorsus abstineas. Quòd si aliquam in eo pecunie summam expen-

Gg 4 dista

disti aut fortasse totum iam pretium persoluisti, dabo operam, vt ab ipso Annibale tibi omne persolutum restituatur. Dat. X V I. Cal. Octob. M. D. X I I I. Anno primo. Roma

SIGISMUNDO GONZAGAE

Cardinali Mantuano.

25

R E D D I T A E mihi sunt abs te literæ grata illa quidem & optatæ, vtpote amore illa tuo vere fraterno plenissima: sed tamen quæ mihi voluptatem illam, quæ ex tuis literis capere soleo, magna ex parte imminutâ attulerunt. Significabant enim te in quartanam incidisse. Itaque pupugit me, vt sane debuit, incommodum valetudinis tuæ, quæ mihi curæ est æquæ, atque ipsa mea. Hortor autem te, vel potius abs te quæso & peto, vt omnem curam & diligentiam adhibeas, vt quàm celerime conualescas: vt integra voluntate & corpore bene confirmato ad urbem atque ad nos, qui te videre atque amplecti cupimus, reuerti possis: quod tamē efficies commodo tuo. Interea volo tibi persuadeas, res tuas, eaq; omnia, quæ ad dignitatem tuam pertinent, curæ mihi & cordi fore. Caterum Franciscum Marchionem Mantuæ fratrem tuum, qui à me vnicè diligitur, si saluere iusseris, erit mihi gratum.

Dat. X V I I. Calend. Octobr.

M. D. X I I I. Anno
primo. Roma.

P E T R I

PETRI BEMBI EPI STOLARVM LEONIS

DECIMI PONT. MAX.

Nomine scriptarum.

LIBER V.

SIXTO CARDINALI
sancti Petri Ad Vincula.



LECTIS tuis literis, quibus me certio-
rem facis ad aquarum Veneris balnea
curandi tui causa te accessisse: neq³ nūc
quidem sine tua valetudinis incommo-
do posse istinc discedere, itaq³ rogas, ne
te accusem si ad Cardinalium comitia Romæ esse, quem-
admodum tibi scripsi cupere me, eiq³ rei interesse nequi-
uisti. Ego verò Sixte te excuso: valetudinisq³ tua ratio-
nem tibi in primis esse habendam statuo. Quid enim pos-
sumus, aut quid plane sumus egroti? Quare manebis tu
quidem isto in loco perlibente me tandiu, quoad tibi v-
sui erunt aquæ istæ: à quibus tibi profici valde cupio: vt
recta posthac valetudine vti possis, mecumq³ & cum no-
stris fratribus Romæ esse. Hortor autem te quo res me-
lius tuo etiā consensu transigatur, vt tuo chirographo,
vel mihi, vel cuiuis, qui tibi ad eam esse rem idoneus vi-
deatur, mandes tuam vicem: vt is in creandis Cardina-
libus Laurentio Puccio, Iulio Medice, Bernardo Bibie-
na, & Innocentio Cibo, qua tu dicere agere, si adesses,
posses dicere agere ipse quoq³ possit. Dat. XVI. Calend.
Octob. M. D. XIII. Anno primo. Roma.

Gg s. FRAN-

PETRI BEMBI
FRANCISCO GONZAGAE

Marchioni Mantuæ.

2

*QV*O amore quâue charitate complexus semper fuerim Carolum Orpheum templi Martiani istius oppidi Præfectum à me ipse intellexisti, quo tempore anno superiore apud te aliquot dies fui. Ei nunc in Galliam proficiscenti mandavi te ut viseret, salutemq; plurimam tibi diceret meis verbis. Peto autem abs te, ut eum suscipias uti hominem propter plurimas eius virtutes egregiamq; ac veterem in me fidem & pietatem mihi sane charissimum, propter meam verò in te benevolentiam abs te etiam amandum atq; inter tuos collocandum. Id si feceris, erit mihi maiorem in modum gratū. Ipsum enim Orpheum ad me reuerti hac de causa tibi plurimum debentem tuaq; liberalitate maxime deiunctum, valde cupio. Dat. XV. Cal. Octob. Anno primo. Ro.

SIGISMUNDO GONZA-

gæ Cardinali.

3

CAROLVM Orpheum vnum ex ijs, qui mihi sunt charissimi, hominem plurimis virtutibus præditum, proficiscentem ad te, commendo tibi maiorem in modum. Porro mihi gratissimum feceris: si eum ita suscipies tractabisq; ut intelligat se, quoniam à me diligitur, abs te amari. Dat. XV. Cal. Octob. Anno primo. Roma.

MAXIMILIANO MARIAE

Insubrum Duci.

4

AM AVI semper multum Octavianum Marchionem Palauicinum cum pro ea, quam in me, dum Cardinalem gerebam, familiamq; meam omni tempore benevolentiam miro studio conseruauit, tum pro eius egregia in
Rempub.

Rempub. observantia & cultu, vt multis in rebus expertus sum, prope singulari. Quarū illa ita tibi commendo, vt maiore studio & diligentia commendare nō possim: teq; hortor, vt quibuscunq; rebus poteris: meo rogatu eū ita tractes, vt intelligat eos, qui mihi charissimi sunt, tibi quoque esse commendatissimos. Equidem te de eo aliquanto plus etiā diligam, si efficies vt Octavianus propter has meas ad te literas mihi plurimas gratias agat. Dat. XV. Cal. Octob. Anno primo. Roma.

MAGISTRATVI REGII

Lepidi.

5

EXEMPLVM literarum, quas Ioanni Boiardo scripsimus, habuisti cum his literis. Mando autem tibi, vt ei meis verbis imperes eisdem propositis pœnis, quas ei constitui, ne contra Maximiliani Romanorū Imperatoris designati municipes quicquam tentare armatis hominibus audeat. Itaq; literarum mearum sensum mandatis tuis auctū consociatumq; accipiens & ipse quiescat, & alios ne perturbet. Sed iuri aequitatiq; suas iniurias, si quas habet, remittat. Dat. 13. Calend. Octob. Anno primo. Rona.

Ioani Boiardo.

6

ALLATVM ad nos est, te armatorum hominum manum cogere, vt ea certos homines ciues Mutinenses, qui in Maximiliani Imperatoris designati Regno ditioneq; sunt, impetum facias, quibus à ciuib; illatas tibi esse iniurias præ te fers. Quæ res cū mihi permolesta sit, qui in Maximiliani oppidorū aqua atq; meorū otio, quieti, paci consuli cupio, mando tibi, ne te aut tuorum quempiā cōtra illos commoueas, neue eos coacta manu per-

perturbes. Teneri autem te ijs pœnis, quæ de lesa maiestate sunt, volo, nisi parueris. Quod si te ab illis offensum existimas, pergas ea in re legû & iudiciorû via: neque enim sumus tua iura impedituri: sed potius curaturi, vt tibi ius abunde ac sine dilatione administretur. Dat. XIII. Cal. Octob. Anno primo. Roma.

FERDINANDO HIS-

paniæ Regi.

7

ET si scio ijs de rebus, quæ per nos publice geruntur, à Legato tuo homine per diligente fieri te quotidie certiore: volui tamen, vt quod nouissime pro Reipub. ornameto & incremento satui esse faciendum, id meis etiam literis cognosceres. Non enim vereor, quin tibi pro tuo erga me amore Remq; pub. Christianam studio eiusmodi omnia æquè iucunda sint, atq; ipsi mihi. Itaq; scies me ad 11. Cal. Octob. fratribus meis E. R. Cardinalibus consentientibus Laurentium Puccium familiarem meum à dandis literis, & Iulium Medicem Archiepiscopum Florentiæ designatum patruelem meum, & Bernardum Diuitinum Bibienam Quæstorem atq; Innocentium Cibum sororis meæ filium, Innocentiij Papæ Octauij nepotem plurimis maximisq; de causis in Cardinaliû collegiû cooptauisse. Quorum trium prudentiam, integritatem agendisq; rebus vsum atq; scientiam virtutesq; ceteras, & esse tibi perspectas existimo, & Reip. & honori & presidio confido fore. De Innocentio autem spero fore, vt volumus: habet enim egregiam indolem coniunctam cum optimis moribus, quos ornat literarû & bonarum artium studijs: vt iam nihil sit adolescente illo probius elegantius charius. Eius rei confectio, quæ
me

me magnopere delectauit, erit sane mihi & gratior & iucundior, si tibi quoq₃, qui recte omnia prudenterq₃ iudicas, perpendereq₃ soles, probabitur. Existimare autem debes, quoniam tuorum in me familiamq₃ meam plurimorum non solum officiorum, sed etiam beneficiorum illi ipsi omnium optimi teste semper fuisse, quæ ad tuam dignitatem tuendam atque amplificandam pertinebunt, eos esse non minus diligenter, quàm quæ nostra ipsorum intererunt, omni tempore curaturos. Dat. IX. Cal. Octob. M. D. XIII. Anno primo. Roma.

OCTAVIANO FREGOSIO

Genuensium Duci.

8

PLVRIMA egregiaq₃ in me atq₃ in omnes meos tua Federiciq₃ Archiepiscopi Salernitani fratris tui officia, atq₃ ea quæ in vobis summa sunt, maximarum virtutum ornamenta, te atque illum mihi & omni tempore charissimos reddiderunt, & nunc vt maxime erga vos liberalitatem & beneficentiam exerceam, me hortantur: Itaq₃ cum olim Guidus Vbaldus Vrbiniatum Dux auunculus tuus, quod durissimo ac difficillimo eius exiliij tempore strenuam ei operam nauaueris, arcemq₃ & oppidum montis Feretrii maximum atq₃ pulcherrimum eius Regni propugnaculum, omnibus in difficultatibus & cunctarum rerum angustijs positus, consilijs auspicijsq₃ tuis & tua singulari ope atque virtute tutatus fueris, sanctæ Agathe municipium vna cū omnibus eius oppidi regionibus ac finibus tibi sororis suæ filio dederit, donauerit, vt sui erga te amoris & beneuolentiæ tuiq₃ in illum amplissimi beneficii pignus monumentumq₃ esset: nunc vt pulcherrimi eius atq₃ clarissimi nostra etate
te fa-

re facinoris testimoniū ac pramiū mea quoq; ope adan-
geatur, sanctæ Agathæ oppidum omnisq; eius regionis di-
tione, quod oppidum quamq; ditionē in huius Reip. impe-
rio nostriq; iuris constat esse, tibi data donataq; recte
sunto, eaq; donatio autoritate mea probata esto. Atq; e-
tiā tibi illa ipse quoq; do, dono, largior. Quod si te sine li-
beris legitimis cōtingat mori, hac donatio ad Federicū
fratrem tuū extenditor: vt ea, quoad viuat, vti frui in-
re possit. Dat. 7. Cal. Octob. Anno primo. Roma.

Magistratui Bononiæ.

9

QVONIAM Antonium Cardinalem Bononien-
sem summopere amamus, multumq; & fidei eius & pru-
dentie atq; in nos beneuolentiæ tribuimus, volo vt Bal-
dasaris Catanei liberos ab eo ne repetas: sed eos permit-
tas, esse sub ipsius fide. Scribo autē Cardinali, ei me Ca-
tanei libros ea conditione remittere, vt, si erit opus, vel
habere ipse illos hic, cum voluero, possim, vel ipsi istic ita
seruentur, vt ab illis veritas, quæ per nos queritur, de
Bentiuolorum cogitationibus eliciatur. Dat. 6. Calend.
Octob. Anno primo. Roma.

DOMINICO CARDINA-

li Grimano.

10

LECTIS tuis literis, quibus me certiolem facis, te
propter tabellarū tarditatem Cardinalium creationi
interesse non potuisse, magna molestia affectus sum, Qui
enim te pro tuis eximijs virtutibus excellentiq; doctri-
na magnopere diligo, valde sane cupiebā ei declarationi
te adesse. Verum quoniam tabellarium accusas, manda-
ui vt is suæ negligentie pœnas daret. Sed is ita se purgat
ait enim, quoniā Vrbeueteri te nō offenderit, se Spoletū

recta

rectā tetendisse, quod ad oppidum te iter fecisse intellexerat. Quò cum accessisset, rediisse te Urbem ueterem ei nuntiatum fuisse, eoq; reuertisse. Itaq; se tardio rem, quā oportebat, fuisse. Sed quoquo modo se res habet, animi tui alacritatem, quam prae te fers, libenter accipio. Reliqua, quae te scire volo ea de re, nuntius tuus ad te perferet qui cum loquutus sum. Dat. V. Cal. Octobr. Anno primo. Roma.

Petro Bibienæ.

112

SAN E quā mibi gratū atque optatum accidit id, quod heri ex Venetorū Legato publicisq; istius Senatus atq; tuis literis intellexi, eū scilicet Senatū Remq; pub. nobis arbitris suarum cum Maximiliano Romanorum Imperatore designato discordiarum, quae quidem diutius quā oportebat viguerunt, causam cognitionemq; permisisse. Eoq; accepto nuntio valde me hercule gaudius sum: cū propterea quod ista Resp. Senatusq; illustris, qui prudentissimus atq; grauiissimus semper fuit, de nostra in se vetere beneuolentia tantū spei atq; fiducia conceperit, ut suarū maximarū controuersiarū atque rerū summā mibi esse plane credendā statuerit: tū quia magnopere confido ex ea re ipsis quidem primū atque eorū oppidis & municipijs omniq; imperio, Italicis deinde rebus magna ex parte diuturno bello contritis atque labentibus, toti demū Christianae Reip. plurimas esse leuationes maximasq; utilitates prouenturas Dabo equidē ipse operā, ut huius ipsorū de me iudicij tā illustris tāq; praeclari eos nunquā pœniteat. Idq; eis tu iam nūc meis verbis ut certū exploratumq; habeāt, denuntiabis. Reliquas autē huius negotij partes, quae plurimae quidem sunt,

sunt, quas te atque illos scire volumus, ex literis, quas ad te Iulius Medicēs, Cardinalis frater patruelis meus dabit, facile intelliges. Quibus etiam de rebus omnibus cum Petro Lando eorum Oratore sum loquutus. Caput autem illud est, ut confidant, quaecunque ad ipsorum salutem, incolumitatem, commoda quaecunque ad dignitatem retinendam pertinebunt, à me amantissime ac diligentissime curatum iri. Dat. tertio Cal. Octobr. Anno primo. Roma.

A C H I L L I C R A S S O

Cardinali Bononiensi.

12

CONTROVERSIAM, quam Borninus Blancius ciuis Bononiensis cum Petro & Ioanne Francisco Ocellano aliquot iam annos habet de fundo & villa satis quidem luculenta, componere iam tum, atque ipsos conciliare cupiebam, dum in Cardinalium collegio positus istius oppidi Legatum agerem. Itaque rem aggressus breui eam ex sententia confecissem, nisi confestim Bononia decedere in earum me rerum cursus atque celeritas coëgisset. Idem autem mihi nunc quoq, animus voluntasq, cum sit, maximeq, cupiam, ut ab honestis istius oppidi municipibus nulla offensa nullaq, odia exerceantur, tuq, vnus apud eos omnes auctoritate & gratia plurimum valeas, peto abs te, des operam ut inter vtriusq, partis ea de re atque causa omnes controuersiae sedentur, lisq, vniuersa componatur, concordiaq, via finiatur. Erit ea res & ingenio moribusq, tuis propria, qui pacis es & quietis amantissimus, & mea de tua leuitate atque prudentia expectationi non aliena. Dat. quarto Non. Octob. Anno primo. Roma.

Municipio Rauennati. 15

M A N D O vobis vt Ioanni Baptista Bonauentura
vestrae arcis Praefecto reliqua, quae ei ex arcis custodia
debentur, curetis ad eum vsq₃ diem, quo die is eam cu-
stodiam Antonio Medici tradet, quē ei arcis praefecimus.
Dat. quarto Non. Octob. M. D. X I I I. Anno primo.
Roma.

MAGISTRATVI BONONIAE

Polæ Episcopo. 14

M A N D O tibi, vt Nicolao Blanco ciui Bononiensi
reditum in patriam des, reuocesq₃ eum ab exilio, quē-
admodum ego illum reuoco: itaq₃ statuas, vt nulla post-
hac molestia ea de causa Nicolao afferatur. Dat. tertio
Non. Octob. Anno primo. Roma.

ACHILLI CRASSO

Cardinali Bononiensi. 15

S C R I B I M V S Altobello Polæ Episcopo istius op-
pidi Magistratui, vt Nicolaum Blancum ciuem Bono-
niensem exulē restituat, si uiq₃ patria permittat & for-
tunis suis omnibus. Eam rem tibi etiam meis literis esse
notā volui: hortorq₃ te, vt negotium, si erit opus, auto-
ritate tua iuves, quo melius atque facilius explicetur.
Dat. 3. Non. Octob. Anno primo. Roma.

LEONARDO LAVREDANO

Venetiarum Principi. 16

F R A N C I S C V S Foscarus qui tuum Oratorem
apud nos egit, perfunctusq₃ suo munere abs te reuoca-
tus istuc proficiscitur, egregiā tibi quidem omnino Ro-
mā dū fuit, & praestantem operā nauauit. Nā et in con-
silijs tuis explicandis probitatem, & in rebus tractandis

prudentiam & grauitatem, & in omni genere studiū
 & diligentiam singularem semper ostendit. Mihi verò
 cum his atq; ceteris suis virtutibus, tum præclaris in re
 Romanam meritis cumulate & pulcherrime satisfecit.
 Hac autem ad te scribenda esse duxi non quidem quòd
 ea vlla ex parte latere te existimarem: sed vt mea in il-
 lum paterna charitatis sensum, & constans de eius præ-
 stantissimis virtutibus iudiciū meis apud te Remq; istā
 pub. literis declaratum atq; testatum relinquere. Dat.
 Octauo Id. Octob. Anno primo. Roma.

OCTAVIANO FREGOSIO

Genuensium Duci.

17

MITTO ad Ludouicum Gallia Regē Sebastianū
 Pistoriensem familiarem meum: qui iter isthac faciet.
 Quare abs te peto, vt eum in itinere conficiendo quibus-
 cunque rebus poteris, iuues. Et quoniam certior factus
 sum in tuæ ditioni vicinis locis magna hoc tempore la-
 trocinia fieri, per mihi erit gratū, des operam, vt Seba-
 stianus in Galliā transalpinam tuto atque celerrime se
 conferat. Dat. VI. Id. Octob. Anno primo. Roma.

DOMINICO GRIMANO

Cardinali.

18

QVONIAM ad proxime sacri Lateraneensis Cō-
 ciliū futuros dies aliqua sunt nobis iam nunc constituē-
 da, peto abs te, quod commodò tuo facere poteris, vt an-
 te diem 12. Cal. Nouembris Romam te conferas. Dat.
 V. Id. Octob. Anno primo. Roma.

Regi Britannia.

19

LECTIS tuis literis, quibus me de tua in Morinis
 contra Gallos victoria, Morinorumq; deditione certio-
 rem

rem facis, magna sanè laticia pro mea in te paternæ beneuolentia, proq³ rei cōfecta magnitudine affectus sum: habuiq³ Deo Opt. Max. gratias, quòd is eorum, qui pro buius imperij dignitate tuenda & conseruanda pro ac recto animo arma sumpserunt, curas conatusq³ fortunauerit. Quamquàm id quidem certe prope pro comper to semper habui. Sperabā enim fore, vt omnia tibi prospere atq³ feliciter euenirent: cum propterea quòd prudentibus consilijs, summis opibus, magno apparatu, numero sisissima valedissimaq³ manu, Maximiliano etiā Romanorum Imperatore designato sua tecū consilia communicante, bellum hostibus inferre es aggressus: tū vel maxime, quia Dei causam agendā & defendendā suscepisti. Itaq³ cum non multos dies de tua victoria letus inter tuorū Legatorū iucundas salutationes confecissem, vellemq³, vt par erat, ea de re tecū per literas gratulari, ecce alteras ad te literas quæ secundā nobis partem abs te victoriā longe maximā atq³ clarissimā attulerunt, Britannicos scilicet exercitus tuos cum Iacobò Scotorum Rege, qui quidē ingenti militū numero inuaserat in ditionem tuā, manū conseruisse, eius exercitum fudisse: magnā eorum partē Rege ac Regni Principibus occisis internitioni dedisse: magnam etiā captiuā fecisse. Itaque paucis te diebus bellum atrox ac periculosum felicissime confecisse. Iis intellectis tametsi per mihi molestū fuit tantū Christiani sanguinis effusum fuisse, tot hominū millia è populo Dominico desiderari, tū Christianū Regē egregij sanè nominis neq³ spernendarū viriū, sororis tuæ virū Christiani Regis sibiq³ cōiunctissimi ferro cōfossū, cecidisse valde tamē sum gauisus alteros

tuos exercitus tã illustrem tamq̃ celerem victoriã de
 alteris tuis hostibus, qui te ab optimo tuo incepto reuo-
 care conabantur, reportauisse. Quamobrem eundem il-
 lum, qui hos duplices gloriæ tuæ prouentus subministra-
 uit, Deum flexis ad terram genibus erectuq̃ cœlo mani-
 bus adorauit, quod tibi Regi planè iuueni bellorum ini-
 tium ab Ecclesiæ suæ defensione auspicianti hac rudimẽ-
 ta tam præclara tamq̃ conspicua, quasi fundamenta ie-
 cerit reliquæ sanè vel gloriæ vel ætatis tuæ. Te vero in
 primis decet existimare ab illo te omnia, nō ab humanis
 opibus accepisse: quoq̃ Dominus Deusq̃ noster pluri-
 bus atq̃ maioribus ornamentis virtutem illustrare atq̃
 condecorare voluit tuam, eo te quidem certe illi humi-
 liorem submissioremq̃ fieri erit virtutis & prudentiæ
 singularis. Quod cum feceris, non solum credibile est,
 fore vt tibi is secunda prosperaq̃ omnia in ijs quas nunc
 tractas, rebus atque bellis largiatur: sed viam etiã mu-
 niat per quam ingrediens tuū nomen optimis atq̃ san-
 ctissimis artibus æternitati consecrare facile possis. Id e-
 rit, cum tibi eas cogitationes propones, quibus reliquis
 tuis restinctis pacatisq̃ bellis ad contundendā Turcarū
 nimis iā incitatā exultātemq̃ ferociā accendare. Quas
 ad cogitationes ineundas, quemadmodū nūc quidem se-
 res habet, multū dari nobis posse tēporis nō est existimā-
 dum. Ita iā & Pannoniæ Sarmatiæq̃ Regna populata
 debilitataq̃ ab illis sunt, premunturq̃ in dies acrius: &
 ipsa Italia amissis in proximis regionibus non vnis præsi-
 dijs illos sibi vicinos finitimosq̃, acerbū sanè dolendūq̃
 spectaculum cōtuetur. Hac pericula, vt vere dicā, quod
 sentio, me suspensum, atq̃ sollicitū habet, meamq̃ de se-
 cundis

cundis tuis rebus voluptatē et letitiam esse solidā atque propriā nō sinūt. Quare ab ipso immortalī Deo precibus omnibus atque votis peto, vt quemadmodū Ecclesie sue dignitatē ab ijs, qui eius propugnationē suscipere in primis debebant, aliquādo male habitā egregiē prosperissimeq; est tutatus: ita eā & ab accenso, ad inflāmanda sacrosancta eius templa atq; delubra ignis, & ab imminēti populorū sibi dicatorū ceruicibus ferro inimicarū perpetuo gentiū aliquando tandem eripiat. Quibus de rebus omnibus cum Episcopo Vnigormiensi Legato tuo loquutus sum, vt is tibi mentē meam perscribere latius ac diligentius possit. Dat. 5. Id. Octob. Anno primo. Roma.

EPISCOPO FELTRINORVM

Magistratui Placentiæ, & Pau-

lo Sumuntio.

20

MANDO vobis, vt quoniam Hierosolimitani milites in insula Rhodi contra Turcas propugnatione hoc tempore distinentur, prouentusq; suos ea in re maxime quidem necessaria impendunt: ex eius ordinis possessionum atq; fructuū omnis generis pensionibus in eam decimam, quam nuperrime curari exigiq; mandauī ab ijs, qui clerici essent, partem vllam ne inferatis: uēue quicquam eo nomine ab ipsis militibus aut eorum procuratoribus exigatis, aut exigī erogariq; permittatis. Volo enim illum ordinem horum onerum collationumq; omnium immunem expertemq; esse. Dat. XIII. Cal. Nouemb. Anno primo. Roma.

Marco Cardinali Seduno.

21

NON oblitus quantum in nos beneficiorum contuleris, ei, qui has tibi literas reddidit, Goro familiari meo

Hh 3 ad

ad Heluetios proficiscenti mandavi, te ut viseret, tecumq; communicaret causam profectionis suae. Qua in re peto abs te non id solum, ut eum instituas omnibus iis in rebus, quas ad te deferet, doceasq; quid illi agendum, quid statuendum, quid conandum sit. Sed illud etiam, ut meam causam apud Heluetios agas ipse, measq; omnes suscipias parteis. Quod te facturum & facile pro ea qua plurimum apud illos polles dignitate, auctoritate, gratia, et libenter pro tua singulari atque mirifica in nos benevolentia plane confido. Volo autem in primis, ut ipsos Heluetios de mea propensa perpetuaq; in illos voluntate certiores facias, doceasq; eo animo esse me, ut in eadem cum ipsis fortuna magis magisque quotidie coniungi & consociari cupiam. Deinde ut eos confirmes in Maximiliani Mariae Insubrum Ducis statu atque imperio, quemadmodum adhuc quidem egregie fecerunt, & fulciendo & defendendo: quae sane tibi quidem res cura magnopere semper fuit: nobis autem non minus cordi est, quam Florentinorum Reip. atque Urbis, quae mihi patria est, incolumitas et conservatio: quemadmodum ab ipso Goro intelliges. Qui quidem ea etiam, quae ad te de me falso delata sunt, diluet, purgabitque, me tibi, eaque patefaciet, quam obrem mentem erga te meam atque animum perspicere facile possis. Te vero etiam atque etiam hortor, eiusmodi vocibus hominum vel invidentium nostrae coniunctioni, vel certe maleuolorum aures tuas ne prabeas. Quemadmodum & ipsi etiam fecimus, facturiq; sumus ad ea, quae de te ad me, praeter tuam dignitatem & allata adhuc quidem sunt, & fortasse asseretur. Neque enim de te tuis summis praestantissimisque virtutibus vllorum hominum artibus tantulam quidem

quidem partē detractū iri pariar. Reliquum est, vt Gor-
ro ipsi meis te verbis alloquenti omnē fidem habeas. Va-
le. Dat. sexto Calend. Nouemb. Anno primo. Roma.

LAURENTIO MEDICI

fratris filio.

22

PROFICISCENTI ad Heluetios Gorro, vt
meū internuntium apud illos ageret, mandauī pro mea
in rem istam pub. charitate, vt omnem sue profectionis
causam tibi de via communicaret. Cui tu fidem habebis
non secus ac nobis ipsis: quæq; ex ijs, quæ ab ipso intelli-
ges, erunt reticenda, nemini patefacies. Dat. sexto Cal.
Nouemb. Anno primo. Roma.

Heluetijs.

23

MITTO ad vos Gororum familiarē meum hominem
mihi vehementer probatum: vt is meū internuntium a-
pud vos agat. Quare vos eius verbis tantum fidei habe-
bitis: quantum nobismet ipsis haberetis, si vos presentes
alloqueremur. Dat. 6. Cal. Nouemb. Anno primo. Roma.

RAIMVNDŌ CARDONAE

Proregi Neapolis.

24

CVM id meū consilium semper fuerit, vt inter Ma-
ximilianum Romanorum Imperatorem designatū &
Leonardum Lauredanū Venetorum Principem discor-
die, quas quidem vterq; diutius, quàm opus fuerat, ex-
ercuit, fœdere inito componerentur, vt bella cadesq; in
Italia desinerent, pax atque tranquillitas existeret: i-
demq; optare prudentissimū Regē tuum saepe numero in-
tellexerim: gratissimus atque iucundissimus is profecto
nuntius fuit, quē nuper accepi, Venetos scilicet ad ineū-
dum cum Maximiliano pacem animā induxisse, nobisq;

Hh 4 arbit

arbitris omnem discordiarum suarum causam totiusq;
 rei summam velle permittere. Ab hoc enim fonte confi-
 do plurima esse atque maxima Christiana Reipu.com-
 moda, ex quibus haurire omnes homines possint, prope-
 diem emanatura. Hanc eorum voluntatem cum certā
 propemodum exploratamq; habeam, neque dubitem,
 quin illi ea, qua nuntiantur, omnia vt volumus sint con-
 fecturi: etiam atq; etiam te hortor, vt magis in ea sen-
 tentia Veneti confirmentur, ab armis atque in Venetos
 impresionibus abstineas tantisper, dum syngrapham,
 qua mihi eius rei potestas permittatur, ipsi conficiant.
 Est autē prudentia tua paucorū dierū moram tanti nō
 aestimare, vt eam ob causam ab vtrisq; nostrū diu opta-
 ta, communiq; consilio suscepta, & toti rei Christiana
 maxime profutura pacis atque fœderis confectio impe-
 diatur. Quæ quidem mora ne longior sit, quā neces-
 sitas postulat. Petro Bibiena meo apud Venetos internū-
 tio mando, det operā, vt trium aut quatuor dierū spa-
 tio, post has sibi redditas literas ea, quā dico, à Senatu
 Veneto syngrapha conficiatur: teq; illico tota de re cer-
 tiore faciat. Tu verò ea intellecta Casarianos tuosq; mi-
 lites vsq; quaq; continebis, dū pax ipsa fœdusq; sancia-
 tur. Summa hæc est, vt maximi momenti atq; ponderis
 rem vnus quatridui præstolatione hortatu meo iuves.
 Quod te facturū pro tua prudētia, humanitate, lenita-
 te plane confido. Dat. 4. Cal. Nouemb. Anno 1. Roma.

MAGISTRATVI BONONIAE

Polæ Episcopo.

25

QVONIAM Matthæus Cardinalis Gurcensis ad
 Urbem atque ad nos propediem est venturus, volo, vt si
 istac

istac iter faciat, omni eum honoris & liberalitatis genere excipias, itaq; tractes, vt se mihi esse charissimum intelligat. Ea in re omnes diligentia tua numeros te implere sanè peruelim. Dat. quarto Calend. Nouemb. Anno primo. Roma.

MAXIMILIANO MARIAE

Mediolanensium Duci.

26

REVERTITVR ad te meo iussu Hyeronimus Moronus interprest tuus, cuius singularè erga te fidem & diligentiam omnibus ijs in rebus, quas mecum egit, perspicere mihi visus sum: eaq; ipsum de causa, vti probum & spectata virtute hominem, facile amo. Istametsi recusaret Roma te non mandante velle discedere, ostenderetq; mihi habere se abs te plures causas apud nos commorandi, coactus tamen est à me itineri sese dare. Putani enim eū in tractandis apud Heluetios rebus tuis magno tibi vsui futurū, qui cum multa ad tuū commodum dignitatemq; spectantia sum loquutus: eaq; collegi, quæ horū temporū conditio poscere maxime videbatur. Ea ipsa, tū quo studio tenear, vt tibi omnia prospere atq; fœliciter eueniant, ab ipso cognosces: qui quidem nostra erga te voluntatis locupletissimus esse testis potest. Dat. 4. Cal. Nouemb. Anno primo. Roma.

MAGISTRATVI PLACENTIAE

& Paulo Sumontio.

27

MANDO vobis, vt aqua & igni interdicatis, nequis ex ea pecunia, quæ ratione decima à sacerdotibus, qui in Regno Mediolanensi sunt, exigitur, quicquā capere, habereq; apud se audeat, prater eum, quem vos eius rei curatorē esse insseritis: cuius eligendi vobis vnus

Hh 5 facul-

facultas esto. Volo enim, ut is tantummodo, qui à vobis
erit lectus, eam pecuniam administret. Dat. 4 Calend.
Nouemb. M. D. XIII. Anno primo. Roma.

RAIMUNDO CARDONAE

Proregi Neapolis.

28

POST eas, quas ad te proximis diebus dedi literas,
quibus te certiorē faciebam Venetorum Remp. discor-
diarum suarum cum Maximiliano Romanorum Impe-
ratore designato causas omneis nobis arbitris velle per-
mittere: itaq, te hortabar abstinere eos qui in eorum
Imperio essent, armis laceessere tantisper, dū syngrapha
eius rei per Senatū Venetū conficeretur: eā syngraphā,
quemadmodum volebamus confectā Veneti nobis mise-
runt. Quamobrem quo maiore possum studio etiā atque
etiam abs te peto, statuas arma esse reprimenda, Casa-
risq, milites atque tuos ab omni offensienum cōtra Ve-
netos genere continendos, dum res negotiorūq, per nos
transigatur. Ita enim, & nos Venetis recepimus te fa-
cturū: & te, cui quidem Ferdinandi Regis tui mēs atq,
animus perspectus est & cognitus, maxime decet face-
re, nitiq, ut nihil eorū, quae ad pacem consiciendam op-
portuna sint, praetermittatur. Ea de re plura cū Bercen-
no procuratore tuo sum loquutus. Is ad te omnia per-
scribet. Dat. tertio Non. Nouemb. M. D. XIII. Roma.

FRANCISCO MARIAE

Urbini Ducis.

29

CERTIOR factus eos nummos, qui Urbini percu-
tuntur, probos esse, volo, ut tibi as, argentum, aurū,
flare, ferire, quemadmodum consueuisti: & nummos
cadere liceat: neque ea tibi obsint, quae nostris in edictis

summa

nummarijs nuper peopositis continentur. Dat. 3. Non.
 Nouemb. Anno primo. Roma.

OCTAVIANO FREGOSIO

Genuensium Duci.

30

ET si pro animi tui consuetudine tuaq³ propensa in
 omnem iustitiam voluntate certum exploratumq³ ha-
 beam, omnes tue ditionis populos ipsorumq³ incolumi-
 tatem tibi magna cura esse: tamen quoniam Sauonem
 oppidum municipesq³ illos, vel quia cum eorū plurimis
 magnus mihi vsus intercesit, vel quod ij omnes vetere
 instituto ciuitatem Florentinā sunt adepti, mirum in-
 modum diligo: non solum te hortor, sed etiam valde ro-
 go, Sauoniensium fortunas municipiumq³ ipsum & ci-
 ues omnes habeas etiam meo nomine chariores: eosq³
 ita tractes, vt intelligant meam apud te commendatio-
 nem magno illis vsui fuisse. Erit id mihi tam gratum
 quā quod gratissimum. Dat. Non. Nouembr. Anno
 primo. Roma.

Magistratui Parmæ.

31

QVONIAM mihi satis constat Castrum nouum,
 quod est in Parmensi diœcesi, ad Hippolytum Atestinū
 Cardinalem iure spectare: mando tibi, vt id oppidum
 cum iuribus eius omnibus Cardinali ipsi, vel eius procu-
 ratoribus des, tradas sine vlla mora. Quem enim vt po-
 te Reipub. perutilem atque in ea administranda maxi-
 me idoneum virum præstantemq³ hominem vnice dili-
 go, impediri ei sua iura minime omnium volo. Itaq³ da-
 bis operam, vt is ad integram eius oppidi possessionem
 confestim admittatur. Dat. Non. Nouemb. M. D.
 XIII. Anno primo. Roma.

MA-

PETRI BEMBI
MATTHAEO CARDINA-
li Gurcensi.

32

CVM certior factus sim te ad Urbem atque ad nos aduentare: qui quidem mihi nuntius sanè gratissimus fuit: statutumq₃ mihi sit relaxandi animi causa hodie Roma discedere, ne propterea tuū aduentum differas: si fortasse Romæ nobis absentibus esse non appetis, scire te volo perpaucos me dies absfuturum. Quin etiam cum appropinquare tuum aduentum intellexero, dabo operum, vt nos iam reuersos offendas, vt te alloqui, & quamprimum videre possimus. Dat. Non. Nouemb. Anno primo. Roma

Municipio Norsino.

33

ALLATVM ad nos est exules, Cassianos, qui eius oppidi arcem magna cum mea indignitate vi atque armis expugnauerunt, confidere se à vobis auxilium ad se defendendos, si à nostris militibus oppugnabuntur, impetraturos. Quamobrè mado vobis e lege, quæ de Maiestate est, & decem millium nummorum aureorum fisco inferendorū mulcta, ne illis vlla in re auxilium præbeat neue quicquam aggredi & tentare audeatis, quod eis exulibus vsui & adiumento esse possit. Dat. Octauo Idus Nouemb. Anno primo. Roma.

FABRITIO ET MARCO

Antonio Columnæ.

34

QVONIAM exulum Cassianorum audaciā, quæ superioribus diebus in eius oppidi arce inuadenda capiēdaq₃ sunt vsi: agre, vt debui, molesteq₃ tuli, atq₃ ad arcem recuperandam studium & diligentia adhibui magnopere à vobis peto, ne eis exulibus quicquam opis ad
se de

se defendendos subministretis. Quod tamen si existimē vos pro vestra in nos pietate per vos ipsos esse facturos, volui tamē ea de re literas ad vos dare, vt magis etiam de mea voluntate certiores fieretis, cum id à me intellexissetis. Dat. 8. Id. Nouemb. Anno primo. Roma.

FRANCISCO HERNANDO

Aualo Marchioni Aterni.

35

IULIANVM Rodulphum familiarem tuū probū virū et spectata virtute hominē multos iam annos bene cognitū, valde sanē amo. Is quoniā nobis in primis idoneus visus est, qui Iuliani Medicis fratris mei rerū domesticarū curā administrationemq; susciperet, ipsum ei rei praeferi: speroq; fratri meo magno vsui eius virtutē & probitatē fore. Quod te meis literis scire volui, cū vt intelligeres existimare me tibi nos non ingrātū facere, qui familiaris tui opera nostris in rebus vt amur: tū vt certior fieres nobis illum tua causa etiam chariorem fore. Dat. 8. Id. Nouemb. Anno primo. Roma.

FRANCISCO GONZAGAE

Marchioni Mantuæ.

36

ALOISIO Crepello Mantuano, cuius filio familiarissimē vtor, à certis hominibus in tua dioecesi quēdā pecunia summa debetur: quam nisi te adiuvante recuperarit, arbitratur se in perditis & desperatis habiturum. Pergratum igitur mihi feceris, si dederis operam, vt Crepellus ad suum quā celerrime perueniat: & cū ipsum, tum Franciscum eius filium omnibus in rebus tueberis. Probos homines & gratos & tua fide dignos clientelaq; cognosces. Data quarto Id. Nouemb. Anno primo. De Centumcellis.

PETRI BEMBI EPI
STOLARVM LEONIS
DECIMI PONT. MAX.

Nomine scriptarum.

LIBER VI.

ALFONSO FERRARIEN-
sium Duci.



VAN QVAM iniquū sanè fuerit ab
huius Reipub. Vicario eos homines, qui
in eiusdem Reipu. imperio essent, capi,
captosq; in custodia diu haberi: potue-
rimq; ipse Franciscum & Pasotū Fan-
tutios ciues Bononienses captos à tuis custodiaq; tradi-
tos reposcere abs te iuris & iustitia via: petereq; vt eos
in libertatē sine vlla mercede restitueres: voluntamen
& pro nostra vetere necessitudine, & pro mea recenti
charitate, qua te Pont. Max. amplector, amātissimi ho-
minis officio vti, hortariq; te id vt faceres: ad teq; nō v-
nas literas ea de re dedi sperās te ad id quod equitas ip-
sa postulabat, facile nobis hortātibus descēsurū. Quares
cū aliter, ac sperabā, ceciderit: teq; Pasotū quidem ma-
gna accepta pecunia missum fecisse, Franciscū verò in cu-
stodia et quidē dura etiamnū habere intellexerim, deq;
tua in illū asperitate nihil omnino remisisse: equis certe
erat, & huius imperij maiestati conuenientius, nihil nos
te amplius per literas hortari: ne totiēs eiusdem imperij
dignitas auctoritasq; nostra nullius esse apud te pōderis
momentiq; videretur. Quod quidem statueram facere,
at quo

atque, ut scis iam planè faciebam. Veruntamen precibus tandem et lachrymis Francisci necessariorum permotus idem illud etiam nunc scribo: abs teq³ vno verbo peto, ut pro tui Magistratus officio, proq³ ea, quam nobis obseruantia debes, Franciscum iam tandem patriæ restituas et suis: neque patiaris eius hominis libertatem, quā tu eri potius et defendere debuisses, aut impediri abs te, aut ullo pretio emi. Id si feceris, iustitiam, pietatem, dignitatem, meam tibi esse cura non dubitabo. Si non feceris, & tu meam de te opinionem maxime falles, & ego de me deq³ totare tuam. Dat. 12. Cal. Dec. Anno 1. Roma.

LVCRETIAE FERRARI-

ensium Daci.

3

NON vnis literis Alfonso viro tuo Fantutios fratres ciues Bononienses honestos viros nostros homines commendauimus, ut quidam adhuc videmur frustra. Nā cū is eos captos à suis in custodia iam per annum habuerit: ego autem illum sapius hortatus sim. Fantutios liberaret, ne vel in viros egregios, qui nihil vnquam in sese deliquerint, agere inhumaniter, vel Ecclesiasticā libertatem comminuere, demū vt aliquid etiā nobis petentibus tribuere videretur: alterū quidem eorū, qui se magna pecunia redemit, patriæ atque suis restituit: alteri autē neq³ de carceris incommodo, neque de pecunia summa, quā ei ab initio condixerat, adhuc plane quicquā remissit. Itaq³, ut verum fatear, agre molesteq³ ferens parū apud illum pietatē iustitiā Reip. dignitatē, parum etiā nostras literas valuisse, statueram nihil ei amplius ea de re scribere, indignū existimans me, qui illum & veteris beneuolentis & recentis magistratus nomine multum sand

sanè amo, in re præsertim tã honesta tamq̃ plena egregia laudabilisq̃ pietatis, toties ab ipso frustra quicquam si neq̃ fructu petijssè. Sed vicit flexitq̃ me necessariorũ Francisci perpetua obsecratio: aiunt enim ita illum aduersa valetudine laborare, vt si paulo modo vltèr in custodia teneatur spiritus illum & vita sit relictura. Itaq̃ nos orant, ne illum miserũ atque se nostra, hoc est omni spe destitutos relinquamus. Quare id, quod sæpius à viro tuo petij, idẽ nunc etiã ab eodem per literas peto, vt & illorum obtestationibus atque lachrymis, & rei æquitati, honestati, pietati, ipsi denique humanitati, quã induimur, satisfaciã. Franciscũ Fanturium scilicet sine redemptione vti missum faciat: satisq̃ habeat eã, quam à fratre pecuniã accepit. Volui autem te etiã hortari & monere: quã cũ foemina sis, tangite pietate misericordiaq̃ duci verisimilius est: vt apud virũ ea in re iustitia measq̃ parteis amplectare atque suscipias: eiq̃ persuadeas, nostris hortationibus morẽ gerere aliquando tandem in animũ inducat suũ: velitq̃ hominem se esse meminisse. Itaque in homines durius, quã ipsa humanitas postulat, ne agat. Deniq̃ cũ Reip. Vicarium sustineat, sciat indignũ ac iniquum sibi esse eiusdem Reip. homines capere, captosq̃ in custodia tamdiu habere ipsa Repub. Pontificeq̃ Max. vt eos missos faciat, postulante. Nam quomã supra mulierũ captum te & prudentem, & plurimis maximisq̃ virtutibus ornatũ omnes homines prædicant, non dubito, quin à viro tuo sis, quæcunq̃ voles, impetratura, à quo te amari ijs de causis vehementer existimo. Itaq̃ hãc tibi rẽ meo nomine remitto, vt potẽ qua huiusmodi causa apud virũ internuntius esse aptior

atq; coniunctior nullus potest: teq; ingenyq; tui bonitatem, qua excellis, ea cura oneratam magnopere volo. Id si feceris, quod te facturam pro tuo mirifico in nos cultu pietateq; confido, & mihi rem gratissimam teq; ac virtute tua dignam facies: & virum ipsum tuū magna calumnia liberabis. Ero etiā ipse tuis in rebus huius officij nō immemor: diligentiamq; aliquando tuam sarciam. Dat. 12. Cal. Decemb. Anno primo. Roma.

MAXIMILIANO MARIAE

Mediolanensium Duci.

INTELLEXI Gulielmum Marchionē Montu-ferrari abs te accersitum Mediolani propediē futurum, vt de vestris rebus alloqui hominē possis. Fuit is mihi nūtius sane gratissimus. Qui enim & te vere paterna charitate sum complexus, & illum propter eius plurima in nos, dum Cardinalem gerebamus, officia, atq; in Romanos Pontifices perpetuā obseruantia in meā fidem tutelamq; recepi: maxime opto, vt ea per vos fiāt, quibus arcto inter vos planeq; duraturo amoris & benevolentiae fœdere deuinciamini. Quod tamē ipsum etiā pro ea voluntate, qua in omnes Christianos Principes sumus, quos quidē esse cupio inter se quā coniunctissimos, est nobis, vt debuit iucundissimū. Eo autē ad te scribere sum aggreffus, vt te hortarer, quo maior ipse es, quoq; tua est & fortuna, et dignitas excelsiore loco longeq; illustriore posita, eo velles Gulielmū ad te venientē amātius liberaliusq; suscipere, atq; omni benevolentia ostensione ita tractare, vt se tibi plurimum debere fateatur. Id & ad tua ditionis securitatē propter vicinitatē locorū, & ad nominis dignitatē propter illius splendore expecta-

nemq³ hominū erit aptissimū, mihi verò tā gratū, vt in me ipsum magnū aliquod egregiumq³ beneficiū te cōtulisse sim existimaturus. Dat. 12. Cal. Dec. Anno 1. Roma.

GYLIELMO MARCHIONI

montis ferrati.

P E R sanè gratum mihi fuit id, quod proxime intellexi, te Maximiliani Maria Insubrum Ducis hortatu ad illum breui accessurum: vt is de vestris rebus te alloqui, ac tecum, quæ ex vsu vtriusq³ vestrū sint, commodè constituere possit. Nam qui propter plurima tua in me Cardinalem familiamq³ meam officia, & in Romanos Pontifices egregiā voluntatē magnopere te amo, valde cupio, vt ea per vos statuatur, quibus summa inter vos beneuolentia perpetuaq³ cōiunctio sit futura. Quod quidem pro Ducis natura optimisq³ moribus fore confido: vtq³ fieret, quod ad illū attinet, eū per literas sum hortatus. Abs te autē etiam atq³ etiā peto, primū vt, si te itineri nondum dedisti, pergas Maximiliano ea in re morem gerere, libentissimōq³ animo te ad illum quamprimum conferas: deinde vt des operā, cū illō veneris, vt is te nō minus voluntate animi tui, quā locorum vicinitate, sibi esse coniunctū cognoscere atq³ profiteri possit. Id erit mihi pro ea, quā votis omnibus semper cōcupiui, Christianorū Principū vnanimi voluntate cōstituenda, iucundissimū. Dat. 12. Cal. Decemb. Anno primo. Roma.

REGII LEPIDI

Magistratui.

5

D E M O N S T R A T V M mihi est Ioannem Petrū Gonzagā Nuuolaria Comitē, rebelles meos Regienses homines suum in oppidum recepisse. Id si ita esse compereris,

veris, meas ad illum literas, quas vnà cum his literis accepisti, quamprimum mittes. Earum exemplum has in literas conieci, vt tuas apud illum postulationes ad eorū sensum accomodare atque aptare posses. Summa est, cures omni diligentia desq; operam, vt eos habeas, & quemadmodum meriti sunt, mulctes ac punias. Dat. 8. Cal. Decemb. Anno primo. Roma.

IOANNI PETRO GONZA-

gæ Nuuolariæ Comiti.

EX literis optimorum virorū intellexi id, quod sanè credere pro mea in te vetere beneuolentia vix egregè potui, te meīs rebellibus Regiē sibus tuo in municipio receptum ac perfugiū dedisse. Id si ita est, te nō solum moneo atq; hortor, sed tibi etiā præcipio ac mando, vt quotquot ex illis tuis in locis habes, eos omnes Regij Magistratui tradas: qui autem posthac ad te venerint, eos ne recipias, sed expellas: ne cōqueri de te merito & magna cum causa possimus. Dat. 8. Cal. Decemb. Anno. i. Roma.

MAGISTRATVI BONONIAE

Polæ Episcopo.

DEDERVNT ad nos literas ij, qui publicè bonas arteis isto in oppido profitentur, mores atq; consuetudines illo in ludo constitutas magna ex parte remitti & negligi, sic, vt neque hora profitendi, neque conuentus differentium, neque Magistrorum, immunitates, atque comitia haberi solita custodiantur. Eā ego rē, vt debui, egre molesteq; tuli, qui ludum istum esse quā ornatissimū cupio. Mando igitur tibi, vt omnibus professoribus imperes, vt leges atque consuetudines vsquequaq; tueantur, nihilq; prætermittant eorū, quæ tū fieri assolent;

tum discipulorū vtilitatē atq; commoda continēt. Qui non fecerit, ei salarium auferri, & in exarium inferri iubeto. Dat. Cal. Decemb. Anno primo. Roma.

ANTONIO CARDINALI

Bononiensi.

8

CERTIOR factus sum Beneuolos fratres suarū rerū recuperationē iuxta literarū sententiā, quas ad Altabellum Polæ Episcopū Bononia Magistratū dedimus, assequutos nondum fuisse te & moneo et hortor, des operam, incumbasq; in eā rem, vt omni ex parte ea recuperatio meis ex literis conficiatur, neq; vltcrius à quopiā vllō nomine differatur. Quam sententiā voluntatemq; meā 40. viris Bononiensibus denūtiabis: eosq; meis verbis admonebis, si mihi rē gratissimā facere volent, eiusmodi cōfectionē ne impediant. Da. 8. Cal. Dec. An. 1. Ro.

RAIMUNDO CARDONAE

Proregi Neapolis.

9

EX literarum Octauiani Genuensium Ducis illiusq; oppidi Decurionū ad nos exemplo, quo in loco eius ciuitatis res sint propter illorū audaciā, qui perturbare eā armis, collectisq; exercitibus omnia permiscere aggrediuntur, facile perspicias. Ea res cum nihilo sanè minus Ferdinandi Regis tui tuamq; dignitatē, quorū auspicijs is, qui nunc viget, eius vrbis status magna cū omniū ciuium voluptate fuerat constitutus, quā nostrā ipsorū, qui municipiū illud in fidem & clientelā recepimus, diminuerē labefactareq; videatur, hanc mihi operā sumpsi, vt curarē, vt eorū te nihil lateret. Quae cū erunt abs te intellecta & cognita, tui consilij erit, perferrēne ac perpeti velis tantā indignitatē, vt paucis Galliae Cisalpinæ rebus

ne rebus reliquis, quae turbari fortasse poterant, plane iam
 constitutis: teq; prope vno in Italia paratissimum exerci-
 citum habente, ceteris aut superatis, aut communi sen-
 tentia, bellum tecum administrantibus: tamē sint, qui vr-
 bem Genuam in tuam nostramq; fidem receptam oppugna-
 re audeant sub oppidi prope iam moenibus atq; ipsas ad-
 portas positis castris, Equidem, quod ad me attinet, eos,
 unde illa, de qua loquor, armorum hominum manus ad
 quietem eius oppidi auertendam comparari audiebatux,
 propterea quod eum rerum motum totius Italiae res tur-
 bandi & permiscendi, ac bellum maximū excitandi, no-
 uasq; res moliendi asferre initium existimabam, non vnis
 vel literis, vel certis missis hominibus monui, ab incepto
 desisterent, praesentemq; eius urbis statum mea fidei com-
 missum, et traditum ne vexarent, existimans ipsos horta-
 tu meo facile quieturos, praesertim cum scirent in eo non
 minus Ferdinandi Regis, quam meum nomen dignitatēq;
 conuelli & conteri. Triremes etiā meas eam ad urbem
 tuendam misi. Nunc verò cum neq; nostra neq; Regis tui
 dignitatis maiestatis nominis vlla ab ipsis ratio habe-
 atur, equum est te, qui exercitui letissimū atq; fortissimū
 praees, eiusdem cum Regis, tum nostras, tuas deniq; ipsius
 partes suscipere, omnesq; nos, teq; in primis ab iniuria
 tam insigni praeterferre vindicaturum: ne te nominisq; tui
 amplitudinē partamq; iam gloriā contemnendā quispiā
 posthac ducat. Quis enim tua se Regisq; tui fidei credi-
 tum tutum securumq; existimabit, si Genua statum tuis
 armis constitutum, in Regis tui fidem receptum viderit vel
 peruerti, vel labefactari? Quamobrem incumbe in eam
 cogitationē, sensusq; tuos omnibus atq; animū excita: vt

oppidum egregium cuius oppidi oriū cateris Italia oppidis quieti, bellum tumultui esse maxime potest, ab imminenti hostium periculo tua diligentia, consilio, auctoritate, armis etiam si necesse erit, qua quidem arma hoc tempore tibi precipue parēt, tuis denique opibus eripiantur. Quod vnum & Regi tuo sempiternam gloriam pariet. & mihi tam erit gratum, ut me tibi ea de causa plurimum debere sim existimaturus: tibi certe ipsi nominis tuo magnum sane splendorem, magnam auctoritatem afferet. Dat. 7. Cal. Decemb. Anno primo. Roma.

EPISCOPO CERVIAE

Cesena Magistralui. 16

MANDO tibi, ut apud te meo nomine adserues nummos aureos mille, quos habes reliquos ex rationibus Saluatoris: qui nuper mortem obiit, cum vectigalia Flaminia administraret. 4. Cal. Decemb. Anno 1. Roma.

FRANCISCO MARIAE

Vrbinatium Duci. 11

VALDE mihi ea omnia probantur, quae ad Fani Fortune municipum quietem spectantia per tuos ad me homines perferre voluisti, cum in persolviendo salario Bernardo Cardulo, qui procuratorem meum eo in oppido proxime gessit, tum in restituendis Francisco Alexandro Cesenati ijs, quae ei ratione Spoliorum debentur. Quare volumus ut sic fiat, quemadmodum ipse consulis: scilicet ut Cardulo nihil persoluat ultra id, quod tu ei curari iussisti: Alexandro autem quae debentur, restituendi ea ratio adhibeatur, quae tibi esse commodior ad oriū eius oppidi videbitur. Mando etiam Episcopo Pelycastrensi Fani Fortune magistratui, ut ex tua sententia vtranque

tranquere administret. Dat. 3. Calend. Decemb. Anno primo. Roma.

HELVETIIS, QVI

apud Genuam sunt.

12

NON sanè quiui pro Reip. lasa spreta q̃, Maiestate non permoleste ferre, vos, qui eiusdem Reipu. libertatis propugnatores accerrimi nouissimis his temporibus semper fuistis, atq̃ ab ea magno in honore habiti præclara ipsius erga vos atq̃ illustra beneuolentia amoris necessitudinisq̃ signa monumentaq̃ accepistis, ad præsentem Genuæ statum & Octauiani eius ciuium Ducis quietē cōturbandam collecto exercitu armato q̃, accessisse: cū multo antea intellexissetis à me missis ad vos ea dere internuntijs, ipsum Ducem fratremq̃ eius Federicum Archiepiscopum Salernitanorum in meam fidem fuisse receptos. Quamobrem Fabritium familiarem meum magnis itineribus ad vos his cum literis mitto: vt is vobis ea, quæ mihi aqua & iusta magnopere visa sunt super ea re, nuntiet meis verbis cui fidem habebitis. Summa omnium est: vt sine vlla mora & à Genua exercitū abducatis, & nihil agri Ligurum vastatum, nihil villarum incensum relinquatis. Id si feceritis, de mea in vos beneuolentia nihil remittam: quam omni à me quidem officiorum cultam genere, quoad ipsi volueritis, conseruabo. Dat. prid. Cal. Decemb. Anno primo. Roma.

ANTONIO CARDINALI

Bononiensi.

14

PET O abste, & quidem valde peto, vt quoniā Baldassare Mediolanensi municipe tuo viro & probo & pereleganti multos iam annos familiarissime vtor,

Li 4 des

des operam vt is inter illos admittatur, qui idonei sunt,
vt ad Magistratus Bononienses gerendos recipiantur.
Dat. Id. Decemb. Anno primo. Roma.

GVLIELMO MARCHIONI

Montisferrati.

15

ET amauius te antea, dum Cardinalem gereba-
mus, omni tempore, amari enim nos familiamq₃ nostrā
à te sciebamus: & nunc quidem, cum mihi nihil merito
Pontificatum Maximum contulerit Deus, paternate
beneuolentia atque intimo amoris & charitatis mea si-
nu complector atque contineo. Est enim mihi explora-
tissima tua tuorumq₃ maiorū in Romanos Ponti. obser-
uantia & fides: quae te mihi prater eam, qua me prose-
queris, pietatem commendatissimū faciunt. Itaque sic
velim existimes, te tuosq₃ omneis, vxorem, liberos, fra-
trē mihi magna cura esse, idq₃ vt omnes homines intel-
ligant, nos si erit opus, operam & studium libentissime
posituros. Porro quacung₃ ad tuam incolumitatē, qua-
cunque additionis tua tuorumq₃ populorum et tuarum
rerū omnium conseruationē pertinebunt in ijs, tibi nū-
quam deero: neque te, vti de hoc imperio deq₃ me opti-
me meritum, et in meam initio Pontificatus fidem tute-
lamq₃ animo libentissimo receptum, ledi à quoquā, quo-
ad poterò, patiar. Dat. XI. Cal. Ian. Anno primo. Roma.

FERDINANDO HISPANIAE

Regi.

16

INTELLEXI te Petro Cardinali Anconitano
fructus Ecclesiae Gaditanae retineri mādauisse. Quae mi-
hi res & pro meo in illum fraterno amore, & pro eius in
rem Romanā plurimis maximisq₃ promeritis non parua
sanē.

sanè molestiam attulit: praesertim cum perspectissimum mihi sit eum tui studiosum semper fuisse, tuasq; res, dignitatem, gloriam, rebus omnibus autetulisse. Quare te hortor, neque hortor solum, sed etiam peto abs te diligentissime, velis Ecclesiae Gaditanae proventus Cardinalis procuratoribus remittere: quod erit mihi tam gratum, quam quod gratissimū. Caterum polliceor tibi, in meq; recipio, reliquis in rebus, quas cum eo tractas, quemadmodum voles ipse, sic plane fore. Dat. IX. Cal. Ianu. M. D. XIII. Anno primo. Roma.

INTERVNTIO HISPANIENSI

Episcopo Consentino. 17

EXEMPLVM literarum, quas Ferdinando Regi scribimus postulantes vt is Ecclesiae Gaditanae fructus interdictos à se Cardinalis Anconitanus procuratoribus remittat, habuisti cum his literis. Mando autem tibi, vt apud eū agas, cures, enitare, vt res quemadmodum volumus, conficiatur: in quo nihil pratermittes, si mihi re gratissimam voles facere, neque diligentiae, neq; studij, neque plane laboris. Est enim mihi permolestum, Cardinali de Repnb. deq; nobis optimo merito in colligendis Ecclesiae suae fructibus negotium fieri. Nam quod ad eas res attinet, quibus tu de rebus ad me scripsisti, certiorē facere Regem poteris, me curaturum, vt quemadmodū ipse postulat, sic aptentur. Dat. Non. Calend. Ianuarij. Anno primo. Roma.

FEDERICO ARCHIEPIS-

copo Salernitanorum. 18

IVSTITISSIMIS me causis impellentibus mando tibi, vt quem habet sacrorum tuorum in Ecclesia Saler-

nitana Vicarium, eum quamprimum amoveas ab administratione illa & loco: teq; id meo iussu facere neq; ipsi, neq; cuiquam patefacias. Dat. quinto Calend. Ianua. Anno primo. Roma.

MAGISTRATVI BONONIAE

Polæ Episcopo. 19

MANDO tibi, vt ex ijs ducentis peditibus, qui sub Rainaldo Gazopratorij Praefecto istic merent. L. milites eximas, quorum stipendium in alios milites tot numero, quot tibi & XL. viris satis esse videbuntur, per vos diligendos trāsferatur: quibus militibus ea mandentur cura, isq; praeficiatur, quam curā esse ex vsu istius vrbs, quemq; Praefectum ei rei fore idoneum iudicabis: ita sanè, vt posthac Rainaldus CL. milites tantummodo habeat, quibus imperet: illi autem, qui per vos diligenter, tibi & XL. viris obediant praestoq; sint suo cum Duce. 4. Calend. Ianuar. M. D. XIIII. Anno primo. Roma.

OCTAVIANO FREGOSIO

Genuensium Duci. 20

VENIUNT ad urbem atque ad nos è Gallia Trāsalpina sacerdotes aliquot honore & dignitate praediti, tollendi scismatis causa, seq; cum sacro Lateranensi Concilio reliquorū illius Ecclesiae sacerdotū nomine coniungendi: quibus obuiam mitto eum, cui has ad te literas dedi, viatorem meū: qui cū tutius atq; securius accedere Romam possint. Quare abs te peto, des operā non solum vt ij sine vllō impedimento per tuae ditionis loca iter faciant: sed etiam vt à tuis & amice, & liberaliter excipiantur. Dat. Cal. Ianu. 1513. Anno primo. Roma.

PETRO BIBIENAE

apud Venetos internuntio.

21

INTER eos, qui meo stipendio aluntur, est Augustinus Cippus istius Urbis ciuis, vir & multum terrarū peruagatus, & omnis laboris experientissimus, tum & industrius & elegans & plane comis, & mihi certe gratus. Is quoniam à patria sua in exilium missus multos iā annos externis in locis duriter & laboriose confecit, cupit q̃, quàm maxime, vt sibi redire ad lares suos liceat, mando tibi, vt Leonardum Lauredanum Principesq̃ ciuitatis adeas, horterisq̃ meis verbis, velint rogatu meo Augustinum ab exilio restituere: eisq̃ persuadeas, vt exemplo Domini, qui quidem delinquentis pœnitentiam, quàm mortem mauult, ea in re pietate potius & misericordia, quàm vindicta vtantur. Quod quidem tamen si pro istius in me Reip. voluntate facile me assequuturum confido: volo tamen vt eam rem diligenter administres, ostendasq̃ Senatui istū mihi plane gratissimum facturum, si in Augustino ad patriam reuocando mitem se liberalemq̃ præbuerit. Tota autem de re quid egeris, facies me quamprimum tuis literis certiolem. Dat. prid. Non. Ian. 1514. Anno primo. Roma.

MAXIMILIANO IMPE-

ratori designato.

22

ET SI & animo semper agitaui ex eo tempore, cū Pontifex Max. creatus sum, vt pro Reipub. Christiana otio communiq̃ bono te ab armis, ab ardore animi, ab odio exercendo cum ijs, qui hostes tuos appellas, Christianis Regibus atque Principibus. ad pacem atque amicitiam reuocerem: & posteaquam Matthæus

CAR-

Cardinalis Gurcensis Vicarius rerū Italicarū tuus pru-
 dens excellensq; vir Romam se contulit, cū eo sapius ea-
 dem de re sum loquutus. Tamē quoniam hīs diebus fratres
 mei. E. R. Cardinales non solum separatim, vt cuique v-
 sui fuit, quod saepe ante ea fecerant, sed etiam vnā omnes
 atq; palā nos ea de re multo diligentius atq; accuratius
 manuerunt, veriti ne si paulo modo vltorius nostrorum
 Principum discordia inter eos vguissent, Christianam
 Remp. bellis ciuilibus debilitatā valedissimī hostes nostri
 Turca adorirentur atq; opprimerent, qui tractare ar-
 ma, parare exercitus, clasē conficere audiebantur: idē
 nunc quoq; mihi tecū per litteras multo accuratissime a-
 gendum esse contendendumq; existimaui: praesertim cū
 & nonnullorū Regū ac Principū querela accesserint li-
 teris eorum & nuntiis ad nos perlata, petentiū, ne Chri-
 stianos populos nostra cura fideiq; creditos diutius in-
 ter se concurrere collidig; sineremus: & ipse Italia de-
 vastata prope ac desolata vocibus & quasi lachrymis ex-
 citet, vt de grege Domini passim percurte ac se conte-
 rente sollicitus nihil nō cura in eo continendo conseruan-
 doq; adhibeā, nihil remittā laboris. Itaq; te et moneo et
 hortor & plane etiā atq; etiā rogo per Dei Opt. Max.
 nomē, à quo tuo sanē nomini dignitas omnis Maiestasq;
 accessit: per sedē hanc Christianae reip. cuius vniū tuen-
 da cogitatio ad te maxime omnium atq; iustissime perti-
 net: per tot sanctorum virorum humata hac in vrbe atq;
 tellure corpora, qui multos labores, multas exēnas per-
 tulerūt, multū etiā sanguinis instituendis nostris sacris
 augendisq; profuderunt, vt ad pacē cū tuis hostibus in-
 eundam animū & cogitationem tuā des, eamq; de se-
 dibus

dibus deq; populis Domini praepe expulsam, te quidem certe implorantē ne aspernere: praesertim si aequas illam ad te conditiones asferre perspexeris. Quā certe in sententiā adduci eo facilius debes, quo laudabile illud propositū animi tui, qui cū in primis ad arma profuisti: vt libertatē ecclesiasticā audacia nonnullorū violatam cōminutāq; defenderes, dignitatēq; nostrā ab iniuriā vēdicares, suos iam exitus habet: hostesq; tui Dei munere ac tua incredibili virtute tuorūq; fœderatorū auxilio positis animis contumacibus ad huius Reip. cultū & obseruantia humiles accesserunt. Certe quemadmodū te bello imperterritū atq; inuictū adhuc quidem omnitēpore praestitisti: ita optimis consilijs tractabilē dari nūc te, erit non minus prudentia tua quā illud fuerit fortitudinis. Meminisse etiā debes, cum omnium Christianorū Imperatorē geras, datū te à Deo esse quasi tutorē eius populis: vt non tū tibi cogitandum sit, quos vincere atq; subijcere tua ditioni possis, quā vt omnes esse incolumes te procurante conspiciantur. Deinde quo maior ipse excelsiorq; es, eo de te decet omnibus hominibus faciliore commodioremq; esse, benignitatemq; non implacabilitatē, obliuionē incuriarum, non vindictā, liberalitatē non potentiā exercere: neq; tā querere, quibus artibus latiores Imperij tui fines habeas, quā quibus virtutibus gloriā tui nominis extendere, hominumq; in te beneuolentiā augere atq; amplificare melius atq; facilius possis. Quamobrem, vt ad illud redeā, quod inirio dixi, rogo obtestorq; te, primū quidem, vt animū tuū ad pacem inter omnes Christianos Principes conciliandam applies: Deinde vt te ad eas pacis conditiones cū tuis hosti-

hostibus deducas, quæ si non tales erunt, quales ipse volles maxime, sint tamen eiusmodi, ut qui te summopere diligunt, non esse eas abs te reiiciendas putent. Cruentari enim gladios, vastari prouincias, oppida dirui, quæ quidem mala cum bellis semper coniuncta sunt, exerceri denique inter Christianos Principes tam acerbæ contentiones, non solum Reip. Christiana periculosum est, sed ne illis quidem ipsis, qui eas exercent, non triste, non miserum, non fugiendum. Id si ipse per te feceris, plane confido reliqua bella omnia in vniuerso eiusdem Reip. imperio, omnibus hominibus tuum vnius præclarum factum respicientibus, facile quietura: quiq; nostris ceruicibus imminens hostis noster perpetuus Turca, deq; nostris seditionibus incredibilem latitiam capiens nos eam ob causam à sese facilius debellatum iri spem non dubiã alit, vel se intra suos limites continebit, vel nos vnà in redimendis à seruitute Christianis gentibus conspirantes aliquando victores sentiet. Me quidem ipsum, qui te vnice atque summopere amo, fratrumq; meorum Cardinalium collegium, vel potius Christianam rem vniuersam tibi egregie atque in omne tempus deuincies. Dominus autem, ut est in remunerando benefacta hominũ largus, quicquid hac in re atque hoc tempore amore sui me hortatore tuis hostibus remisseris, tibi nominiq; tuo Augusto reliquis tuis in rebus postulatisq; decupla mēsurā atque centupla sarciet. Dat. V. Cal. Ian. M. D. XIIII. Anno primo. Roma.

SINGVLIS IIS QVI

creandi Imperatorē ius habent. 25

EXEMPLVM *literarum, quas ad Maximilianum*

NUM Imperatorem designato dedimus, quibus eum ab armis, à bello, à contentionibus cum Christianis Principibus exercendis, ad pacis studia cogitationemq; reuocamus, habuisti cum his literis. Ex eo curā in eare nostram, diligentiam, studium, pietatem denique, quam adhibemus, ut eius ceterorumq; Principum animi pacē ineant, facile perspicias. Quare cum te plurimis legitimisq; de causis magna esse apud illum auctoritatis exploratam habeam, nec dubitem, quin pro tua virtute animiq; temperantia, proq; officio optimi prudentissimiq; Principis te quoque communia Christianorum populorum mala vel praesentia, vel etiam impendentia commoueant, prorsus vehementer etiam atque etiam abs te peto, ut meas apud illum hortationes literis, postulationibus, internuntijs, per te ipsum denique, si fieri poterit, & quantum poteris, iuues. Planè enim cum in eo, qui tuos conatus adiuuabit Deus, tum in tua diligentia prudentia, auctoritate, spem maximā habeo, fore, ut ab illo sis quaecumq; voles impetraturus, tam iusta praesertim in re atque causa, qua quidem id agit, ut Christiani sanguinis, quem exhauriri profundiq; tam largiter his temporibus perditis atque miseris vidimus, aliquādo tandem ratio habeatur, resq; Christiana publica vel nervos atq; vires resumat, proferatq; in dies sese, quod erat sanè conuenientius, vel ne perpetuis nostris hostibus ludibrio internecioniq; dedatur. Id si tu quidem fili mihi animoq; meo pergate, quantum in te erit, confeceris, & dei causa per te sustinebitur, & me beneficio tuo deuincies, & tibi ipse gloriam paries sempiternam.

Dat. quarto Calend. Ian. 1514. Anno primo. Roma.

L A V R E N T I O E P I S C O P O

Feltrinorum internuntio.

24

E X. literarum exemplo, quas & Maximiliano Imperatore designato, et ijs, qui Imperatorem creandi ius habent, dedimus, ea, quæ de pace inter Christianos Principes concilianda ad eos scribimus, intelliges, quæ quidē exempla atque ipsæ etiam nostræ ad eos literæ tibi red-dita sunt cum his lireris. Volo autem, primum quidem, vt eas literas ijs, ad quos data sunt, quāprimū quāq̃, diligenter cures reddendas & perferendas. Deinde vt quantum in te erit, omni studio, diligentia, labore, omnibus animi tui sensibus rem consiliūq̃ nostrum apud eos singulos iuues, nihilq̃ omnino prætermittas, quod ad persuadendam Imperatori concordiam & pacē esse vsui & adiumento possit: nullaque te in re existimes a-quē gratum nobis facere posse, quam si hac in re id, quod volumus, confeceris. Dat. 4. Cal. Ian. M. D. XIII. Anno primo. Roma.

V L A D I S L A O R E G I

Pannoniæ.

25

S C R I P S I M V S & Maximiliano Romanorum Imperatore designato, & Ferdinando Hispaniarū Regi, & Henrico Regi Britannia diligentissime: qui quidem Reges nonnullis cū Regibus & Principibus Christianis bellum gerunt: eosq̃ pro nostri muneris officio ac propensa in rem Christianā pub. voluntate hortati sumus, vt ab armis in inter se exercēdis, quæ sanē diutius, quā oportebat tractata vibrataq̃, viguerunt, ad pacis aliquando tandem studia conuertentur. Nā præter-quā quod plurima semper cū bellis mala calamitatesq̃

coniun-

coniuncta sunt, id etiam planè timemus, ne contritis
Christiana Reip. per eiusmodi odia contentionesq³ ner-
uis atque lacertis, totoq³ corpore debilitato, validissimi
hostes nostri perpetui Turca nos adoriantur, atque oppri-
mant: qui Ducem audacissimum Selinum Regem nacti
tractare arma, parare exercitus, classem conficere di-
cuntur, vt nos dissentientes labefactatosq³ pessudent,
se³ nostris ceruicibus imponant. Ad hac accesserunt per-
petua fratrum meorum E. R. Cardinalium idem prope
verentium & respicientium iam ab initio nostri Ponti-
ficatus agi cœpta postulationes: qui sane diligenter non
solum secreto aut separatim, sed etiam publice atque si e-
quentes sæpenumero nos admonuerunt, curaremus, ne
vlterius Christiani inter se populi concurrerent. Certi
etiam reges atque Principes per literas ac per internun-
tios, vt eam curam cogitationemq³ susciperem, pacemq³
inter dissidentes conficerem, nullus me precibus rogaue-
runt: quos quidem commune periculum sollicitat: quiq³
magnopere ne hostibus nostris latuita simus atque laci-
brio, pertimescunt. Quas ob res omnes cum ad eos Re-
ges, quos supra commemorauì, diligenter scriptas lite-
ras dederim: te etiam & monere & hortari volui, vt
eisdem regibus ipse quoque in eam sententiam scriberes,
hominesq³ tuos mitteres, qui eos ad pacis studia cogi-
tanda suscipiendaq³ hortarentur. Quod tu quidem certe
facere eo diligentius debebis quo periculo es proximior,
teq³ ipsi Turca his temporibus primum omnium ex Chri-
stianis Principibus delegerunt, in quem inuaderent,
quemq³ debilitare ac proterere, conarètur. Id vt facias,
non solum quia tua interest, sed etiam quia omnium, &

quod maxime in eo rei Christianae dignitas maiestasq;
defenditur, abs te etiam atque etiam peto. Dat. tertio
Cal. Ian. M. D. III. Anno primo. Roma.

THOMAE EPISCOPO FEL-

TRINORVM INTERVENTIO. 26

REVERTITVR istuc ad Maximilianum. Imp.
designatum Ant. Cominatus mihi multis de causis valde
charus: qui cum multa et tecū communicanda, et Maxi-
miliano significanda sum locutus. Quibus in omnibus ei
fidem habebis: quaeque illi mandata dedimus, ea tua pru-
dentia et diligentia reddes faciliora. Quinetiā vnā cum
ipso, si tibi opus esse videbitur, ad Imperatorem te conse-
res: resq; communi consilio nostras administrabis. Dat.
VIII. Id. Ian. M. D. XIII. Anno primo. Roma.

MAXIMILIANO IMPERA-

TORI DESIGNATO. 27

CVM intelligeremus Antonium Cominatum, quem
ad nos miserat, abs te accersitum redire ad te, scire-
musq; cum abs te amari, nos verò ipsi vel propterea quod
abs te diligitur: vel propter eius singularem virtutem,
hominem diligeremus: multa cum eo communicauimus,
quae conducere ad commune vtriusque nostrum commo-
dum dignitatemq; his temporibus magnopere videban-
tur. Illum igitur audies, nosq; diliges. Dat. VII. Id. Ian.
M. D. XIII. Anno primo. Roma.

BONONIAE MAGISTRATVI. 28

QVONIAM certior factus sum, his diebus eiusmodi
motum istic animorum fuisse, sic ad arma concitum
esse, vt mirum prope modum fuerit, plurimorum ciuium
eadem & optimorum virorum interitum non fuisse con-
sequi-

sequuntur: mando tibi, ut cū aliquid excitari audieris inter istos ciues, edicta grauisima constanter atq; intrepide proponas, operamq; des, ut omnes te homines timeāt, auctoritatemq; vereantur tuam: ne tibi quisquam illudere, vel nostrae potius dignitati tuo sub nomine audiat: sed tibi pareant, hoc est nobis, quorum tu munus in isto Magistratu geris. Itaq; volumus, ut omnia agas, cures, prauidelas, ne armatorum hominum conuentus à quopiam excitentur. Et si verum esse compereris, quod à nonnullis affertur, Antonium Volteium eius, de quo dixi tumultus atq; motus causam occasionemq; dedisse acriter eum reprehendes, monebis ab armis se abstineat, ne grauius aliquid in illum decernere vel inuiti compellamur. Dat. sexto Id. Ian. M. D. XIII. Anno primo. Roma.

ANTONIO VOLTEIO

BONONIENSI.

29

INTELLEXI magna quidem certe cum molestia, eius tumultus, qui proxime isto in municipio excitatus parum absuit, quin maximorum malorum & plurimorum ciuium cadis initium fuerit, te autorem extitisse. Eares, quo te magis diligo, eo me acrius vehementiusq; commouit cum tua ipsius causa quem esse iustum et temperantem pacisq; cupidum & studiosum maxime conuenit: tum propter istius urbis otium, quod tueri omnibus modis debeo. Quamobrem te hortor, vel potius mando tibi atque impero, omni studio & diligentia caueas ab eiusmodi motibus excitandis: ne iuste de te conqueri, neue in te grauius aliquid decernere atq; statuere cogamur. Dat. sexto. Idib. Ian. M. D. XIII. Anno primo. Roma.

QVAE ad me perferri per Dominicum Malium internuntium tuum probem hominem curavisti, ea mihi plane gratissima fuerunt. In ijs enim & tuam erga me familiamq; meam veterem benevolentiam agnoui, & illa tua multarum rerum experientia, prudentia consilium, ex quibus ea manabant, et quorum plena Malij oratio fuit, non mediocrem mihi voluptatem attulerunt. Itaq; ea de re atq; cura, quam sumpsisti, vt cogitationes tuas mihi notas faceres, valde te amo. Quae quidem à me omnia diligenter considerabuntur, daboq; operam, quoad potero temporaq; patientur, ne frustra laborem sumpsisse videare. Quod ad Iouis oppidum attinet: tibi quidem scitis libentissime fecissem, si modo aliquo potuissem. Sed res est planè perplexa, sic, vt explicari hoc tempore non possit: quemadmodum ab ipso Malio intelliges. Reliquum est, vt te nobis esse charissimum tibi persuadeas: tuaq; omnia nobis magna cura esse, ac semper fore. Datum quinto Id. Ian. M. D. XIII. Anno primo Roma.

KAIMVMDO CARDONAE

PROREGI NEAPOLIS. 31

AMAVI, quod te scire non dubito, quoad vixit, Antonium Cardonam Marchionē Padula gentilem tuum, cum propter eius plurimas egregiasq; virtutes, tum quod me singulari observantia prosequeretur. Lius vxor vidua proba sanè nobilēq; mulier propinqua mea quod dotis reliquum sibi debetur, et praeterea portionem illam, quam

quam lege petere viduæ mulieres in regno Neapolitano solent, per procuratores suos dari sibi ex mariti testamento postulat: cupitq₃ maxime, ne impensis contratur, ius abs te suum quam celerrime consequi. Quare abs te peto, eius scemina causam fortunæq₃ omnes, quæ hoc in negotio maxime versantur, habeas meo rogatu quam commendatissimas, velis pro tua in nos obseruantia dare operam, vt quod ei iure competit, de eo mulieri, à quibus debetur, integre ac sine dilatione satisfiat. Erit id & viduarum nomine, quæ præcipuè subleuanda sunt, sane pium, & nobis apprime gratum. Dat. IIII. Idib. Ian. M. D. XII. Anno primo. Roma.

MARCHIONI BRAN-

DEBURGENSI.

32

REVERTENTIBVS ad te legatis tuis probis viris has ad te literas dedi: quibus tibi significarem me illos tuo nomine à te venientes, consiliaq₃ tua nobis ostendentes & libentissime vidisse, & non semel audiuisse, tuusq₃ et fratris tui postulationibus omni ex parte satisfecisse. Amo enim te, atq₃ illum, tantiq₃ facio, quantum vtriusque virtus atque dignitas postulat, hoc est plurimi atque maximi. Itaq₃ existimare te planè volo, & pro tuo maiorumq₃ tuorum in Rempub. cultu, & pro ea, qua nos ipse pietate prosequeris, quæ ad te dignitatemq₃ tuam pertinebunt, ea nos æquè, ac si de nostro ipsorum commodo ijs in rebus ageretur, quam commendatissima semper habituros. Dat. quarto Idib. Ian. M. D. XIII. Anno primo. Roma.

P. ROEGIS NEAPOLI-

TANI VICARIO.

33

Kk 3

CVM

CUM maxime nostra intersit, ut Franciscus Mariani Scorcij filius civis Romanus, quem esse Capreis intellexi, mihi videatur: te etiam atq; etiam hortor, des operam, ut eum, quanto celerius fieri potest, habeas in custodia semoto aliquo & secreto in loco. Id si feceris, quod ut facias, magnopere abs te peto, spondeo tibi, te in eo non solum mihi, sed Regi etiam tuo rem gratissimam esse facturum. Tota autem de re quid egeris, facies me quàm diligentissimè certiore. Dat. XIX. Calen. Feb. M. D. XIII. Anno primo. Capricana.

PARMAE REGIIQUE LE-
PIDI MAGISTRATVI. 34

EGREGIAM mulierem Paulam Gonzagam paterne amo vel propter eius probitatem & mores vidua femina dignos, nobilitatemq; generis, vel quia soror est Alberti Pij, quem scis apud me Maximiliani Rom. Imp. desig. Legatum agere, doctissimi praestantissimiq; viri, quemq; ipse vnice diligo. Itaq; certior factus illam maxime cupere impetrare à me Monticulum oppidulum, quod in agro Regiensi est, eam ob causam tantummodo, ut habitare in eo suis cum mulieribus possit, vitamq; cœlibem, quam degit, commodius atque honestius ducere: mando tibi, ut paulè oppidum Monticulum, adesq; oppidi des, quibus utatur, diligentiamq; adhibeas, ut eas vacuas, cum uti volet, habeat. Dat. XVII. Calen. Feb. M. D. XIII. Anno primo. Thuscanella.

MAXIMILIANO MARIAE ME-
DIOLANENSIVM DVCI. 35

ALLATVM ad nos est, quod quidem nobis molestissimum fuit, quàm indigne praterq; morem sacrorum homi-

hominum & virorum religiosorum Cisterciensis societatis monachi aliquot istuc nuper se gesserint: qui conducta armatorum hominū manu monasterium Ambrosianum manus eiusdē societatis noctu aggressi portas vi fregerunt, Basiliumq; Casatensem eius monasterij Praefectū comprehenderunt, comprehensumq; secum abduxerunt. Ea res cum maximam inter omnes monachos perturbationem pariat cum audacia novitate facinoreq; ipso, tum vero etiam exemplo, quin tibi quoq; summopere displicuerit pro animi tui iustitia et pietate, planè non dubito. Qua de re tota quid nobis statuendum sit, mature considerabimus, tibiq; perscribemus. Nunc autem quia periculum est, ne inter istos armatorum discursus atq; licentiam aliquis improbus, ut sunt multi, ad horrea monasterij Clareuallensis eiusdē societatis atq; ad suppellectilem animum adiciat, quæ quidē suppellex perluculenta peregregiaq; est, eamq; appetat atq; diripiat: te magnopere hortor, mittas illō religiosos viros vnā cū tuis militibus, quib. mandes, dent operā: nequid omnino ex monasterij rebus atq; ex ea suppellectile vniuersa, maximeq; argentea depereat. Dat. XI. Cal. Feb. Anno primo. Grauisis.

MAGISTRATVI SIN-

VESSANO.

36

Amo sanè quidem paterne Aloisium Sinuessanum familiarem meum: eiusq; opera & fide meis in rebus quotidie vtor. Quamobrem patrem eius Franciscum bonum & frugi hominem, ipsiusq; Francisci res & fortunas omnes tibi commendo maiorem in modum. Qui cum isti municipio præsides, cuius est ipse ciuis, & in quo domicilium remq; suam omnem habet, non est dubium,

Kk 4

quin

quin illi vsui & ornamento esse plurimum possis. Id vt facias, omnibuq; illum in rebus & negotijs quam commendatissimum habeas, abs te peto. Dat. VIII. Cal. Feb. M. D. XIII. Anno primo. De Centuncellis.

ENNIO EPISCOPO

VERULANO.

37

FIDES, opera, diligentiaq; tua, quibus te in nostris rebus cum Heluetijs ecclesiasticis & libertatis defensoribus administrandis vsum intelligo, magnopere mihi probantur: hortorq; te, vt quemadmodum adhuc quidem te laudabiliter prudenterq; gessisti, ita deinceps ea sedulo agas, quibus optimam erga te voluntatem meam etiam atq; etiam augeas. Omnibus autem de rebus quae te scire volo, ea ex meis ad Gorum Gherium internuntium, meum literis intelliges. Dat. sexto Calend. Feb. Anno primo. Ex Severiano.

VNI EX PRIMATIBVS

HELVETIORVM.

38

Ex Ennij Episcopi Verulani, & Gori Gherij Interpretum meorum literis intellexi, qua cura et diligentia, quantaq; tua in nos voluntatis ostensione procurandis apud Heluetios rebus nostris te gesseris. Quod quidem neq; nouum mihi pro tua probitate atque consuetudine pluribus in rebus cognita, neq; sanè non iucundissimum fuit. Amo enim te charissimumq; habeo, vtq; magis magisq; in dies singulos tua in nos merita exaugeas, valde opto vt etiam vberiore à nobis gratia relationem, ab hominibus reliquis veram laudem atq; gloriam, à Deo Opt. Max. autem, cui ista procurantur, secundiores tuarum rerum. omnium exitus, euentuq; prosperiorem consequare.

sequare. Itaque te hortor, vt eandem diligentiam studiumq; tuum is, qua restant, tractandis rebus adhibeas, reddasq; omnia tuo studio tuaq; opera, consilio, prudentia faciliora. Dabo autem ipse operam, vt tu labores vltos nostra causa suscepisse nunquam non gaudeas: quemadmodum interpretibus meis latius semper eare scripsi. Dat. VII. Cal. Feb. Anno primo. Ex Seueriano.

PETRI BEMBI EPI
STOLARVM LEONIS DECL
MI PONT. MAX. NOMINE
scriptarum.

LIBER VII.

LODOVICO GAL
LIAE REGI.



DE Anna Regina vxoris tua morte certior factus magnam sanè molestiam cepi: cum propterea quòd foeminam egregia singulariq; virtute & spectatio in Deum ac Dei Ecclesiam cultu pietateq; amissimus: tum quia te pro tuo in illam laudabili amore, illius in te, maximo esse dolore affectum multorum literis intellexi. Accedit adhuc, quòd me illa, quasi patrem optatissimum pia; amantissimaq; filia, incredibili obsequantia prosequeretur. Regnum etiam ipsum tuum ceteraq; gentes opis alienae indiga, in quas illa munificentiam exercebat suam: multum mihi amisse in ea ma-

liere bonæ spei atq; præsidij videbantur. Itaq; pluribus et quidem iustis maximisq; de causis vehementer is mentis perturbauit. Verum cum optimam viuendi rationem summamq; probitatem, et eximiam mulieris temperantiam tam amplo in Imperio posita ceterasq; eius præstantissimas virtutes animo repeteremus, & simul huius vitæ misérias atq; horum temporum incommoda perturbationesq; respiceremus, in eam sententiã adducti sumus, vt bene cum ijs actũ esse statueremus, qui hoc tempore mortem cum vita commutauissent. Deumq; Opt. Max. Annam Reginã ad sese, tanquã de terrarum astu & fluctibus in portum, aut tanquam de flebili hospitio ad plenam hilaritatis paternam domum cœlum ipsum beatorumq; concilium vocauisse, magnopere existimaremus vbi illa bene actæ vitæ præmia, et cū liberalitatis atq; beneficentia, quib; duabus virtutibus supra mulierũ captum enituit, tum vero etiã temperantiæ patientiaq; suæ speratos fructus lata felicissimaq; perciperet. Quæ omnino cogitatio mœrorẽ quidem meũ multum leuauit. Quare te hortor, vt eadẽ atq; similia vel etiã meliora, quæ tuæ tibi vel prudentia vel animi magnitudo facile subministrabit, ad cogitationes tuas adhibeas ægritudinemq; q̃ te vxoris tuæ mortem contraxisse audio, leues: ferasq; æquo animo, quæ ferenda sunt: sunt autem ea omnia, quæ aliter se habere non queunt. In quo & tuam ipse temperantiam atq; prudentiam maxime ostendes, et mihi, qui te vnice diligo, omnem mœrorem absterges, si te leuatũ sensero. Dat. tertio Cal. Feb. Anno primo. Roma.

CLAVDIAE LVDOVICI

REGIS FILIAE.

2

AVDITA

AUDITAMORTE Anna Regina matris tuæ, multis
 quidem de causis magnum sensi dolorem: sed eum præ-
 cipue, quod te filiam in tam tenera ætate reliquit, ut tuas
 exoptatas sibi nuptias iam tractari cœptas conficere, læ-
 titiamq; de te capere, quam ei debeas, non potuerit: ex
 quo te etiam magnum dolorem accepisse magis quidem
 ingenij tui mirificæ indole, quàm ætate tua ad animo-
 rum affectus percipiendos idonea, te inuente ac exci-
 tante sanè puto. Sed quoniam ea Dei Opt. Max. volun-
 tas fuit, matrisq; tuæ virtutes tot tamq; egregiæ extite-
 runt, ut memoriam eius nominis omnibus seculis conser-
 uatura videantur, curandum tibi est, non tam ut homi-
 nes ex eius te obitu mœrentem sentiant, quàm cogitan-
 tem quibus artibus ei esse quam simillima possis. Quod
 planè futurum confido: atq; ut ei rei curam adhibeas, et
 in iuniorum te Domini exemplo matris instituas, amantis-
 sime te hortor. A me autem te sperare omnia volo, quæ
 ad tua commoda dignitatemq; pertineant, eoq; magis,
 quod te tam illustri matre, tamq; optima orbatam &
 spoliatam video. Et quanquàm is tibi pater sit, qui sup-
 peditare tibi omnia, quæ à te expetentur, & propter im-
 perij magnitudinem poterit, & volet propter amorem,
 quo is matrem tuam complectebatur, cuius tu illi imagi-
 nem refers, quoq; tibi parentis nomine afficitur: nostrum
 tamen studium, si quid tibi esse vsui poterit, voluntasq;
 ad te ornandam propensa tibi certe nunquam deerit.
 Dat. tertio Calend. Febr. M. D. XIII. Anno primo.
 Roma.

BRESELLAE PAGO

HELVETIORVM.

3

INTEL-

INTELLEXINOUUM vos in Heluetijs pagum confecisse, duodecimq³ prioribus atque antiquis pagis vestrum Brensella pagum adiecisse. Quade re non medio-crem sanè latitiam & voluptatem cepi, cum intellige-rem sociorum meorum mihiq³ charissimorum & con-iunctissimorum vires atque nomen augeri. Itaq³ de eo vobis atq³ illis gratulor. Caterum eius reb. fidem habebi-tis, quas ad vos Ennius Episcopus Verulanus & Gorius Gherius interpretes mei deferent. Dat. prid. Cal. Febr. M. D. XIII. Anno primo. Roma.

RAIMUNDO CARDONAE

PROREGI NEAPOLIS.

4

COGNOVI de procuratori tuo Bercenno, quanto studio quantaq³ diligentia & quam multiplicibus modis vsus es, vt bella controuersiaq³ inter Maximilianum Roman. Imp. def. atque Venetos sedarentur planeq³ res-tinguerentur. Quares ita mihi grata atq³ iucunda ac-cidit, vt nihil gratius nihil iucundius esse potuerit eo nuntio. Itaq³ cum plurima atq³ maxima tua erga nos omni tempore officia extiterint obseruantia, beneuolen-tia amorisq³ plenissima: tamen propter eam curam, qua zeneor nostrorum hominum confectis odio animis exul-ceratisq³ medendi, tua ista recens mirificaque solertia nullo tuo est antehac ad mea cōmoda dignitatemq³ ad-hibito studia inferior. Nunc autem quanquam mihi du-bium non est, quin quod super est, super est autem, vt mi-hi quidem videtur, etiam paululum quiddam, quod ta-men ipsum pro mea voluntate nimium quantum est, ea-dem sis diligentia confecturus: te tamen etiam atque et-iam hortor, & pro nostra necessitudine abs te peto, nihil posthas

posthac intermittas neque studij aut vigilantia, neque opera, neque plane laboris, vt quemadmodum res, quæ labi atque flectere in peiorem partem coeperat, tua est prudentia & diligentia eò reuocata, vt bene nobis sperandum sit, ita, quod reliquum est, quod quidem certe iam minus difficile videri debet, ad optatos exitus speratosq; quam celerrime perducatur. In quo & si rem sane quam Ferdinando Regi tuo gratam, Christiana autem Reip. maxime profuturam efficies: me certe ita tibi deuincies, vt omnium maximum benefactorum & meritorum cumulum tuis prioribus meritis te addidisse sine existimaturus. Tibi verò nominiq; tuo iam illustri tantum gloriæ splendoriq; adyicies, quantum te illa alia ex hoc quidem tempore posse assequi vix est vlllo modo credendum. Plane autem in Domino confido, cuius in partes suscepisti, qui concordiam inter disidentes, pacem, inter bello implicitos conciliandi curam atq; munis generis, tuam te operam non frustra positurum. Caterum tota de re latius cum Bercenno sum loquutus: is ad te omnia perscribet. Datum prid. Calend. Febr. Anno primo. Roma.

VICARIO PROREGIS

NEAPOLITANI.

MITTIMVS istuc ad recuperandam sacrarij nostri supellectilem à Vicario Episcopi Salernitani male ablatam, Gabrielem Archiepiscopum Dirrachinorum eiusdem sacrarij custodem qui tota de re mentem te nostram docebit. Itaq; enim causamq; ipsam commendo tibi maiorem in modum. Gratissimum mihi erit, si deris operam, vt quemadmodum is tecum statuet, ita res quam

quam celerrime transigatur. Dat. Id. Feb. Anno primo.
Roma.

FABRITIO CARRETO MAGNO
RHODI MAGISTRO. 6

LECTIS literis tuis, quae me cum de Guidonis magni Rhodi Magistri morte, dum de tua in eius locum suffectione per concilium societatis legitime facta certiores reddiderunt. In altero perinde, atq³ de optimi praestantissimiq³ viri maximeq³ temperati prudentiq³ hominis iactura sanè per quam dolui illumq³ tam breue temporis spatium societati suae praefuisse, ut parum ei ornamentum accidere ab ipso potuerit, moleste admodum tuli. In altera tanta letitia is me nuntius affectit, ut statim Deo Opt. Max. gratias egerim, & quoddam dolorem quem ex Guidonis morte contraxeram, tua declaratione leniret: & quod illud tibi muneris tradi mandariq³ voluerit, qui pro tua virtute, animi magnitudine, diligentia, religione maximis in rebus perspecta saepe atque cognita nihil est eorum praetermissurus, quae ad rem Christianam conservandam atque amplificandam ipsiusq³ cultum & illustrandum & propagandum perinebunt. Atque hoc cum publice mihi gratum et iucundum est: tum illud priuatim adiungitur, quod te, dum Cardinalem gererem, multos quidem annos et amavi ipse, & abs te amari me planè sensi: ut si vnus ex omni sociorum tuorum numero mihi optandus fuisset, quem sibi illa societas praeficeret, neminem tibi sanè praetulissem. Itaq³ duplici nomine ea de dignitate ac praefectura tibi tradita magnopere gratulor, altero Reip. altero vnus ipsius atque proprie meo: optoq³, ut & honor tibi iste salutaris, & tu societati tuae
vsi

usui atq; gloria sis futurus: quod quidem plane confido fore. De me quidem tibi ipse omnia promittas volo, quae ab oprimo atque optatissimo filio de patre amantissimo sunt speranda. Non fallam opinionem tuam. Caterum obsequij tui peregregia perq; illustris significatio, quod mihi eadem tuæ literæ Philippiq; Frouanus societatis procurator tuis verbis præsiterunt, mihi gratissima accidit: eamq; libenti animo sum complexus. Societas etiam ipsa tua, quam mihi magnopere commendas, quæq; mihi, tanquam de vniuersa re Christiana optime merita, charissima per se est, erit posthac mihi tuo etiam nomine charior: proq; ea insulæq; ista ab Turcarum cupiditate bellicisq; apparatus, de quibus scribis, tuenda & defendenda, si erit opus, nihil sum neq; studij neque diligentia neq; omnino laboris pratermissurus. Certe non si vitam ipsam profunderem me oporteat ea in re, tua vnquam societatis curam, tutelam, procurationem negligam. Quod respondere ei meis verbis opto & volo: eamq; bono animo esse atque forti iubeo. Cui quidem gratulor, quod te sibi magistrum legerit: atq; te ea, qua debet obseruantia prosequatur, quanquam id quidem scribere pro antiqua ipsius in omnes magistros pietate minus necesse est, eam tamen hortor. Etiam atq; etiam mi Fabriti vale.

Datum VIII. Id. Feb. Anno primo. Roma.

FABRITIO MAGNO RHODI MAGISTRO. 7

BERENGELLUM Rechesium, qui à Raimundo Cardona Prorege Neapolis vnice diligitur, estq; ex eius intimis maximeq; familiaribus, commendo tibi maiorem in modum. Is vt ei Prioratum Aliagensem, qui est in agro

agro Tarrocanensi tradas, per me impetrare abs te postulat: dignusq; admodum Rechesius videtur esse tum proregis nomine atq; causa, tum etiam quod multos annos ordini tuo egregium studium nauauit, in quem eiusmodi beneficium conferas. id si feceris, erit mihi sanè quàm gratum. Dat. VII. Id. Feb. Anno primo. Roma.

MAGISTRATVI BONONIAE

POLAE EPISCOPO.

8

QVONIAM & coliper te legum iussa, animaduersionemq; in scelestos fieri summopere volo, et Antonium sancti Sixti presbi. Cardinalem Bononiensem, vt scis, vnice amo, charissimumq; habeo: vt harum duarum omnium meo quidem iudicio maximarum atq; sanctissimarum rerum rationibus iuris reddundi amicitiaq; colende satisfiat: in reorum istorum causa, quos in vinculis habes, de quibus tuis me literis consulis, petisq; quid fieri velim: ita tibi respondeo. Nam cum & iustitiae administratio ostentionem maxime postulet iuris administrari, & humiles atq; assiduus Cardinalis postulationes multis admixtas non modo precibus, sed etiam lachrymis, nihil impetrare à me durum admodum atq; implacabile videri possit: mando tibi, vt eos ipsos omnibus, quibus in rebus fieri assolent, more atq; consuetudine seruatis condemnnes perinde atque meriti sunt: condemnatosq; ad eum locum duci mandes: vbi eos morte multari oportet, si multari vellemus. Cum autem inspectante populo ante mortis instrumenta in habitu damnatorum perducti constiterint, eos Cardinali nostro nomine dono des facta testificatione postulationis, quae apud nos supplici atque

atque accuratissima est vsus, nostraq; erga illum voluntatis : vt plurimum valere apud nos Cardinalis bene de Rep. meriti auctoritatem omnes homines intelligant. Caterum de ijs quos in posterum scelestos comprehendes: mandata nostra exhauri. Dat. VII. Id. Feb. M. D. XIII. Anno primo. Roma.

MAGISTRATVI BONONIAE

POLAE EPISCOPO.

9

MAGNA cum molestia percepi, contemptis edictis tuis meo nomine propositis ab improbis scelestisq; hominibus istius ciuitatis admitti quotidie indignum insolensq; aliquid, & nefaria crimina creberrime perpetrari. Quemadmodum nuper accidit, admissumq; est ab ijs, qui armati per oppidum incedere noctu atque interdiu sunt ausi magna cum perturbatione ingentiq; motu istorum ciuium: quos quidem in otio atq; in officio continere nullo non studio & diligentia nitimur. Quorum ex numero scelestorum seditiorumq; hominum quoniam cognoui aliquot fuisse qui dum illa committerent, quo se facilius tuerentur, Antonij Cardinalis Bononiensis familiaribus se immiscuerunt: ita tibi mando atq; impero, vt quod ad Cardinalem attinet, qui suas plurimas maximasq; virtutes, egregiasq; in Remp. atq; nos merita mihi est, vti debet, sane charissimus atque coniunctissimus: rationem habeas nostrae erga illum voluntatis, & beneuolentiae: dignitatemq; eius atq; amplitudinem omnibus in rebus, quoad fieri poterit, illasam esse atque integram studeas. Quantum verò ad illos pertinet, quos in custodia iam habes, ita facies, vt ex meis literis, quae una cum his tibi reddita sunt, intelliges velle me. Caterum

Ll

quos

quos posthac comprehendes, cum ex edictorum tuorum scripto, tum maxime pro scelerum gravitate multabis audacter & pume. Tibi verò nequam ea de causâ molestiam vlllo tempore Magistratus afferre vllus possit, scrupulusue tibi aliquis abortiatur: siue tu in populares atque solutos, siue in sacris initiatos sacerdotesq; homines sis adinaduersurus, tibi quouis genere animaduersionis in omnes pariter homines animaduertendi ius potest. q; esto: neue tibi ea de causa magistratus vlli siue Romani, siue exteri succensento: neue facti rationem petunto. Itaq; dabis operam, vt omnibus modis seditiosos turbulentosq; coërceas: in aliorum fortunas impetum facientes punias, scelestos atq; nefarios multes: omnibus hominibus summis, infimis ius æquabiliter administres: si de me optime mereri postulas. Dat. VII. idib. Feb. M. D. XIII. Anno primo. Roma.

ANTONIO CARDINALI

BONONIENSI.

IO

NON dubito te existimare, si quid eiusmodi accidat quod ciuium istorum otium quietemq; perturbare motumue vllum animorum excitare possit, id mihi esse, vti debet, molestissimum. Nam & mentem super ea remeam, et numeris mei partes pro mea in te fide, rerumq; à te gestarum ratione atq; vsu maxime omnium cognouisti. Itaq; nihil attinet me ad te scribere ea, quæ istic nuper acciderunt contra magistratus edicta, mihi summo-pere displicuisse. Quæ vero de ijs rebus ad eum scripserim, quæ ue fieri mandauerim, ab ipso intelliges. Quibus ex omnibus facile cognosces, quanta mihi cura tua dignitas atq; ampliudo fuerit. Nunc autem etiam atque etiam

etiam abs te peto, vt tu item ijs in rebus, quibus in rebus dignitas nostra versabitur, velis primus omnium prae-
esse, adhibereq; omnem diligentiam, vt & magistrati-
bus nostris Bononienses tui pareant, & scelesti flagitio-
siq; puniantur. Id si feceris, quemadmodum quidem &
amor charitasq; in te nostra postulat, & te futurum pro
tua prudentia magnopere confido, feceris planè rem &
te dignam, et patrie tuae salutarem, & nobis mirandum
in modum gratam. Septime Id. Feb. anno primo. Roma.

PROMAGISTRO RHODIO IN
REGNO NEAPOLITANO. II

AMAVIMVS ab ineunte aetate, atq; inter fami-
liares paternos atq; nostros, charissimum semper habui-
mus Vincentium Papacodam tuae societatis hominem &
probum & fortem & industrium. Li commodari de tui
collegij magistratibus, qui in Regno Neapolitano sunt,
valde cupio: quo se alere, paratioremq; ad res societatis
nauandas laboresq; subeundos alacriorem prestare pos-
sit. Itaque te hortor, vt Vincentio praerogatiuam des ad
eos magistratus, quos qui gerunt, primum isto in Regno
demorientur, quorum pensio prouentuq; numerum au-
reorum quingentorum summam efficiant. Id si feceris,
& hominem strenuum tibi deuincies, & me item tuis in
rebus gratum atq; memorem experire. Dat. sexto. Id.
Feb. Anno primo Roma.

PETRO REMIRAE MAGI-
STRATVI SINVESSANO. 12

SUPERIORIBVS literis commendavi tibi Fran-
ciscum Sinuessanum satis quidem pro re diligenter. Eas
commendationes nostras quoniam non tantum apud te

valuisse, quantum de tua in me obseruantia confidebam, certior factus sum: has ad te alteras dare literas volui, quibus te etiam atq³ etiam hortarer, velles habere rationem eius hominis, qui cum nihil iniuste egit, tum pater est Ludouici familiaris mei, mihiq³ propter optimos eius mores singularemq³ animi ad virtutes omnes indolem planè charissimi: quem his cum literis ad te mitto, vt præter id, quod ego abs te peto, vt patrem eius saluum esse atq³ incolumem velis, filij te etiam affectus atque preces moueant ad pietatem & liberalitatem. Ex quo reliqua intelliges. Vnum illud à nobis, si nostris hortationibus morem gesseris, id tibi omne voluptati futurum. Dat. sexto. Id. Feb. Anno primo. Roma.

MAXIMILIANO MARIAE MEDIO-
LANENSIVM DVCI. 13

ALLATVM ad nos est, Episcopus eos, qui è Gallia profecti suo & reliquorum Episcoporum & sacerdotum nomine ad sacrum Lateranense Concilium pro communi bono veniebant, paululum supra fines regni tui confedis-
disse, neq³ vlterius progredi voluisse, quoniã tutum iter per tuam ditionem non haberent. Ea de re quanquam ad te antea literas dederim, nunc tamen etiam atq³ etiam his te literis hortor, ne in tam opportuno & salutari Christianæ Reipubl. negotio velis impedimento esse, quominus ij cum Romana Ecclesia, à qua, vt scis, aliquandiu alieniores fuerunt, paribus studijs vnanimiq³ voluntate coniungantur: mittasq³ aliquem ex tuis probum virum cum authoritate, qui eos tua per loca tuto ac sine molestia in agrum Genuensẽ perducatur, quò illos tendere volui, vt eo minus cura tibi minusq³ oneris afferent, quo
breuius

*breuius per tuam ditionem esset illis iter conficiendum:
quemadmodum cum tuis oratoribus sum loquutus. Dat.*

XVI. Cal. Mart. M. D. XIII. Anno primo. Roma.

MAXIMILIANO ROMANORVM

IMP. DESIGNATO.

14

COMMENDARVNT mihi tuis verbis Matthæus
Cardinalis Gurcensis atq₃ Antonius Cominatus Bernar-
dinum Cardinalem sanctæ Crucis sanè diligentissime:
petierunt q₃ à me, vt eius fortunas, quæ quidem naufra-
gium fecerunt, liberalitate mea restituerem. Ea com-
mendatio me certe plurimum mouit: tuam enim ex eo
propensam in illum voluntatem beneuolentiamq₃ per-
spexi: quod mihi gratissimum fuit. Nam et amaui antea
illum omni tempore: & nunc, cum in Reipub. muneribus
obeundis etiam mihi præsto sit, singulari eum charitate
beneuolentiaq₂ complector. Itaque dabo operam cum se
occasio tulerit, vt eum magistratibus atque prouentibus
honestum atque ornatum reddam. Tu vero interea Fer-
dinandum Hispaniæ Regem si hortaberis, ea in re vt te-
cum atq₃ mecum sentiat, quod tamen illum facere per se
iam video: erit ea hortatio & Cardinali ipsi magno v-
sui, & mihi plurimum grata. Dat. XV. Cal. Mart. An-
no primo. Roma.

THOMAE EPISCOPO

FELTRINORVM.

15

EXEMPLVM literarum, quas ad Maximilianum
Romanorum Imp. dedi, quibus ad ea respondeo, quæ me-
cum per internuntios suos egit, vt Bernardini Cardina-
lis sanctæ Crucis fortunarum iactura atque vlceribus
consulere mederi q₃ vellemus, habuisti cum his literis.

Ll 3

Mando

Mando autem tibi, vt earum literarum sensum oratione tua apud illum uiues, commendesq₃ vicissim ei meis verbis Cardinalem ipsum diligentissimè. Datum xv. Idib. Mart. M. D. XIII. Anno primo. Roma.

FERDINANDO HISPANIA-
RVM REGI. 16

GRATVM admodum nobis fuit id, quod ex literis Galeatij Buirrigarij internuntij apud te nostri perspeximus: Bernardum scilicet Cardinalis sanctæ Crucis Episcopi Sabinensis causam tibi curæ atq₃ cordi fore: daturumq₃ te operam, ne nostræ de illo commendationes apud te vulgares fuisse videantur: tum commendare te etiam illum mihi, rogareq₃ me, vt eius fortunis afflictis atq₃ miseris opem aliquam asseram. Qua de re valde te laudo. Magnanimi enim Regis & maxime liberalis officio fungeris, qui clarum virum fortunis omnibus deiectum & spoliatum tuendum fouendumq₃ suscepisti. Itaque sic habeto, nihil esse potuisse ista tua in illum voluntate prastantius. Nos quidem certe cum per nos ipsi, qui hominem diligimus, tum tua commendatione adducti sumus ea, quæ postulas, diligenter curaturi. Datum xv. Cal. Mart. Anno primo. Roma.

LEONARDO LAVREDANO
VENETIARVM PRIN-
CIP. 17

MITTIMVS Venetias Ioannem Franciscum Valerium ciuem tuum, Bernardi Cardinalis sanctæ Mariæ in porticu familiarem ab epistolis, ad Petri Bibienæ ipsius Cardinalis fratris internuntijq₃ apud te nostri nuper defuncti vxorem liberosq₃ conueniendos: vt mœrorem
meum,

meum, qui quidem perinde atq; in morte hominis mihi
 charissimi veterēque necessitudine coniunctissimi, deq;
 gente mea meq; ipso optime meriti, certe non leuissimus
 est, meis apud illos verbis testetur: eiq; vel marito, vel
 patre singularis virtutis viro deiectis & orbatis in tam
 graui vulnere solamen aliquod afferat nostra ad eorum
 fortunas modis omnibus subleuandas paternae atque a-
 mantissimae voluntatis. Cui etiam mandauit ut te salu-
 taret, significaretq; tibi quedam cum hac ipsa in re, tum
 reliquis etiam in rebus, quae te scire magnopere volo.
 Caterum demortui liberos & familiam omnem eo li-
 bentius & accuratius tibi commendo, quo ipse amorem
 erga Rempub. urbemq; istam suum plurimis maximisq;
 officijs, & multorum annorum perpetuis suis laboribus
 apud omnes homines testatissimum reliquit. Datum
 XIII. Calend. Mart. M. D. XIII. Anno primo.
 Roma.

PAVLO GERMANO MIG-
 DELBURGENSI FOROSEM-
 proniensium Episcopo.

QUONIAM & in temporum ad Romanam ratio-
 nem referendorum computatione indagatiōeq;, & in
 sacri Lateranensis Concilij rebus tua nobis virtute atq;
 doctrina magnopere opus est: te hortor, ut Romam,
 quod tuo commodo fiat, primo quoq; tempore te conse-
 ras, nostra enim interest te hic esse. Dat. XIII. Cal.
 Mart. M. D. XIII. Anno primo. Roma.

MAXIMILIANO MARIAE
 MEDIOLANENSIVM

D V C I.

19

Ll 4

PAVLAM

PAVLAM Gonzagam Alberti Pij sororem cum ipsius, tum fratris causa paterne diligo. Ea cum maxime cupiat impetrare abs te, vt quod sibi dotis nomine debetur, id omne mandes procuratoribus suis sine dilatione curari: peto abs te, vt & hortatu meo, & iustitia causa velis in illam liberalitate tua vti, dareq³ operam, vt quod illa iure postulat, id vniuersum atq³ solidum etiam non laboriose consequatur. Dat. VI. Cal. Mart. M. D. XIII. Anno primo. Roma.

ANDREAE BVRGIO. 20

SCRIBIMVS Maximiliano Maria Infubrum Duci, vt quicquid Paula Gonzaga Alberti Pij sorori ratione dotis debetur, id ei curet quàmprimum quamq³ integrum atq³ solidum reddi: quemadmodum ex literarum mearum ad ipsum Ducem exemplo cognoscēs. Hortor autem te, ita rem apud illum iuues, vt mulier vidua ius suum sine mora sineq³ diminutione consequatur. Dat. sexto. Cal. Mart. Anno primo. Roma.

BVRGHESIO PETRVTIO

SENENSI. 21

CERTIOR factus Alexandum & Hieronymum Senenses bellicis rebus praefectos ad Portum Herculis cum armatorum manu se contulisse, oppidumq³ atq³ arcem occupauisse expulsis Augustini Ghisii probi hominis mihiq³ grati & probati ministris: ad quem quidem, vt mihi saepe demonstratum est, eius loci ius omne publicis confectum syngraphis pertinet: non potui non moleste ferre, vos iusta fidei possessorem vestrum ciuem spectatae virtutis virum, qui ciuitati isti ornameto liberalitate sua esse consuevit, indicta causa vi atque armis eiecisse.

Quam

Quamobrem etiam atq³ etiam te hortor, des operam auctoritate prudentiaq³ tua, vt Augustino eius oppidi atq³ arcis possessio, in qua aliquod annos pacifice fuit, amice atque omni amota procrastinatione restituatur. Quod quidem certe pro eo, quanti hominem facio: facio autem sanè plurimi: proq³ eius in nos Remq³ pub. multis maximisq³ officiis erui mihi porro gratissimum: teq³ eo nomine bene de nobis meritum facile profitebor. Quod si ius aliquod eo in portu atque arce sibi competere ista ciuitas existimat: iuris ad id via, quàm vi atq³ iniuria, multo melius atq³ honestius processerit. Dat. Non. Mart. M. D. XIII. Anno primo. Roma.

RAIMUNDO CARDONAE
PROREGE NEAPOLIS. 22

MITTIT ad te Franciscus Maria Vrbinatium Dux nostrorum militum Imperator Antonium Nigossantem internuntium suum: vt se per illum purget, causamq³ apud te suam tueatur ea in re atque calumniam, qua de ipsum in ius vocauisti. Eum quoniam nihil admisisse contra Ferdinandum Regem tuum exploratum nobis est, te hortor, ne patiaris nobilem atq³ magnum virum, qui cum mihi omnes necessitudines sunt, eiuscmodi delationibus vexari. Sed eum apud te calumnia iniusta liberes, tum vel maxime apud Regem testimonio tuo iuues, ad quem ipse internuntios suos ea de re propediem est missurus. Itaque & prudenter & perhumane egeris, si Regi ipsi integrum negotium remiseris. Quod vt facias, in primis abs te peto. Erit id nobis tam gratum, quàm quod gratissimum. Dat. prid. Idib. Mart. Anno primo. Roma.

VEL egregia tuae praeclearaq; virtutes, optimarumq;
artium studia, quibus excellis, & iam nobis pridem co-
gnitus & probatus es, vel praecipua pietas singularisq;
cultus, quem nobis omni tempore praestitisti, nos hortan-
tur, ut quae fortunas & dignitatem tuam ornare atque
augere possunt, ea libenter & propenso animo comple-
ctamur. Itaq; cum Franciscus Maria Feltrius Urbina-
rium Dux, urbis Praefectus, nostrorum exercituum Im-
perator, quoddam fidelem diligentemq; operam multos an-
nos ei nauaueris, in sua erga te beneuolentia testimoni-
um laborumq; tuorum premium, tibi liberisq; posteri-
q; tuis maribus legitime procreandis Nubilariam castellum
diocesanos Pisaurensis, quod quidem nostri iuris est, om-
nemq; eius castelli diuionem tibi dono dederit, cesserit:
Nos te etiam nostrae beneuolentiae testimonio hac in re
amplecti atque prosequi volumus. Quare donationem
eiusmodi, quaeq; in ea continentur omnia, probamus,
confirmamus: quatenusq; oporteat, Nubilariam castel-
lum cum iuribus eius omnibus tibi liberis, posterisq; tuis
maribus legitime procreandis damus, donamus: & tuum
atq; tuorum quoad aliquis eorum super erit, perpetuo ut
sit decernimus: multo etiam maiora si se occasio dederit,
libentissime largituri. Datum V. Mart. M. D. XIIII.
Anno primo. Roma.

MAGISTRATVI PARMAE. 24

DILIGENTIA, qua vsus es cum in significanda
nobis morte Comitum Soragna, tum in adhibenda cura ut
Comitis bonorum & locorum nostro nomine possesio-
nem

nem caperes, nobis egregie probatur. Quam in re quoniā, vt scribis, propter demortui nepotis temeritatem, qui se in ea bona iniecit, nihil consequi potuisti: mando tibi, vt ei meis verbis denunties, eorum bonorum & locorum possessionem quamprimum quamq; liberam tibi relinquat. Id ni fecerit, armis te illum aggressurum, & vi expulsurum magnopere confirms. Itaq; sine vlla mora facias. Scribo autem Galeatio Palauicino, ope illum auxilioq; suo posthac ne iuuat: quod illum facturum puto. Scribo etiam Troilo Rubeo, armatorum hominum manum tibi, quantam voles, det, qua manu abs te ille ijs ex bonis eyci & detrudi possit. Mando insuper omnibus ijs, qui dono aliquid à Rep. obtinent, idem vt faciant. Quod si parum adiumenti possum ijs in omnibus ad rem faciendam intelliges, Guidi Rangonij equites arcesses, & ad illas, quas coegeris, copias adiunges. Quibus mando, vt tibi præsto sint. Itaq; diligentiam, curam, vigilantiam, laboremq; omnem tuum adhibebis, vt in capienda Soragna Comitum bonorum possessione id, quod volumus, consequamur. Nam quod scribis demortui nepotem habere se ius ijs in bonis palam dicere: mihi id verisimile non est. Sed vt sit, experiundo id à nobis consequi postulet, non vi atq; arrogantia rapere aggrediatur. Nihil enim ei à nobis quod iustum honestumq; sit, negabitur. Dat. III. Id. Mart. M. D. XIII. Anno primo. Roma.

GALEATIO PALAVICINO. 25

INTELLEXI Soragna Comitum demortui nepotem armatorum hominum manu abs te iuuari, fauoreq; tuo atque auxilio niti, quominus ipse locorum & bonorum eorum possessionem, in quam se iniecit, Magistratui

Parma

Parmæ nostro nomine id petenti & postulanti remittat: ad quos quidem pleno iure pertinet: teq; il propinquitati, qua cum illo coniunctus es, tribuere atque largiri. Quamobrem his te literis & moneo & hortor, primum vt nullum propinquitatis nomen aequitati & iustitiæ anteponendum putes, deinde vt nostram in te atque in omnes tuos beneuolentiam, tuumq; in Romanos Pont. multorum annorum studium ob vnius pueri temeritatem atque audaciam ne violes, neue profundas. Sed potius & illi consulas, ne se nostris conatibus, quibus par esse non poterit frustra temereq; opponat atque obijciat: & Magistratum nostrum in assequenda eorum honorum possessione opera diligentiaq; tua iuues: quod te facturum pro tui animi rectitudine sanè confido. Quod si propinquus tuus competere sibi ius aliquod ys in bonis existimat, volo te ei dicere planeq; polliceri, nihil ei me, quod iustum honestumq; sit, negaturum. Itaque iure id non iniuria expetat. Erit hoc & ipsi utilius, & tibi magis honorificum, & mihi summopere gratum. Dat. III. Id. Mart. Anno primo. Roma.

PARMENSIBVS DONO ALL

QVO REIP. AFFECTIS. 26

M A N D O vobis, vt quibuscunq; rebus poteritis, Magistratui nostro Parmæ id à nobis requirenti presentem operam adhibeatis sine vllius hominis respectu, aut planè temporis interuallo & mora, quo is Soragna Comitibus nuper demortui locorum & bonorum possessionem assequi nostro nomine possit. Idq; à nobis cum pro iure vestri numeris fieri volo, tum pœna propofita bonorum vestrorum omnium arario inferendorum, nisi parebitis.

Quod

Quodd si quis eorum bonorum ius sibi competere existimat, nemini iuris via experienti, quod suum erit, posse assequi negabitur. Dat. tertio. Id. Mart. Anno primo. Roma.

TROILO RVBEO PAR-

M E N S I.

27

MANDO tibi, vt quibuscunque in rebus poteris, tum armatis hominibus, tum etiam fauore tuo reliquo Magistratum nostrum Parma iuues, eiq; praesto sis: quo is Soragna Comitum nuper demortui bonorum possessionem nostro nomine capere, atque illum qui se in eam temere iniecit, expellere atque deicere possit. Quod quidem sic abs te peto, vt quantum mihi charus esse atque iucundus postulas, tantum te studij ac diligentiae ponere hac in re negotioq; conficiendo sane peruelim. Datum tertio Idib. Mart. Anno primo. Roma.

MAXIMILIANO MARIAE

MEDIOLANENSIVM DVCI. 28

COMMENDAUI tibi sanè multos, vt quisq; abs te aliquid petiturus auctoritatem apud te meam, quo id facilius impetrare posset, expetiuit. Idq; non tam mea sponte saepe feci, quam quodd opem nostram iusta in te studiose petentibus negare me, alienum esse à mei muneris officio magnopere existimaui. Itaq; eam ob causam commendandis tibi hominibus crebrior fortasse adhuc quidem, quàm volui fui. Veruntamen cum id accidit, vt prius, qui illustri aliqua dignitate in Dei Ecclesia eminent, commendandis ad te literas dem, tunc quidem eo tecum munere animo libentissimo vtor. Quemadmodum tibi nunc commendo Antonium Episcopum Asta designatum sanè

sanè diligentissime : cuius Episcopatus reliquorumq₃ sacerdotiorum pensiones intercipi seponiq₃ iussisti. Petoq₃ abs te, ne id fieri aut mandes ipse, aut permittas à tuis: sed uti sunt Dei Opt. Max. munere ipsi Antonio ea pensiones attributæ, ita illum ad eas assequendas & fruendas iuues potius, quam impedas. Neq₃ tu in Ecclesiæ te bona, si me audies, vllorum hominum suasionibus immiseris, sed eris tuis ipse bonis contentus : quæ quidem maxima atq₃ amplissima sunt . Habes enim Regnum opulentissimum: ut nullius opis non modo ad amplitudinem, sed ne ad satietatem quidem, si te ipse noueris, indigere possis. Quæ cum ita sint, valde abs te peto, ne Antonio molestiam adhibeas in suis pensionibus exigendis, præsertim cum is frater sit Episcopi Nouocomensium : cuius & in sacris obeundis, & in reliquis Reip. negotijs administrandis egregia & fideli opera quotidie vtor. Quemadmodum & cum oratore tuo Hieronymo Morono ea de re sum loquutus: & Fabritius familiaris meus, quem ad te mitto, tibi significauit. Dat. XIX. Cal. April. Anno primo. Roma.

IOANNI PETRO GONZAGAE

NUVOLARIAE COMITI.

29

MULTI ad me deferunt, te non solum exules è Regio Lepidi excepisse, eosq₃, quemadmodum tibi mandaueram, expellere noluisse: verum etiam ciuibus quibusdam Regiensibus honestis hominibus, qui prædia tuo in agro habent, noua inusitataq₃ onera imposuisse, eosq₃ ad ea persoluenda te coacturum interminari nouis modis. Quæ cum eiusmodi sint, ut mihi ferenda esse non videantur, mando tibi atq₃ impero, primum ut sine vlla mora

eos

eos exules, quos excepisti habesq₃ in tuis oppidis, expellas & ejcias, locumq₃ posthac atq₃ perfugium nemini illorum des: deinde ut ciues Regienses novis oneribus ne premas: sed eos siui pradiorum suorum fructibus & pensionibus sine molestia permittas. id si feceris, boni viri & meum imperium non delectantis officio fungere atque munere. Sin aliter te, atq₃ opto, maximeq₃, convenit, hac in re gesseris: exploratum tibi esse volo, eam me indignitatem ulterius non laturum, daturumq₃ operam ut te poeniteat mihi non paruisse. Dat. XVI. Cal. April. Anno primo. Roma.

MAGISTRATVI PLACENTIAE.

30

VENIT istuc nobis mandantibus ad eos perquirendos & puniendos, qui novas res isto in oppido molientes tumultus maximos excitauerunt, Bonifacius Vallengis Iureconsultus familiaris meus, non sanè quia de tua prudentia, diligentia, rerum gerendarum scientia atque in primis probitate magnopere, ut soleo, confidere non possim: sed ut tuum tibi munus atque onus aliquanto levius faciam, illo ad partem oneris tecum ferendam adhibito atq₃ addito. Quare volo, ut, si tibi videbitur, omnibus gerendis rebus una cum illo adsis, praestesq₃ ei tete socium, ut communis virusq₃ vestrum consilio negotium administretur. Itaq₃ si hominem & libenter exceperis & accurate iuueris, erit mihi gratum. Dat. XV. Cal. April. Anno primo. Roma.

IOANNI SAXATELLO PRAEFECTO EQVITVM APVD
Placentinos.

MITTO

MITTO istuc ad quaestiones exercendas, atque in eos animaduertendum qui nuper isto in oppido novos tumultus excitauerunt, Bonifacium Vallengem iureconsultum familiarem meum. Quamobrem mando tibi, ut quibuscunque is in rebus sibi te tuosq³, equites fore vsui existimabit, auxilio et fauore tuo ei, praestò sis: omnemq³ operam adhibeas, quò is facilius atque celerius mandata nostra prosequi atq³ conficere possit. Dat. xv. Cal. Apr. Anno primo. Roma.

PETRI BEMBI EPI
STOLARVM LEONIS DECL
MI PONT. MAX. NOMINE
scriptarum.

LIBER OCTAVVS.

FRANCISCO MARIAE VR-
BINATIVM DVCI. I



ECTIS literis tuis, quibus nos certiores facis conuentum & nundinas, quas quidem te Pisauri posse facere de mense Martij concessere ramus, ab Andrea Corio mercatore Genuensi mercibus Iudaeorum inter cupiendis pro eo, quod ipsi debetur, perturbari atque impediri, fidemq³ tuam omnibus eas ad nundinas adeuntibus publice datam labi & fluere, magnopereq³ postulas, eo te nomine accusari & redargui ne permittamus praesertim cum ea nundina hoc anni tempore

pore nunc primum instituantur : ea tua postulata nobis
 æqua & digna visa sunt, quibus annuamus. Itaq; volo
 ne ea de causa, quod Andrea Corio concesserim ut exi-
 gere centesimam cum dimidia posset ex Iudeorum bonis
 sub imperio Turcarum Regis degentium, vlla molestia
 tuis ad mundinas Hebrais accedentibus inferatur : si-
 de tue tuam fallere tibi necesse sit, aut illos homines ad
 eiusmodi centesima solutione compellere, præter eos, si
 qui erunt, qui iam antea cum Andrea pacti sint : quos
 quidem volo, ut stipulationib. inter ipsos confectis stare,
 promissaq; dissolvere teneantur. Iis autem rebus eo liben-
 tius adducimur, ut tibi morem geramus, quo dignitas
 omnis tua mihi magne curæ est, tuamq; apud me pluri-
 mum valere auctoritatem facile patior. Dat. Idib. Mart.
 M. D. XIII. Anno secundo. Roma.

PROMAGISTRO RHODIO IN
 REGNO NEAPOLITANO. 2

ALTERIS literis hortatus te sum, velles mea cau-
 sa Vincentio Papacodæ, qui est in tui ordinis societate,
 viro strenuo, familiari perantiquo meo prærogatiua
 dare ad eos vestros magistratus, qui primo quoque tem-
 pore præfatos amiserint : qui magistratus pensionem an-
 nuam quingentorum nummorum aureorum efficiant.
 Nunc verò quoniam etiam atque etiam opto, ne Vincen-
 tius in eiusmodi desiderio suo, cuius per me compos fieri
 postulat, abs te deferatur : non hortor te solum, sed etiam
 pro meo iure obsequijq; tui in vi & virtute tibi plane
 mando, ut ei, quemadmodum scripsimus, de prærogatiua
 statim commendes : ut & societati tuæ, cui per multos
 iam annos omnem operam & studium detulit atque im-
 pendit

pendit suum, maiori esse vsui possit : & inter vestri Magistri familiares tam diu illum fuisse aliquam iam ei tandem vtilitatem atq₃ fructum pariat. Datum IX. Cal.

April. M. D. XIII. Anno secundo. Roma.

IOANNI PAULO

BALIONI.

3

HORTOR te, atq₃ abs te planè peto, vel, si opus est, mando etiam: vt Sibiciani Dominos fratres vlla molestia neq₃ afficias ipse, neq₃ affici permittas à tuis. Cures autem potius, desq₃ operam, vt eorum agri atq₃ oppidula tuis à militibus tuta sint: quemadmodum quidem conuenit ea omnia per te esse, qua nostra sub tutela conquiescunt. Id enim magnopere volo, vt eis fratribus negotium vllò ab homine temere atq₃ iniuria ne adhibeatur. Quod si tibi ius eorum in bonis competit, dabo ipse operam, vt tibi quem vnice diligo, modo id iuris via postules, non vi atque armis appetas, quamprimum, quamq₃ ampliter satisfiat. Datum VII. Calend. April. Anno secundo. Roma.

IACOBO CIVI BONONIENSI

QVAESTORI MILITVM.

4

CVM equitatus is, quem Bononiam accedere, atq₃ istic esse maxime oportet, quamobrem sese alat, nisi ex stipe ab incolis atq₃ inquilinis vestri agri dari solita, nihil planè habeat: mando tibi, vt ea stipe tantummodo excepta, quam stipem Ramazato curari volui, reliquam stipem omnem ad Vitellij Praefecti militum vsus alimentaq₃ conuertas: qui quidem nunc Vitellius ad tutelam istius oppidi me volente proficiscitur. Cui rei mandatoq₃ meo nullas volo vel meas ipsius, vel ab eo, qui ante me fuit,

fuit, Romano Pontifice scriptas ad te magistratū me li-
ter as impedimento esse. Datum VI. Calend. April. M. D.
XIII. Anno secundo. Roma.

DECVR. ET MAGISTRATVI

M V N I C I P I I A S C V L A N I.

5

QVONIAM intellexi Firmanos exules magna
armatorum hominum coacta manu oppidum Firmanum
vi ingressos esse: veritus vestros quoq; exules exemplo
illorum permotos atq; percitos idem ausuros, in Ascu-
lumq; inuasuros, volo, ac vobis mando, vt & arma ipsi
capiatis, & propinquos clientesq; vestros amari celerri-
me iubeatis ad defendendam urbem vestram, vestraq;
urbis eum statum, qui nunc est, conseruandum atq; mu-
niendum: ne vestri exules nobis nolentibus, vobis autem
etiam inuitis oppidum aggredi atque adeo ingredi pos-
sint. Caueri autem à vobis precipue volo, curamq; om-
nem & diligentiam adhiberi, ne tumultus aliquis eo no-
mine, intestinū me malum possit existere. Itaq; ad no-
uam vim atq; iniuriam vestrorum exulum repellendam
promptos vos atq; paratos esse iubeo: non autem vel ad
veteres iniurias vlciscendas, vel ad potentiam extraor-
dinariam exercendam. Vt cum improbi ciues vestri fla-
gitiosi q; homines armatos vos atque animatos ad com-
mune bonum senserint, à male cogitando maleq; agen-
do absterreantur & conquiescant. Dat. prid. Cal. April.
Anno secundo. Roma.

FABRITIO MAGNO RHO-

D I M A G I S T R O.

6

A MA VI omni tempore probum hominem, mul-
tisq; virtutibus praditum & ornatum virum Iulianum

M m 2

Rodul-

Rodulphum : qui prater veterem suam cum meis omnibus necessitudinem, studia, officia, nunc etiam Iuliani Medicis fratris mei domus & rerum familiarium curam gerit. Is cupit impetrare abs te, vt cum in diplomatibus tuis conficiendis super Capua Prioratu, quem ei deferri à Iulio Medice Cardinali siatre patrueli meo volui, vt nostra in sese beneuolentia hoc iam nunc signum atque iudicium haberet: tum in Mortorij sic enim vos appellatis, officio atq; munere tibi persolueno rem nullo sumptu conficiant. Quare vt ei te liberalem & munificum is in rebus prabeas, atq; vt vllū solutionis impendio subleues, abs te peto. Est enim admodum senex, pensionesq; Prioratus sui atq; fructus, adhuc quidem nullos percipit: eos enim Cardinalem sequi quoad prouentibus abundaret, volui. Itaq; impensas nunc primum facere, quas longo tempore reponat, ipse non potest quemadmodum illi possunt, qui iuuenes sunt: quibus longa esse nulla expectatio potest. Quares facit, vt mihi planè gratissimum sit futurum, si Iulianum abs te ea, quæ postulat impetrasse intellexero. Est autem profecto ipse ita praestanti & animo vir & virtute, vt si tua societas eius opera suis in rebus vti volet: abunde ei atq; largiter, vel tibi etiam ipsi referre gratiam possit. Dat. Cal. April. M. D. XIII. Anno secundo. Roma.

P R I O R I G A L L I A E C I S A -
S P I N A E R H O D I P R O -
magistro. 8

EXEMPLVM literarum quibus literis Iulianum Rodulphum Capua Priorem Fabritio Magno Rhodi Magistro diligenter commendaui, mitto ad te cum his
. literis.

literis. Ex eo quo in loco illum habeam, tum quid ei velim à Fabricio tribui, cognosces, Atq; hoc ideo ad te scribo, vt quoniam tuam apud illum auctoritatem plurimum valere multi mihi significauerunt, te horter, ac pro meo iure mandem etiam, cures desq; operam omni studio, agas apud illum, perficias deniq; vt Iulianus ea, quæ optat te adiuvante consequatur. Optat autem Magni Magistri liberalitate nobis commendantibus subleuari. Id erit mihi tam gratum, vt nihil abs te in me possit esse gratius. Quod ita esse tuis in rebus, si mea ope vlllo tempore tibi opus erit, facile perspicias. Dat. Cal. Apr. M. D. XIII. Anno secundo. Roma.

MAGISTRATVI REGII

LEPIDI.

8

DE LATVM ad nos est Ioannem Petrum Gonzagam Nouolarie Comitem quosdam ciues Regienses coegisse ad certam pecuniæ summam sibi persoluendam, vt ter centum quinquaginta nummos aureos, quos quidem ipse curare Cesaris negotiatoribus iubebatur statim reponeret. Id me primum omnium de te non intellexisse, & te eos ciues presertim spectata fide homines ea in re nihil iuuisse, nullam omnino eis opem tuam, nullum adiumentum præsto fuisse valde miror. Quamobrem mando tibi primum, vt omnem rem perquiras diligentissime: Deinde si iuuare Regienses poteris adhibereq; remedia, nequid ab Ioanne Petro dispendij perpetiantur, iuues, curesq; rem omni studio & diligentia. Sin autem non poteris, nos tamen, quemadmodum se res habeat, certiores facias, doceasq; quo pacto ei occurrere malo possimus. Quod si operapretium erit mitti à nobis istuc ali-

M m 3

quem

quem, qui controuersias inter Regienses Comitumq;
componat, id vero à nobis facile curabitur, vt isti posthac
ciues à comitis iurisdictione separentur discretiq;
sint, ne calumnijs eiusmodi vlla in posterum causa vllus one-
rum perferendorum, munerumue obeundorum scrupu-
lus, vlla questio exoriri possit. Id enim maxime opto, vt
Regienses ciues sub Regiensium Principum ditionibus
ne censeantur: vt Reip. rationibus nullum preiudicium
inferatur. Dat. sexto Id. April. M. D. X I I I I. Anno
secundo. Roma.

CARDINALI SEDVNO. 9

C V M perspecta nobis esset & virtus & prudentia
tua deg; tua in me atq; in Remp. in quam quidem pluri-
ma tua egregia præclaraq; officia extiterunt, fide &
cultu magnopere considerem, Carratiolum notarium,
meum & Petrum Magnum familiarem tuum ad te
misi à quibus consilia mentemq; omnem meam in tra-
ctandis nostris rebus intelligeres. Itaq; non vereor, quin
ea omnia quemadmodum volebamus, ad Heluetiorum
Magistratus amanter accurateq; detuleris. Quoniam
autem multa sunt, quamobrem existimem nihil accidere
posse his temporibus, quod plus afferat rebus omnibus
momenti & ponderis ea re, quam illi ad te meis verbis
pertulerunt: abs te etiam atque etiam peto, vt si tibi to-
tum negotium quoquo modo in dubium adducetur sic,
vt vereri possis Heluetios in ea mecum sententia, per
quam nihilo certe minus illorum, quàm Reip. commodis
consultitur, non futuros, de eo nos quamprimum facias
quamq; celerrime certiores: ne dum ipsi de illorum in
nos obseruantia frustra confidimus, aliquod alicunde
Resp.

Resp. incommodum & detrimentum accipiat. Neque enim interea vel de oblati in dies conditionibus ab alijs & populis & Regibus, vel de iudiciarum pactione confirmanda, vel omnino vlla de re quicquam statuere atq; consicere possum, neq; plane quiescere, donec abs te aliquid afferatur. Dat. XV. Calend. Maias. Anno secundo. Roma.

PAVLO VICTORIO. IO

M ANDO tibi, vt posteaquam ex ratione decimæ istius Reip. sacerdotibus impositæ quindecies mille nummum aureorum summa exacta fuerit, des persoluasq; è summa reliqua Roberto Nasio & eius socijs, id quod eis curari mandavi, ea tamen conditione, vt si ex tota ratione illius decimæ summa tricies mille nummum non exigetur, Robertus socijque, quod abs te curatum acceperint, id omne reponere ac restituere teneantur. Quicquid autem ultra totam triginta milium aureorum nummum summam erogabitur, id Roberto & socijs ad abietem in templi Romani Principis Apostolorum substructiones cædendam atq; aduehendam deferatur. Dat. XI. Calend. Maias. Anno secundo. Roma.

VGONI PEPVLO. II

CVM te, qui in nostra ditione domum & lares patrios & fortunas omnes habes, quemq; propter familia splendorem animiq; fortitudinem magnopere diligo, Guidum Rangonium necessarium & propinquum tuum nostrumq; Praefectum equitum ad singulare certamen intellexerim prouocauisse, locumq; ei ad certandum statuisse apud Mediolanensium Ducem ad diem duodecimam Calend. Iunij, literasq; ad te dederim, vt quam-

primum te ad nos conferres, tuq; mandatis nostris parueris, urbemq; Romam ad nos accesseris: quod quidem eo consilio feci, ut te ab incepto reuocarem. Idem nunc etiam cum optem, magnopereq; cupiam, ut ex vinea Domini, quam colendam purgandamq; suscepi, irarum & odij & bellorum semina radicitus euellantur: mando tibi cum obedientia vi & virtute, tum aqua tibi & igne interdicens, tuorumq; bonorum fisco inferendorum poenā proposita, nisi parueris, ut ea de re & prouocatione tua totaq; ratione certaminis, causisq; quas habuisse te idoneas atque iustas ad eam prouocationem exercendam existimas, nullum posthac verbum vlllo in loco, vlllo cum Principe aut planè homine modo vlllo colore vlllo facias: neque ad Maximilianum Mediolanensem Ducem locumue vlllum illius Regni ea de causa te conferas vsq; ad diem decimam Cal. Iunij: neque omnino quicquam aut loquaris aut statuas animo decertandi. Datum decimo Cal. Maias. Anno secundo. Roma.

GVIDO RANGONIO. 12

CERTIOR factus sum, quibusdam te de causis ab Vgone Pepulo necessario & propinquo tuo ad certamen singulare prouocatum, ei rei libenti animo annuisse, vellegq; ad Maximilianum Mariam Mediolanensem Ducem proficisci: apud quem tibi ab illo ad diem XII. Cal. Iunij certamen est indictum. Quae res mihi & minime noua, et maxime molesta accidit. Nam cum mihi perspecta est animi tui magnitudo: tum fortitudinem & singularem tuam istam bellicis in rebus praestantiam, quae quidem maximo vsui esse in Reip. Christianae dignitate vel tuenda vel agenda potest, obmanes atq; leuissimas causas

causas tam dubijs fortuna casibus iri propositam mihi
 maximo dolori sanè fuit : qui, vt patris tui mori optimi,
 domusq; tua in meam familiam antiqua & plurima of-
 ficia sileam, te vnice atque paterne vsq; à puero amo.
 Quamobrem, vt & nostra dignitati, cuius in equitum
 Praefectum geris, & Domini pacem nobis diligentissime
 commendantis monitis praeceptisq; satù fiat, mando tibi
 & aquae atque ignis interdicto, & laesa maiestatis poena
 committenda, ne ea de causa te ad Ducem Mediolanen-
 sium conferas, aut vllum ad eius ditionis locum : neque
 prorsus quicquam agas, loquaris, statuas, vt sit tibi cum
 Vgone decertandum. Dat. decimo Calen. Maias. M.D.
 XIII. Anno secundo. Roma.

MAXIMILIANO MARIAE
 MEDIOLANENSIVM

D VCI.

13

MVLTI ad me detulerunt te et Guido Rangonio,
 & Vgoni Pepulo ad certamen singulare locum tutum
 scriptis ad eos literis esse pollicitum ad diem XII. Cal.
 Iuny. In quo non potui, vt verum fatear, non moleste
 ferre, non te mihi eam rem ante, quàm quicquam sta-
 tueres significauisse : cum scire pösses eorum alterum in
 huius Reipub. Imperio ex clara esse charissimāq; familia
 progentum : alterum etiam agere nostrorum equitum
 Praefectū, atq; à me plurimis maximisq; de causis & ve-
 teribus & recentibus valde amari. Itaq; cum meum in
 primis munus sit è Domini agro controuersiarum & bel-
 lorum stirpes succidere, ad quem suum publicè colendum
 adhibuius, abs te etiam atque etiam peto, vt eas tuas li-
 teras, quibus locum tempusq; illis ad certamen statuisti,

reuoces: desq³ separatim ad utrunque alteras quamprimum literas, quibus id significes, nolle te amplius eis locum ad certamen dare: iubeasq³ ne ad te ea de causa proficiantur. Dat. decimo Calend. Maias. M. D. XIII. Anno secundo. Roma.

FERDINANDO HISPANIARVM REGI.

14

MITTIT ad te Franciscus Maria, Vrbinatum Dux, nostri (vt scis) exercitus imperator certum hominem familiarem suum: qui se apud te purget ijs in rebus, quas res aliquot iam annis admisisse illum contra te Magistratus in Regno Neapolitano tui sunt nuper criminati. Quae quidem criminatio mihi, vt vere dicam quod sentio, non molestissima esse non potuit: cum quae obijciuntur, eiusmodi sint, vt quae sita potius ab illis insinulandi Ducem quoquo modo causa, quam merito suscepta fuisse videri possit, cum propterea quod ea, quae obliuioni iam prope tradita, vel plane etiam sopita & extincta sunt, per illos in iudicium reuocantur: tum quod illa ipsa non vllius modo culpa, sed ne colore quidem culpa vlllo sunt admissa. Quae enim tui apud Soram gesta in tuum, vt ipsi aiunt, dedecus offensaq³ asserunt, ea neque sciri aut caueri à Duce propter longinquitatem itineris potuerunt: neque in ipsius, sed in eius matris administratione eorum locorum procuratio tunc fuit. Nam quod ad Rauenna praelium tuorumq³ militum recessum attinet: nobis quidem, qui eo in praelio fuimus, satis constat, illum contra nomen dignitatemq³ tuam nihil ipsum fecisse, nihil vt fieret iussisse, nihil deniq³ fieri permississe. Sed quis est, qui possit magno commisso praelio in solui exercitus fuga

fuga omnes vicina prouincia populos in officio continere? Quanquam quidem, quod ad illum attinet, non solum nihil egit ipse contra tuos: sed eis etiam per sui Regni fines sine ordine, vt sit temereq³, properantibus comites itinerumq³, duces dedit: debilitatosq³, vlncribus multos suis in oppidis iussit curari: inuit etiam complures rebus omnibus. Itaq³, functus in eo est boni viri amanti-
 miq³, tui officio. Quae quidem omnia, vel plura etiam, palam, vt intellexi, ipsi tui milites praese tulerunt. Sed hac atque alia ab eius internuntio cognosces. Ego autem, qui plurimis maximisq³, de causis tum priuatis & familiaribus, tum certe publicis summo illum amore singulariq³, beneuolentia sum complexus, abs te quaso magnopere & peto, vt eius procuratorem libenter excipias, excusationesq³, quas afferet, audias: admittas quoque pro aequitate & iustitia, cuius semper studiosus fuisti, mea de causa aliquanto etiam libentius. Erit id nobis tam gratum, vt nihil magis: tibi vero laudi etiam & gratia. Nam quoniam is Iulij Secundi Pont. Max. fratris filius fuit, eiusq³, copiarum Imperatorem gessit, & nostrarum gerit, nihil tam liberaliter agere tamq³, humaniter erga illum poteris, quin te optime fecisse omnes homines sint existimaturi: teq³, de eo etiam amaturi. Datum quarto Cal. Maias. M. D. XIII I. Anno secundo. Roma.

LEONARDO LAVREDANO

VENETIARVM PRINCIPI. 15

CONQUESTI apud nos per quam sane graui-
 sunt Legati Anconitanorum, ea de causa, quod eorum
 nauim ipsorum & Florentinorum onustam mercibus
 domo in Asiam tendentem, triremis Veneta ductor Seba-
 stianus.

stiamus Memmus hostili animo atq; impetu non longe ab Ragusio sit aggressus, propeq; depresserit tormentorum vi. Depressisset autem, nisi se illa in Epidauri portum recepisset. id quoniam parum successerit, observari eam aiunt ab eodem Memmo alijs etiam Venetis trirēibus in præda societatem adscitis vicinis in portibus: ut eam ex Epidauri portu exeuntem interciperent. Quæ res quoniam contra ius & bonos mores, contraq; vestras cum Romanis Pontificibus initas pactiones & fœdera in primis est, id, quod accidit, existimo præter tuam istiusq; Reipub. voluntatem accidisse. Hortor autem paterne te atque moneo, des quamprimum operam, mandesq; nequid posthac à vestris trirēibus detrimenti nostrorum hominum præsertimq; Anconitanorum nauibus inferatur. Punias etiam multesq; ductorem illum, qui ei navi tantum molestiæ tantumq; iacturæ temere atque hostiliter attulit: ut alijs vestrarum trirēium ductoribus & nauarchis exemplo sit, nihil iniuste posthac in nostros homines moliendi. Id si feceris, quemadmodum pro Senatui istius æquitate confido te facturum: erit & mihi, qui te remq; istam pub. vnice amo sanè gratum, & tibi cum honorificum, cum te iustitiæ colentem fœderumq; observantem esse homines intelligent: tum etiam salutare: omnem enim ijs, quorum interest, cogitationem eripies potiora ei rei fructuosioraq; remedia perquirendi. Datum Calend. Maijs. M. D. XIII. Anno secundo. Roma.

MAGISTRATVI ARIMINI. 16

VARIJ atque difficiles fortunæ casus, quos egre-
gia mulier Violantis Centiuola Mala testis quatuorde-
cim se-

cum ferè annos est perpeſſa, dum mariti ſui ditione priſtina excuſa nouem liberos alienis opibus nutrit, me com-
mouent, vt eius arummas atq; labores parte aliqua ſuble-
uem. Itaq; certior factus bona quadam in Ariminenſi ra-
tione dotui illi deberi, mando tibi, des operam, vt ei pro
iſtius ſatiſſiat: eoq; magis, quod intelligo, Ariminenſes
ipſos eam ſatiſfactionem non impediuros. Dat. tertio
Non. Maias. M. D. XIII. Anno ſecundo. Roma.

RECANATENSIBVS. 17

CERTIOR ſum factus eam materiam, quam
Bernardo Bibiena Cardinali vos daturos recepiſti,
qua materia ad templi Lauretani adificationem vte-
remur, probam atque idoneam non eſſe. Quamobrem
mando vobis atque impero, vt bonas arbores, quæq;
uſui ei adificationi poſſint eſſe, ex Andrea Sauini eius a-
dificationis magiſtri ſententia, apportari illò quàm ce-
lerrime iubeatis: vt quæ iam cœpta ſunt fieri, ne in-
termittantur, ſed procedant: ne tum nos, tum etiam
Deam ipſam inani lignorum inutilium donatione lu-
ſiſſe videamini. Dat. XVI. Calend. Iulias. Anno ſecun-
do. Roma.

MAXIMILIANO ROMANO-
RVM IMP. DESIGNATO. 18

ALLATVM ad nos eſt, Venetos, cum Flumen op-
pidum tuum, quod eſt in Iſtria, cepiſſent, multam ligno-
rum vim ad naues conficiendas idoneam in vicinis ei op-
pido ſyluis cadi inſiſſe. Ea q; ligna Venetis abs te repul-
ſis recuperata q; prouincia humi proiecta atq; imbribus
expoſita iacere: periculum q; eſſe, ne breui ita vitientur,
vt nullus ex ijs percipi uſus poſſit. Quod cum ita ſit, ad
fani

fani autem Lauretani adificationem omni à me curâ diligentiaq₃ inceptam atque institutam, quod quidem fanum summo atque admirabili gentium & populorum concursu pietateq₃ celebratur, eius lignorum generis atque materiei magnopere indigeã, hortor te etiam atq₃ etiam, velis, vt Diue honos tua liberalitate augeatur, celeberrimo orbis terrarum fano donare eam materiam, mandareq₃ tuis Magistratibus, vt nostris hominibus, quos eò mitremus, omnem à Venetis casam arborem auerendi, atque Anconam & Lauretum transportandi potestatem faciant: eoq₃ libentius, quod te aiunt ijs arboribus quem ad vsum vti possis, vix habere. Id si feceris, & rem tua religione atque amplitudine dignam statues: & me qui quidem suppeditare tam apte ei adificationi ligna idonea nequaquam possum, eo munere ad adificationem conficiendam reddes etiam diligentior, tibiq₃ debentem. Datum XVI. Calend. Iul. Anno secundo. Roma.

IOANNI LVNAE SICVLO

VIRO PRINCIPI.

19

LAETITIA tua, quam ex eo, quòd ad propinquitatem inter te atq₃ nos familiamq₃ nostram ineundam & constituendam animum induxerim, accepisse te scribis, mihi plane grata accidit. Itaq₃ Sigismundum filium tuum, cui Lucretia Saluiata sororis meae filiam spopondimus, amore iam prope paterno pietateq₃ complector, quemadmodum ostendis cupere te: neq₃ sanè illum modo, sed reliquos etiam liberos tuos, vniuersamq₃ domum atque familiam in meam fidem beneuolentiamq₃ recipio: quam rem fortunare Deum volo. Tibi quidem certe

certe omnibus in rebus, quæ ad tuum commodum, quæ ad honorem dignitatemq₃ pertinebunt voluntas nullo tempore nostra, pietas, liberalitas deerit. Reliqua ex literis Iuliani fratris mei, qui te maxime diligit, cognosces. Datum XII. Calend. Iul. Anno secundo. Roma.

CAROLO DVCI ALLO.

B R O G V M.

20

GRATISSIMUM sanè mihi optatissimumq₃ fuit, te, quem quidem propter animi tui egregias præsantissimasq₃ virtutes, generisq₃ nobilitatem à maioribus tuis magnis atq₃ claris viris, antiqua laudatissimaq₃ serie deductam atq₃ traditam, plurimi semper feci, Philibertam sororem tuam Iuliano Medici fratri meo nuptui velle tradere: affinitatemq₃ nobiscum inire, et consociare atq₃ astringere vtramq₃ familiam eo vinculi genere, quod idem esset omnium arctissimum atq₃ sanctissimum, inductioniq₃ animi & propensio ista tua valde me delectat. Itaq₃ quoniam non dubito, quin, quæ vtrig₃ nostrum probantur, ea etiam vterq₃ re sancitum iri atq₃ ad exitum perductum magnopere velit. Deum Opt. Max. oro quesq₃ vt cum ea confici annuat atque mandet ipse: tum velit, primum quidem fratri meo & sorori tue, deinde mihi atq₃ tibi, qui & propiores illis sumus, & amore atque beneuolentia coniunctiores, denique vtriusque nostrum familie atque generi ea de re & propinquitate prospere atque feliciter euenire. De me quidem ea omnia sperare expectareq₃ te volo, quæ ab optimo optatissimoq₃ filio de patre amantissimo sunt expectanda. Quemadmodum ab AMADEO BERRYTO notario & familiari meo latius cognosces, quem is de rebus ad te mitto.

mitto, hominem & nobis charum, & tui cupidum. Dat.
O^{cto}auo Idib. Aprilis. M. D. XIII. Anno secundo.
Roma.

PHILIBERTAE DVCIS AL-
LOBROGVM SORORI. 21

MITTO ad Allobrogum Ducem fratrem tuum ijs
de rebus, quas ab ipso cognosces, Amadeum Berrutum
familiarem meum : cui mandavi, meis vt verbis tibi sa-
lutem diceret : tecumq³ ageret, quæ agenda essent. Et tu
fidem habebis, & valebis. Dat. o^{cto}auo Idib. April. Anno.
secundo. Roma.

COMITI GENVEN-

SIVM.

22

AMADEO Berruto notario & familiari meo ad
Ducem Allobrogum fratrem tuum proficiscenti ijs de
rebus, quas tecum communicabit, mandavi, vt tibi salu-
tem nuntiaret meis verbis. Et fidem habebis : tibiq³ ipsi
omnia de me pollicebere, quæ ex vsu tuo esse cum Domi-
ni voluntate cognosces. Dat. o^{cto}auo Id. April. Anno se-
cundo. Roma.

LVDOVICO GALLIA-

RVM REGI.

23

ALLATVM ad nos est, tibi à certis hominibus
insusurratum fuisse, Claudy Episcopi Massiliensium de-
signati Legati tui curam atque operam nobis gratam
non nimium esse. Quæ sanè res eo mihi grauior atq³ mo-
lestior accidit, quod cum illum ob eius doctrinā, ingeni-
um, probitatem multum sen per amauerim, posteaquam
is ad me, vt Legatum tuum ageret, Romam venit, nihil
ipso tui amantiùs, nihil ardentius vidi, nihil planè tuis in
rebus

rebus omnibus tractandis atq; administrandis diligentius, accurratius laboriosius illo fuit: quod quidem certe me illi etiam deuinxit arctius. Itaque cum se aliquando ad te redire velle mihi significauisset, ne id faceret, sum illum pluribus fortasse verbis, quam vel nostra dignitas vel mea fert consuetudo, dehortatus. Quae cum ita se haberet, hac ad te scripsi, vt esset eius rei testimonium apud te meum, hortarerq; te, ne posthac de mea in Claudium voluntate plus vllis hominibus crederes, quam ipsi mihi, neue velles, vt is abs te, suorum pro te susceptorum officiorum, laborum, curarum, vigiliarum longe aliam, quam te atq; ipsum deceat, mercedem atque fructum caperet. Dat. Id Iun. Anno secundo. Roma.

CAROLO DVCI

Allobrogum.

24

EX oratione Amadei Berruti, de tuo erga me studio atque ijs in rebus, de quibus tecum egit, voluntate, quae maxime optabamus, quaeq; mihi gratissima fuere, cognoui, tuasq; literas libenter legi per quas mihi de paterno meo in te animo, gratias agis humanissimis verbis. Eas ad literas & Amadei sermonem quid rescribi tibi, quaeq; scire te volo, ex ipsius ad te literis intelliges. Ipse autem Berrutus, quem quidem multis de causis admodum diligo, erit mihi posthac tua commendatione etiam charior. Caterum amari te magnopere à me comodaq; omnia dignitatemq; tuam atque amplitudinem mihi magna cura esse si existimabis, minime, decipiere. Dat. XI. Calend. Iulij. Anno secundo. Roma.

Comiti Geneuensi.

25

ET tua ad nos plena officio & obseruantia litera, &

N II AMIA

Amadei Berruti familiaris nostri sermo tuum erga me cultum & voluntatem vberime ostenderunt. De eo & valde quidem te amo: & meam ad te ornandum pronā beneuolamq; mentem & studium omni tempore tibi polliceor. Reliqua ex Berruti literis cognosces. Dat. XI. Cal. Iul. Anno secundo. Roma.

MAGISTRATIBVS SENENSIVM.

26

MITTIMVS ad sedandos cōpescendosq; tumultus vestrorum exulum, qui vt ciuitatem vestram perturbarent, manum armatorum hominum cōegerunt, Pindarū Santesium familiarem meum, hominē & virtute praditum, et nobis in primis gratum & probatum. De quo mentē & consilium super ea re meum cognoscere facile poteritis, quamq; vos urbemq; istam diligā. Dat. 8. Cal. Iulij. Anno secundo. Roma.

Pindaro Santesio.

27

ET nuntijs & multorum literis cognoui nouarū rerum motū ab exulibus Senensibus excitari, coactamq; iam esse operarum magnā manum armatorumq; hominum, qui urbem Senas inuadant, perturbentq; eum statum, qui nunc est, quoq; oppidum in praesentia regitur. Quamobrē agre molesteq; ferens, esse vllos eius oppidi ciues tā scelestos tamq; perditos, qui eiusmodi consilia concipiant atq; agitent, mando tibi, cuius mihi probitas atq; prudentia probantur, vt illō te quā celerrime cōferas, desq; operam, nequid ea vrbs detrimenti capiat, Qua in administratione atq; cura quicquid iusseris imperaueris, id ita iussum imperatumq; volo esse, vti esset, ipse idem si iussissem, imperauissem. Itaq; tu ea in re vica-

rius

uius meus esto: autoritas tibi mea, siue dixeris, siue quid statueris adesto: qui mihi Rei q₃ pub. parent, tibi parento. Tu verò singula pro tempore, uti res feret, consulte atq₃ prudenter administrabis: & me adesse omnibus rebus: quas dices: quas q₃ statues, existimabis. Dat 8. Cal. Iul. Anno secundo. Roma.

REIPUBLICAE FLO-

rentinae.

28

MITTIMVS ad sedandos tumultus & audaciā exulum Senensium compescendam Pindarum Santesiū familiarem nostrum & gratum nobis hominē & probatum. Valde enim cupimus, ne scelere perditorum hominū id oppidum, quod nostros ad fines pertingit, cuiq₃ oppido non minus animorū beneuolentia, quā locorū propinquitate coniungimur, insigne aliquot detrimentum atque molestiā capiat: sed nostra cura diligentiaq₃ inuniat^{ur} atq₃ defendatur. Ei mandauimus, ut si ad rē, ut volumus conficiendam vestrae opis indigebit, literas ad vos det, petatq₃, quae sibi esse vsui existimabit, quaeq₃ administrandis à se rebus opportuna esse conducibiliq₃ cognoscet. Itaque ut Pindaro fidem habeatis, operamq₃ vestram, si erit opus, & officium strenue atque impigre nauetis, etiam atque etiam à nobis peto. Erit id nobis in primis gratū, atque ita, ut nihil possit esse gratius. Dat. octauo. Calend. Iul. Anno secundo. Roma.

VLADISLAO REGI

Padnoniae.

29

PETRV M Bergnanum familiarem meum mitto ad te cum mandatis ijs de rebus, quas ab ipso cognoscas: quaeq₃ mihi pro mea in te beneuolentia magna

N n 2 sunt

sunt, eius verbis omnem fidem habebis, & valebis, nosq;
diliges. Dat. quinto Calend. Iulij. Anno secundo.
Roma.

MAGISTRATVI PARMAE. 30

CATANEO ad te proficiscenti, vt de consociendis
cum Malatestata Medice propinquo meo nuptijs meo
& Guidi Medicis eius fratris nomine te alloquatur, has
ad te dare literas volui: quibus te commonefacerem, vt
quoniam eos fratres in primis diligo, quorum alterius e-
tia diligens fidelisq; opera domesticis meis in rebus atq;
familiaribus quotidie mihi magis probatur, omne tuum
studium & diligentiam adhiberes, vt si ea nuptia vsui
& honori futura illis essent, rem conficeres, teq; ita ge-
reres, vt intelligeremus propinquorum meorum homi-
num mihi charissimorum honestorum virorum causam
tibi cura atque cordi fuisse. Reliquum est, vt & Cata-
neo & Guidi literis fidem habeas, vt q; ipsi tuam operā
deposcent, teq; facere volent, sic facias. Dat. sexto Cal.
Iulij. Anno secundo. Roma.

Annibali Paleotto.

31

ET virtutem probitatemq; tuam, quibus agendarū
rerum experientia & in omni vita prudentia coniun-
cta esset, dum Bononiæ Legatum agerem, saepe probavi
& Romanos à te Pontifices miro studio ac pietate sem-
per cultus fuisse plenè cognoui. Ac prater hac etiam pa-
tris tui Vincentij Paleotti equitis Bononiensis legū sci-
entia magni atque clari viri nomen, fratrumq; tuorum
Alexandri & Camilli excellentes diuersis in literarum
& doctrinarum studijs disciplinæ mihi ante oculos ver-
santur, meq; admonent, vt meam in te paternā propen-
samq;

Samq̃, voluntatem egregio aliquo munere apud omnes homines testatam faciam. Itaq̃, te Bononiæ, cuius municipij ab antiqua & honesta familia oriundus ciuem geris, omnesq̃, tui gessere, XL. virum facio Antonij Mariæ, qui propter senectam ei magistratui renuntiavit, loco omnibus ijs cum muneribus, honoribus, antelationibus, commodis, quibus reliqui XL. viri vtuntur, fruuntur, gaudent, vel vti, frui, gaudere eis licet. Quare mando ijs, qui in eo magistratu sunt, vt te in suum collegiũ recipiant. Tu verò dignum te & maioribus tuis & mea beneuolentia fac præstes, vt spei quam de te habeo, planè respondeas. Dat. Cal. Iul. Anno secundo. Roma.

LAVRENTIO FELTRINORVM

Episcopo internuntio apud Imperatorem.

32.

INTELLEXI Vitum Frustum Magistratum Mutinæ in custodia Guidum et Sigismundũ Rangomios fratres habere: qui vel propterea, quod ex ea familia sunt, quæ pro suis plurimis atque maximis in me meosq̃, omnes officijs est mihi, vti debet, cõiunctissima vel, quod ipsos Maximiliani Romanorum Imperatori designato, studiosissimos esse cognoui: habentur à me in propinquo- rum mihi & necessariorum loco. Itaque mando tibi, vt eos Maximiliano ipsi quàm accurratissime commendes meis verbis cum reliquis eorum in rebus atque causis, tum præcipuè in salute, quæ mihi cordi est, quantum potest esse maxime. Dat. Non. Iul. Anno secundo. Roma.

PETRI BEMBI EPI STOLARVM LEONIS

DECIMI PONT. MAX.

Nomine scriptarum.

LIBER IX.

FEDERICO LANDO

Placentino.



AUDIVI de ijs, qui te amant, ciuibus
tuis, qui Roma sunt, te ex interitu
Baptista Landi filij tui Romae à Petro
Francisco Maluicino ciue Placentino
proximis diebus interfecti, permotum
atq; perturbatum, reliquosq; liberos tuos irainiuriaq;
percitos parare arma in Maluicinarum familiam, ut de-
functi mortem modis omnibus vindicetis. Ea in re tametsi
tuo tuorumq; dolori iusto praesertim facile ignosco, mo-
lestimeq; fero ea, quae acciderunt: te tamen, quem quidem
certe in primis diligo, cuiusq; & prudentiam et tempe-
rantiam omnibus in rebus semper probavi, moneo paterne
atque hortor, ut quam adhuc quidem moderationem a-
nimi tui vitaq; rationem es complexus, ea posthac etiam
utare, teq; ipse primum, deinde tuos contineas, nequid
Placentiae tumultus vestra causa exoriat: quod plane
fiet, si & ipse quiesceris, & quiescere iusseris tuos. Id ut
facias etiam atque etiam abs te peto. Erit & mihi gra-
tum, & tua aetate, integritate atq; prudentia dignum.
Equidem quae cogitari atq; statui à me debent, ut dolo-
ri tuo atque iniuria pro iustitia satisfiat, in ijs tibi eo mi-

nus deero, quo te magis intellexero meis monitis præceptisq³ paruiffe. Da. 18. Cal. Aug. Anno secundo. Roma.

CANONICIS ET SOCIETATI

Ecclesiæ Veronensis.

2

INTELLEXI vos emphiteoseos nomine villam atque agrum, Cederelli qui fuerat, Domitio Pomedello dedisse. Qui quidem Domitius cum alumnus sit Antonij Thebaldei, quem ego virum propter eius præstantem in optimarum artium studijs doctrinam, pangendisq³ carminibus mirificam industriã vnice diligo, grata hercule mihi ea vestra liberalitas fuit. Itaque certior factus superesse etiam vobis portionem quandam ex illis ipsis Cederelli bonis, quàm nemini adhuc quidem donauistis, has ad vos literas dedi, vt sciretis, si, quod est reliquũ eorum bonorũ, eo à vobis Domitius augebitur, mihi id per quàm gratum futurum. Vos autem in eo præterea & modesti ac probi adolescentis arctam angustamq³ rē vestra liberalitate explicabitis, & virum egregium ac per elegantem, deq³ vestra ciuitate optime meritũ eius patronum eo beneficio vobis deuincietis. Dat. XVI. Cal. Aug. Anno secundo. Roma.

SIGISMUNDO REGI

Poloniæ.

3

PERFERTVR ad me, seditionibus non negligendis in Pannonia per factiosos homines & scelestos excitationis arma temere tractari, ac trucidari passim plurimos, & intestinũ quoddam quasi bellum existere cōtra Vladislai Regis Pannoniæ fratristui voluntatem. Itaq³ timendum esse, nisi ei rei quàm celerrime occurratur, ne freti ac permoti ea occasione Turce Regnum illud

conuulsum iam per se ac debilitatum, ad quod quidem maxime omnium mentem atque animum adiecerunt propterea quod est cum suis Regnis coniunctissimū, ipsi integri collectis viribus adorianitur. Eo Regno atq; populis vel sub iugum missis, vel profligatis ac perditis, qui vos casus maneat, nemo est, qui non videat etiam tacēte ac silente me. Eas ob res omneis te hortandum esse in primis duco, vt vel sublato, modis omnibus eo bello, quod te in praesentia intelligo cum Moscouitis exercere vel si fieri potest suspenso atque in aliud tempus dilato ac reiecto, properes auxilium atque opem ferre fratri germano tuo, exercitumq; in Pannoniae fines adducas. Non enim vereor, si te modo appropinquare populi illi senserint fratri suppetias allaturum quin se omnes in officio contineant. Quod cum fecerint, etiam Turcis spem eripient primū quidem in Pannonios fratremq; ipsum tuū, deinde in reliquos Christiani nominis populos atq; gentes male cogitandi. Id abs te ita peto, vt quanquam videar tuorum etiam causa te cohortari atq; animo commonefacere, tibi tamen nihilo sim minus ea de re debiturus, ac si mihi vni tantum, quantum postulo, tribuisses. Quintodecimo Cal. Aug. Anno secundo. Roma.

Liunionæ Magistro.

4

PROXIMIS diebus Prusia Magistri atque tuis petentibus Legatis, vt Regis Poloniae ipsiusq; Magistri veterem illam maximarum rerum & controuersiarum causam, quam habent, sacro Lateranensi Concilio iudicandam terminandamq; aliquando tandem remitterem: nuntiatum est in Pannonia tumultus magnos & seditiones exortas esse: ob eamq; rē trucidari plurimos

exci-

excitariq₃ tanquā intestinum bellum contra Vladislai Regis Pannonia voluntatē: verendumq₃ esse, nisi id tēpestiue bllum sedatū sopitumq₃ sit, ne animati ea occasione Turca Regnū illud, quod vicinū ipsis est, inuadant atq₃ diripiāt. Ea regio atq₃ natio cū quasi vallus quidā atq₃ agger munitissimus inter nos atq₃ illos adhuc quidem semper sit habita, quantū ex eo periculi rei Christiana impendeant, satis etiā tacente me res ipsa per se loquitur. Itaq₃ cum existimarē primū omnium oportere, vicinorū & Regū & Principū vnanimi consensu rebus Pannonicis quam celerrime succurri, ne inchoatum iā malum atque labes augendi confirmandiq₃ sese morā atq₃ spatiū nancisci possit: tuorū et Magistri Prusie Legatorū postulationes in aliud reieci tempus, atq₃ distuli: ne dum animorū voluntatumq₃ vestrarū conciliationis nouus hic Pannonia rerū status maxime indiget, lis inter vos ac disceptatio magnis de rebus atq₃ causis agi tractariq₃ Romae incipiat. Quamobrē tametsi Regē Polonia bello Moscouitano esse implicitū audierim: tamen quia Pannonia Regno in periculū adducto vicina ei Regna in tuto esse nequaquā poterunt, dedi ad eū literas, quibus literis, vt vel sedato eo quoquo modo, vel suspensibello ad Pannonia fines cum exercitu se conferret: deq₃ sedandis eo in Regno seditionibus intestinoq₃ bello cum Rege fratre suo ageret, sum illum diligenter hortatus, speroq₃ fore, vt meis monitis salutaribus praesertim atq₃ amantissimis pareat. Eā ad rē tu quoq₃ vti curā cogitationemq₃ tuā adhibeas, pro mei muneris officio etiā atq₃ etiā abs te peto. Nā quoniā propter eā, quae tibi cū Moscouitis est, vicinitatē confido tua me opera & autorita-

te posse, quod postulo, facile consequi, vt id, quod dixi, bellum vel finem aliquem nanciscatur, vel ipsum differatur, quo Rex Polonia Regi Pannonia auxilium afferre, ei^q3 prestò esse possit: valde cupio, vt eam tu ad rem tã honestã tamq³ laudabilem consociendam, consociandasq³ duorũ Regum voluntates atque mētes auctoritatem tuã conferas nobiscum atq³ adiungas. Id si feceris quemadmodum quidem tua fides cum prudentia, tum in me, qui te vnice diligo, voluntate maxime confido te facturum, & officio eris functus optimi prudentissimiq³ Principis & spem omnem hostibus nostris communibus auferes Regnum quidem Pannonia primũ, deinde alias atque alias nationes Christianas inuadendi atque proterendi, et tibi ego plurimum debebo, cuius eris precibus atque monitis obsequutus. 15. Cal. Aug. Anno 2. Roma.

Antonio Mariæ Palauicino.

5

RECORDARI facile potes, me cũ Roma esses nõ semel te paterne monnisse, vt cum Galeatio Palauicino fratre tuo ageres, vt Castrũ Cornelij, quod quidem Castrum egregia Rubeorũ familia apud nos est conquesta ad se pertinere, mihi et Reip. ille atq³ tu remitteretis, vt quæ aqua honestaq³ essent, de eo statuerem: teq³ ita facturũ, nobis pollicitũ fuisse, puto te non esse oblitũ. Id cũ à te differatur, nihilq³ de eo confectũ adhuc quidem sit, scribendũ ad te putauĩ, vt quemadmodũ pollicitus fuisti te cum fratre tuo curaturũ, ita faceres, Reiq³ pub. atq³ mihi tu fraterq³ tuus Castrũ Cornelij traderetis, vt de illo pro iustitia decernere & statuere possem. Id si feceritis: erit mihi admodũ gratũ: vosq³ vti viros mei obseruantes posthac etiã impensius diligã. Dat. 4. Cal. Aug. Anno. 2. Roma.

MAXI-

MAXIMILIANO MARIAE

Mediolanensium Duci.

6

PROFICISCITVR Mediolanum is, cui has ad te literas dedi, abs te petiturus, vt sibi emere istic liceat thoracas ferreos quater mille, quibus nostri pedites vt possint. Qua in re te hortor, des ei atque cominodes non id modo, vt emere thoracas illos, sed etiam vt sine portorij solutione educere de tua ditione possit. Dat. 4. Cal. Aug. Anno secundo. Roma.

Ludouici Tornaboniæ.

7

NARRAVIT mihi Iulianus Tornabonius propinquus tuus de tua in me pietate sanè multa, qua mihi grata admodum atque iucunda fuerūt. Animi enim tui erga me plenam beneuolentia voluntatē à primis virisq; nostrum annis mihi et perspectā & probatam libentissime agnoui. Itaque ea de te re amabiliq; officio valde diligo, voloq; scire, si quid acciderit, in quo tibi aut tuis esse vsui perpetua mea erga te charitas amorq; paternus possit, nullum me grati animi signum pratermissurum, vt intelligas te mihi esse charissimū, semperq; fore. Dat. tertio Cal. Aug. Anno secundo. Roma.

Municipibus Arimini.

8

CERTIOR factus sum Clara Malatesti Montisferetriana sacerdoti, quæ vxor Roberti Malatestæ fuit, certam summā dotis & hereditatis nomine à vobis deberi: itaque à sex viris Fisci Romani, cum in controuersiam res venisset, iudicatum fuisse. Quare hortor vos, vt secundum Sexuirum iudiciū curetis efficiatisq; vt mulier ad suum perueniat sine dispendio & mora. Dat. prid. Cal. Aug. Anno secundo. Roma.

PETRI BEMBI
PETRO MARIAE

Scotto Placentino.

9

INTELLEXIMVS te quasdam possessiones Ghiselli Marchionis Malaspinae per tuos vi occupauisse: eiusq₃ vxori sorori tuae virū vt relinqueret, persuasisse: itemq₃ quosdam ex tuis abs te adiutos magnū frumenti numerum domus Hospitalis Placentinae interceptisse: cū diui Benedicti societatis aqueductus perfragisse. Quae quidem mihi omnia per sanè grauiā perq₃ molesta fuerunt, eiusmodiq₃ visa sunt, vt tolerari à me nullo pacto debeant. Quod si Palauicinorū familia nobis charissima causa tuā adhuc arrogantiam pertulimus, scire te planè volo, nos posthac tibi Palauicinorū auctoritate nihil remissuros: sed cū illa priora, tū ista recēter abs te admissa eo acrius vindicaturos, quo in te mitiores adhuc quidem fuimus. Itaque mando tibi, vt ablata abs te atque à tuis, Ghiselliq₃ coniugem ilico restituas: aqueductus perfractos reponas: audaciamq₃ tuā reprimas: teq₃ ipse modestia nostrae impunitateq₃ abutentem colligas, atq₃ contineas, moresq₃ induas & clementia nostra & tua familia dignos: pareasq₃ istius vrbs Magistratui omnibus in rebus, quas te res volet facere, tibiq₃ iusserit. Haec omnia nisi abs te curabuntur, non ea modo, quibus te liberalitas nostra donauit, sed etiam patrimonium tuum omne addici fisco mandabo: teq₃ vti rebellum nostrum atque hostem modis omnibus puniam. Dat. prid. Cal. Aug. Anno secundo. Roma.

Magistratui Placentiae.

10

EXEMPLVM literarum, quas ad Petrum Mariam Scottum dedi, habuisti cum his literis. Itaq₃ mandate

do tibi, vt quæ me ei præcipere ijs in literis cognoscēs, eadem tu quoque meis verbis illi mandes at quæ præcipias. Quod si is meis mandatis non obtemperauerit, volo eum releges, quo in loco tibi videbitur, eiusq; bona fisco addicas, ceteraq; omnia statuas pro nostra dignitate: nequis posthac malefacere audeat, speretq; se id impuniturum. Dat. prid. Cal. Aug. Anno secundo. Roma.

GALEATIO ET ANTONIO

Mariæ Palauicinis fratribus.

11

PERTVLIMVS adhuc quidem vestra causa Petri Mariæ Scotti intemperantes mores audaciamq; nõ ferendam. Ille verò benignitate nostra magis magisq; in dies singulos abutitur, atque in omnia mala promior fit. Quamobrem has literas dictaui, vt vos commonescerem, nisi se ille audaciamq; suam furoremq; represserit, et quæ nuper damna intulit, ea statim omnia illis ipsis reposuerit, qui pertulerunt, nos in illum neq; vos neq; quempiã reuerentes, quemadmodum meritis est, sic animaduersuros. Dat. prid. Cal. Aug. An. secundo. Roma.

PHILIPPO CAPELLO ET

eius patruelibus Andreæ Capello

filijs Venetis ciuibus.

12

LECTIS vestris literis, quibus mecum multis precibus agitis, vt cum olim Iacobus Franciscinorum minorum societatis Magister, qui tunc erat, cubiculum in sociorum domo, quæ Venetijs est, Victori Capello auo vestro eiusq; liberis dederit, concesserit: idq; deinde factum Romani Pontif. duo Paulus Secundus & Sixtus Quartus probauerint: eam ipse datione & concessione in vos, qui Victoris nepotes estis ex duobus eius filijs Andrea &

Paulo

Paulo geniti, ita transferam, vt parentum vestrorū ius
in vobis tribus eorū liberis resideat: pro mea in vos pie-
tate facile animū induxi, vt vestris postulat is satisfacere-
rem. Itaque dationis & concessionis eiusmodi sensum
feriemq₃ omnē ipse quoq₃ approbans idē illud, quod Vi-
ctori Capello auo vestro eiusq₃ liberis vestris parentibus
datū cōcessumq₃ tunc fuit, auctoritate mea aqua portio-
ne in vos trāsfero: volog₃ vt ius ex semisse illud in cubi-
culum habeas tu Philippe Capelle vnicus Pauli Capelli
filius: vos autē Andrea Capelli duo filij ex altero semisse,
hoc est ex quadrante quilibet. Quorū quidem patrum
vestrorū alter à me valde sanè diligitur Paulus, Remq₃
pub. Venetā administrat: alter plures abhinc annos Ro-
mæ Legatū Venetum agens mortē obiit. Ita & mea in
vium beneuolentia, & mortui nec publicē suscepta vo-
bis proderit. Dat. 5. Cal. Aug. Anno secundo. Roma.

Raphaelo Vrbinati.

13

CV M præter pictaræ artem, qua in arte te excellere
omnes homines intelligunt, is à Bramante architecto
etiam in construendis edibus es habitus, vt tibi ille recte
Principis Apostolorum templi Romani à se inchoati adi-
dificationem committi posse moriens existimauerit,
idq₃ tu nobis forma eius templi confecta, qua desidera-
batur, totiusq₃ operis ratione tradita docte atq₃ abun-
de probaueris. Nos, quibus nihil est prope antiquius;
quàm vt fanum id quàm magnificentissime quamq₃ ce-
lerrime construatur, te magistrum eius operis facimus
cum stipendio nummūm aureorum trecentorum tibi
annis singulis curandorum à nostris pecuniarum, quæ
ad eius fani adificationem erogantur ad nōsque perse-
runtur.

runtur, Magistris: à quibus id stipendium aquis pro tē-
pore portionibus dari tibi cum petieris sine mora etiam
mensibus singulis iubeo. Te verò hortor, vt huius mune-
ris curam ita suscipias, vt in eo exercendo cū existima-
tionis tuæ ac nominis, quorum quidem in iuuenili atate
bona fundamenta iacere te oportet, tū spei de te nostræ
paterneq; in te beneuolentiæ, demū etiam fami, quod in
toto orbe terrarum longe omnium maximū atq; sanctissi-
mum semper fuit, dignitatis & celebritatis, et in ipsius
Principem Apostolorum debita à nobis pietatis rationē
habuisse videre. Dat. Cal. Aug. Anno secundo. Roma.

Legato Auenionensi.

14

ANTONIVM Thebaldeum probum hominem,
atque in bonarum artium in primisq; poetices studijs
tum nostra, tum Latina lingua facile præstantem virū
multos iā annos vnice diligo. Cui cum portorij munus,
quod in ponte Sorgiæ Fluminis est Auenionensis disce-
seos Legationis tuæ, conferri cupiam, vt eo sese alere ac
sustentare liberaliter possit, peto abs te velis, vt homo e-
gregius & excellens & mihi valde charus eo munere
per nos te libente afficiatur. Dat. Nonis Aug. Anno
secundo. Roma.

Regi Britannicæ.

15

HADRIANVM Bardum ciuem Florentinum
Tami plebanum propter plurimas ipsius virtutes eamq;
necessitudinem, quam cum domo mea veterem atq; ar-
ctam habet, valde diligo. Quem cum intelligam in Re-
gno tuo triginta prope annos innocenter fuisse versa-
tum commendo tibi eum sanè per diligenter. Quicquid
in illum beneficij liberalitatisque contuleris, id tam
nobis

nobis erit gratum, quàm quod gratissimū. Dat. octauo
Id. Aug. Anno secundo. Roma.

LAVRENTIO MEDICI

fratris filio

16

ET si ex aliorum literis de Consulatu Constantino-
politano Zenobio Medici tradendo mentem meam co-
gnoscere potuisti: te tamen meis etiā literis putavi esse
commonefaciendam, dares operā, effuieresq₃ autoritate
tua & gratia, magistratū vt illum Zenobius ab ista Re-
pub. consequeretur. Valde enim cupio, ne propinquus no-
ster ea in re ferendis suffragijs prateratur vel propte-
rea quòd augeri illū omnibus in rebus sane volo, vel ma-
xime, quòd Zenobium ipsum ei muneri fore idoneū ve-
hementer existimo. Dat. 7. Id. Aug. An. secundo. Roma.

IOANNI ET GENTILI

Saxatellis Forocorneliensibus.

17

MULTI ad me scribunt, rumor etiā ipse quasi me
admonet, Bentiuolos fratres modis omnibus dare operā,
vt in patriam vi redire, Bononiāq₃ statum perturbare
atque peruertere possint, eisq₃ vos auxilio in primis fu-
turos. Quod vtrunq₃ tum pro illorum, tum etiā pro ve-
stro in me cultu, nostraq₃ in illos atque vos paterna vo-
luntate & charitate credere nullo pacto possum. Quid
est enim minus hominis, quàm hominum bene viuentiū
conuentus & societates constitutas diripere, eisq₃ vim
asserre conari? nedum id etiā amicorū & necessariorū
hominū munus esse atq₃ cogitatio credatur. Vt cūq₃ au-
tem se res habet, mando vobis ea lege, quæ de maiestate
est, nō id modo, vt à Bentiuolis vlla in re iuuandis in eo-
rum ad patriā reditu prorsus abstineatis, quanquam id
quidem

quidem maxime: sed etiam vt illos modis omnibus ab eā cogitatione reuocetis, operamq; vestram omnem, curā, diligentiam adhibeatis, ne facere, aut etiam tentare id omnino possint. Dat. prid. Id. Aug. Anno secundo. Roma.

ALFONSO DUCI

Ferrariensium.

18

NON vnīs optimorum hominum & prudentiū virorum literis certior factus sum, reditum in patriam à Bentiuolis fratribus vi atq; armis parari, existimariq; à multis, vel iam planē sermone hominū confirmari, eis te auxilio futurū, opesq; tuas subministraturum, vt id facilius consequi atq; consicere possint. Quae sanē res mihi quidē, qui te atq; illos amo, deq; vtrisq; vt bene meritus essem etiā laboraui, omnino verisimilis non sit. Neq; enim vel illis esse obscurum potest, me id non laturū, sed ei rei modis omnibus occursum: vel tu is es, qui sis nescius, quiq; nō offensionem in me tuā damnosiores tibi, quā Bentiuolorum in patriā reditum fore vsui existimes. Verumenimvero, quoquo modo ea se habeant, te etiam atque etiā hortor, planeq; commonefacio, vt si illi ad reditū vi comparandum animū adiecerunt, non oratione modo eos tua, vel autoritate sententia absterreas ab eiusmodi consilijs suscipiendis: sed etiā quibuscunque rebus potes, potes autē & plurimis & maximis, prohibeas, ne rē aggrediantur: sed quiescant, seq; cōtineant, neq; pergāt eo progredi, vnde sciunt reditū nullum esse. Id si feceris, & ipsis optime consulueris, & mihi tā fuerit gratum, quā esset molestum, si te adiutorem & socium meorum hostium atque rebellium praestitisses. Da. Prid. Id. Aug. M. D. X I I I I. Anno secundo. Roma.

PETRI REMBI
XL. VIRIS BONO-
nienſibus.

19

EX vestris ad Vergilium Legatum vestrum literis intellexi, quæ ad me deferri curauistis, argumenta coniecturasq₃, quibus in eam sententiã adducti estis, vt credatis teteri à Bentiuolis fratribus multa, armatorumq₃ hominum manũ ab eis cogi, vt redire in patriam vi, istiusq₃ ciuitatis statum atq₃ otium perturbare atque peruertere possint. Itaque auxilia contra illorum conatus postulatis. Quæ autem per vosmet ipsos parari atq₃ effici poterāt, ea vos comparauisse iam omnia suisq₃ disposuisse singula & collocauisse locis adscribitis. Quibus de rebus omnibus studiũ, cura, diligentiaq₃ mihi vestra vehementer probatur: fidemq₃ vestrã facinus certe plurimũ. Nam quod ad presentem vestrarum rerum formã attinet, etsi existimẽ tũ Bentiuolos, tum etiã reliquos, quos commemoratis, nihil tale cogitare: ne vereri tamẽ queatis istius vrbi otium & tranquillitatẽ mihi minori, quàm profecto debeat, cura solitudiniq₃ esse: primum quidem Alfonso Duci Ferrariensium et Ioanni ac Gentili Saxatellis fratribus interminatus sum per literas, ne manũ vllam, neue auxilium vestris exulibus mitterent: sed eos modis omnibus prohiberent, ne conuellere ciuitatis vestræ statum molirentur: quod eos facturos sanẽ confido. Idem etiam Guido Rangoni scriptis ad eum literis mandauit: neq₃ vereor, quin ipse quoque nobis sit, vti debet, potius, quàm illis satisfactorus. Laurentiũ deinde Medicem fratris mei filium commonefeci, vt si vos Episcopus uẽ Pole Bononiæ magistratus opẽ ab eo Reg₃ pub. Florentina petitem miseritis, rebus vobis omnibus præsto

præsto sit sine vlla mora. Quod, si erit opus facietis, atq;
ad illum, tanquam ad me mittetis. Nam is propterea
quod vobis est vicinus, facile iuuare vos atque celeriter poterit. Quod si maiore auxilio esse vobis opus existimabitis, meq; de eo certio rem facietis, copia nostræ omnes ad vos tuendos defendendosq; mittentur: sic enim maxime Reip. nostræq; dignitas retinebitur. Vos autem singulis de rebus, quæ istic agentur, diligentissimè ad nos vt adhuc quidem fecistis, literas dabitis, vt vobis in tempore opitulari, cū initia rerū cognoro, facilius & exploratius possim. Dat. Id. Aug. 1514. Anno secundo. Roma.

FABRITIO MAGNO

Rhodi Magistro.

20

ET si exploratum nobis erat pro tuo fraterno amore ac pietate tristē te nuntium accepturū, cum intellexeret Cardinalem Finariū fratrem tuum mortē obijisse: volui tamen, vt de eo meis literis fieres certior, vt cognosceres te atq; tuos tuaq; omnia paternæ mihi curæ, vti debēt, fuisse. Quem sanè virū cum propter plurimas eius eximiasq; virtutes & diligere, vt fratrē, et magno esse vsui in Reip. administratione viderem, quantū mihi molestia quantum mœroris eius mors attulerit, existimare facile ipse per se potes. Ego quidē certe sic existimo, multum in eo viro splendoris & præsidij Rempubli. amisisse. Nostri verò in ipsum amoris & beneuolentiæ testimoniū id supremū fuit, quod omnibus profecto in rebus, quas impetrare à me noluit, vt benefaceret suis, ei petenti satisfeci. Ipse autē ita fortiter temperateq; decessit, vt credi par sit, Deū Opt. Max. ex hoc impuro lachrymabiliq; hospitio ad cœlestis illum patriæ incun-

disſimam beatiffimamq₃ ſedem euocare atque traduce-
re voluiſſe. Nihil enim eorum, quæ ad ſanctiſſime dete-
dentes pertinent, prætermiſit. Quæ cum ita ſint, te hor-
tor, vt eam iacturam æquo & erecto animo ſeras: vt vi-
rum magnum, & ætate iam deuexa, & terrena omnia
infra ſe habentem & contemnentē decet. Ego autem, ſi
quid in eo ſolatiū tibi eſſe poterit: polli- eor tibi atq₃ reci-
pio, me omnibus in rebus, quæ ad te dignitatemq₃ tuam
pertinebūt, fratris tui clariffimi viri amorisq₃ eius erga
te prætes atq₃ munera ſubiturū, libentiſſimeq₃ repreſen-
taturū & præſtaturū. Tu modo ad rem Chriſtianam iu-
uandam, tuaq₃ cura et diligentia, vt ſoles ampliſcandā
à luctu atque mœrore te auoca. Erit id & te dignū, &
tūæ antea actæ vitæ propriū, & mihi gratū & optatum.
Dat. 13. Cal. Aug. M. D. XIII. Anno ſecundo. Roma.

LAVRENTIO MEDICI

fratris filio.

21

SIGNIFICAVIT mihi Matthæus Cominus
Montisferetrianus, ſe bona ſua nondum recuperaviſſe.
Quod mihi quidem fuit ſanè moleſtū: qui homini nobis
familiæq₃ noſtræ in primis dedito ſatiſſeri valde cupio.
Quamobrē volo des operā, vt is in priſtinas ſuas fortu-
nas omneis ſine mora ſineq₃ diſpendio reponatur. Præte-
rea quoniā per ſupra ſyndicos Cortinarū Aretij ꝑꝑediē
creandus eſt, is qui Camerariatus & Maſſariatus mu-
neri præſit: erit mihi pergratum, ſi abs te curabitur, vt
Matthæus ipſe à ſupra ſyndicis Aretinis legatur, qui eū
magiſtratū gerat. Dat. 12. Cal. Aug. Anno ſecundo. Ro-

FRANCISCO MARCHIONI

Mantux.

22

QVO.

QVONIAM ad sacra conficienda precesq; diuinas celebrandas cantore mihi opus est, qui grauiori voce cōcinat: velim, si tibi incommodum non est, vt ad me Michaelē Lucensē cantorē tuū mittas: vt eo nostris in sacris atque templo, quod est omnium celeberrimum atque sanctissimum, communēque totius orbis terrarum pietatem & letitiā continet, vti possim. Dat. 3. Cal. August. Anno secundo. Roma.

ALFONSO CARDINALI

Senensi. 23

SCRIPSIT ad te Iulius Medices Cardinalis meis verbis, velles ad me mittere eum puerum, quē habes Gallum Muscæ artis peritum. Ex ijs enim, quos ē Gallia accersui, vnus atq; is quidem, qui peritior erat, voculaq; blādiorē ac flexibiliore praditus, mortē obiit. Eas literas cum tibi arbitrer redditas non fuisse: nihil enim ad illas adhuc quidem respondisti: hās ad te alteras literas dare volui, quibus item te hortarer, velles de puero illo sacra nostra commodare: quibus in sacris tu quoque, cum huc veneris, pium honestumq; oblectamētum capies. Dat. prid. Cal. Aug. Anno secundo. Roma.

FRANCISCO MARIAE

Vrbinatium Duci. 24

INTELLEXIMVS te in recenti eorū Cesenae oppidi ciuium tumultu, quibus priora delicta pepercimus, quiq; nobis fidem apud te dederant se pacta seruatuos, fa. emq; non violatuos, opportuna prudenterq; curasse, ne malū serpere vltius posset firmata tuo praesidio ciuitate, misissq; illō qui eam regerent, cum eiū rei arbitrum fecissemus. Quae nobis omnia magnopere

probantur. Mando autem tibi, vt in eos, qui pacta quicq;
fidem non praestiterunt, animaduertas, quemadmodum
tibi equum esse atque opportunum videbitur: vt ceteri,
qui fidem nobis suam vel iam dederunt, vel daturi post-
hac sunt, eam fallere minus audeant. Faciesq; nos de eo,
quod egeris atq; statueris quàm diligentissime certio-
res. Dat. prid. Cal. Aug. Anno secundo. Roma.

INTERNVNTIIS APVD RE-

gem Hispaniarum nostris.

25

EXEMPLVM literarum, quas ad Ferdinandum
Regem dedimus, habebitis cum his literis: ex quo quàm
mihi gratum futurum sit, vt cum Geuensis Ecclesia
Episcopus defecerit velit vt eam Gabrieli Archiepiscopo
Barenfi conferamus, facile cognoscetis. Itaq; volumus,
vt omnem curam diligentiamq; adhibeatis, vt ab ipso
Rege id, quod volumus, consequamur. Dat. quarto No.
Sept. M. D. XIII. Anno secundo. Roma.

FERDINANDO HISPA-

niarum Regi.

26

IOANNIS Scotti, cuius fides & industria pro re
Romana tuisq; rebus égregia atq; mirifica bellis Itali-
cis extitit, controneriam, quàm habet cum ijs, à quibus
res eius domestica retinetur atq; diripitur, commendo
tibi maiorem in modum: petoq; abs te, vt eius causam
cum veterem, tum aduersariorum artibus conturbatã
explices: fauoremque te homini forti atque prudenti
prebeas. Erit mihi sane quàm gratum. Dat. prid. Non.
Septemb. Anno secundo. Roma.

LEONARDO LAVREDANO

Venetiarum Principi.

27

CON

CONQUESTI apud me sunt Legati Maximiliani Romanorum Imperatori designato, multis et quotidianis prope querelis, Ioannem Paulum Balionem, diu is vestri exercitus Praefectum ageret, captum ab Hispano exercitu, postea fide data reuertendi cum iuberetur nobis petentibus demissum, demum redire sapius iussum nunquam via se dedisse. Quam rem agre molesteq₃ ferre Maximilianum, seq₃ delusum existimare, ydem mihi saepe Legati significauerunt. Quibus cum bona semper verba dedissemus, proxime mecum egerunt longa constantiq₃ oratione, vt vel ipsum Io. Paulum ad Hispanorum exercitum, cuius est captiuus factus, remitterem: vel darem operam, vt tu Christophorum Frigapanem Maximiliani exercitus item Praefectum captiuum tui missum faceres illius loco. Earum rerum alterutram mihi breui tempore consecissem. Maximilianum graui se à me affectum iniuria, irriskiq₃ habitum, existimaturum. Quamobrem vt ipse vel promissi mei onere, vel expostulationis eorum molestia aliquando tandem subleuer, peto abs te etiam atque etiam, vt quemadmodum Maximilianus meo rogatu Ioanni Paulo Romam veniendi potestatem fecit, ita tu quoq₃ Christophoro se ad nos conferendi potestatem facias fide ab eo accepta, se Roma me nolente non discessurum, neq₃ contra te hoc toto bello arma sumpturum. Id si feceris, & me magna molestia liberaueris, & te illis aequum & iustum praestiteris, qui fidem meam adhuc quidem desiderant, ego vero illius quidem certe, sed me hercule etiam tuam. De eo cum Legati tui scriba sum loquutus: is ad te sermonem meum perscribet. Dat. VI. Id. Septemb. Anno secundo. Roma.

— IACOBVM Sadoletum ciuem tuum, cuius egregia & fideli opera scribendis epistolis quotidie vt orob eius excellens atque praeclarū ingenium, optimarumq; artium singularem doctrinā, & praestantē omni virtutum genere animum magnopere amo, facioq; sanē plurimi. Eius sororis vir Tadeus Gilinus cupit impetrare abs te magistratū aliquem tuis in locis, quem trienniu aut biennium exerceat: vt & honestius eos dies traducere, & familiam suam alere facilius atque commodius possit. Itaque te non solum hortor, sed etiam rogo, velis praeclari hominis mihiq; charissimū propinquo pudenti, vt intelligo, viro & virtute praedito satisfacere, qui tamē rem omnem desideriumq; suum tibi coram ipsemet diligentius explicabit. Dat. V. 1d. Sept. Anno 2. Roma.

LVDOVICO GALLO-

lorum Regi.

29

ET si te antea certiore feci, me tum ad monasteria, tum etiā ad Ecclesiam Caturcensem, quorū & possessor & Episcopus Cardinalis Finarius mortem Romae obierat, Ludouicum Carretum demortui propinquū et Franciscum Eliscum Cardinalem sublegisse: hortatusq; te sum, velles diplomata eis conficere, quibus significares ea, quae statueram, probari abs te, atque ita fieri tibi placere: te tamen his etiam literis commonefaciendum putavi, ne rem differres longius neue in eo te duriorē & difficiliorem preberes, quā vel meus erga te amor, vel optimi hominis tibi planē dediti, atque duorū alterius viui, alterius nuper mortui Cardinalium egregia

atq;

atq; illustria in te multorum annorū officia, studia, labores etiā postularent. Dat. 17. Cal. Oct. Anno 2. Roma.

LUDOVICO GALLO-

rum Regi.

30

PETRV M Nauarrum Cantabrum præstantem in rebus bellicis virum captiuum tuū, cuius res fortiter & præclare gestas pro Rep. Christiana egregiamq; in nos fidem & pietatem tibi notas esse arbitror, valde amo: eiusq; incolumitas & salus mihi magna cura est. Itaq; quo maiore studio possum, abs te peto, velis eum aliquādo tandem missum facere. Qua de re Ludouico Episcopo Tricaricensi Legato apud te meo per literas, & Ioanni Racosforti Legato apud me tuo præsens ipse mentem meam latius & diligentius explicui, ij ad te omnia deferent. Dat. 12. Cal. Octob Anno secundo. Roma.

PETRO NAVARRO

Cantabro.

31

PROFICISCENTI ad te Ferrando, qui est ex societate Franciscinorum minorum, familiari tuo dedi ad Ludouicum Regem literas: quibus literis peto ab illo, te vt missum faciat: quod eum facturum pro mea in illum voluntate & beneuolentia sanè puto. Itaque hac vt scires volui, tum vt bono animo esses, cōsideresq; me nulla in re, quæ ad salutem libertatemq; tuam pertineret, negligentem fore. Quod etiam plenius & vberius ex ipso Ferrando cognosces. Dat. XII. Cal. Octob. Anno secundo. Roma.

Municipio Firmano.

32

MAGNA cum molestia percepi Ioannem Franciscum Astuldi filium Asculanum ingenti armatorū homi-

num manu vestro in oppido comparata res Asculanorū
perturbare aggressum fuisse, perductisq; ad oppidi mu-
ros ijs militibus, quos coegerat, penetrare oppidum ho-
stilibus adortum modis multum turbarum excitauisse,
magnumq; terrorem oppidanis incussisse. Quares cum
indignissima sit, quae nobis ferenda videatur, praesertim
cum certior factus sim Ioannis Francisci profectioni vos
ipso fauisse, propterea quod is multos tum ex ijs militi-
bus, qui tuendi istius oppidi causa apud vos merent, tum
verò etiam ex vestris municipibus secum habuerit: mā-
do vobis atque impero, poena decem millium nummum
aureorum proposita, si dicto audientes non eritis, vt im-
petum posthac à vestris hominibus quoquo modo in res
& fortunas Asculanorum eiusq; municipij temperamē-
tum fieri ne permittatis, neue vestrum in oppidum Io-
annem Franciscum Astuldi filium, aut vllos ex Asculanis
exulibus recipiatis: sed eos vniuersos ex municipio a-
groq; vestro, quoad fieri per vos possit, celeriter expella-
tis. Id si feceritis, harū turbarum, quibus alimenta prae-
buiſti, admissiq; vestri culpa ne vobis fraudi sit statuen-
di, vobisq; ignoscendi occasio mihi aliqua fortasse para-
bitur. Sin mandata nostra despexeritis, dabimus profe-
cto operam, ne id impune fecisse vos gloriari vllos a-
homines vobis liceat. Dat. 12. Cal. Octob. Anno 2. Roma.

Heluetijs.

33

PROFICISCENTI ad vos Ennio Episcopo
Verulano Legato meo mandavi vt vobis plurimā salutē
impartiret meis verbis, vosque magnopere laudaret de
vestra in me obseruantia, deq; ea cura & studio, quod
pro nostra et Reip. dignitate maiestateq; tuenda et geri-

tis

tis quidem nunc, & semper gessistis. Hortaretur autem etiam amantissime, ut posthac quoque, quo ea, quæ adhuc quidem fecistis, consilio, non temere fecisse videamini viam quam institistis, in ea eodem passu pergeretis iter facere: talesque vos omni tempore præstaretis, quales & ipsa Respublica experta non semel est, & ego, qui virtutem vestram atque constantiam noui, vehementer fore confido. Quæ præter hac scire vos atque cognoscere volui, ea vobis Ennius exponet. Me si vestri esse nominis amantissimum existimabitis, non fallam vestram opinionem. Sexto. Cal. Octob. Anno secundo. Roma.

Heluetijs.

34

EA quæ in causa Eleutherij Rūschi Lurcani Comititis ex nouem pagorum sententia pro iustitia statuistis, & laudabilia profecto sunt, & nos de ijs ipsi vestram sanè iudicium collaudamus. Hortamur autem vos, ut quæ etiamnum restant, ut res ad exitum perducatur, ea conficiaris, hominisque bene de vobis meriti iurium in eo, quod est reliquum, quemadmodum adhuc quidem fecistis, rationem habeatis. Erit id mihi admodum gratum: quod etiam Ennius Episcopus Verulanus Legatus meus vobis latius atque apertius significabit. Dat. V. Calend. Anno secundo. Roma.

MARCO CARDINALI

Seduno.

35

CUM Ennius Episcopus Verulanus Legatus meus istuc proficisceretur, ei mandaui, ut tibi salutem adnuntiaret, ostenderetque tuum studium, curam, diligentiam, laborem, quem mihi Reipublicæ impendis, esse gratissimum, eaque omnia ut bene posuisses te sentias, me esse

Turum

durum. Is alia etiam nonnulla, quæ te scire volo, tibi significabit. Valebis igitur: nosq; diliges. Dat. sexto Cal. Octob. Anno secundo. Roma.

A L F O N S O D V C I

Ferrariensium.

36

EGO verò & magnopere te amo, & tibi omnibus in rebus, quod cum Dei Opt. Max. voluntate fieri possit, satisfacere valde cupio. Itaque Latinū luuenalsm familiarem meum ad te mitto, vt is Herculem filium tuū sacro chrismate perungendum meo nomine teneat, eiq; adsit: quod te & Lucretiam Ducem eius matrem vxorem tuam maxime cupere mihi significauisti. Qui quidem puer Deum oro, vt patri sit quàm simillimus, vel etiam te virtute facile vincat atque superet. Ego in eum amore atque beneuolentia parentis vicem secundum te atque illam me præstaturam polliceor: cui suauilolum dabis & matri salutem dices. Dat. 4. Calend. Octob. Anno secundo. Roma.

S E B A S T I A N O F E R R E R I O

Quæstori Regio Galliæ Cisalpinæ.

37

IN SV L A M & hortos, quos Roma in Quirinali habes, emere de te valde cupio. Itaq; peto abs te, quod sine tuo incommodo fiat, eos mihi vt vendas, quanti ipsi tibi videbitur. Neque enim vel te puto pluris postulaturum, quàm posceres, si vulgo venirent: vel ipse minoris cogito. Dat. 4. Cal. Octob. Anno secundo. Roma.

C A R D I N A L I A L B R E T O

Gallo.

38

A M O R E & beneuolentia, quæ te fraterne prosequer, tuāq; valetudine me impellente has ad te literas dedi.

dedi: quibus literis, quemadmodum Iulius Secundus Pont. Max. tibi extra Italiam commorandi potestatem fecit, ita & ipse, vt in Gallia moram ducere saluis legibus posses, tibi permissi, quoad aliter statuerem. Quod tamen ipsum non fiet, nisi commodo tuo tuo: tibi enim valetudiniq; tuae consultum iri maxime cupio. 4. Calend. Octob. Anno secundo. Roma.

Iano Parrhasio. 39

CVM id magnopere optem, vt Romanus literarum ludus à præstantissimis doctoribus exerceatur, vt ij, qui se bonis artibus dediderunt, ea ex re fructus vberrimos percipiant: de tua in studijs mitioribus doctrina certior factus ad ea publice docenda Roma te sublegi, stipemq; tibi dari iussi annis singulis ducentorū aureorum nūmum. Quare volo vt ad urbem quamprimum venias: libenti enim te animo atq; paterno videbo. Dat. tertio Cal. Octob. Anno secundo. Roma.

Classis Præfecto. 40

MANDO tibi, vt Joannem Rocafortem Ludouici Gallorum Regis Legatum nauibus longis, quibus præes, Massiliam, aut quem ad Prouincia locum ipse voluerit, peruehas, cum primum nauigandi tempestas idonea erit. Nam quoniam is infirma admodum & valetudine est & viribus, valde cupio, vt tranquillo nauiget mari. Dat. prid. Calend. Octob. Anno secundo. Roma.

DAVIDI REGI.

Abissinorum. 41

PROFICISCENTI ad te Andrea Corsalo ciui Florentino mandauit, vt tibi meis verbis plurimam salutem diceret, certioremq; te faceret, pro tua in nos obseruan-

seruantia, & pro ardore tuo atque cultu in Christianā
 Remp. mirifico propeq₃ singulari, et amari te à me sum-
 mopere, & fieri sanè plurimi. Quod etiam his ad te lite-
 ris perferri volui, vt te hortarer, vt in istis remotissimis
 à Romana Ecclesia regionibus Dei dominique nostri
 IESV CHRISTI nomen atque gloriam, quantū
 posses maxime, propagares & extenderes, poteris au-
 tem, si in eo curam atque animum intendes tuum, sem-
 per quidem plurimum. Ipse etiā dominus: quem colue-
 ris, cuiq₃ gratum te earum, quas ab ipso possides, maxi-
 marum fortunarum atq₃ memorem prastiteris, te foue-
 bit, adiuuabit, prouehet. Caterum Andreā ipsum hone-
 stum sanè virum, & industrium hominem, & ciuem
 meum, & mihi valde gratum commendo tibi maiorem
 in modum. Dat. 6. Id. Octob. Anno secundo. Roma.

OCTAVIANO GENVENSIUM

Duci & Federico Archiepiscopo Saler-
 nitanorum fratribus.

42

AMOR erga vos meus prope singularis, quem qui-
 dem vos plurimis vestris maximisq₃ virtutibus & egre-
 gia perq₃ veteri pietate fidelibusq₃ officijs excitauistis,
 efficit, vt tametsi de commodis ornamentisq₃ vestris sa-
 pe cogitem, mihi tamen quotidie magis magisq₃ esse co-
 gitandum putem. Sed cum hoc tempore multa essent,
 quæ ad vos perferri magnopere cuperem, Augustinum
 Folietam municipem vestrum, familiarem meum, cuius
 mirificā probitatem atq₃ virtutem & eximiam ac pro-
 pe incomparabilem in tractandis rebus consiliorum pru-
 dentiam propensumq₃ in vos studium satis cognitū ha-
 bebam misi ad vos cum mandatis: vt is vos de rebus om-
 nibus

nibus doceret. Dat. prid. Non. Octob. Anno 2. Rosilione.

LVDOVICO REGI

Gallorum.

43

ARCHIEPISCOPVM Burgensem, quem ad nos cum mandatis misisti, & ipsum libenter vidi: est enim mihi & cognitus & probatus, & tuas literas legi diligenter. Ex ijs atq; Archiepiscopi sermone tuā in nos egregiam propensionem mirificamq; voluntatem abunde cognoui. De quo tamen si non semel neque vnus intermunt ijs, sed multiplicibus & autoribus & literis certiores facti sumus: est illud tamen nobis, vt verissime dicā, magnopere semper gratū Eandem enim tuā illam erga me benevolentiam, quam quidem, vt debeo, facio plurimi, vel augeri repetitione testificationis tuae, vel magis magisq; confirmari quotidie puto. De nostro verò in te, dignitatem, amplitudinemq; tuam paterno sensu atque animo, quanquam nihil eius latere te existimo, multa sum tamen cum Archiepiscopo loquutus. Ea te ab ipso cognoscere malo, quā ex meis literis. Quem quoniā mihi commendas, dabo operā, vt extet fructus commendationis tuae. Dat. 4. Id. Octob. Anno secundo Viterbio.

FRANCISCO MARIAE

Vrbinatium Duci.

44

ET legi tuas literas, & Horatium Floridum interternuntium tuum libenter audiui, excusationemq; tuā accepi libentissime. Equidem is sum, qui te cum amicorū copia, tum reliquis opibus & praesidijs cupio esse quam munitissimum: neminiq; in te amando atque amplificando, cedimus. Eoq; te impēsius decet & nostrae dignitatis & Reip. maiestatis atque amplitudinis habere rationē.

Verum

Verū de ijs deq̃, reliquis rebus, quas te scire magnopere volo, ab eodem Horatio intelliges: cui mandavi, vt sermonem, quē cum ipso habui, curaret ad te quā celerime perferendum. Dat. 3. Id. Octob. Anno 2. Viterbio.

PETRI BEMBI EPI
STOLARVM LEONIS

DECIMI PONT. MAX.

Nomine scriptarum.

LIBER X.

IOANNI NERONI

ciui Florentino.



Cum statutum nobis sit à curis atq̃ laboribus, quibus assidue pro Christiana Rep. nobis creditaregenda atq̃ administranda distinemur, auocare interdum nos ijs animi remissionibus, quae aucupij & venationis studio continentur, propterea quòd eiusmodi per agros atque saltus peruagatio, dum in equis sumus, ad valetudinem viresq̃ corporis confirmandas plurimum valet, mediciq̃ nostri nobis magnopere suadent, vt eo motus & vectationis genere quam creberrime vtamur: molestum admodum nobis est id, quod ad nos multi perferunt, quicquid agri atq̃ sylvarum intra vigesimum ab Vrbe lapidem quoquo versus iacet, ita temere vulgoq̃ à venatoribus aucubibusq̃ frequentari, vt omni auium & ferarum genere, quarum copia esse maxima consueuerat, magis magisq̃ in dies singulos exhauriatur, sic profecto, vt earum breui tem-
pore

pore magna Roma caritas, magna in agris inopia videatur futura. Quamobrem cupienti mihi ne priuatorum hominum maximeque vel lucri causa, vel quod nullam rem aliam gerunt, aucupio & venatui se deditum libidine meus & fratrum meorum E. R. Cardinalium, qui vna mecum ad Reipu. gubernacula vigiliam exercent, eiusmodi siue vsus siue voluptas impediatur, visum est eius rei ministrum facere, cuius mihi & industria & diligentia & quidem certe probitas atque prudentia probantur. Itaque mando tibi, ut eius tantummodo agri, qui ad decimum a porta Vaticana villaque nostra Manliana atque ab Hostia totoque a Tyberi lapidem intra viam Cassiam & maris littora pertinet, saltus sylvasque omnes custodias: curesque diligenter, ager ut is atque tractus ab incolis, ab exteris, a peregrinis, a citibus, denique vllis ab hominibus aucupij aut venationis exercenda causa ne adeatur: prater eos, qui auculas visco & noctua capiunt. Quod ut facere commodius possis, volo ut tibi facultas sit & armatos homines, quo volueris, intra illos fines mittendi: qui retiis & cassis genus omne, quod in agris atque sylvis comportatum repererint, venabula omnia, canem vel ad indagandas, vel ad consequendas capiendasque feras idoneum, accipitrem, aquilam manu assuetam interceptiant: & illos, siue domini siue se rui sint, quos cum iis aucupio aut venatui opera dantes offenderint, mulcandi, quemadmodum tibi aquum & iustum videbitur pro captarum volucrum, aut ferarum vastatarum modo. Quas quidem mulctas tibi omnes remittimus, volumusque tuas esse. Confidimus enim te in eo non tuorum commodorum aut plane lucri cuiuspiam, sed tantummodo nostrae volun-

tatis rationem habiturum. Volumus autem, vt cum Roma exire nobis licebit, atque per illa, quæ dixi, loca iter facere, non ipsi modo nos, sed Cardinales etiam, qui nobiscum erunt, atque adeò multo magis, cohorsq; nostra omnis, & confirmare se aucupij & venationis studio, & exhilarare voluptate possit. Da. 9. Oct. An. 2. Viterb.

LVDOVICO CANOSSAE

Episcopo Tricaricensium Legato. 2

P E T R V M Nauarrum Cantabrū, Ludouico Gallorum Regi per literas perq; eius Legatum commendavi sane quàm diligenter. Amo enim magnopere hominē propter eius spectatam virtutem, quod te non latet: cupioq; vt eum Rex è captiuitate atque custodia, in qua prope triennium consecit, ad libertatem restituat, missumq; faciat rogatu meo. Eam tu rem quanto maximo studio & diligentia fieri poterit, si mihi voles gratissimum optatissimumq; facere, procurabis atq; conficies, ita tamen, dum adhibeas in consilium orationis tue lenitatem atque prudentiam. Dat. XII. Cal. Nouemb. Anno secundo. Cereueterere.

VLADISLAO PANNONIAE

Regi. 3

D E D I proximis diebus ad te literas, quibus te de pace à Ludouico Rege Gallorum & Henrico Rege Britannia me autore nuper inita certiore feci. Postea vero & ex literis Thoma Cardinalis Strigoniensis, & Francisci Marsupini eiusdem Cardinalis internuntij sermone intellexi, te plurimis maximiq; bellorum sumptibus iam prope exhaustum ad tuenda istius Regni vicina Turcis oppida solum atque à socijs destitutum, tuis

tantummodo opibus & praesidijs idoneum hoc tempore
 non esse. Itaque rogare obsecrareque nos, ut quoniam cum
 oppidorum illorum conseruatione tui etiam vniuersi pro-
 pe Regni salus incolumitasque coniuncta est: velimus tan-
 tum nostrae opis tibi subministrari, ut ea tueri atque de-
 fendere possis, ne Christiana Reipub. hostes captis expu-
 gnatisque quos vires lacertosque confirment atque augeant,
 quibus, cum libuerit, in reliquis tui Regni partes, atque
 adeo in robur & pectus ipsum audacter vtantur. Habe-
 re autem te loca & ditionem multis hominum millibus
 ad bellum aptissimorum refertissimam: ut si tibi stipen-
 dium ad eos alendos suppeditatum sit, validissimum con-
 tra Turcas exercitum cogere atque conficere facile pos-
 sis. Itaque statuamus, utrum Regnum istud per sese fir-
 missimum & populosissimum gentibus inimicissimis proy-
 cere ad seruitutem & ludibrium velimus: an pro re facul-
 tatibusque nostris dare operam, ne hostes eo nostri potia-
 tur. Quas ad tuas postulationes tibi respondeo. Primum
 quidem, pro mea in te gentesque tuas charitate, proque
 Reip. dignitate, te tuosque populos, Regnumque istud om-
 ne mihi magna cura esse. Deinde versare me noctes atque
 dies animo non tuam modo salutem & incolumitatem
 tuam, quae mihi charissima est, sed etiam de amplitudi-
 ne tua deque gloria sapissime cogitare, quoque te pacto iu-
 uem, curamque adhibeam, ut in bello, quod tibi à Turcis
 nunquam non imminet, administrando ipse te possis apud
 Deum quidem primum, deinde apud omnes homines com-
 mendare quam maximis quamque pulcherrimis virtutis
 atque glorie monumentis. Quamobrem si iustum exercitum co-
 ficere, atque in Turcas impetum facere statueris, bellumque sis

administrare, vt illustris aliqua in illos impressio expugnatioq; oppidorū consequatur, quinquies decies milla nummorum aureorum me ad erogaturū daturumq; tibi spondeo atq; recipio. Sin verò id tantummodo consilij suscipies, vt tuta ab hostibus reddere tua illa propinqua Turcis oppida, de quibus scribis, tibi satis futurū putes: bis decies mille nummū aureorum tibi praesto vt sint, cum me cōmonefeceris, curabo. Itaq; excita exuscitaq; te Vladislae fili praclaras ad actiones animi magnitudine atq; constantia suscipiandas: exemploq; maiorū tuorum maximorum atque amplissimorū Regum tibi proposito, te cum ad tui Regni populorumq; tuorum & gētiū, tum ad Christiana Reip. non solum propugnationem, sed etiā amplificationem para. Quod cum feceris, statutum habeas velim, meas fortunas opesq; omnes fore in tua potestate. A Deo aut Opt. Max. cuius causa patrociniū hoc quidem tempore vnus omnium maxime suscipies, secundū tibi tuo: um conatum exitus euentusq; prosperrimi sunt expectandi. Quibus de rebus omnibus multo sum latius atq; vberius cū Marsupino loquutus: ei q; mandauī, vt tibi singula perscriberet, Vale igitur, nosq; dilige. Dat. XI. Cal. Octob. Anno secundo. Roma.

THOMAE CARDINALI

Strigoniensi.

4

EXEMPLVM literarum, quas Vladislao Regi scribimus, erit cum his literis. Ex eo mentem erga illum meam planè perspicis: quam tu etiam meis ad illum verbis deferres, explicabisq; singula & accuratius & prolixius. Ac te quidem scire volo, vos nihil aliud singulis penè horis cogitare atq; prospicere, quàm vt pacem inter

omnes

omnes Christianos Principes conficiamus: eiꝫ rei neꝫ studio, neque diligentia, neque labore, neque certe ardore animi contentioneꝫ deerimus. Et quoniā in eo id, quod volebamus, à Gallia, atꝫ Britannia Regibus iam consequuti autore Domino sumus, ceterorum etiā Regum & Principum controuersias placandi & terminādi, animesꝫ consociandi confido eundem mihi dominū vires & facultatem subministraturum. Ac si fieri profecto poterit, vt ad id autoritas atque prudentia Regis Polonia Vladislai Regis fratris mihi magna vsui sit futura: Quod cum erit, statim te faciam per literas certiore: vt nauare in eo tu quoque operā mihi trā possās. Atꝫ ea quidem, de qua loquor, pax atꝫ concordia. Deū Opt. Max. oro & quaeso, vt suū ad exitū nobis viuētibz perducatur: vt reliqua quæ restant multo meo quēdem iudicio, opinione quā re maiora, contra eius nominis hostes perpetuos commun omnium consensu & voluntate aliquando moliamur. Sed & hæc & alia, quæ in eum sermonē conieci, quem quidem proxime habui cū Francisco Marsupino procuratore tuo hominē in primis diligente, ipse ad te perscribet: cui mandauī, vt tibi salutem adscriberet. Dat. 11. Cal. Octob. Anno 2. Roma.

MAXIMILIANO IMPERA-

tori designato.

§

AVDITA ea victoria, quam ingentem & maximā Turcarū Rex Selinus cōtra Ismaelem Sophim Persia Regem de mense Augusti prosperrimo successu est consequutus, fratribus meis E. R. Cardinalibus statim adhibitis, diligentiqꝫ consilio ea de re habito, visum est vobis ad omnes Christianos Reges esse literas dandas:

P. 3

quibus

quibus literis & eos certiores tanta de re faceremus, et hortaremur, ut imminenti vniuersae rei Christianae periculo communi consensu atque sententia ire obuiam vellent. Quorum quidem Regum cum tu primus & dignitate & autoritate sis, id mihi tecum primum atque potissimum esse agendum existimaui. Itaque exemplum Selini literarum ad Epidaurenses, quibus victoria summa seriesque continetur, ad te mitto: quo perlecto pro tua singulari prudentia facile perspicias, auersus à nostris moribus atque sacris homo effertur ab ineunte aetate bello exercitibusque ductandis assuetus, qui se regnandi libidine contra patrem senem armauerit, eumque Regno expulerit ad mortem, compulerit, per fratrum & propinquorum aliam super aliam coaceruat as cades ad maximum orbis terrarum Imperium euectus, eo demum in Asia Rege deuicto, cuius vnus maxime opes atque potentiam verebatur, eiusque Regno capto, quid sit factururus: cum illo integro superstitibusque fratre atque fratris filio, qui ei dubium paterni auitique Regni sceptrum faciebant, perturbare tamen mos exercitibus in Pannoniam missis oppidisque aliquot vicaptis anno proximo sit aggressus. Nemini profecto dubium esse debet, qui modo recte minus etiam quam medicriter sentiat, posteaquam is eum hostem perdomuit, à quo sibi vno ab altero Regni sui latere Asia videlicet superiore esse timendum videbat, quin sit in illos, quos ad Europam habet exercitum victorem suum, omnesque suas Imperijque sui vires, ipsamque illam tot secundis successibus tam crebris tamque illustribus victorijs sibi blandientem fortunam suam quam celerissime conuersurus: qui quidem & maiori odio illi sunt propter alienam sacrorum rationem totiusque

tuisq; vite studia, et maiorem ei curā incutiunt propterea quod nos multo se potētiore esse multoq; rebus omnibus ad bellum terra mariq; administrandum paratiores homo minime debens intelligit. Itaq; primū omnium debilitare nos cogitat ea societate, Pannoniamq; suam facere: qua tamen si est ipsa quidē per se firmissima atq; bellicosissima sustinere tamen tantos impetus vna nō poterit. Id cum fuerit assequutus, quid erit amplius, quod illius animū ad te atque nos oppugnandos vnū tantummodo diē coercere atq; continere possit? Nisi forte, qui propinquis, qui fratribus, qui parenti regnandi cupiditate non pepercerit, eū volumus credere à nobis vnīs, qui & moribus illi & certe voluntate hostes sumus, animi facilitate atq; adeo lenitudine temperaturū. Huic tamen presenti malo atq; periculo nobis remedium medicinamq; adhibere sedulo quarentibus vnū illud sese offert multo ante iā à me & prouisum, et tibi reliquisq; Regibus & Principibus Christianis propositū: ut pace atque concordia inter illos omnes teq; in primis tuosq; hostes conciliata, depositisq; priuatis inimicijs publice cōmuniq; consensu hosti victori ac fortuna dulcedine ebris opes viresq; nostras omnes coniunctas atque consociatas oppanamus. Atq; id quidem nos si saepe alias, ut dixi, & tibi & reliquis Regibus frustra et sine vllō vsu proposuimus: est certe ea re tarditateq; nostra factū, ut idē Turca & antea nō vnos suos hostes, et nunc Ismaēlē ipsum, qui vnus ei ex nō Christianis imminēbat eratq; reliquos debellare atq; proterere, Imperijq; sui fines lōge lateq; promouere, opesq; suas multe & firmiores ad se defendēdū, et ad nos aggrediēdos explicatiores paratioresq;

reddere sanè potuerit. Qui nobis rerū euentus quàm sit formidabilis, nemo non videt. Quòd si nunc etiā non audiemur, aut potius si liberator noster Christus, qui vos per vicariū suum alloquitur, atq; ad populos Remq; pu. suam tuendā impellit, non audietur, dicāne an taceā? locus iam iamq; tot peccata nostra corrigendi segnicieq; sarcienti nullus dabitur: vnusq; omnes exitus, vna clades atque interitus manebit. Gliscit namq; malū serpitq; in dies latius, & vires horis prope singulis ita sumit, vt si paululum præterea prestolabimur, ac nosmet ipsos, quemadmodum adhuc quidē fecimus, nostris ipsorum viribus conteremus. spes iam nobis auxiliij atq; presidij nulla reliqua sit futura. Quamobrem per illam te baptismatis tui sacrā salutaremq; vnam, qua te Christianum es professus, perq; tuū Imperatoris nomē, quod te apud omnes nationes verè magnū & venerandū facit, oro, abs teq; precibus omnibus peto & quaeso, vt quādo tu omnium Christianorum Regum Principē geris, prius etiam odia inimicitiasq; tuas, quas cū Christianis populis exerces, deponas: proq; animi tui magnitudine pacē, si non quātilius, certe quā facilius fieri potest cōditione cū tuis hostibus in eas: omnesq; mora causas plane reijcias, ne per te cupiā stetisse videri possit, quominus Christiane Reip. Turcarū gladijs ac furori proposita in tēpore succurratur. Id vel officij tui, propter quod Reipub. Christiane plus quàm ceteri debes vel tui regni causa facere te oportet, ne tuos etiā aliquando populos, si obdormieris ea ipsa imminens omnibus illuies atque perniciēs trahat. Deinde tuo vt nomini atq; glorie consulas, ne te eum locum tenente, quem tenes, vlla insignis

Christi

Christiana Reip. nota atque calamitas inuratur. Demum etiam vt reliqui tuo se exemplo Reges ad id faciliores praebeant. Non enim vereor, cum tu vnus nostris fidelibus monitis obtemperaueris, quisquam omnino vt sit Ecclesia Senatusq; consilij hac in re communiq; periculo aduersaturus, vt nostra hac in Turcas profectio, quam dies atque noctes cogitamus, necessitasq; ipsa nobis suadet, parari celerius atq; commodius possit. Quemadmodum quidem te facturum, quae tua semper fuit pietas atque prudentia, sanè confido. Reliquum est, vt valetudini tuae seruias: à qua tibi non rectè esse permolestè tuli. Quamquam quidem cum has literas dabam, sperabam te conualuisse: iam enim erat febricula illa leuior, qua tentabare. Saluebis igitur à nobis omnibus, & valebis. Dat. Non. Nouemb. M. D. X I I I I. Anno secundo Roma.

THOMAE EPISCOPO

Feltrinorum Legato.

6

EA quae scribimus Maximiliano Imperatore designato, de pace cum suis hostibus ineunda, vt imminenti Reip. nostrae periculo ire obuiam possimus, ab earum literarum exemplo bis concluso literis cognosces. Manda autem tibi, vt ad eas literas etiā vim adiungas orationis tuae, quam tibi causa ratio facile subministrabit: adiuesq; quantum poteris, sermone tuo concilium et sententiam nostram. Quod cum feceris, literas ad me de rebus omnibus dabis quam celerrime quamq; diligentissime. Dat. Non. Nouemb. Anno 2. Roma.

FABRITIO MAGNO

Rhodi Magistro.

7

ET si te existimo de recenti Turcarum Regis victo-

pp 5 ria

ria Sofianiq; belli exitu ante quàm nos intellexisse: tamen cum idipsum ex me etiam vt scires volui literisq; ijs, quæ erunt infra scripta quibus tota rerum series explicatur, tum illud in primis quòd tibi viro optimo & rei Christiana studiosissimo fore pergratum puto: me scilicet ad omnes Christianos Principes dedisse literas, quibus eos quanto maximo studio et contentione potui, hortatus ob testatusq; sum, vt pacem inter se quamprimum reiectis priuatis inimicitijs conficerent: vt nos ad illam iam diu à me, vt scis, institutâ animo, & ipsis propositam, nunc verò etiâ necessario suscipiendam in Turcas profectionem atque bellum accingere comparareq; possemus. Quæ vt pax conficiatur, scire te volo, me omnem meam curam, vigilantiam, auctoritatem adhibiturû, omnem lapidem, vt est in prouerbio, conuersurum: speroq; pro Domini, cuius res agitur, clementia nõ frustra eum me laborem suscipere. Te autem & hortor, & planè rogo, vt quando vicinus illis est, quid agant, quid moliantur, quid etiam cogitent, perquiras diligentissime, faciasq; me in dies singulos de rebus omnibus certiorè: vt prorsus ne quid ignoretur: quo facilius quid agendum nobis sit, statuere in tempore possimus. Erit id & tui officij tuæq; diligentia proprium, & nobis per opportunû perq; gratum. Dat prid. 1d. Nouemb. Anno 2. Roma.

SEBASTIANO FERRERIO

Quæstori Regio Galliæ

Cisalpinæ.

8

ET literas tuas, quibus me de letitia, quâ de meis familiæq; meæ prosperis rebus percipis, deq; tuis pro meæ meorumq; incolumitate decretis supplicationibus cert-

tierem

tiorem facis, libenter legi: & Ioannis Lascaris de ea re sermonem audiui excepiq₃ libentissime. Volo autem vt existimes te tuosq₂ omneis charissimos mihi esse: idq₃ me quotiescunque se occasio dederit, re comprobaturū. Caterum excusatio, quam affers, quod des ad me minus saepe literas, mihi probatur. Ea de re, deq₃ reliquis rebus omnibus ad ipsius Lascaris literas te reijcio: qui ad te singula perscribet. Dat. 3. No. Nouemb. Anno. 2. Roma.

FRANCISCO CHERINO

ciui Florentino.

9

GRAVITER ac permolestē tuli, proximē te comitjīs in nouis istius Reip. magistratibus creandis præteritum fuisse. Scire enim debes paucos meorum ciuium mihi te iucundiores esse, paucos à me pluris fieri. Et quoniam ea in re voluntatem erga te meam atq₃ beneuolentiam perspicere facile potuisti: te hortor, æquo vt animo quæ euenerunt, feras. Dabo enim apud istā Rempub. operam efficiamq₃ profecto, vt dolor, quem ex ea reiectione cepisti, alicuius tibi potioris vel honoris vel commodi voluptate celeriter sarciatur. Dat. prid. Non. Nouemb. Anno secundo. Roma.

BARTHOLOMAEO LIVIANO

Venetorum exercitui Præfecto.

10

SCIRE te arbitror Ludouicum Canossam Tricaricensum Episcopum propter plurimas suas maximasq₃ virtutes & magnopere à me diligī, & meū Legatum apud Gallia Regem agere. Eius fratrum germanorū bona & fortune omnes atq₃ prouentus, quos è fundis suis colligunt, sunt in villa Garzani, quæ est in agro Veronenſi

nensi & ampla, & luculenta. Quare peto abs te, des o-
peram, vt si tuus exercitus in ea loca peruenerit, ea bona
tuis à militibus ne diripiantur, sed tuta prorsus ab omni
tuorum militum incursione sint. Quod etiam Legato
Veneto, qui tuis in castris est, meo nomine significabis.
Id erit mihi tam gratū, quam quòd gratissimum. Dat.
sexto Id. Nouemb. Anno. 2. Roma.

VITO FRVSTO PRAE-

fecto Mutinae.

11

ET mihi & Maximiliano Imperatore designato,
fœdus initū est, pactiq; sumus, vt is Mutinae oppidi ei. & q;
agri ius omne mihi cederet atque remitteret: quemad-
modum ex diplomate, quod ea de re confectū est, pote-
teris cognoscere. Tametsi id te scire iam arbitror, lite-
rasq; à Maximiliano, qua tibi eam rē significarint, ac-
cepisse. Quare velim vt Fabiano Lippo familiari meo
viro probo & mihi probato, quem ad te his cum litteris
misi, ius & possessionem oppidi Mutinae, cui praes, eiusq;
arcis, agri, vicorum omnium destradasq; liberaliter.
Dat. prid. Id. Nouemb. Anno secundo. Roma.

MAXIMILIANO MARIAE

Insulbrum Duci

12

ET si cum superioribus diebus nobis renuntiātū esset
Nicolaum Scottum sese ad Venetos, vt apud illos con-
tra Maximilianum imp. desig. stipendia faceret, con-
tulisse, sane quàm pro eo, ac res postulabat, grauiter
molesteq; tuli, tam temerarium tamq; audacem eum
fuisse, vt non solum ignorantibus nobis, sed contra omni-
no quàm volebamus, proficisci ad illos, non dubitarit: ta-
men cum nuper certior sim factus eum Crema proficis-

centura

uentem interceptū ab hostibus Mediolanumq; perductū
 esse, non potui non dolere, quod vir fortis & bello egre-
 gius gentisq; sue facile princeps in manus hostium inci-
 disse. Itaq; tametsi pro ea tam insigni temeritate hoc
 quidem certe mereri videbatur, vt alieniori nūc esse nos
 in sese animo suo in periculo experiretur: tamen quoniā
 exemplo illius, cuius vicarium in terris gerimus, mites
 esse clementesq; nos maxime omnium conuenit, has ad
 te literas statim dedi: quibus, etsi te pro animi tui ma-
 gnitudine nihil in eum grauius, quā in captiuos mili-
 tes statuere homines magni solent, quāq; consuetudo
 militia ac ius quasi quoddam belli fieri permittit, esse fa-
 cturum arbitrarer: tamen abs te peterem, vt quando is
 multo in me verius Romanamq; Remp. cuius est ipse so-
 cius, quā in te deliquit, Nicolaum ad nos remitteres:
 vt in eū statuere pro more nostro possemus. Erit id cum
 ad gloriam tui nominis augendam aptius, tum nobis ve-
 hementer gratum. Dat. 10. Cal. Dec. Anno 2. Roma.

DVCI ET MAGISTRATVI

Genuensium.

13

MAGNA me latitia is nuntius affecit, quo certior
 factus sum quietis vestrae hostes, qui cōtra vos contraq;
 praesentem vestrae urbis statum animis insensissimis se
 armauerant, irritos conatus suos effudisse, vosq; eis for-
 titer repugnantes magna cum vestralaude & gloria
 dignitatē vestram fuisse tutatos. Itaque ea de re vobis-
 cum vere atque ex animo gratulor. Sic enim existimo
 DEVM Opt. Max. qui rectas hominum bene viuen-
 tium proborumq; virorum voluntates facile perspicit,
 acta vestra atque consilia probauisse, statuisseq; ne vobis
 nocere

noceri ab iniquis atq; improbis posset. Veruntamen quæ-
niã de Federico Archiepiscopo Salernitano Legato ve-
stro intellexi eosdem illos hostes nihildum de sua in vos
improbitate voluntateq; remisisse, atque aliqua etiam-
num moliri, egi cum Florentinorũ Magistratibus Lau-
rentioq; Medice fratris mei filio mandarent eis equiti-
bus atque militibus, qui Pisis sunt, vt ad vos tuendos de-
fendendosq; contenderent, vobisq; præsto essent, quo tẽ-
pore quoq; loco iussissetis. Quod si vobis erit opus maiori
auxilio, Florentinorũ equites militesq;, quotquot ha-
bent, & nostræ copia omnes ad vos statumq; vestrũ &
dignitatẽ retinendã atq; oppidum conseruandũ & cõ-
firmandũ celeriter traiciuntur. Volo. n. omnes homi-
nes intelligere me pro vestra salute nõ minus, quã pro
meis patria q; mea fortunis, laribus, incolumitate labo-
rare. Quemadmodum cum Federico ipso sum loquutus:
qui vobis reliqua perscribet. Da. 7. Id. Ian. An. 2. Roma.

Heluetijs.

14

EX Ennij Episcopi Verulani & Gori Gherij Lega-
torum meorum literis intellexi, vos in fœdere mecum
quidem prorogando, cum Florentinis autem & cũ mea
gente atq; familia ineundo nonnihil esse suspensos: non
quodd dubium vlli sit, quin, quo ardore animi hoc Impe-
rium Romanosq; Pontifices antehac semper coluistis,
eorũque auspicijs multa egregia præclaraq; facinora
gestistis, eodem quoque esse in posterũ statueritis: nã id
quidem inter omnes iam prope constare significant: sed
quia de ratione capitũ, quæ in fœdere scribendo firmari
oportet, inter vos non conuenit, et multi multa afferũt,
plura immutant, aliqua nec recipiunt quidẽ, eo tardio-

res vos ad rem conficiendam quotidie fieri adscribunt. Qua in re nihil vobis perscribere debeo, quos tã diligo, quam qui maxime, tam coniunctos esse nobiscum puto, vt vestra ipsorũ commoda mihi esse vsui existimem. Puto etiam vos ijs in rebus atque sententijs optimo consilio duci. Illud dico, nostra vtrorũq; maxime interesse, vos in hoc fœdore siue confirmando siue sanciendo non esse lentissimos. Imminet enim nobis omnibus hostis efferus atque perpotens Turca: quem quidem tot prosperrimis successibus atq; victorijs exultantem nisi retuderimus, iam iamq; aderit nostris in iugulis suos gladios cruentaturus, quos modo è necessariorum, quos è propinquorum, quos è fratrum suorum abscisis ceruicibus ac prope patris sui cano corpore atque tremulo eduxit. Nam & magnos comparare illum exercitus & ingentẽ classem ornare atq; instruere ad nos perferunt, qui Byzãtio veniunt: quibus vtrisq; rebus simul vt i nisi cõtra nos plane non potest. Id veritus rem pulcherrimã illam quidem maximeq; salutarem, sed implicatam ac per difficilem & cogito dudum, et paro, vt pacem inter Christianos Reges omnes atque populos conficiam: speroq; Dei Opt. Max. benignitate atq; munere non frustra me laborare: modo vos vni vestram mihi operã nauetis. Id erit, si quã celerrime hac, qua instãt, fœdera sancietis: quibus constitutis maior mihi erit, apud reliquos Reges autoritas, si vobis socijs eos commonefecero, vt pace atque concordia cum suis hostibus in ita ad profectionẽ se in Turcas comparent. Itaq; à vobis quanto maiore studio possum, peto, vt quemadmodum adhuc quidem maximarum rerũ gestarum Romanis Pontificibus autores

exti-

extitistis, ita nunc etiam nobiscum tam exoptata pacis
initium & quasi fundamenta iaciatis: vt reliqua, qua
restant, multo quidem & laudabiliora & magis salu-
taria, aggredi vnà atq; ad exitum perducere possimus.
Sed & hac & alia quae oportet, mei vobis Legati expli-
cabunt. Deum oro, vt qualem nobis mentem erga vos
dedit, talem vobis esse velit erga nos ad ea celeriter cō-
muni consilio constituenda, quibus eius maxime nomen
gloria, cultus, pietas augeatur. Dat. VI. Cal. Februar.
M. D. XV. Anno secundo. De villa Seueriana.

FRANCISCO REGI

Galliae.

15

GRATISSIMAE mihi tuae literae fuerunt: quibus
ostendis assentiri te, vt de Narbonensi Episcopatu, quē
conferre Iulio Cardinali fratri patrueli meo cupiebam,
quae vellem, statuerē: omnesq; causas & rationes, quas
quidem plurimas neque leuissimas colligis, quibus alior-
sum trahere, desiderio meo te adscribis posthabuisse.
Quod tamen ipsum etiam ex Episcopi Tricaricensis Le-
gati mei literis intellexi: qui de tuo propenso, & libera-
li erga me Cardinalē q; ipsum animo ad nos multa per-
scripsit. Ea res praeter quam quod illum tibi magnopere
deuinxit, ita mihi grata atq; optata accidit, vt studiū,
quo tenebamur, vt te, qui quidem plane adolescens ad
omnium amplissimi nobilissimiq; Regni gubernaculum
accessisti, & beneuolentia complecteremur, & autori-
tate nostra confoueremus, non parū medijsfidius auxe-
rit. Itaq; intellecta voluntate tua de fratrum meorū E.
R. Cardinalium sententia eā illi Ecclesiam hodie contra-
bi. Te autē, quod supersit, hertor, eadem animi liberali-
tate

tate cures vt sine vlllo vel impedimento vel mora negotium conficiatur. Eo et officium erga me Cardinalemqꝫ ipsum tuum, & illius erga te studium, & mea sanè charitas augebitur. Dat. 3. Non. Febr. Anno 2. Roma.

ALOISIAE REGIS

Gallorum matri.

16

EX legati mei literis intellexi, quanto studio cum Francisco Rege filio tuo egeris, vt is vellet, vt de Episcopatu Narbonensi, cui præsicere Iulium Medicem, Cardinalem fratrem patruelem meum cupiebam, pro nostra voluntate statueremus. Quare res ita mihi atque illi grata atqꝫ incunda accidit, vt quanquā tu in eo huius Reipublice. qua tibi quidem pro tua pietate charissima debet esse, dignitatem & auctoritatem es tutata, officiumqꝫ praestitisti optima & praestantissima mulieris, plurimum tamen ex eo tibi debere vterque nostrum facile praeferat: eoqꝫ magis, quod Rex non paucis neque vulgari-bus sanè causis, qua in alia ipsum impellebant, desiderium nostrum praeiulit. Quamobrem scire te plane volo, eo te officio & Cardinalem tibi tuoqꝫ filio deuinxisse, & mox in illum beneuolentiam auxisse. Quemadmodum ab eodem Legato meo latius intelliges. Dat. 3. Non. Februa. Anno secundo. Roma.

MATTHAEO CARDINALI

Seduno Heluetio.

17

MOLESTE sanè tulimus Maximilianum Mariā Insubrem Duci haberi in custodia iussisse Ioannem Petrum Moronū ciuem Mediolanensem Federici Cardinalis sancti Angeli procuratorem, ea de causa, vt fructus

Qq mena

monasterij Morimundi, quos is Cardinali debet, quique apud ipsum sunt, ab eo per vim atque iniuriā extorqueantur: eiusque te iussionis autorem fuisse, quem minime quidem decuit, minimeque opus fuit. Eo de genere toto iniuriarū tametsi proxime ad te literas dedimus, quibus te hortabamur, velles inferēdis Cardinali detrimentis modum aliquē aliquando tandem statuere: tamen quia nō solum ea te litera nihil mouerunt, sed post eas multo etiam, quā antea, grauius atque iracundius te gessisti: has ad te alteras dare literas volui, vt te diligētius commonefacerem, meminisses, Federicū & esse Cardinalem, et haberi, nosque id Romanāque Remp. statuisse: neque esse Regem aut pop. Christianum vllum, qui nō ipsum eo nomine appellet. Hac quanti tibi facienda sint, si nescis, cur te fieri Cardinalem appetieris, nō intelligo. Si scis, & magni aestimas istā dignitatem, vide, ne quod tibi amplum putas, in altero te minimi facere, non tamen vllius vitiū redarguat, quā sit tuū. Quod si reliquæ causæ omnes parum apud te quidem valent, tui te ordinis & dignitatis ratio ab eiusmodi consilio reuocare certe debet: ne tuo exemplo quilibet laceffere reliquos etiā Cardinales ordinemque ipsum augustissimū audeat: vnumque vestrum male habendi licentia ad ceteros facile contemnendos emanet. Hæc scripsi impulsus non magis Federici causa, quā amore in te meo mutuaque nostra beneuolētia. Tu si offensionum iracundiāque tuæ finē feceris, & illum frui monasterij sui fructibus & pensionibus passus fueris, profecto et reliquis Cardinalibus tibi que ipse cōsules, et huius Reip. dignitati videbere tuas rationes posthabuisse, & mea mandata non despexisse. Dat. 16. Cal. Mar. Anno 2.

Roma.

MA

Magistratui Parmæ.

18

VENIT istuc meo iussu Iacobus Corregius, ut in ca-
stri Gibelli possessione nobis tradenda curet agatq; meo
nomine, ut res sine armis ex voluntate nostra transiga-
tur. Quamobrem curabis, ut quoad ipse adire ad eos,
quorū interest, tractareq; rem possit, omnia suspendan-
tur, pacatq; sint: eiq; fidem habebis ijs in rebus, quas
ad te meis verbis deferet. Dat. XV. Cal. Mart. Anno 2.
Roma.

IOANNI IORDANO

Vrsino.

19

INTELLIMVS inter Aldobrandinum Archie-
piscopū Nicosiensem & Ludouicum Petilianū Comitē
germanos fratres disceptationem quandam super Fianā
oppido rebusq; alijs magno animorum ardore susceptā
exerceri, timeriq; ab eorum propinquis, ne breui ad a-
cerbissimas contentiones atq; ad arma prosiliant. Qua-
re te hortor, atque abs te, tanquam ab homine Vrsina
gentis facile principe, diligēter peto, cures quamprimū
desq; operam tuā prudentia, ut ea controuersia compo-
niatur. Quod si perficere non poteris, utriq; eorum meo
nomine volo mandes ab altercatione ut abstineant, quo-
ad ipsi te audito statuere, quæ æqua erunt, possimus. Da-
XV. Cal. Martias. Anno secundo. Roma.

LAVRENTIO TYCCIO

cui Florentino.

20

GRATAE nobis tuæ literæ fuerunt, quibus tuam in
nos mirificam obseruantiam veteremq; in familiā no-
stram cultum multo quidem antea nobis & perspectum
& cognitum facile ostendisti. Itaq; volo existimes, nos

in tua commoda esse propensos, teq³, si Romam veneris, libenter visuros: ita tamen, dum id itineris senectutis esse valetudinisq³, tua incommodo ne suscipias. Dat. prid. Cal. Mart. Anno secundo. Roma.

MAXIMILIANO ROMANO-

rum Imperatori designato.

21

SI vnquam aliâs vlla in re concupiuius impetrare abs te optatos exitus nostræ petitionis, hac vna est, in qua id per te consequi maxime omnium expeto, vt Marco Cornelio Cardinali aliquando remittas atque restituas fructus Ecclesie Veronensis cui præest, reliquorumq³, sacerdotiorum, quæ is in tua ditione habet. Quæ de re non hortor te solum, sed etiam magnopere & vehementer rogo ijs de causis, de quibus ad Thomam Episcopum Feltrinorum des. legatum meum scripsi: cuius ad sermonem, ne bis in scribendo sim longior, te reijcio. His autem literis te rogo, ita mihi respondeas, vt singulas petitionis meæ causas & amanter & prudenter te appareat considerauisse. Dat. 8. Id. Martias. M. D. XV. Anno secundo. Roma.

THOMAE EPISCOPO

Feltrinorum Legato.

22

EA quæ ad Maximilianum Imper. desig. de fructibus Ecclesie Veronensis & reliquorum sacerdotiorum M. Cornelio Cardinali restituendis breuiter scripsi, ab exemplo mearum ad illum literarum, quas ad te mitto, quod erit tum his literis cognosces. Quoniã autem magnopere mihi est cordi, neq³ solũ cordi est, sed mea etiã interest, vt res ad optatum exitũ perducatur, volo captes obseruesq³, tempus id, quo tempore nihil te ab eo non impe-

impetraturū possis considerare, literas meas ei reddendi:
hisq; redditis petitionem meam tuis tū verbis tum pre-
cibus quantū maxime poteris, accuratè atque appositè
subsequare, cuius tui cū illo sermonis illud sit caput: me
pro Cardinali Cornelio nō tātōpere laborare solummo-
do, quia Cardinalis sit: quanquā id quidē & me mouet
maxime, & illius etiam animum mouere et flectere sa-
nè debet: vel quia fratrum meorum E. R. Cardinalium
vniuersus senatus precibus omnibus, ex postulationibus,
contentionibus prope quotidie hac de re nos appellet, at-
que vt eius ordinis iura auctoritatēq; ne prodamus, à
nobis non tam petat, quā etiā exigat: quibus quidem
tā assidue tantoq; opere aqua præsertim petentibus de-
esse nullo pacto possum: sed etiam propterea, quod & ip-
se quidem de me optime amplissimēq; promeritus, &
quod ei maiorem huius mei Pontificatus partem sanè de-
heo. Ea enim is in nobis Reip. præficiendis egit cura stu-
dio diligētia labore animiq; sui motibus omnibus & sen-
sibus, vt illi multo maximā eius rei gratiam habeamus.
Quanquam quidem, vt pergā ad reliqua, diu est, quod
cum illo, tanquam cum fratre optimo atq; iucundissimo
vivo omniq; fraterna germanaq; beneuolentiæ studia
atq; officia inter nos exercētur. Nunc autem ad priorē
veteremq; nostram necessitudinē amoremq; mutuū ad-
ditis ingentibus illius meritis ita est mihi animoq; meo
gratus, nihil vt addi posse ad nostram coniunctionem vi-
deatur. Itaq; meo à latere ferè nunquā discedit. Quo-
niā autem ademptis ei distractisq; his, quos dixi, fructi-
bus, alere sese ipse non potest, alio eum ego atq; sustento
impensa mea. Quod et si libentissime facio est tamen mi-

hi, vt verissimè dicam, permolesta per q² grauis eius im-
 pense causa: praesertim cū eius rei is sit autor, à quo sub-
 leuari me in rebus etiam dubie iustis pro meo in illum
 singulari amore at q² beneuolentia aquisimum profecto
 esset, nedum in hac, in qua certe ipsa rectus mos, consue-
 tudo, ius omne, aq²uitas omnis, pudor ipse, pietas q² inest,
 debeam. Neq² enim obesse Cardinali debet, quod Vene-
 tus natione sit: cum ipse ita moderate omnibus in rebus
 quae ad Maximilianū pertineant, ita temperate, ita non
 ambitiose semper se gesserit, vt indignissimum planè sit,
 cum ipse in illum nihil omnino agat, nihil cogitet, debitū
 etiam illi cultum & obseruantia pra se ferat: sua se vi-
 ta atque victus alimenta at q² praesidia, quoniam ab illo
 intercipientur, desiderare. Quam indignitatem reliqui
 Cardinales omnes periniquo animo cum ferant, ea de
 re ita apud me cōtendunt, vt dixi prope quotidie, vt qui
 libet suam se causam agere in Cardinalis causa, quilibet
 pro seipso laborare atque niti existimet. Timent enim
 & verentur maxime, sibi quoq² aliquando idem ne ac-
 cidat alijs ab Regibus, si Cardinalis Cornelij dignitas cū
 Reip. dignitate coniuncta per nos hac in re atque causa
 negligatur. Itaq² quod initio dixeram, non tam moue-
 ri me ceterorū Cardinalium causa & precibus ad fru-
 ctus Cornelianos procurandos: nunc mehercule, vt iam
 liberius dicam quod sentio non moueri modo fateor ea
 me re & concuti, sed planè etiam conuelli magnopere q²
 perturbari. Neq² enim suslinere illos iam, meq² ab eorū
 & iustis & quotidianis querelis tueri possim. His omni-
 bus de causis petere te ab illo meis verbis atque precibus
 volo, vt me quidem hac animi sollicitudine, his impensis

at q²

atque onere, se verò ea calumnia, atq; etiam hac molestia liberet: neque enim ab incepto possum, nisi re impetrata desistere. Itaq; remittat aliquando tandem Cardinali Cornelio eos, de quibus loquimur, fructus, vel iustitia, quā vnus omnium maxime atque sanctissima omni tempore coluit, vel sacri Cardinalium ordinis & collegij, quod apud omnes homines augustissimum semper fuit, vel huius Reip. dignitatis: quam tueri ipse in primis debet, vel mea demum causa, qui illam tantopere amo tantiq; facio, vel simul omniū. Atque mea quidem certe causa non ea modo, quo illi atque alijs Regibus commendare saepe multos soleo, sed quo agerē, si pro Iuliano Medice fratre germano meo, vel etiam si pro ipso me, quam & pro me ago, hac in re atque causa laborarē. Id si fecerit, confirmabit ille quidem in omnium hominum mentibus atque sermonibus existimationem, quam alit, liberalissimi Regis atq; iustissimi. De Cardinali Cornelio aut̃ deq; ceteris Cardinalibus optime morebitur. Ego verò id eo loci apud meum animū atq; memoria sensum reponam, vt eius in rebus & postulationibus, si quid acciderit, in quo me quoque ipse velit sibi petenti satisfacere, vt sunt omniū rerum vices, facile appareat, mihi se in eo fecisse gratissimū. Ex his verbis potes facile prospicere quantum prudentia, studij, diligentia sit abs te adhibendum, vt res ex sententia transigatur. Itaq; nō erimus longiores. Vnū addam, quanti me facis, tantundem hoc in negotio & procurando & conficiendo tute labora. Dat. 8. Id. Mart. M. D. XV. Anno. 2. Roma.

VLADISLAO REGI

Pannoniæ.

23

Lq 4

CVM

CV M & Reip. Christiana dignitas, & tui regni atque populorū salus in eo mihi versari hoc tempore maxime videretur, si certa in Illyrico atque Croacia municipia Turcis exposita loci natura satis ad resistendum idonea, etiam hominum opibus atq; praesidijs munirentur: Vincentio Ototiensium Episcopo & Iulio Cortonēsi procuratoribus meis mandaui, vt eam curam susciperent, eoq; se conferrent, quā celerrime fieri posset. Eis magnum tritici numerum, magnū hordei illò comportandum iussi dari, puluerisq; perfecti ad tormenta impellenda libras mille: sulphuris prater ea libras decies mille: salis nitri quinquies mille: quibus ex rebus puluis, si esset opus, confici posset. Tormenta etiam varij generis aliquot. Atque ijs quidem rebus omnibus curata pecunia adieci nummos aureos vices centum: qua pecunia quibusq; rebus ex Episcopi Vespriemensium Croacia praefecti sententia & consilio vterentur. Audio autem opera pretium esse maxime quidem certe vt moenia eorum oppidorum reficiantur, & vallo ac fossa praeingantur, sed si quid esset aliud, quod vel edificari, vel muniri oporteret, id eos ita iussi procurare, si Episcopus Vespriemensem mandauisset. Te autem magnopere hortor, vt quā ad te pecuniam ex Reipub. propediem ex arario sum missurus, qua quidem erit ad vices mille aureorū nummūm, eius multo maximam insumas partem illis in locis & municipijs, & firmandis, & communiendis. Hac cum me videas pro tua tuorumq; incolumitate laborare, quid te ipsum facere Vladislav oporteat, facile iudicabis. Itaque non ero longior. Dat. 3. Cal. April. M. D. XV. Anno tertio. Roma.

EPISCOPO VESPRIMENSIVM

Præfecto Croatiae.

24

DEDI ad Vladislavum Pannoniae Regem Vincentio Ototiensium Episcopo & Ghilio Cortoniensi interpretibus & procuratoribus meis literas: quos ad certa Illyrici Croatiaeq; municipia, ut scis, & firmanda, & munienda ad Turcarum impetus sustinendos mitto petente maxime, & monente te: quibus ex literis quantos labores, quantas etiam impensas susceperim, facile intelliges. Nunc te hortor, ut quando in eam procuratorem atque curam te autore sum ingressus, cuius prudentia atque in rebus gerendis experientia plurimum tribuo: quibuscunq; in rebus esse illis usus poterit virtus auctoritasq; tua, eos iuves, Ghiliumq; praesertim, cui madaui, tuo ut consilio muniendis illis oppidis, & bello, si forte in aliquem tumultum eorum aduentus incideret, administrando & ducendo uteretur. Id facere te oportet cum Reipu. Christiana, cuius res agitur, causa, tum tua, quo impulsore usus sum, tum verò etiam mea: qui te secundum Regem tanti facio, ut tibi tota ista in regione latissima atque populosissima praeferam neminem. Dat. 3. Cal. April. M. D. XV. Anno tertio. Roma.

LEONARDO LAVREDANO

Venetiarum Principi.

25

MITTO ad certa Illyrici Croatiaeq; oppida, Turcarum incursionibus exposita, Vincentium Episcopum Ototiensium & Ghilium Cortonensem procuratores meos cum commeatu armamentisq; ut ea bene atque celeriter muniant: usq; madaui, ut omnem diligentiam adhiberent, ne quid illis in locis detrimenti Res Christiana-

na pub. acciperet. Quare te hortor, mandes quamprimum tuis magistratibus, quos in Illyrico habes, vt quibuscunque in rebus ferre opem meis procuratoribus poterunt, vt mandata nostra facilius atque celerius conficiant, illis præsto sint: maximeq; in calce reliquaq; materia atque operis ad fossas, vallum, mœnia vel sarcieda, vel exedificanda subministrandis: recipiantq; ac seruent ea omnia fideliter, quæ à nobis secum ferent, quoad illa ulterius deportari opus sit. Demum ita se gerant, vt ea cura, quam ad communem Christi populorum vtilitatem suscipio, quantum maxime potest, proficiat. Dat. 3. Cal. April. M. D. XV. Anno tertio. Roma.

EMERICO PANNONIAE

Palatino Principi.

26

LEGI tuas literas, quibus & tuam in nos mirificam voluntatem & in Romanam Remp. singularem cultum pietatemq; præ te feres. Quarum duarum rerum animiq; tui propensionum & inductionum quæ ad me pertinet, valde mihi grata est, quæ ad Remp. ea etiam sancta & vehementer probata & mihi esse debet & bonis omnibus. Itaque de vtraq; valde te amo. Quod vt etiã apertius scire possis, exemplum literarum, quas ad Vladislaum Regem dedi, tibi describi iussi, tum vt quam curam pro Christianæ Reipub. dignitate tuenda suscepi, ea ne te lateret: tum etiam vt te hortarer, vt communem causam apud Regem ipsum iuuares autoritate tua & gratia, vt quas impensas fecissem pro istius regni maxime salute atque gloria, ea quam fructuosissima essent futura. Ceterum quod ad Episcopatum Varadiensem attinet, cui postulas vt filium tuum velim præficere, est illius
quidem

quidem certe atas ad id ponderis sustinendum imbecillior: sed quia te, vt dixi, valde amo, dabo operam, vt quanto aptius & citius pro nostra dignitate fieri possit, satis appareat tuam apud me auctoritatem plurimum valuisse. Dat. Cal. April. M. D. XV. Anno tertio. Roma.

Nicolao Leoniceno.

27

LITTERAS tuas quibus literis egregiam & singularem tuam in me obseruantiam doctè sanè luculenterq; ostendisti, legi libentissime: tuumq; studium mihi operam nauandi, si qua in re vti vellem, in illis agnoui: quod mihi gratissimum fuit. Te verò & amaui profecto omni tempore, multiplicemq; & excellentem in optimarum artium studijs doctrinam tuam magni, vt debui, feci: & nunc etiam Petri Bembi scribe à Latinis mei, qui te mirificè diligit, & Ferraria in Prodominatu patris sui admodum adolescens cū esset, de tuo pleno fonte hausisse se præcepta philosophiæ dicitat, riuulumq; duxisse, apud me habito multa cum tua laude sermone facile adducor, vt ad priorem meam in te beneuolentiā magno addito cumulo vnice te cōplectar & prosequar: cupidusq; sinu ornandi tui meritis & præmijs & laudibus. Id te scire volui, vt si quid esset, in quo tibi & vsui & ornamento esse posset amor erga te meus, consideres te à me omnia, quæ velles, posse consequi. Dat. 4. Non. April. Anno tertio. Roma.

LEONARDO LAVREDANO

Venetiarum Principi.

28

EGREGIA singularisq; probitas, prudentia, virtus, atque in agendis tractandisq; rebus istius Reipub.
summa

summa cum lenitate coniuncta tum grauitas tum etiā diligentia Petri Landi Legati tui eum nobis magnopere commendarunt. Itaq; & hoc tempore toto, quo eum apud me esse voluisti, magno amore hominem sum complexus, & vidi atque audiui vsquequaq; libentissime: et nunc ad te atque ad patriam iussu tuo reuertentem his prosequi literis volui, tanquā testibus & nostrā in illum voluntatis, & muneris non solum prudenter, sed etiam praestanti modestia, integritate, studio acti ab illo cum magna tua semper tuaq; Reip. & Senatus istius laude ac dignitate. Quae quidem res officijq; perfunctio chariorem tibi illum reddere sanè debet. Ipsum autem redire nunc ad te eo nobis minus molestum est, quo aliquot iam menses sunt, cū is Roma incommoda valetudine utitur. Sperat autem se, cum istuc atque ad suos redierit, facile conualiturum. Quae spes ne eum fallat, DEVM Opt. Max. precor. Tibi verò illum Senatuq; isti, non quod existimem ciuem vestrum optimum hominem & prudentem virum deq; vobis optime meritum apud vos commendatione mea egere, sed vt mihi ipse charitatiq; in illum mea morem geram, summopere atque diligentissime me commendo. Dat. 8. Id April. Anno tertio. Roma.

MAXIMILIANO MARIAE

Mediolanensium Duci.

29

ALTERIS meis literis hortatus te sum vt Paula Gonzaga id, quod ratione dotis ei debetur, dari iube-
res vel aequitatis causa, cuius esse minister in primis debes, vel mea, qui eius fratrem clarum & praestantem virum vnice diligo: vt se sustentare, & celibatum, in quo aliquot iam annos est, ducere honestius atque commo-
dius

dius possit. Quod quidem te facturum vel propterea cōfidebam, quod nihil esse prope intelligebam favore atq; tutela maximorum hominum & virorū principum dignius viduis mulieribus, quibus sanè omnium gentium leges, mores, consuetudines plurimum tribuunt. Verum cum prater spem expectationemq; nostram nihil abs te curatum, nihil mandatum ea in re adhuc quidem sit, credo, quod occupationes magna tua cogitationem tibi illam eripuerint: non enim arbitror nihil te tribuere meis commendationibus voluisse: iterum te & hortor, & planè rogo, velis dare operam, vt mulieri satisfiat. Omnino eam remita tibi commendo, vt etiam cupiam te in ea procuranda diligentiorē esse, quā in causa ipsa postulat: vt ostendas me à te pluris, quā cetera, fieri. Dat. 12. Cal. Maias. Anno. 3. Roma.

PHILIPPO GVALTEROTTO

ciui Florentino.

30

ALLATVM ad nos est te apud animum tuū proposuisse, vnicam filiam tuam Raphaëli Medici gentili meo nuptui velle tradere: quod mihi admodum incundum fuit. Nam & Rafaëlem ipsum valde diligo, & te facio, vti debeo, plurimi. Quare tuo hac voluntas mihi vehementer probatur: scireq; te volo, nuptias istas se confeceris, cum me nuntium libentissime auditurum. Deum autem in primis precor, vt qua tibi & filia domuiq; tuae, atque illi nobisq; omnibus vsui & voluptati futura sint, ea per te hoc in negotio transigantur. Dat. Cal. Maijs. Anno tertio. Roma.

LATINO IUVENALI

familiari meo.

31

CV M

CV M magnopere cupiam, vt simultates ac belli se-
mina inter Maximilianum Mariam Mediolanensem
Ducem & Octavianū Ducem Genuensem populūq;
Heluetiorum exorta iam atque iactata pro communi
bono atque ipsarum partiū statu per me adiutore Do-
mino quā celerrime sopiantur & aboleantur: mando
tibi de cuius fide atq; in agendis rebus experientia ma-
gnopere confido, vt magnis itineribus ad Maximilianū
quidem primum, deinde ad Heluetiorum eos pagos, qui
militiam in Italia faciunt, demum Genuam te conse-
ras: omneq; tuum studium diligentiam, curam, laborē
adhibeas, vt pacem inter illos omnes firmare atque con-
ficere possis. Pro qua consicienda rebusq; constituendis
siquid meis te verbis promittere atque recipere siue v-
ni, siue alteri eorum, siue planē omnibus oportebit: id
omne, quod promiseris quodq; receperis, ratum & gra-
tum me habiturum, fidemq; tuam in eo præstaturū, om-
niāq; illa, qua tu egeris, probaturū, hoc meo chirogra-
pho polliceor & spondeo. Da. 15. Cal. Iu. Anno 3. Roma.

OCTAVIANO GENVENSIVM

Duci & Federico Archiepiscopo Saler-
nitanorum fratribus.

32

QV A de causa Latinum Iuvenalem familiarem
meum adolescentem probitate atque virtutibus pradi-
tum ad vos miserim, ipse vobis exponet. Quoniā autem
simultates odiq; semina, qua inter vos & Ducem Me-
diolanensem populūq; Heluetiorum nimis iam &
diu & acriter iactantur, sine graui & vestra vrbis &
totius Italia incommodo vlterius progredi exerceriq;
non possunt: pro mea in vos charitate etiā atque etiani

à vrbis

à vobis peto, animum & mentem inducat is ad ea statu-
enda, quæ mihi, qui propterea quod absum ab earum re-
rum culpa longius, iudicare recte possum, fore vobis &
vsi & dignitati & certe otio magnopere videntur.
Non enim, vt bene vobis atque feliciter sit minus labo-
ro, quàm si vel pro patria ipsa meâ, vel hoc pro Imperio
Romanâq; repub. eam curam suscepissem. Dat. XV. Cal.
Iun. Anno tertio. Roma.

RAIMVNDÔ CARDONAE

Proregi Neapolis.

33

NON vni ad me nuntij, rumor etiam ipse attulit,
esse quosdam, qui in huius Reip. ditione inuadere armis
cogitent, Parmamq; atque Placentiam in primis. Quod
et si non queo credere: recta enim sentio de omnibus: ta-
men ne prorsus imparati offendamur, si quispiam erit,
qui male cogitata exequi cupiat, peto à te, cuius in me
remq; hanc publicam pietatem animiq; magnitudinē,
meq; paucis & grauissimis in rebus sum expertus, velis
Iacobo Gambaro, quem ea de causa ad te venire iussi,
eam militum tuorum manum tradere ad ea municipia
inuenienda, quam is à te requiret. Pluribus verbis non v-
tar cum propterea, quod te eius sceleris, quod paratur,
si modo quisquam est, qui tantum ad scelus se compa-
ret, ipsa indignitate permotum excitari per tete atque
ardere animo puto: tum quia tota de re Bernardus Bi-
biena Cardinalis meo iussu literas ad te dabat, cum hac
scriberem. Dat. 6. Cal. Iun. Anno tertio. Roma.

FABRITIO MAGNO

Rhodi Magistro.

34

CLEMENS Rhodius metropolitæ tum tuæ, tum
verò

verò maxime Ioannis Lascaris familiaris mei docti ho-
minis commendatione & gratus mihi est & probatus
sic, ut eum item tibi ipse eiusq; res commendare facile
statuerim. Nota tibi esse arbitror, quæ à me proxime
concessa & condonata illi fuerunt. Ea ne ipsi abrogari
vllis ab hominibus, neue iniuriam fieri permittas, abs te
peto. Dat. 3. Cal. Iun. Anno tertio. Roma.

OCTAVIANO GENVENSIUM

Duci & Federico Archiepiscopo Salernitanorum fratribus.

35

QUONIAM quod tantopere cupiebā, de pace ni-
hil esse adhuc confectum & constitutum video: has ad
vos literas dedi, ne ea de causæ rem posse confici diffide-
retis, aliāq; cogitanda vobis esse atq; statuenda existi-
maretis. Nam & ea in re nihil prætermittam vel studiū
vel diligentia vel laboris, tentaboq; omnia & moliar:
in quo nihil dum etiam eiusmodi video, prorsus ut sit de-
sperandum: & si erit is meus inanis atq; irritus de pace
labor & cogitatio, tum illud aggrediar, quod quidem
mihi præripere vestrorum inimicorū nullus poterit: atq;
aa vos oppidumq; & dignitatem vestram tuendam &
conseruandam omnes meas, omnes Florentinorum co-
pias, quæ quidem sunt paratissimæ, statim mittā: osten-
damq; omnibus hominibus, quanti vos vnos faciā, quiq;
sit meus erga vos sensus, studium, beneuolentia. Quare
volo bono vos atq; magno animo esse. Quin etiam ut co-
gitationes meas omnes clarius atq; planius intelligere-
tis, Ioannem Vespuccium familiarem meum magnis ad
vos itineribus his cum literis venire iussi, qui mentē vo-
bis nostram explicaret. Dat. 3. Cal. Iun. Anno 3. Roma.

IOAN

IOANNI BLASSIAE TRIRE-

MIVM PRAEFECTO.

36

MANDAVI Ioanni Vespuccio, quem ad octavianum Genversum Ducem & Federicum archiepiscopum Salernitanorum fratres misi, ut ad te sermonem meum, quem cum eo habui, perferret, is de rebus, quas te scire magnopere cupio. Cuius illud caput est, ut hanc ad oram littorag, nostra à piratis & purganda & mutianda cum is nostris triribus, quas nunc quidem tecum habes, Centuncellas navigatione non intermissa te conferas. Datum tertio Calend. Iun. Anno tertio. Roma.

SIGISMUNDO TROTTO

FERRARIENSI.

37

QUAM ad me scriptam probe sane & multa musica artis suavitatem atque dulcedinem aspersam cantilenam attulit Vincentius Mutinensis missam abs te mihi, ea me reliquosq, quos habeo multos, ut scis, ea in re doctos homines oblectavit tenuitq, plurimum. Mirifice enim placuit, visq, est eiusmodi, ut nihil ei ad aurium delectationem animosq, permulcendos prope deesset, ita vocum inflectione, varietate, concinnitate, artificio deniq, omni & temperamento continebatur. Quam in re & tuam in me observantiam & optimum is in rebus sensum & iudicium animi ingenijq, tui profecto agnovi. Itaq, ista tua diligentia cum de veteribus tuis missis ad me scriptis cantibus, tum de hoc nouo, mihi valde grata est. Quod te scire volui, ut consideres, me de te & remunerando et ornando cogitare. Dat. v. id. Iun. M. D. XV. Anno tertio. Roma.

Rr

FLO.

VALDE mihi opus est eis libris, quos Angelus Politanus à perueterebus illis qui à vobis publice afferuantur, Iustinianarum legum & degestorum libris, quos Pandectas vocant, sua ipse manu descripsit. Qui quoniam apud vos sunt, vos hortor, vt eos Laurentio Medici fratris mei filio mihi mittendos dari iubeatis. Eos vobis, cum vsus fuero, statim remittam. Dat. x v. Cal. Iul. Anno tertio. Roma.

LAVRENTIO MEDICI. 39

PROFICISCENTI Florentiam Francisco saluato deesse nolui, quominus scriberem ad te, dares operam vt à suis creditoribus insigni aliqua molestia ne afficeretur: maximeq; eam ob causam, ne quid ex suis fortunis rebusq; ijs, quæ moueri solo nequeunt, siue insulam, siue fundum, vendere atque distrabere cogeretur. Itaq; erit mihi sane quàm gratum, valde enim hominem diligo, vt facilitate prudentiaq; tua eius cum creditoribus ita agas, vt malum malo ne addant, contentiq; sint vt eius rei modus aliquis & ratio amicè ineatur: quemadmodum tibi esse aptius expeditusq; videbitur. Quod quidem creditores velle ipsi cum propterea debebunt, quod est Franciscus plane soluendo, tum etiam quòd ipse adiumento illi esse, eamq; solutionem mea pecunia explicatiorem facere cogito. Dat. x i i. Cal. Iul. Anno tertio. Roma.

LVDOVICO AREOSTO

FERRARIENSI.

40

SINGVLARIS tua perq; vetus erga me familiamq; meam beneuolentia, egregiaq; bonarum artium & lite-

& literarum doctrina atq; in studijs initioribus præsertim poëtices elegans ac præclarum ingenium iure prope suo exposcere videntur, ut quæ tibi vsui futura sunt, iusta præsertim et honesta petenti, ea tibi à me nō libenter modo, sed etiam liberaliter concedantur. Quare cum libros vernaculo sermone et carmine de gestis errantium, quos appellant, equi tum ludicro more, longo tamen studio & multorum annorum cura vigilijsq; conseceris, eosq; conductis abs te impressoribus edere in manus hominum statueris, ut ea tua diligentia probiores exeant, tum ut si quis fructus ea ex re percipi potest, is ad te potius, qui conficiendi poëmatis laborem & perpeffus, quàm ad alienos deferatur: edico et mando ne quis te viuente eos tuos libros imprimere, aut impressos venundare, vllis in locis audeat sine tuo iussu & voluntate. Qui contra mandatum hoc nostrum fecerit, admiserit, is vniuersæ Dei Ecclesiæ toto orbe terrarum expers esto. Dat. XII. Cal. Iul.

Anno tertio. Roma.

FRANCISCO MARIAE VR-
BINATIVM DVCI. 41

IOANNI Mariæ Mutinensi internuntio tuo mandavi, ageret tecum, tuas ut copias esse paratas ad profectiōē iuberet, efficeretq; ut essent quamoptime quamq; celerrime instructæ. Eumq; ad te venire iussi tum hac de causa, tum ut te de meo beneuolo in te paternoq; animo et voluntate coram certiore faceret. Quare te hortor, ut et charitatem erga te meam & hominū de te spem q̄ excitasti, fide cura diligentiaq; tua in Reip. negotijs administradis mandatisq; meis explicandis & consiciendis hac in iuuenili tua surgentiq; adhuc atate atque florenti

non confirmes modo, sed etiam augeas. Decimo Calen.
Iul. Anno tertio. Roma.

ANTONIO SANCTAE

CRVCIS.

42

CVM de tua in bellicis rebus virtute & fide magnopere posse me confidere existinem, vt libentius cum res exigat, mihi praeſto sis, ornatioꝝq; te, quo eris iussus, conferas: sexcentorum nummum aureorum pensionem in annos singulos stipendij nomine tibi vt dent ararij Quaestoribus mando: ita quidem, vt quarto quoq; mense tibi vel tuis procuratoribus eius summae tertiam partem persoluant. Datum Decimo Calend. Iul. Anno tertio. Roma.

POPVLONIAE DOMINO. 43

ET tuam fortitudinem bellis exercendis, & vigilantiam atque solertiam administrandis, & fidem animiq; tui sensum vel ardorem potius nobis & colendis & obseruandis plurimi sane facio. Id clarius atque apertius intelligas, atque etiam vt mihi maiori esse vsui, cum opus erit, possis, ad quinquies mille nummorum aureorum pensionem annis tibi singulis ab ararij Quaestoribus iubeo dari. Tu vero ita te geres, vt facile ostendas te magnam curam exercere, vt & sanguinis propinquitati, qua nobiscum es coniunctus, & tuae dignitati, & expectationi nostrae maxime satisfacias. Dat. XII. Calen. Iul. Anno tertio. Roma.

BERNARDO BIBIENAE

CARDINALI.

44

CVM omnium, quas in Pontificatu curas gerimus, ea non postrema sit, vt Mariae semper virginis Dominiq; nostri

nostri matris Lauretana phanum augustissimum, quod magnis sumptibus atque impensa multos iam annos à Romanis Pontificibus construitur, qua maxime conuenit diligentia & studio conficiatur, eiusq; phani prouentus probe custodiantur, reliquaq; omnia, quæ ad ipsius Virginis matris cultum lociq; religionem non solum retinendam, sed longe etiam, si fieri possit, ad augendam atque amplificandam pertinent, recte administrantur, ipsius te Lauretani templi, ædium, domus, loci, prouentuum omnis generis, eiusq; templi adificationis, cultus, curationis, ministrorum, operumq; omnium procuratorem facio. De tua enim in Diuam pietate, in rem Romanam studio, in me autem, cui quidem familiæq; meæ omnia penè vsque à puero summa cum integritatis & fidei tum verè curæ atque diligentia egregia & præclara officia præstitisti, peruertere obseruantia voluntateq; admonitus, nihil est rerum omnium, quod tibi recte mandari crediq; posse non existimem. Itaq; tibi in eo procurationis munere obeundo eandem potestatem idemq; ius largior in teq; transfero agendi omnia, mandandi, statuendi, quæ potestas quodq; ius mihi, idem si agerem, mandarem, statuerem, profecto esset. Quare tuum erit, qui virtute atq; ingenio sic abundas, nemo tibi in vtrisque ut præferatur, in singulis æquentur pauci, eum magistratum ita gerere, ut & phanum illud apud omnes homines plus in dies venerationis & celebritatis acquirat, & mihi extet fructus laboris & industria tua. Dat. Calen. Iul. M. D. XV. Anno tertio. Roma.

LEONARDO LAVREDANO

VENETIARVM PRINCIPI. 45

Rr 3

CVM

CUM existimarem propter ea, quæ tibi fœdera cum Turcarum Rege sunt, non posse te aperte quicquam atq; palam contra illos moliri: eorum autem latrocinij & incursumibus, quas creberrimus faciunt, per me ipse ire obuiam, oppositaq; illis loca nostra communire atque defendere cuperem: statui triremes aliquot, quæ Anconi fabricatæ sunt, deducere et ornare eam ob causam. Quare abs te peto, ut tormenta bellica, cæteraq; armamenta, quæ ad naues eas instruendas satis sint, mihi commodas. Ea de re Augustinum Beatianum familiarem meum & ciuem tuum probum ipsum virum & ingenio doctrinaq; præstantem ad te mitto: qui tibi mentem meam latius explicabit. Cui etiam mandavi, ut certos Græcorum libros, quibus egeo, Venetijs perquireret. Lain re si illum iuueris, erit mihi gratum. Dat. tertio Non. Iulias. Anno tertio. Roma.

RAFAELO PETRUTIO EPL
SCOPO GROSSETANORVM
ROMANÆ ARCIS

Præfecto.

46

UT amoris erga te mei atque beneuolentia, & eius cura, quam in Romana arce custodienda mihi impendis fructum aliquem iam nunc percipias: Carrantianam domum meam cum hortis, quæ ad Portam Vaticanam egressis urbem prima omnium sese ostentat, tibi dono do, trado: eamq; domum cum hortis tuam esse volo, ita tamen, ut hæredes tuos ne sequatur. Dat. XIII. Cal. Aug. Anno tertio. Roma.

RAIMUNDO CARDONAE
PROREGI NEAPOLIS.

47

DEDI

DEDI ad M. Antonium Columnnam meum Praefectum equitum literas, quibus ei mando, ut cum suis equitibus centum & quinquaginta tot enim sunt, Veronam se quam celerissime conferat. Quamobrem te hortor, ut eos equites, qui Verona sunt, quorum praefecturas Mutius Columnna & Troilus Sabellus gerunt, proficisci Parmam atq; Placentiam iubeas per Mantuanum agrum, aut qua securius posse eos iter facere intelliges: sed ita ut omnem profectionis opportunitatem in celeritate positam existiment. Dat. VII. Idib. August. M. D. XV. Anno tertio. Roma.

FRANCISCO GALLO.

RVM REGI.

48

GVISIAE Dominum consiliarium tuum prudentem sane hominem & grauem ac eloquentem virum, ad nos cum mandatis abs te missum libenter vidimus horas aliquot, cui ad te redire festinanti bonum reditum sum precatus. Eorum, quae me rogas, quantam tibi partem concesserim, ab ipso intelliges. Equidem omni tempore paternam tui curam & rationem habui: sumq; posthac honesta praesertim postulantis & quibus Reip. dignitas coniuncta sit, quae quidem mihi mea vita est charior, sic habiturus, ut facile cognosci possit, nullius apud me hominis auctoritatem plus valere, quam tuam. Datum VII. Id. Aug. Anno tertio. Roma.

FRANCISCO MARIAE METAVRENSIVM DVCI.

TAVRENSIVM DVCI.

49

ET si in dubium mihi non venit pro tua in me voluntate animiq; tui magnitudine, quin omnem sis celeritatem adhibiturus, ut quemadmodum tibi mandavi.

Rr. 4

Inter-

Intermittiturq; tuis te facturum mihi recepit, cum tua manu quam primum Placentiam te conferas: tamen magnitudo rei facit, ut etiam atq; etiam te de eo et monendum & hortandum putem. Itaque summopere tibi sum auctor, ut quamvis maxime potes itineribus eo te conferas. Nam cum maximi quidem interest te cum tuis copijs ibi praesto esse: tum vero in tua tuorumq; celeritate totius rei pondus atque summam esse positam debes existimare. Quare maiorem in modum contendendum tibi est, ut de aduentu illuc tuo quemadmodum quidem res postulat, quamprimum certior fieri possim. Datum IIII.

Id. Aug. Anno tertio. Roma.

PROLEGATO VMBRIAE. 50

R V M O R est, ex tua prouincia multos quotidie proficisci, ut cum exteris Regulis militiam faciant. Quo cum nihil esse posui indignius: pertinet enim ad maiestatem huius imperij, suos homines atq; milites sibi potius, quam alienis nationibus vsui esse, mando tibi, eam profectiorem prohibeas studio diligentiaq; tua: edicasq; ne quispiam ad militiam exercendam alio se conferat. Qui secus fecerit, ei laesa maiestatis poena esto. Quod si erunt posthac in tua prouincia, qui abitum parent, dabis operam ut capiantur & puniantur. Dat. XVII. Cal. Sept. Anno tertio. Roma.

RAPHAELO VRBI-

NATI.

51

CUM ad Principis Apostolorum Phanum Romanum exadificandum maxime interfit, ut lapidum mar-morisq; copia, qua abundare nos oportet, domi potius habeatur, quam peregre aduehatur: exploratum autem mihi

mibi sit magnam eius rei facultatem Urbis ruinas suppeditare, effodiq; passim omnis generis saxa serè ab omnibus, qui Roma, quiq; etiam prope Romam edificare aliquid vel omnino terram vertere parumper moliantur. Te, quo magistro eius adificationis utor, marmorum & lapidum omnium: qui Roma, quiq; extra Romam denum millium passuum spatio posthac eruentur, praefectum facio ea de causa, ut quæ ad eius phani adificationem idonea erunt, mibi emas. Quare mando omnibus hominibus mediocribus summis infimis, quæ posthac marmora quæq; saxa omnis generis intra eum, quem dixi, loci spatium eruent, effodient, ut te earum rerum praefectum de singulis erutis effossisue quamprimum certior rem faciant. Id qui triduo non fecerit, ei à centum usq; ad tercentum nummum aureorum quæ tibi videbitur multa esto. Præterea quoniam certior sum factus multum antiqui marmoris & saxi literis monumentisq; incisi, quæ quidem sæpe monumenta notam aliquam egregiam præ se ferunt, quæq; seruari operapretium esset ad cultum literarum Romaniq; sermonis elegantiam excolendam, à fabris marmorarijs eo pro materia utentibus temere secari ita, ut inscriptiones aboleantur: mando omnibus, qui cadendi marmoris artem Roma exercent, ut sine tuo iussu aut permissu lapidem vllum inscripant, cadere secarèue ne audeant, eadem illi multa adhibita, qui secus atq; in eo fecerit. Dat. VI. Calend. Septemb. Anno tertio. Roma.

FERDINANDO HISPANIAE REGI.

52

EXCVSATIONEM, quam affers, cur Episcopus

Rr 5

Malacti-

Malacitanus venire ad me hoc tempore non possit, libenter accipio. Estq; id, quod scribis, verum. Nam si quo ei tempore per literas mandavi, vt Romam se conferret scire potuissem te illi munus aliquod mandauisse, ipsumq; in Regni tui tractandis administrandisq; rebus occupatum versari, eiusmodi ad eum literas profecto non dedissem. Præter enim quàm quoddam ea, quæ tibi negotium aliquod aut incommodum asserunt, mihi esse vsui nequaquam possunt: hominem etiam valde diligo: estq; mihi cum illo consuetudo sanè peruetus: vt gratum mihi atq; iucundum sit intellexisse eius te opera magnis in rebus vti. Itaque hoc illi via atque itineris duplici de causa æquo animo remitto, & quod ei bene atque honorifice apud te esse mihi gratum est, & quod tibi, vt scribis, eius est & opera & industria domi cum iucunda, tum fructuosa. Dat. V. Cal. Septemb. Anno tertio. Roma.

H E L V E T I I S.

53

ANNIBALEM Rangonium Præfectum Prætoriorum equitum eiusq; cohortis, quæ tota ex vestris militibus vtimur, & præstantis animi iuuenem, & mihi in primis gratum, venire ad vos ea de causa volui, vt & vos meis verbis salutaret, & mea in vestram fortissimam inuictissimamq; nationem studia beneuolentiamq; ostenderet: certioresq; vos faceret, quantæ mihi curæ esset salus, dignitas, gloriaq; vestra. Nam cum is meo à latere ferè nunquam discedat, qualis in vos animus mensq; nostra sit, optime omnium nouit. Ei etiam mandavi: vt & forti vos animo atque constanti esse ad rem communem tuendam & conseruandam iuberet, quo & fuisse adhuc quidem vos plane cognoui, & posthac futu-

vos magnopere confido: & me nulla in re, quæ ad vos fo-
uendos atq; ornandos pertineret, defuturum pollucere-
tur, planeq; reciperet. Quæ quidem ei ad vos mandata
nostra perferenda eo libentius dedi, quo ipsum scio ani-
mo esse in vestra nationem benevolentissimo, vestramq;
virtutem atq; in bellicis rebus prastantiam magnopere
& mente suspicere, & oratione laudare. Sed & hac &
reliqua ab illo. Ego certe & ut amicissimi hominis in
vos officia prastitisse me omni tempore profiteri predica-
req; possitis, libentissime procurabo: et Deum Opt. Max.
ut vos in vestra fortiter constanterq; agendi consuetu-
dine contineat, suppliciter rogabo. Datum tertio Calen.
Septemb. Anno tertio. Roma.

REIPVB. FLORENTI-

N O R V M.

54

QVONIAM ad exædificandum Principis Aposto-
lorum phanum Romanum, cui quidem rei, ut scitis, om-
nem meam curam & diligentiam adhibeo, arboribus
ad constructiones idoneis nunc etiam deficiamus: hortor
vos, quod etiam anno superiore sum hortatus, ut pro
rei pietate & vestra religione eam abietum vim cadi
ab eius phani procuratoribus vestris in montibus permit-
tatis, quam ipsi à vobis petent, ut facilius atque celerius
tam laudabilis tamq; veneranda omnibus hominibus æ-
dificatio vestra ope surgere conficiq; possit. Datum ter-
tio Calend. Septemb. Anno tertio. Roma.

HENRICO NOLAE

C O M I T I.

55

ET AR.

ET audiui Traianum Nolanum internuntium tuum, & tuas postulationes confecissem, si quo modo facere potuissem. Sed quoniam Ludouicus Petiliani Comes parricis tuus mea causa domo est profectus, eaq; est horum temporum natura, ut nulla pacis & concordia studia exerceri posse commodè videantur: te hortor, ut pro meo in te amore duos aut tres ad summum menses nihil moueas, causamq; ita se habere, quemadmodum nunc se habet, sinas. Confido enim interea occasionem mihi datum iri, rem ita, ut volumus, maximeq; conuenit, inter vos communi concordia statuendi. Quemadmodum ab ipso Traiano tum his ad te literis reuertente clarius intelliges. Dat. prid. Cal. Septemb. Anno tertio. Roma.

HELVE TIIS.

56

Ex literis Marci Cardinalis Seduni vestro in presentibus rebus fori atq; ad omnia difficilia superanda fidenti alacriq; animo ea, quæ à vestra sanè virtute expectari maxime poterant, intellexi: quæq; mihi magnam spem attulerunt, incepta nostra cum Dei Opt. Max. nutu eos, quos volumus, exitus habitura. Itaq; cum magnam verissimamq; vobis laudem ea de re tribuendam puto: tum vos hortor, etiam si minus necesse est id me facere: quid est enim vobis omnibus ad viriliter agendum vel constantius, vel omnino ardentius? sed tamen vos hortor, ut eosdem animos, fortitudinem, alacritatem adhibeatis usq; eo, dum res quam aggressi estis, autore me vel Domino potius, explicata soluta confecta sit. Quod quidem vos facturos multorum vestrorum antea recte præclareq; factorum recordatione nō dubito. Quod ad me attinet, dabo certe operam, ut vobis omnibus in

rebus,

rebus, quæ ad vestra vel commoda vel ornamenta pertinebunt, pro Reip. viribus dignitate adhibita, quam vobis esse charissimam video, satisfiat. Datum prid. Cal. Sept. M. D. XV. Anno tertio. Roma.

VINCENTIO GRA-

N A T A E.

37

QV AE ad me de Consalvi Ferrandi Magni & voluntate in nos, & pietate scripsisti, ea mihi planè notissima per spectissimâq₃ sunt. Bene autem in eo se res habet. Nam illum item ego & vnice atq₃ summopere amo, & facio, vt debeo, maximi. Virum enim pluribus virtutibus præditum, bellicisq₃ in rebus clariorem hominem etas nostra non habet: atq₃ haud scio an etiam parentum atq₃ nostrorum etates habuerint. Respondere tibi autem ad reliquas partes epistolæ tuæ, vt te cupere video, planè non possum. Hæc enim tempora aliam rationem postulant. Reliquum est, vt scias tuum mihi studium valde gratum esse. Dat. prid. Cal. Septemb. M. D. XV. Anno tertio. Roma.

N.

AD XII. Cal. Septembris quas ad me literas dedisti, ea diligentia mihi vestram ostenderunt, qua vsi estis, vt me de Asiaticis rebus certiore faceretis. Itaq₃ quoniam video vos adhibere operam, nequid eorum a nobis ignoretur, in ea vestra diligentia atq₃ officio plurimum conquiescam. Curabo autem quod vos peruelle intelligo, nequid emanet, ne officium vestrum vobis noceat. Vos modo pergite, vt facitis, literasq₃ ad me omnibus illis de rebus date quàm creberrimas quàmq₃ plenissimas.

Erit

Erit id mihi vehementissime gratum. Dat. II II. Non.
Septemb. Anno tertio. Roma.

FRANCISCO MARIAE ME-
TAVRENSIVM DVCL. 59

ET si prioribus meis vnis atq; alteris literis hortatus te sum, vt quanto celerius fieri posset, cum tua manu Placentiam accederes: idq; curare te omni diligentia existimo: tamen quoniam permagni interest quamprimum te illic esse: etiam atq; etiam te commonesacio, vt diligentia tua celeritatem, celeritati etiam alas, quod aiunt, addas, vt id, quod volumus, abs te tuisq; copiis citius atq; temporius fiat. In quo si nihil pratermiseris vel cura, vel opera vel laboris, nihil erit tam magnum tamq; amplum, quod non tibi à me deberi facile sim existimaturus. Datum XVII. Calend. Septemb. Anno tertio. Roma.

MARCO ANTONIO

COLVMNAR. 60

ET si existimem antequam hæ tibi nostra litera redantur, intellecturum te de Iulio Medice Cardinali Legato, quid te facere oporteat: ad tuas tamen literas pridie Idib. Augusti datas tibi respondeo mihi placere, vt te quamprimum cum tuis equitibus Veronam conferas, vt celerius, quemadmodum quidem valde opus est, Raimundus Neapolis Prorex eiusq; equites Verona discedere, et quod expedit proficisci possint. Quæ ad tuendum id oppidum pertinent, ea tibi à Prorege parabuntur. Caterum de tuis rebus vel admonitus à tuis ea faciam, quæ volenti, vel quod per me existimare potero velle te, non pratermittam: vt facile intelligas, me tui assentis commo-
dorums

dorum & dignitatis rationem habuisse. Datum xvii.
Cal. Septemb. Anno tertio. Roma.

FRANCISCO GALLO-

RVM REGI.

61

GRATISSIMA mihi voluntas tua fuit, quam in
Bernardum Bibienam Cardinalem ostendisti ijs literis,
quibus mihi significasti cupere te, ut, si Federicus Cardi-
nalis sancti Angeli mortem obiret, Ecclesia illum Ma-
leacensi praefererem. Nam cum is propter suas plurimas
excellentesq; virtutes, vitaq; consuetudinem mecum et
cum meis omnibus prope vsque à puero acta, laboresq;
quos quidem maximos administranda mecum Rep. su-
stinet, ita mihi gratus probatusq; sit, ut neminem plus
amem: nihil mihi accidere iucundius potuit, quam te
perspicere in eius fortunis, quae quidem perexigua perq;
tenuēs sunt, pro dignitatis ratione amplificandis penè
nobiscum certare. Itaq; cum tibi ea de re magnopere de-
beo: tum volo te scire, homini tibi deditissimo tuiq; stu-
diosissimo, atq; in primis beneficiorum planè memori &
vehementer grato te fuisse, cuius ipsius in te obseruan-
tia & studiorum ipsi optimi testes sumus. Verum quod
ad ecclesiam Maleacensem attinet, quoniam ei Petrum
Cardinalem Anconitanum virum doctum, ac de me
deq; Repub. meritum iam praefeci, non queo aliter ea de
re statuere. Tibi tamen neque ipse Bernardus Cardina-
lis minus debet, quam si eam esset Ecclesiam consequu-
tus, neque benevolentia in illum liberalitasq; tua mi-
nus mihi grata atque iucunda est, quam si ei Ecclesiam
ipsam tua in tempore intellecta voluntate contulisses.
Itaque existimare planè potes, quantum ad animum
vtriusq;

viriusq; nostrum attinget, nihil omnino ea in re de tuo benesicio fortunam detraxisse. Quo te magis hortor, ut hanc ipsum egregiam in illum animi tui propensionem vel retineas in posterum, vel etiam augeas: quando ipse hac illius ostensione abs te facta suam in te benevolentiam magis magisq; in dies omnibus est officiorum generibus illustraturus. Dat. VII. Cal. Septemb. Anno tertio. Roma.

PETRI BEMBI EPI
STOLARVM LEONIS DECI
MI PONT. MAX. NOMINE
scriptarum.

LIBER XI.

FRANCISCO GALLO-
RVM REGI.



APITA foederis inter te atque me Remq; hanc pub. sancienti ab episcopo Triceruensi legato meo allato Romam, tanquam primordia & quasi fundamenta voluntatis vniusque nostrum, quod magnopere concupiui, consocianda libentissime vidi. Libentius autem ipsum Episcopū audiui. Plura enim mihi & clariora de tuo optimo in Dei Ecclesiam atque nos animo egregiaq; voluntate narrauit. Quae si vera sunt, quemadmodum quidem puto, cum te de hac tua pietate

pietate, atque mente vehementer laudo: nihil enim potes-
te dignius atque præclarior facere, quam nihil commit-
tere, quo te male gratum appellare Dominus tam in te
largus tamq³ beneficus possit: tum spero fore ut hoc vir-
tutum tuarum specimen, quod quidem in tam tenera æ-
tate nobis das, cum ijs opibus, quas maximas atque am-
plissimas habes, coniunctum & consociatum vniuersæ
Reip. Christianæ magnum breui adiuumentum atque or-
namentum asserat. Itaque eiusmodi tuæ & virtuti &
pietati omnem nostram & Reip. dignitatem tuendam
statui permittere: ut existimare plane possis, mihi te &
esse iam charissimum, & semper fore. Neq³ enim vereor,
cum videas te à me plurimi, quin statuas, hoc in fœdere
sanciendo honorem meum abs te neglectum iri non opor-
tere. Quemadmodum ab ipso Episcopo, quem quidem ad
te eadem celeritate, qua est ad me profectus, intra bi-
duum, aut summum triduum remittam, clarius omnia
atque apertius intelliges. Vale, nosq³ dilige. Dat. quinto
Cal. Octob. M. D. XV. Anno tertio. Roma.

MAGNO GALLIAE

MAGISTRO.

2

INTELLEXIMVS ab Episcopo Tricaricensi,
quanto studio, quantaq³ pietate nostras Ecclesiæq³ res
omni tempore iuueris, quamq³ te nostri obseruantem
semper ostenderis. Quod quidem mihi gratissimum sanè
fuit. Meam enim de tuis plurimis maximisq³ virtutibus
illustriq³ probitate tua, quam omnes homines prædicant,
spem expectationemq³ egregie confirmauit. Itaq³ ea de
re cum te vehementer laudo: tum tibi polliceor, me tuæ
opera & studij memoriam nunquam abiecturum. Reli-

Ss

qua

qua ex eodem Episcopo ad Regem tuum propediem reuerfuro cognosces. Dat. quinto Calen. Oct. Anno tertio. Roma.

DVCI ALLOBROGV. 3

STVDIVM & officium apud Franciscum Gallorum Regem pro mea Reiq³ pub. dignitate tuenda adhibitum tuum plurima me voluptate affecit: de quo sum ab Episcopo Tricaricensi coram admonitus: qui mihi summa cum tua laude multa narrauit, quamobrem meam dignitatem tibi fuisse charissimam cognoscerem: attulitq³ capita fœderis inter Regem atq³ me sancienti tuo labore diligentiaq³ confecta: qua quidem mihi magna parte magnopere probantur. Verum quod ad illa attinet, idem Episcopus, qui se ad Regem celeriter referet, mentem tibi meam explicabit, meq³ eius tui officij fore bene memorem pollicebitur. Te interea hortor, vt quod reliquum est, in eo eandem curam habeas nostra dignitatis: qua tibi etiam ornamento esse poterit. Vale. Dat. quinto Cal. Oct. Anno tertio. Roma.

IVLIANO MEDICI

FRATRI.

4

NARRAVIT mihi Ioannes Vespuccius familiaris tuus de valetudine tua, quotidie tibi melius esse sperareq³ se breuiter conualiturum: quo nihil mihi potuit afferri gratius, nihil iucundius. Neque enim in vita quicquam habeo te vno charius. Quare te hortor vt reiectis alijs cogitationibus omnibus vnum illud cures, te vt quamprimum confirmes, restituasq³ tum pristina valetudini, tum nobis, tibiq³ persuadeas nos tui absentis tuarumq³ rerum omnium eandem curam habituros, quam habere-

haberemus, tu si hic esses, atq; à latere meo nunquam discederes. Proinde optime et suauissime frater, si me amas ipse, si te à me amari existimas, bono fac animo, hoc est, leto atq; vacuo sis, ac nihil cogites præter hoc vnum, vt cito te valentem & confirmatum habeamus. Dat. Cal. Oct. Anno tertio. Roma.

FRANCISCO GALLO-

RVM REGI.

9

VENIT ad te Ioannes Lascaris Constantinopolitanus obseruantissimus & studiosissimus tui, vir & genere apud Græcos admodum illustri, & doctrina optimarumq; artium & literarum præstantia & agendis rebus experientia, & morum probitate omniq; vitæ comitate plane insignis. Eum his tot tantisq; de causis & amari omni tempore, & in Pontificatu prope quotidie ita eius virtute sum vsus, vt nemo illo mihi charior sit, nemo iucundior. Neq; solum nos, sed vniuersa domus nostra, a q; in primis Laurentius pater meus quotidiano prope in conuictu illum habuit, hominisq; familiaritate & consuetudine mirifice est delectatus. Quare gratissimum mihi erit, si præterquam quod is tuo in ære iam pridem est, quodq; valde dignus est, qui abs te diligatur, mea etiam causa arctius benignitate illum tua et liberalitate fueris complexus, ostenderiq; ei, meam apud te commendationem plurimum valuisse. Dat. Non Oct. Anno tertio. Roma.

MARCO ANTONIO

COLUMNAE.

6

GRATVM tibi admodum & optatum fuit id, quod tuus ad nos iueris est allatus. Maximilianum Romæ

Imper. desig. sui te exercitus Legatum fecisse. Omnis enim tua dignitatis accessio pro meo in te amore magnam mihi voluptatem affert. Quare quod ad meam voluntatem attinet, sine cuius significatione scribis nolle te eam legationem accipere, libenti animo titulos tuos ut augeras, idque muneri obeas, tibi permitto. In quo ut magno illi usui esse possis, tibi erit enitendum non solum id quod te decet facias, sed etiam ut tibi viam munias ad reliquos honorum & dignitatis gradus capeffendos, quos quidem magnis atque fortibus viris et diligentibus tuique simillimis hominibus virtus atque industria patefacit. Dat. Non. Octob. Anno tertio. Roma.

MAGISTRATVI SPOLETI. 7

POST LXIII. virorum creationem, quam ex omni ciuitate fieri iussi eius literis, quas Non. Iulij dedi, qui quidem pro istius oppidi statu conseruando munia publica procurarent, intellexi facile accidere posse, ut ciuitatis quieti conduceret, ut is numerus vel augeretur, vel subtraheretur, tum aliquorum iam declaratorum loco alij subrogarentur, ipsi eycerentur. Itaque quoniam omni ex parte istorum ciuium paci & commodo consulere magnopere cupio, nihilque pratermittere eorum, qui iuuare eam rem possint, volo ut tibi, cuius prudentiam maximis in rebus & perspexi saepe & probaui, potestas facultasque sit eum, quem dixi, LXIII. virum numerum augendi, subducendi, antiquandi, reponendi, quaque tibi esse usui ea in re videbuntur, iubendi & statuendi. Quare te hortor, ut omnem curam adhibeas, ut quam de te spem habeo fore, municipium ut istud optime abs te regatur, ea ne deferar. Datum XIII. Calend. Nouemb.

uenib. Anno tertio. Thufcanella.

RAIMUNDO CARDONAE

PROREGI NEAPOLIS.

8

ALLATVM est ad me Picentes exules, quos quidem de nobis male meritos esse omnes homines intelligunt, confidere sese ab exercitu tuo Regnum Neapolitanum per agrum Picenum petente restitutum iri, auxiliāq; eis iri praebitum, quibus auxilijs eorum municipiorum statum conturbare atque conuellere, deq; aduersa, sibi factionis ciuibus, qui de nobis bene merentur, vindictam sumere pro libidine possint. Id tamen si mihi, qui te prudentiamq; tuam & probitatem noui, credibile non est: volui tamen te & hortari & impensius commonefacere, nolles eiusmodi postulationibus Picentium exulum praebere tuas aureis, neue quid eis concederes, quo moliri quippiam contra eius prouincia quietē nostramq; voluntatem audeant. Nihil enim fere mihi grauius posset atque molestius accidere, quam si contingeret res illas ab eo, in quo nunc sunt, statu & temperatione diuelli & prorui. Dat. XIIII. Cal. Nouemb. Anno tertio. Thufcanella.

CARDINALIBVS ABSENTI-

BVS SINGVLATIM.

9

ACCEPIT quemadmodum Deo Opt. Max. placuit Franciscus Gallorum Rex eas pacis conditiones, quas ei dedimus, libentiq; animo nobiscum foedus inijt: quam quidem pacem non solum huic vrbi atq; imperio, sed vniuersae etiam Christianae Reipub. confidimus maxime vtilem et salutarem futuram. Nunc autem cum existimem ad eiusdem Reip. dignitatem magnopere perti-

nere, vt tota de re te reliquosq; fratres meos E. R. Cardinales quamprimum consulam, vt quæ agenda nobis sint communi omnium sententia constituantur: peto abs te, vt omni mora posthabita, quod commodo tuo fiat. Viterbium ad nos te conferas: quam ad urbem ad tertium Cal. Nouemb. erimus. Dat. XI. Cal. Nouemb. Anno tertio. Graufcis.

FRANCISCO GALLO-

RVM REGI.

IO

MANDAVIMVS Nicolaio Elisio & Iulio Medici Cardinalibus Legatus nostris, vt tibi Bononiam ad nos venienti obuiam profiscerentur, teq; nostro nomine exciperent, beneq; tibi precarentur meis verbis: & cum de letitia, quam ex aduentu tuo capio, tum alijs de rebus te certiore facerent. Quia ad te propiæ scripsi, vt & ipsis fidem haberes te alloquentibus, et scires magna mihi curæ esse dignitatem tuam. Datum quarto Non. Decemb. Anno tertio. Florentia.

IACOBATIO CARDINALI LE-

GATO ROMÆ RELICTO.

II

QUONIAM in hoc Francisci Gallorum Regis ad nos aduentu cupio, vt is ad me præclarū aliquod primumq; munus habeat, volo vt sanctæ Crucis fanum, quod in Hierusalem dicitur, caste atq; persanctè adeas, capiasq; tantum de Crucis Dominicæ trunculo, quod ibi asseruatur, quantum formæ causa hac in membrana scriptum atque depictum conspicias. Id ubi feceris, eam igni partem bene obignatam per celerem tabellarium ad nos mitto cum eius facti testificatione tua manu scripta, quæ Regi vna cum igne iradatur. Hac diligenter curabis, & valebis.

lebis. Datum tertio Non. Decemb. Anno tertio. De villa
Casagioli agri Florentini.

ALOISIAE FRANCISCI

REGIS GALLORVM

MATRI,

12

QVEMADMODVM ei, qui cum vult atque ubi
vult spirat, sanè placuit, Franciscus Gallorum Rex filius
tuus hodie Bononiam ad me veniens clarum atque illu-
stre mihi obsequij obseruantiaq; munus praestitit, ea pie-
tate & religione, vt libentissime illum amantissimeq;
oborta prope. paterna latitia lachrymis complecterer,
ageremq; Deo Opt. Max. gratias, qui mihi filij sui vi-
carium in terris dederit, vt huius Reip. maiorem digni-
tate & autoritate filium tantum Regem, tantis opibus,
tanta potentia praeclitum, omnibus animi corporisq; doti-
bus perornatum, florentem aetate, eidem Reipubl. se tam
pie coniungentem addicentem submittentemq; conspi-
cerem. Valde enim confido fore, vt ea res vniuersa
Christiana Reipublice maximam & vtilitatem & glo-
riam pariat. Quanquam hoc quidem nostrum tam
mirificum gaudium ea etiam latitia est consequuta,
quod cum illum sub postea priuato in congressu habere-
mus, spem expectationemq;, quam nobis primò aspectu
atque intuitu, primisq; illis habitis à se verbis excitauit,
pleno religionis & prudentia sermone, suisq; in iuuan-
da Christiana re atque populis erecti propensiq; animi,
deq; nobis benemerendi cupidi ostensione etiam atq; et-
iam auxit. Itaq; has ad te quàmprimū literas dedi: qui-
bus meam ex eius aduentu conceptam tecum latitiam
communicarem, significaremq; tibi nulla cum ex parte,

nulla ex re mihi non egregie, non ampliter, non cumulatissime satisfecisse, hortarerq₃ te, ageres ipsa etiam Domino gratias, qui te non solum tam potentis atq₃ magni, sed etiam tam pi^j, tam prudentis, tam alti animi Regis, tam tui, quod quidem perspexisse mihi videor, obseruantis esse matrem voluerit, quodq₃ ipsa tuum in eo educando & instituendo studium, diligentiam, laborem bene positum planè iam videas, magnosq₃ ex eo atque optatissimos fructus capias, confidas etiam te in dies longe quidem maiores atque vberiores percepturam. Non enim vereor quin existimes, qui tibi nequedum planè adolescens, &, vt verius dicam, puer matri filius satisfacit, impletq₃ cupidum semper animum, eundem esse etiam deinceps annis pariter cum virtute crescentibus firmiores tibi de sese iucunditates pleniorémq₃ lætitiā allaturum. Quod ad me attinet, scire te plane volo, nullum te in nobis erga illum boni patris officium vllō tempore desideraturam. Neque enim vllam Regis ornandi & dignitatis illius amplificandæ occasionem prætermittam, vt se mihi sentiat esse quamcharissimum. Pergat modo ipse quodq₃ specimen veræ pietatis ac timentis Deum animi caterarumq₃ virtutum tua in primis curatuisq₃ prudentibus consilijs fultus iam dedit, id in posterum tueatur, vel etiam exaugeat. Quod vt facere melius atq₃ facilius possit, etsi currentem, vt credimus, incitatura sis, tuas tamen maternas amantissimasq₃ hortationes ipsa ne intermittito: adolescentemq₃ bene institutum tibiq₃ in primis parentem in eodem Dei cultu & Reipu. obseruantia, à qua sibi sperare omnia ornamenta potest magis magisq₃ in dies tuis præceptis tuisq₃ monitis

confir-

confirma & contine. Dat. tertio Id. Decemb. Anno tertio. Bononia.

MAXIMILIANO ROMANO-

RVM IMP. DESIG.

13

EGIDIVM ordinis Augustinianorum Eremitarum magistrum meum ad te Legatum mitto, vt tecum non sanè pauca vtriusq₃ nostrum ad munus, officium, dignitatem, Reiq₃ pub. Christiana vtilitatem magnopere spectantia communicet meis verbis, apud teq₃ sit, quoad illa tractabuntur & terminabuntur. Is quoniam est eximia integritate, religione, doctrina, omniumq₃ prope linguarum, quæ nunc quidem excoluntur, vsum atq₃ scientiam, omnium bonarum artium disciplinas cognitâs & explicatas habet, te hortor, vt eum liberaliter excipias cum mea, tum ipsius etiam causa. Hominem egregium & tua clientela dignissimum cognoscet. Datum Idib. Decemb. Anno tertio. Bononia.

MATTHAEO CARDINALI

GVRCENSI.

14

EGIDIO ordinis Augustinianorum Eremitarum magistro ad Maximilianum imper. designatum proficiscenti, vt Legatum meum apud illum ageret, in primis mandavi, vt tibi salutem plurimam diceret, quaq₃ à me discedens ad Maximilianum mandata habuit, ea tibi omnia nota faceret, vtereturq₃ in ijs tractandis maxime omnium consilio tuo. Itaq₃ quoniam exploratum mihi est, pro tua prudentia & autoritate quantum adiuuenti tuus illi fauor sit allaturus: peto abs te, vt rem non magis illam quidem meam, quàm huius Reipub. atq₃ tuam, vel potius, vt verissimè dicam, omnibus Christianis populis

lis communem, quantū poteris iuues: Egidiniq; ipsum, quem quidem pro singulari eius humanarum diuinarumq; rerum scientia, bonarumq; artium omnium & literarum doctrina, probitate, religione ita diligo, vt neminem eius ordinis aequè charum habeam, & libenter videas, & ei quasi dux & moderator sis earum rerum, quas tractabit: desq; operam vt ipse tibi plurimum debeat. Mihi certe nihil gratius facere poteris: idq; vt facias abs te peto. Datum Idib. Decemb. Anno tertio. Bononia.

VINCENTIO MARTINAE

LVSITANO NAVIVM

PRAEFECTO.

15

CVM propediem ad Italiam atque ad urbem duanaves sis adducturus, volumus vt Aluarum Rodrigium & Garsiam Reberum Lusitanos, qui nuper ab Hebraica secta recedentes Christianae Reipu. baptismatisq; sacramento se addixerunt, cum ijs, qui vna cum ipsis volent conscendere, tuis nauibus imponas, ad Italiamq; perducas omni cum eorum suppellectili, qua cum transmissuri te adierint. Quibus omnibus, si mihi gratissimum facere vis, cura atq; effice, ne qua molestia vllò ab hominum genere adhibeatur: vt, quod in te erit, incolumes se Romam conferant. Dat. XVIII. Cal. Ian. Anno tertio. Bononia.

LVDOVICO COMITI SAN-

CTI BONIFACII A CV-

BICLVO MEO.

16

PETIT à me Ioannes Franciscus Picus Mirandula Dominus multis precibus, vellem eius filiolum, quo
proxi-

proxime audius est, ad sacrum baptismatis fontem meo nomine admoueri. Quare te, cuius sedulitas & studium mihi probantur, interpretem & internuntium eam ad rem meum facio: mandoq; tibi, Mirandulam te vt conseras, Piciq; & vxoris eius nuper editum filium, qui lauandus est, tuis ipse manibus teneas, vicariumq; meum geras, omniaq; dicas atq; agas, qua agi, quaq; dici consuevere in eiusmodi celebritate ab ijs, qui compairum nomine atque vinculo colligandi sunt cum infantium lauandorum parentibus. infanti autem, cum lotus erit, bene dices, beneq; precabere, meis verbis. Dat. xviii. Cal. Ian. Anno tertia. Bononia.

REGI LVSITANIAE.

17

CVM nobiscum per literas & per internuntios diligenter egisset Franciscus Gallorum Rex, vt se ad nos accedere vellemus, intellexissemusque de illius recto in nos atque in Rempublicam vniuersam propenso animo multa, qua spem nobis faciebant, si se is ad nos contraxisset, fore, vt eiusmodi congressus noster aliquid certe in communem vtilitatem boni pareret, libenti animo ei permisi, vt ad me Bononiam accederet. Itaque ille ad tertium Id. Decemb. Bononiam cum venisset, ita omnes boni & py Remq; publ. atque nos obseruantis ac vere Regis partes impleuit, vt nihil neque à me neque ab vilo meorum fratrum Cardinalium, qui pene omnes mecum erant, desideraretur. Secretioribus vero in sermonibus colloctionibusq; nostris cum illius dia cogitationesq; eius omnes ad rem Christianam tuendam, iuuandam, amplificandam mirisq; e conuersas atq; animum atque mentem diligentius pertentarem, studere

directas cognoui : ipsum autem cum & probum, & ve
 illa atque fert, etiam prudentem & alto ac magno animo
 pradium, tum etiam facilem ad curas suas, desideria,
 spes, conatusque omnes remittendos perspexi, dum illud
 tam pium, tam iustum, tam sanè etiam necessarium in
 Turcas bellum non verbis & literis, ut sepe alias, sed re
 atque opera vnanimi consensu conspirationeque suscipere-
 tur. Quæ cum vidissem, Regiumque animum, quasi quod
 manu tangitur, tenuissem : est enim planè bonus, hoc est
 aperto ingenio ac perliberali : egi quidem primum Deo
 Opt. Max. plurimas genibus innixus gratias : qui mihi
 eius filij vicario in terris dederit, ut tantum Regem, tan-
 ta virtute, tanto gerendarum rerum initio, ea ætate, ijs
 opibus, ad eam profectionem suscipiendam tam alacrem,
 tam nobiscum coniunctum & consociatum, quasi de cœ-
 lo missum aspicerem. Deinde has ad te literas dare vo-
 lui, tum ut tibi omnia significarem, quæ quidem tibi pro
 tua religione & pietate, proque tuis Reipub. Christiana
 causamulta impensa, singulari perseuerantia, incredi-
 bili labore, nouis inusitatisque ac prope inauditis antea su-
 scepis peregrinationibus & bellis fore tibi gratissima
 non dubitavi : tum ut te hortarer, abs teque etiam atque
 etiam peterem, quando imminere nostris ceruicibus Tur-
 carum Regem acerrimum atque bellicosissimum vides, te
 ut nobiscum hoc ad bellum pares, atque ita quidem pares,
 ut reiectis reliquis consilijs tuis omnibus nihil cogites,
 nisi hoc, quod dixi, vnum : quod quidem maxime omni-
 um cogitandum aggrediendum explicandumque est. Spero
 enim in ipso, cuius causam agimus, Deo, si ad nostram
 Regisque Gallorum copulatam voluntatem tuam etiam
 volun-

voluntatem, tuam prudentiam, auctoritatem, tuas opes
 alacri magnôq; animo adiunxeris, fore, vt qua aij om-
 nes multorum seculorum Reges vix optare ausi sunt, ea
 nos summa cum Christiana Reip. tuâq; in primis laude
 celeriter atque facillime consequamur. Nullus enim reli-
 quorum Christianorum Regum atque Principum erit,
 modo vere Christianus sit, qui cum nos ad id coniunctos
 animatosq; viderit, non se etiam comparet ad bene de
 Christiano nomine pro virili parte communi in re atque
 causa promerendum. Quemadmodum omnibus his de re-
 bus cum legato tuo sumus loquuti. Accinge itaq; te cum
 Dei auspicio et nomine ad rem cogitationemq; tam præ-
 claram suscipiendam: & Domino, qui tibi tantum Re-
 gnorum dedit, eorundem Regnorum opes prome: vt re-
 cuperare amissa turpiter à maioribus nostris ea, in quibus
 ipse nasci versariq; inter mortales, denum etiam pro sa-
 lute nostra obire mortem voluit, loca terramq; plane san-
 ctam possimus. Vt qui te illi gratum Christiana ditionis
 fines vltimo in orbe terrisq; ignotis tua tantum virtu-
 te, nullis socijs nulloq; adiutore longe lateq; promouendo
 prastitisti, idem te media in Europa atque Asia vna no-
 biscum recuperanda gratum etiam prabeas, possisq; ad
 tuam propriam pristinamq; gloriam communis quoque
 gloria cumulū adiungere, sisq; omnium pariter et gra-
 tissimus & vera solidaq; laude cumulatissimus. Datum
 XIX. Calend. Ianuar. M. D. XV. Anno tertio. Bononia.

HELVETIIS FOEDERIS

GRISII,

18

PRO mea in vos vestraq; commoda libenti pater-
 naq; voluntate, proq; ea coniunctione & fœdere, quod
 inter

inter me atq; vos sanctum firmatumq; est, certiores vos facio, me, cum Franciscum Gallorum regem ad huius reip. vniuersaq; rei Christiana dignitatem tuendam atq; amplificandam propensum animatumq; cognouissem, cum illo foedus iniisse: quo in foedere vnum est caput, quo capite eumq; ditionemq; eius defendere contra omnes bellum regi molientes teneor. Itaq; hoc vobis cognitum esse volui, cum vi sciretis vna cum reip. maiestate cõiunctam esse Gallorum regis amplitudinem atq; potentiam, tunc vt quoniam intelligo esse quosdam, qui armis inuadere in eius ditionem cogitent, illos in eo cognoscere vt non solum contra regem, sed etiam contra me esse facturos: idq; me quidem nihilo secius, ac si tantummodo in me arma sumpsissent, esse existimaturum. Dat. quinto Cal. Ian. M. D. xv. Anno tertio. Florentia.

FRANCISCO GALLO-

RVM REGI.

19

CONSTANTIAM Varambonam Philiberte fratris mei vxoris, materteraq; tua familiarem lectissimam fœminam paterna charitate sane prosequor, eiusq; causa cupio omnia. Quare te hortor, vt in re dotis ei iam pridem debita, cuius dotus Maximilianus fortia sese praedem constituera, mandes vt mulieri satisfiat: neq; permittas probam nobilemq; fœminam sua dote spoliatam iacere tamdiu, frustra q; implorare auxilium pretatu & liberalitatis tuae. Egu tecum proxime, Etonia cum esses, hac ipsa de re matertera eadem tua per sese, agnq; nunc etiam, vt intelligo, per internuntios: quæ quidem pro sua excellenti virtute & vestra propinquitate digna est, quæ à te talia impetret, praesertim nobis commendan-

tibus

tibus. Itaque non agam tecum pluribus. Vnum dicam: si Constantia satisfieri celeriter iusseris, id mihi perquam gratum fore. Dat. tertio. Non. Ian. M. D. XVI. Anno tertio. Florentia.

MAGISTRATVI VL

TERBIENSI.

20

MANDAVIMVS Ioanni Iordano Virino propinquo nostro, vt controuersias inter heredes Baribolomai Aluiani nuper exortas autoritate sua componeret, & usq; quo sedatius & pacatius posset, omni studio et diligentia sedaret. Id cum Iordanus facere sese posse plane diffidat, nobisq; significet, per alteros eorum stare, quominus res, vt volumus, conficiatur, qui honestati & quieti sese dare nequaquam volunt, cum alteri imperata facere paratissimi sint: mando tibi, vt tui muneris atq; officij partes ea in re atque causa posthac prestes: omniq; agas & efficias, quae tibi & Iordano ipsi agenda esse videbuntur: cui scimus aqua & honesta & virisq; commoda & salutaria vehementer probari. Dat. Id. Ian. M. D. XVI. Anno tertio. Florentia.

ALFONSO DVCI FER-

RARIENSIVM.

21

VOLVIMVS, vt naues sale onustae vsq; ad numerum quinque nauium, quas Leonardus Lauredanus Venetiarum Princeps Pado an. ne Bergomum mittit, liberè & sine vlla portorij mora per tuam ditionem iter faciant. Dat. sexto Cal. Feb. Anno tertio Florentia,

EPISCOPO FOROLIVIEN-

SIVM IN HISPANIA IN-

TERNVNTIO.

22

MISSVS

MISSVS istuc à Iuliano Medice fratre meo ad Hispanos equos aliquot emendos ad nosq₃ perducendos is, qui has tibi literas reddidit, certiores nos fecit, eos sese equos emisse quidem iam, existimareq₃ ea se nobis emptione satisfacturum. Verum ex ista eos prouincia educendi impetrare se facultatem non potuisse à Regijs ministris. Quare mando tibi, vt Regem adeas ea de re, petasq₃ mandet suis, vt equi illi, qui quidem ad decem sunt, educi ex eius Regno possint, ad nosq₃ perducant: vt si eorum aliquis ad nos vectandos erit idoneus, eo vtamur. Datum quarto Cal. Febr. Anno tertio. Florentia.

ANTONIO ABBATI SAN-
CTI BERTINI. 23

IMAGO diui Christophori, quam nobis dono misisti, pro mea in te singulari perq₃ vetere beneuolentia mihi sanè gratissima fuit, non quod ea mihi ad tui memoriam vt scribis, excitanda vti necesse sit: cuius ob oculos, ex eo quo te vidimus, valde quidem longinquo tempore satis crebro amantissime suauissimeq₃ versaris: sed quia ea omnia, quæ abs te proficiuntur, vti ab homine mihi charissimo iucundissimoq₃ missa mirifice me delectant. Reliquum est, vt te conserues, senectamq₃ istam tuam & valentem & firmam cura diligentiaq₃ tua quàm longissime protrahas: existimesq₃ te à me et summo opere amari, & fieri plurimi. Datum Calend. Febr. Anno tertio. Florentia.

MAXIMILIANO ROM.

IMP. DESIG. 24

ET si existimo eius te rei nuntium iam accepisse, quæ de re graui cum dolore ad te scribo: vel magnitudo tamē

tamen ipsius, vel mea in te beneuolentia facit, vt statuerim de ea te certiore fieri meis etiam literis oportere. Itaq; scies meos in Hispania internuntios scribere Ferdinandum Regem ea nocte, qua nox diem XI. Cal. Febr. est consequuta, vitam cum morte commutauisse. Egidem satis commemorare non queo, quantum nobis molestia, quantum mœroris tam grauis, tam prudentis, tam nostri & Reipub. obseruantis, tam bello & pace praclaris excellentisq; Regis mors atque interitus attulerit; existimandus multum nobis, multum Romanæ rei, multum etiam Christiana publicæ eo extincto. Rege tum praesidium tum ornamentum esse sublatum. Quas ad causas tot atque tantas doloris mei illud etiam accedit, quod te scio eius viri obitum grauitè et moleste laturum, quippe qui magno sapientissimoq; Rege & tui amantissimo tecumq; coniunctissimo te deiectum et spoliatum intelliges. Quamobrem vti de communi vtriusq; nostrum, aut etiam vniuersæ Christiana rei damno atq; iactura grauitè atque magnopere doleo, animiq; mei vberimum tecum mœrorem & agrimonia partior. Quod cum facio, tum Deum oro quæsoq; vt te esse apud homines eo diutius velit, quo Ferdinando Rege optimo atque maximo nostri homines eo diutius velit, quo Ferdinando rege optimo atq; maximo nostri homines spoliati autoritatis, prudentiæ temperantiæ, consiliorumq; tuorum impensius indigebunt. Dat. quinto id. Feb. Anno tertio Florentia.

VLADISLAV PANNONIAE

BOEMIAEQUE REGI. 25

LECTIS tuis ad nos literis, quibus cum literis erat exemplum earum literarum, quas Turcarum Rex de

Tt

pace

pace tecum sancienda, aut saltem de inducijs statuendis ad te scripserat, quibus me literis super ea re consulis, petisq; à me, velim, quid tibi agendum sit, mature constituere, ad teq; perscribere. Visum est mihi faciendum, ut adhibitis statim meis fratribus E. R. Cardinalibus tanta de re inter nos sententia dicerentur. Quod cum esset agitatum, tandem omnium consilio atq; sententia decreuimus ad te scribi oportere, nullo ut pacto non solum pacem, sed ne inducias quidem vllas cum Turcarum Rege faceres: nec tuam illi fidem, qui nulla fide obstringitur, obligares neue causam dares eo fœdere perpetuis nostris hostibus rem Christianam pub. commodius atq; facilius perturbâdi. Non enim Rex pacem tecum vult vilius boni causa: sed tantummodo te ut consopiat, quiescereq; faciat, dum ipse ceteros suos hosteis expugnet: ut postea ab ijs, qui ei nunc imminet, hostibus securus, & fortior robustiorq; factus te tuaq; Regna cum prima rei bene gerendæ occasione aggrediatur atque opprimat. Quamobrem non te quidem pax ista tutum à Turcis reddet, otiumq; tibi comparabit, sed te quidem ipse primum tuaq; Regna ea pace inita, deinde etiam Christianam Rempub. opportuniorē illi obijcies ad debellandum, & quasi de manu, quantum in te est, trades. Quod quàm tibi committendum sit, statues ipse, & puto statues ex tua maiorumq; tuorum dignitate. Veruntamen quoniā exploratum nobis est sine nostro ceterorumq; Christianorum Regum & virorum principum auxilio non posse te à Turcarum impetu Regna tua tueri atque defendere, externis præsertim internisq; bellis defessa iam prope ac debilitata: dedi Regibus singulis & Principibus lite-

vas: quibus petij diligentissime ab ijs, te vt pecunia vnà nobiscum iuuarent. Quod eos omnes libenter facturos puto. Quare bono animo es. Confido enim tantum tibi pecuniæ in tempore communiter subministratum iri, vt nihil tibi verendum sit, ne repellere hostem possis, tuosq; fines facile tueri. Quod cum ita sit, summopere te hortor abs teq; pro tua religione & pietate vehementer quaeso, ne te vlllo pacis aut induciarum genere cum Turcis cōiungas. Quanquam quidem non id peto, vt eorum postulationes iam nunc respuas atq; reycias: sed potius vt eis verba des, tempusq; interposita spe teras: quemadmodum ipsi tecum fecerunt, qui legatum tuum ad se profectum ante biennium non admiserunt: dum quid mihi à Christianis Regibus respondebitur, scire possis. Quod vt celeriter fiat, omnem operam adhibebo, incumbamq; in eam rem, vt in te defendendo nullum à me paternæ charitatis & beneuolentiæ munus atque officium pratermittatur. Vale, nosq; dilige. Dat. sexto Cal. Feb. M.D.XVI. Anno tertio. Florentia.

CAROLO HISPANIA

RVM REGI.

26

SACERDOTIVM sancti Iacobi Ventosilianum, quod nuper Consalui Ferdinandi magni morte vacuum factum est, Galeatio Butrigario meo in Hispania inter-
nuntio contuli: quemadmodum meis ex literis, quas ea de re scribi iussi, cognosces. Mouit autē me ad hominem eo & dignitatis & beneficij genere honestandum cum ipsius virtus, probitas, industria, mitis elegansq; natura tum mea in illum mirifica voluntas plurimis eius & veteribus & recentibus officijs excitata: cum nihil ei

defuerit meis in rebus procurandis vel ad prudentiam, vel ad diligentiam, vel ad fidem. Itaq; & opinionem, quam de eo pridem cepi, cum minorem dignitatem gererem, non sustinuit solum, sed etiam auxit: & indies suis meritis factus est mihi quidem charior. Hac autem eo spectant, ut intelligas & debuisse nos Galleatio omni tempore bene facere, & nunc magnopere valuisse. Quare te hortor, ut eius sacerdotij possessionem ita ei liberaliter mandes dari, ut cognosci facile possit, qui mihi charissimi sunt, eos etiam abs te diligere: id, quod ego quidem in tuos et feci saepe, & facio quotidie: ut quos mihi commendas ipse, eos sic ornem, ut tibi non vel chariores esse videantur, vel coniunctiores, quam mihi. Id si tu quoque hoc in homine feceris, ut videre eius ornandi causa mecum quasi certare voluisse, erit mihi supra quam dici possit, gratum: utq; facias, etiam atque etiam abs te peto. Dat. prid. Non. Feb. Anno tertio. Florentia.

EPISCOPO VESPRIMIENSI. 27

Cum intellexissem Turcarum Regem ab Vladislao Pannonia Boëmiaq; Rege per Legatum suum petere, ut vel pacem secum, vel inducias triennales conficeret: de fratrum meorum E. R. Cardinalium sententia dedi ad eum literas, quibus ab eo magnopere petij, nihil eorum, quæ postulabantur, faceret, neque se cum hoste suo nostrog; vlla conditione coniungeret. Pollicitus autem esum, daturum me operam, ut communi Regum omnium & Principum Christianorum pecunia collatione iuuetur, ut se suosq; populos tueri, atque propellere hostem possit: scripsiq; ad singulos ea de re diligentissime. Quorum qui vicinus nobis erat, Franciscus Gallorum

Rex

Rex mihi amantiſſime reſcripſit, omnia quæ vellem, libentiſſime ſe facturum. Itaque confidimus, vt maxime opus eſt, ita fore, reliquosq; Reges omnes idem reſponſuros, idemq; facturos. Quod cum erit ab ipsis confeſtum, omnem illorum ſtipem mea cum ſtiſe, quanta maxima fieri poterit, per meos homines magnis itineribus iſto mittam. Quibus de rebus omnibus te certiorem facere volui, vt ſpem haberes, Vladislauum Regem & ipſum & eius populos non ſolum, quæ ſe tueri, ſed etiam quæ, ſi volent, offendere hoſtem poſſint, propediem habituros. Dum hæc autem interea comparantur, ſi tibi ad tuenda auxilijsq; munienda Illyrici municipia operæpretium erit commeatus iſ, quem in oppido Sabinico Gilius Cortonenſis meo nomine aſſeruandum reliquit: permitto tibi, vt eo vniuerſo, quemadmodū tibi videbitur, ſic vtare. Hortor autē te, vt ſtudio diligentiāq; tuam, curam, laborem, animiq; tui fortitudinem mihi plane iam, vel omnibus potius hominibus cognitā, iſ in reb. adminiſtrandis ita exerceas, vt quod ſpero, & Reipub. Chriſtianæ dignitas per te retineatur, et tui gloria nominis augeatur, & tibi ipſe magis magisq; debeam. Dat. xvii. Calen. Mart. Anno tertio. Florentia.

HELVETIIS VIRO

RVM OCTO.

28

GRATIſſimæ mihi veſtræ literæ fuerunt: quibus me certiorem feciſtis, vos meis hortationibus impuſos cum Franciſco Rege Gallorum amicitiam contraxiſſe, ſædusq; percuſiſſe: eaq; de re veſtram in me pietatem, quam pulcherrime oſtendiſtis, & propenſos ad pacis ſtudia concordiamq; veſtros animos vehementer

Tt 3

probo,

probo efferoq₂ magnis et verisimis laudibus. Spero enim fore, vt vestra ea cum Rege illo inita beneuolentia & coniunctione admoniti reliqui nostri Reges ad communem pacem, quam velle omnes atq₂ optare tantopere debemus, conciliandam faciliores & lubentiores conueniant, eaq₃ statuunt, qua ex vsu dignitateq₃ Reipub. maximopere sint futura. Hortor autem vos, amantiissimeq₃ commonesacio, in eam curam cogitationemq₃ incumbatis, id enitamini, vt reliqui etiam vestra nationis populi eandem pacem, idem sœdus conficiant, conglutinentq₃ cum vobiscum quidem sese suosq₃ animos: ne dum eiusdem corporis partes atq₃ membra contraria inter se pugnantiaq₃ tendunt esse, existimationem apud omnes homines vestram incredibili virtute partam imminuât, & opes ipsa viresq₃ vestra discreta atq₃ dissociata debilitentur: tum certe etiam cum Romana re atq₃ nobiscum: vt quam antehac Dei Opt. Max. Ecclesia maiestatem contra labefactare illâ atq₃ proterere imprudenter aggressos vestro sanguini non parcentes sapenumero protexitis, eadem in posterum per discordiam disidiaq₃ vestra nullam à suis hostibus offensionem, nullam insignem notâ accipiat: vosq₃ omnes & vestra natio vniuersa tam præclara, tam fortis, tam semper huius certe Imperij Romanorumq₃ Pontificum studiosa, cōsentiens secum ipsa atq₃ vnanimis in eisdem studijs maneat: qua quidem studia multum vobis dignitatis multum autoritatis & pepere-runt iam, et sunt profecto, si neq₃ in vestris inter vos sententijs, neq₃ in huius reip. obseruantia infirmi labantesq₃ eritis, etiam deinceps paritura. Ceterum quod ad Cardinalem sedunum attinet, ita illi scribimus, vt sperandum

dum vobis sit, ipsum quidem amantissimis nostris et consilijs & precibus permotum vestra posthac concordia studia non impediturum. Nihil autem eorum prætermittā tum hac ipsa, tum cæteris in rebus, quæ ad vestros animos coniungendos & consociandos esse vsui vel ipse per me cognoro, vel à vobis admonebor. Quod vt faciatis, literasq; ad me quamcreberrimas omnibus de rebus mittatis, sanè peruelim. Dat. XVI. Cal. Mart. Anno tertio. M. D. XVI. Florentia.

MARCO CARDINALI

SEDVNO.

29

CERTIORES nos per literas fecerunt Heluetiorum Legati vicorum octo nobiscum fœderatorum, qui in oppido, Bergensi conuenerant, se, quo facilius nos communem omnium Christianorum concordiam inire, necessariamq; in Turcas protectionem parare atq; conficere possemus, suas cum Francisco rege Gallorum similitates atq; inimicitiam deposuisse: neq; dubitare, quin consentientes statim vnà cum ipsis futuri ea in re fuissent reliqui eorum fœderis socij: nisi tu eis impedimento fuisses tuisq; eos studijs à proposito retraxisses. Deq; eo grauius apud nos sunt conquesti: vtpote qui prauideant, si, quæ optas quaq; conaris, effeceris, nouos bellorū in Christiana rep. motus magna inter ipsorum societates dissidia, grauissimasq; breui tempore dissensiones futuras. Quæ quidem nobis omnia incredibilem molestiam attulerunt, fortissime illius nationis consensum atque concordiam, & Christianorum Principum vnanimem præclarum illud ad bellum conspirationem summo iam pridem studio desiderantib. atq; spectantibus. Quamobrem

has ad te statim literas duxi dandas : quibus te commo-
 nefacerem atque hortarer ab incepto desisteres : quietiq;
 potius & tranquillitati : quàm bellorum & discordia-
 rum fouendis inijs incendendiq; animis tete dares :
 cogitaresq;, quàm te deceat cum à nobis dissentire atq;
 in alia omnia discedere , qui pro tua dignitate vnà no-
 biscum Romana reip. curam sustines , tum Heluetiorum
 nationem tam egregiam, ex qua oriundus es, concordia
 praesertim cupidam velle dissociare atq; dirimere. Quod
 si tu vel priuatus omnino, vel alienus homo esses, deberes
 tamen & cum reip. voluntate Romanq;, Pontificis stu-
 dyis consociare studia & voluntatem tuam, et velle for-
 tem praecalamq; gentem illam & populos concordēs
 potius inter sese esse, quàm bellis intestinis laborare. Ni-
 hil est enim tam alienum à boni viri prudentiq; hominis
 consilijs, quàm, quæ coniuncta pacis & beneuolentiae stu-
 dyis praestat esse: ea cupere dareq; operam, vt bellis et dis-
 sensionibus conterantur. Cum verò & vnus sis ex meis
 ipsis fratribus E. R. Cardinalibus, et in Heluetiorum ter-
 ra Heluetijs parentib. atq; maioribus genitus, vide, quā
 de te hominum opinionem sis excitaturus, cum & à no-
 bis atq; à rep. dissentias, & ea tractes, quibus Heluetio-
 rum natio, quæ te progenuit, à pace atque concordia ad
 arma seditionesq; conuenitur. Quanquam id quidem et-
 iam mouere te plurimum debet, quod in eo vniuersa rei
 Christianæ p. male consulis: quæ quidem maxime in Hel-
 uetiorum & inter se concordia, & cum re Romana con-
 iunctione, tanquam in optimo totius spei rerum bene ge-
 rendarum fundamento atq; initio, nititur Neq; à me il-
 lud quoq; silebuur, amorem erga te meum, quo te sem-
 per

per fraterne colui; veteremq; beneuolentiam mereri, vt ne nostris conatibus, praesertim cum omnium Christianorum bono atq; salute coniunctis ad pacem otiumq; tendentibus ire obuiam statuas, aduersariumq; te pares. Quod ne pergas facere, atq; vt verborum Domini memor, qui pacem nobis discedens commendauit, pacem et concordiam nationis tuae iniri coeptam ne impediās, per huiusce reipub. dignitatem, cuius esse propugnator in primis debes, & mehercule consuesti, perq; eam, qua Christianus es, religionem, abs te magnopere quaeso & postulo. Id si feceris, & ipse tuorum in me officiorum & plurimorum neq; sanè leuissimorum memoriam nunquam proiciam: & dignitas tua principem apud me curam locumq; semper obtinebit: & facies quidem ex usu cum omnium hominum, tum tuorum maxime ciuium, sed certe atq; in primis tuo. Dat. XVI. Calend. Mart. M. D. XVI. Anno tertio. Florentia.

IOANNI FRANCISCO
PICO MIRANDVLAE

DOMINO.

30

EGIT mecum per internuntium suum Francisco Triultia, quae Ludouici fratris tui vxor fuit, grauissimis mehercule querelis: cum se diceret intolerabilibus à te iniurijs quotidie affici: qui bona & fortunas ad se suumq; filium spectantes intercipias ruptis spretiq; stipulationibus, quas vtrig; Matthaeum Cardinalem Gurcensem autorem sequuti probastis. Itaque precibus omnibus petijt, vt se viduam mulierem suumq; filium pupillum fratris tui filium abs te spoliatum iri ludibrioq; esse ne permitterem. His auditis cum internuntium item tuum ad-

It 5

missem,

missem, is apud me de Francisca ipsam ferè verbis est conquestus: atq; ab illa tum intercipi fortunas tuas, tum non stari pactis Gurcensianis longa constantiq; oratione differuit, opemq; meam atq; auxilium implorauit. Ego quidem, cui familia sane vestra magna cura semper fuit, agerrimeq; fero disceptationes eiusmodi atq; dissidia inter vos exerceri, te, quem quidem, cum vir sis, & bonarum artium sacrarumq; literarum excellas studijs, decet etiam foeminis & prudentiorem esse, & ab inferendis iniurijs alieniore, primum atq; precipue hortor, si lapsus in aliquo es, pactaq; illa vestra lesa abs te preteritaq; sunt, velis meo rogatu & ablata restituere, & in posterum curare, nequis eo nomine conqueri de te iure possit. Quid enim facere illos oportet, qui obscuri & sine nomine sineq; villo cultu literarum sunt: cum doctos & philosophia diuinarumq; rerum scientia praeditos homines, & praeclaros ac per illustres viros videant tam turpiter labi tamq; acerbe delinquere non in alienos, sed in suos? Hoc autem, quod te hortor, quodq; te facere est equissimum, vt libentius facias, scire te volo hac me omnia per literas à Francisca ipsa petere, quæ his abs te literis peto. Quare tuum erit dare operam atq; efficere, ne nos quicquam abs te eiusmodi frustra petijisse videamur: neue cogamur asperius aliquid in te, quam vellemus quamq; consuetudo nostra fert, eo nomine statuere. Dat. sexto Cal. intercalares priores. M. D. XVI. Anno tertio. Florentia.

FRANCISCAE TRIVLTIAE
CONCORDIAE DOMINAE. 31
ET longum apud me sermonem, & plenum querel-
larum

larum grauissimarum habuit Ioannis Francisci Pici Mirandula, qui viri tui frater fuit, procurator ipsdem ferè verbis, quibus antea internuntius apud me tuam causam tuam egerat: se scilicet non vnus à te neq³ leuibus contumelijs esse vexatum: dum ea, q³ sui iuris sunt, vel furtim subripis, vel tenere intercipis, & pacta Cardinalis Gurenensis autoritate omnibus de rebus inter vos confecta & sancta pro nihilo habes. Itaq³ petijt à me, ne sibi fraudi esset, si ipse quoque in te eiusmodi aliquid admitteret, quod tua in sese temeritatis impudentiaq³ cursum atq³ impetum refrenaret. Quibus intellectis rebus facere non potui, quin animo perturbarer, cum mutuas esse inter vos iniurias pactorumq³ transgressiones cernerem. Quare cum Ioanni Francisco literas dederim diligentissime quidem scriptas, vt tuis postulatis & querelis satisfacere: idem quoq³ statui ad te scribere. Itaq³ te hortor, ac primum quidem, vt illud cogites, æquius profecto esse te foeminam, etiam si offendare, vel aliquid ei permittere, qui viri tui frater fuit, vel dissimulare te offensam esse potius, quàm velle aut iniurias vlscisci, aut ius tuum vsquequaque persequi. Nihil est enim in muliere laudabilius continentia, placabilitate, lenitate, nihil audacia temeritateq³ putidius. Deinde, vt si quid contra pacta vestra ablatum à te aut à tuis ex illius bonis est, id ei omne reponas atq³ restituas. Deniq³ vt quibus semel te pactis Cardinale statuente obligauisti, ijs omni ex parte des operam vt stes, prestesq³ in posterum ea omnia tam diligenter, vt merito apud me conqueri de te nemo possit. Id si feceris, & quieti prospexeris tua, & filij tui saluti optime consulueris, & mihi curam eripueris,

durius

durius in te, atq₃ à mea in vos beneuolentia & consuetudine alienius vt huic occurri malo possit, quippiam cogitandi. Dat. VI. Calend. intercalares priores. M. D. XVI. Anno tertio. Florentia.

FRANCISCO GONZAGAE

MARCHIONI MANTVAE.

32

CONQUESTA grauius apud nos est Franciscæ Triultia, quæ Ludouici Pici Mirandula vxor fuit, de Ioanne Francisco Pico Mirandula viri sui fratre: à quo se ait plurimis maximisq₃ iniurijs & contumelijs premi, dum stipulationibus inter se atq₃ illam Matthæo Cardinali Gurcensi autore initis nequaquam stat, sed iura omnia conuentionesq₃ perturbat: petijtq₃ à me, vt suæ filijq₃ sui incolumitati pro mei muneris officio consulereim: ne quotidie ipsa mulier vidua eiusq₃ filius puer patre orbatus in fortunarum suarum salutisq₃ discrimen per Ioannis Francisci avaritiam & crudelitatem adducerentur. Idem subpostea Ioannes ipse Picus fecit, cōquestusq₃ de Franciscæ eadem ferè attulit petens à me, vt mulieris audaciam importunitatemq₃ retunderem. Quæ cum mihi essent permolesta: totam enim illam gentem atq₃ familiam & amo tampridem, & tueor: tædi ad vtrunq₃ literas, hortatusq₃ eos sum, inferendis inter se damnis et offensionibus modum statuerent, concordiamq₃ Cardinale statuente seruari vtrinq₃ iussam ne violarent. Peto autem abs te, vt pro ea, quæ apud illos polles autoritate, cum illorum oppidi dimonis tuæ fines pertingant, teq₃ ipsi vnum vereantur planè atq₃ suspiciant: des operam, vt ea familia paci & quieti & bonis artibus potius, quàm dissidio et inimicitiarum seminibus & irritandis animis studeat,

studeat, praestetq₃ vterque eam fidem, quam pepigere. Confido enim si tu illos commonefeceris, fuerisq₃ interminatus te vtrisq₃ succensurum, si pergent inter se lacerare: ipsos facile quieturos, ad officiumq₃ redituros. Dat. sexto Cal. intercalares secundas. M. D. XVI. Anno tertio. Florentia.

ODONI LAVTRECHAE

PRAEFECTO MEDIOLANI. 33

IOANNEM Franciscum Picum Mirandulam doctum hominem & pereruditum cum ipsum, tum Franciscam Triultiam, quae Ludouici Pici Mirandulae vxor fuit, eumq₃ filium in huius Reip. tutela me Pontifice susceptos paterno amore atq₃ beneuolentia iam pridem tueor. Eos, dum magnopere inter se dissiderent, Matthaeus Cardinalis Gurcensis pactis quibusdam & stipulationibus, quibus stare tenerentur, initis firmatq₃ ad concordiam reduxit. Eis ipsos non acquiescere hoc tempore intelligo, sed dissidere inter se, inferriq₃ ab vtrisq₃ in alteros iniurias magno cum illius familiae non solum dedecore, sed planè etiam detrimento. Scripsimus sanè illis nos, quemadmodum quidem erat scribendum, ea de re, vt eos ad bene atq₃ concorditer viuendum reuocaremus. Quoniam autem exploratum nobis est, quantum ipse auctoritate valeas tum apud familiam omnem Triultiorum, quae tua in prouincia est, tum apud Ioannem Franciscum ipsum: te hortor, velis eos commonefacere, à pactis atq₃ conuentionibus, vt diximus, initis ne recedant, amentq₃ inter se potius, quàm se suasq₃ opes inferendis iniurijs coterant. Id si fecerint, te illos prudenter fecisse esse existimaturum, pluriq₃ facturum: si non fecerint, daturum operam,

operam, vt sua ipsos stultitia improborumq; consiliorum aliquando pœniteat. His atq; talibus monitis non vereor, quin egregia familia in officio contineatur. Mihi certe feceris gratissimum. Idq; vt facias, abs te peto. Datum sexto Cal. intercalares secundas. M. D. XVI. Anno tertio. Florentia.

ENNIO EPISCOPO VERV-
LANO APVD HELVETIOS

Internuntio.

34

SCRIPSI ad te prioribus literis post fœdus à me cum Francisco Gallorum Rege initum, ita te apud Heluetios fœderatos gereres, vt Regis animum nulla in re procurationeue offenderes. In quo tametsi pro tua prudentia & fide morem à te mihi gestum putem: Regj tamen ministri suspitionem illam priorem de te non abiecerunt. Quamobrem censeo à conuentibus istis publicè proximeq; celebrandis prorsus abstineas, abdasq; te potius in aliquem deuium & priuatum locum, ex quo exploratum illis sit te ne cogitare quidem quippiam contra Regis voluntatem. Nam aggredi & moliri quid poteris? Dat. prid. Cal. Mart. Anno tertio. Roma.

ISABELLAE ARAGONIAE BA-
RIONIS DOMINAE.

35

ACCEPI de Ioanne Iacobo Lamello equum missum abs te mihi & pulchrum quidem, & perornatum, & quoniam vti eo iam cœpi, Qualem ad me commode vehendum maxime idoneum habere cupiebam. Itaq; scito tuum mihi munus & gratum & iucundum accidisse. Quod verò attinet ad petitionem tuam in ornando eo, quem nobis idem Lamellus tuis verbis commendauit, dabimus.

bimus, cum se occasio nobis obtulerit, profecto operam, ut intelligas tuas apud nos commendationes plurimum valuisse. Dat. quarto Non. Mart. M. D. XVI. Anno tertio. Roma.

ODONI LVTRCHAE PRAEFECTO MEDIOLANENSIVM. 36

REDEVNTI ad te Minioni, quem tuis cum literis ad me miseris, has ad te literas dari volui: quibus tibi significarem, mihi quidem displicere non potuisse me satisfacere petitioni tuae de monasterio Claruallensi propter eas rationes, quas ad te proximis diebus scripsi. Quoniam autem confido non defuturas mihi occasiones ornandi tuos, dabo quidem operam, ut intelligas regis ipsa experiare, tuas apud me commendationes multum valuisse, auctoritatemque tuam, quemadmodum quidem mea & cum Rege tuo benevolentiae & de tuis excellentibus virtutibus opinioni maxime convenit, à me fieri plurimi. Dat. quarto Non. Mart. M. D. XVI. Anno tertio. Roma.

LA VTRCHAE PRAEFECTO MEDIOLANENSIVM. 37

MITTIT ad te Iulius Cardinalis Medices frater patruelis meus procuratorem suum, ut in causa monasterii Clareuallensis, quod ei nuper contulimus, tuo auxilio ea conficiant, quae agenda illi sunt: quemadmodum ab ipso intelliges. Qua de re literas ad Regem tuum dedi: nec vereor pro nostra in illum benevolentia, proque recentibus ipsius Cardinalis totiusque nostrae familiae in regem studiis, quin ea mea collatio grata illi probataque sit futura. Nunc autem his de causis cum existimem

mem eam te amanter rem administraturum, minus diligenter te hortor, hortor tamen, & erit mihi sane gratissimum, ut efficias, ut Cardinalis procurator id, quod petet, ex sententia consequatur. Dat. quarto Non. Mart. Anno tertio. Roma.

IO ANNI PAVLO

BALIONI.

38

VENERAT proximis diebus Romam Alfonso Cardinalis Petrutius vocatu meo: quod quidem feceram, ut disceptationes & controuersia, quas habet cum gente ipsa sua, me autore sedarentur & consopirentur. Cumq; is nobiscum mensem integrum prope fuisset, vellemusq; iam planè omnia ex eius sententia statuere, nobis non salutatis repente profectus est: cum tamen nos ea profectio abitusq; non lateret. Quoniam autem certior factus sum, versare illum animo, ut, si qua ratione poterit, suæ patriæ otium perturbet, conuellatq; eum Senarum statum, qui nunc est: fidere enim plurimum in Perusinarum quorundam auxilijs: tametsi puto fore neminem eo in oppido, qui cum mihi & huic Reipub. iniuriam facere cogitantibus se coniungat: hortor tamen studi se te, scribas tuis, non id solum ut ab eiusmodi scelere se abstineant, quod eos per se facturos facile crediderim, sed etiam ut absterreant contineantq; alios: si qui erunt, qui id moliantur: eaq; omnia facias, quæ de Laurentio Medice fratris mei filio Vrbinatium Duce operapretium esse abs te fieri & curari latius intelliges. Dat. tertio Non. Mart. Anno tertio. Roma.

PETRI

PETRI BEMBI EPI
STOLARVM LEONIS DECI
MI PONT. MAX. NOMINE
scriptarum.

LIBER XII.

IACOBO BANNISIO MAXI
MILIANI ROMANORVM
Regis ab epistolis.



T antea te paterna beneuolentia sum
complexus, atq; vti virum prudentem et
huius Reipub meiq; studiosum hominem
inter illos, qui mihi maxime chari &
probatum sunt; libenter habui: & nunc
multo sane vberius atq; prolixius idem mihi est facien-
dum puto, propterea quod Latinus Iuuenalis familiaris
meus istinc rediens de tuis in me remq; pub. officys ea
rexit, quae mihi quidem gratissima iucundissimaeq; ac-
ciderunt. Itaq; volo te scire, eius me rei memoriam nullo
tempore obiecturum. Hortor autem praeerea te idem il-
lud quod pro tua probitate non dubito, quin tua sponte
sis facturum: vt quoniam ad Maximilianum regem tuum
Bernardus sanctae Mariae in porticu Cardinalis Legatus
proficiscitur ad mea & Christianae Reip. negotia pro- u-
randa, velis ei praesidio esse, cum prudentia & consilio, tum
vero studio & diligentia tua: vt quae tractare atq; age-
re incipiet, tua ope fultus etiam explicet. Ipse porro cuius

causam ages, Dominus tuam in eo pietatem intusbitur, eamq; tui patrocini mercedem constituet, quam nulla vnquam eripiet dies. Nos quidem certe, cum primum se occasio dederit, aut etiam quotiescunque se dederit, bene grati erga te animi praeclara sumus signa atque indicia ostensuri. Dat. tertio Cal. April. M. D. XVI. Anno quarto. Roma.

H E L V E T I I S.

2

QVAE ad me proxime de componendis Maximiliani Roman. Imp. desig. & Francisci Gallorum regis controuersis sedandoq; bello scripsistis, ea legi oculis libentissimis, vosq; vti & prudentes viros & religione praeditos homines & illorum Regum peramanteis ea de re magnopere laudandos puto. Nihil enim neque sapientius per vos fieri potuit, neque nobis gratius & iucundius significari. Deo etiam Opt. Max. qui pacem a nobis atq; concordiam coli amariq; in primis vult, satis vos in eo facere arbitror. Quare nulla quidem in re vobis deero, in qua tam iusta vestra petitioni, tamq; pia, tam cum Domini voluntate coniuncta opitulari prestoq; esse auctoritas cura diligentia studium labor etiam meus possit. Reliqua ex Ennio Episcopo Verulano cognoscetis. Datum tertio Non. April. M. D. XVI. Anno quarto. Roma.

L V D O V I C O P A N N O N I A E

B O E M I A E Q V E R E G I

P V E R O.

3

Ex literis Thomae Cardinalis Strigoniensis Legati intellexi Vladislaum Pannoniae Boemiaq; Regem patrem tuum magno cum illorum populorum maerore & luctu

luctu vivere defuisse. Quo sane nuntio vehementer sum perturbatus, magnūq; vt debui, cepi dolorem ex amantissimi mei prudentissimiq; Regis morte, præsertim tam alieno Reipubl. Christiana tempore: existimōq; te quidem primum, qui in tam tenera etate patrem tuum maximū clarissimūq; virum amisisti, reliquos deinde istorum Regnorum viros principes, Regna deniq; ipsa et populos magno esse & presidio & ornamento spoliatos, remq; hanc pub. beneuolentissimi in se animi Rege fidelissima societate, maximis auxilijs eo extincto planè carere. Verum cum eisdem literis certior sim factus Regnorum te istorum à patre tuo heredem fuisse institutum, cuius indoles egregium iam specimen magnamq; excellentis virtutis spem præbeat, statui mihi à luctu atq; molestia esse temperandum. Deumq; Opt. Max. rogandum, & vt illum mortali exutum corpore terrenisq; compagibus cœlestem in patriam inter beatissimas fortium optimorumq; virorum & sanctissimorum hominum animas conuentumq; recipiat: & vt te, cui quidem planè puero duo Regna maxima iure recteq; obtigerunt, tantum polleere bonis studijs optimisq; artib. velit, vt expectationem de te nostram tuorumq; populorum vota æquare atque implere facile possis: euadasq; in eum Regē, qui quidem in timore Domini eruditus omnibus Christianis populis atq; gentibus multum gloriæ multumq; Roboris sis allaturus. Quod profecto animo libentissimo et facio iam, & sæpe in posterum faciam: speroq; fore vt me pro te pie se atq; suppliciter precantem Dominus audiat. Et quoniam idem Legatus scripsit ad nos patrem tuum extremo vitæ suæ tempore mihi te commendauisse: omnes meas opes

omnem auctoritatem ad te fouendum ornandumq; polliceor: teq; iam in charissimi mihi filij locum agnosco atq; recipio, bonisq; verbis & atque omnibus & complector & prosequor. Tu vero ipse optimi viri patris tui maiorumq; tuorum fortissimorum & clarissimorum Regum gressibus atque vestigijs inambulans Regnum tuum à Dei pietate & cultu, atque ab huius Reipub. obseruantia & studio auspicare, dàq; operam, vt non minus religione, quàm etate, neque magis corporis viribus, quàm virtutibus animi subcrescere tui te populi videant. Datum prid. Non. April. M. D. XVI. Anno quarto. Roma.

EPISCOPO VESPRIMIENSI:

TVM CAETERIS SINGVLIS

IN PANNONIA MA-

gnis viris.

4

SCRIBIMVS ad Bernardum cantorem Agriensem internuntium nostrum ea omnia, quæ per illum tibi hoc tempore significanda esse duximus nostris verbis. Hortamur itaq; te, vt pro nostra in te paterna sane beneuolentia, expectationeq; ea & spe quam de tua probitate magnitudineq; animi, & religione, ceterisq; tuis virtutibus magnam atque mirificam semper habuimus, des operam, vt quibuscunque rebus poteris, istorum Regnorum quieti & tranquillitati per te consulatur: auctoritateq; tua, qua multum polles, ad eam rem cum huiusce Reip. dignitate, quæ quidem in tua erga se illustri voluntate & studio libentissime conquiescit, maxime omnium atq; in primis vtare. Erit id cum per se præclarum, & tibi laudi atque gloria, tum certe egregia isti fortissimeq;

nationi

nationi & populo apprime salutare. Dat. Non. April.
Anno quarto. Roma.

THOMAE CARDINALI

STRIGONIENSI.

5

QUANTVM mihi molestia, quantum mœroris
Vladislai Pannonia Boëmiæq; Regis mors attulerit, de
qua tuus ad nos literis est allatum, ex mea in illum chari-
tate atque beneuolentia tibi quidem vni omnium maxi-
me perspecta & cognita per te ipse facile potes existima-
re. Videor autem mihi in illum non magnum et pruden-
tem modo Regem, sed optimum etiam filium meiq; ob-
seruantissimum amisisse, quo tempore propter Turcarum
insidias adiectumq; ad ista Regna semper animum ma-
xime illum viuere oportuisset. Itaq; cum mea & certe
istorum populorum, vel potius, vniuersa Christiana Reip.
causa vehementer dolorem, angeretq; prope animi om-
nibus articulis & sensibus, illa me res non mediocriter
est consolata, quod is, vt scribis, Ludovicum filium suum
mirificæ indolis magnaq; spei puerum Regni heredem
sibi reliquit. Qui quidem si non satis dum propter ætatem
sit ad id regendum & procurandum idoneus: habet cer-
te non paucos excellenti virtute, singulari prudentia vi-
ros principes, quibus nitatur, quorumq; consilijs, & ipse
recte institui, & eius Regnum administrari commode
atq; feliciter possit. Quamobrem sedato, quantum potui,
mœrore meo & luctu, consilioq; cum meis fratribus. E.
R. Cardinalibus super eare mature amantiissimeq; habi-
to tibi quidem negotium damus, primum, vt Regem pue-
rum saluere iubeas nostris verbis, affirmesq; illi salutem
eius & dignitatem magna cura nobis fore, nosq; singu-

los in eo & fouendo, et ornando Vladislai patris eius curam et studium plane gesturos. Deinde vt reliquos istius Regni Principes quo maiore animorum nostrorum ostensione poteris, hortere, velint, quemadmodum quidem confidimus te atq; illos esse facturos, in eam precipue cogitationem incumbere, nihil vt inter vos disidiū, nihil omnino discordia suboriatur, sed vno omnium vestrum consensu & voluntate sedate atque amanter Regni & Regis pueri res, prouentus, otium, negotium procuretur. Id erit & prudentia vestra dignum, & nobis omnibus in primis gratum sic, vt iam nunc libentissime profiteamur, eius rei gratiam vobis singulis aliquando etiam relatu-ros. Caterum quod ad municipiorum illorum curam & tutelam attinet, quæ municipia isto in regno vicina oppositaq; Turcis sunt, atque in summa rerum omnium inopia versantur, celerisq; auxiliij magnopere indigent, ea in re omnem meam curam adhibebo: daboq; operam, vt eis omnibus in tempore succurratur. Itaque volo bono vos animo esse, neque vereri, quin à me omnia paterna in vos officia procurationesq; profiscantur. Quod quidem vt iam re fieri perspicere omnes homines possint, mittere istuc quamprimum decreui Robertum Archiepiscopum Regium familiarem meum illustri ortum gente, probumq; ipsum hominem, & doctrinæ studijs præditum, quem valde amo, tecum vnà vt à Regis pueri latere nunquam discedat, auctoritatemq; illi offerat nostram, quibuscunque in rebus & opus erit, & oportebit: ne is tam illustrem patris sui de sese commendationem apud nos parum valuisse suspicari possit. Scripsi etiam Bernardo Cantori Agriensi internuntio meo, vt cum istius

istius Regni magnis viris, quos ad singulos etiam literas dedi, diligenter ageret, vt in Regni negotijs procurandis concordiam in primis exercerent: vt rectius atque commodius publica per eos vtilitati regiæq, dignitati consuleretur. Iubebam autem tum has ipsas, tum cæteras, de quibus dixi, literas eiusmodi tabellario dari, qui celerrimè iter faceret: vt ante conuentus vestri tempus, qui ad diem nonum Calend. Maij est futurus, ad te perferrentur. Datum octauo Id. April. Anno quarto. Roma.

CAROLO HISPANO

REGI PVERO.

6

QVOD Hieronymo Vicco excellenti virtute, mirifica diligentia, singulari fide viro, qui Roma Ferdinandi regis aui tui legatum multos annos gessit, velle te hoc tempore vti scribis, habereq, illum eodem apud me loco, sane gaudeo. Nam & ego illum valde amo, gratissimæq, mihi eius consuetudo semper fuit: & tu hominem ad eam rem magis idoneum habere nullum poteras. Habes autem eo in munere multa cum laude diu versatum, & cui vrbs Roma notior, quam vlli domus ipsa sua sit: qui neque fallere propter probitatem, volet, neque falli poterit propter vsum rerum atque prudentiam. Itaq, verissimum de illo testimonium Antonij Stunigæ magni Castelle prioris, de quo scribis, plurimum apud te valuisse valde lator. Hortor autem te: quem quidem & amari semper antea, & nunc pluris etiam facio, cum quidem ad priorem in te charitatem meam Regij etiam nominis tui dignitas maiestâsque sit adiuncta, vt, quo horum ipsorum in te beneficiorum

Domini bene memor videare, velis in ipsius Domini cultu & amore, quemadmodum quidem intelligo facere te vt in huius Reip. obseruantia amantius in dies atq; ardensius versari, addicereq; animum in hoc ingressu in adolescentiam tuo ad omnium hominum pacem atq; salutem, quantum in te erit, erit autem semper plurimum, procurandam. A me certe omnia boni amantiq; patris offi- cii in te proficiantur. Quemadmodum cum Vico ipso, de quo, vt ad initium reuertar magnopere probo consilium tuum, his de rebus omnibus sum loquutus. Dat. septimo Id. April. Anno quarto. Roma.

SIGISMUNDO POLO-

NIAE REGI.

7

CUM Vladislai Pannoniae Boëmiaq; Regis fratris tui mors, eiusq; filij Ludouici nimis tenera ad perferenda onera duorum Regnorum aetas, aliquot nos dies moerentes suspensosq; habuisset: de fratrum meorū E. R. Cardinalium sententia Robertū Archiepiscopum Reginum designatum familiarem meum, quem propter familiae splendorem & singularem ipsius doctrinam atq; virtutem ita complector, vt sit mihi plane charissimus, legavi, quem illuc quamcelerrime mitterem: vt esset, qui vnā cum Cardinali Strigomensi Regi puero meo nomine adesset: atq; ad pacem & otium eius regni procurandum auctoritatem adderet meam: vt quantum pro tempore possem, puerum quem quidem nobis pater extremo vitae suae tempore diligentissime amantissimisq; verbis commendauerat, & pueri regnum ornarem atque protegerem. Volo enim omnes homines intelligere, fratrem meum fortem virum ei prudentem à religione prae- ditum homi-

hominem cum fruente vita dilexisse, ium eius commenda-
 tionem morientis non neglexisse, Regnorumq; illo-
 rum & nationum fortissimarum & bene de re Christia-
 na meritum, quam delui, curam et rationem habuisse.
 Cui quidem Roberto, cum maturare, quantum posset,
 profectionem suam mandauissem, haec ad te literas iussi
 dari certo tabellario & celeri: ut te ante omnibus de re-
 bus docerem, quam is Pannoniam attigisset. Ego si com-
 mendare tibi fratris tui filium velim, diffidere videar.
 probitari tua: cui sane non diffido: est enim mihi quidem
 probatissima. Sed tamen facere non possum, quin tibi il-
 lum commendem. Vale. Dat. tertio. Id. Apr. Anno quar-
 to. Roma.

VITERBIENSIBVS.

8

Cum nuper intellexerim Piratarum Punicorum
 iustam classem ad vicina vobis littora oramq; istam ma-
 ritimam aduenire, vos quidem vnos maxime omnium
 & commonefacere & hortari volui, paratus ut vos ala-
 cresq; ad ea munera obeunda, curas laboresq; capeffen-
 dos prestaretis, quæ munera Franciscus Pius Hetruria
 Prolegatus vobis mandauerit, quamobrem tam inopi-
 nato teterrimorum hostium & latronum aduentui atq;
 impressionibus iri obuiam possit. Ea in re si quemadmo-
 dum quidem spero, deq; vestris confido studiis, sic egeri-
 tis: non vos quidem ipsos plus amauero. Qui enim fieri
 potest, nihil cum sit meo perueteri erga vos amore cha-
 ritateq; ardentius? sed plus amari à me meritos esse vos
 facile profitebor. Dat. sexto Calend. Maias. M. D. XVI.
 Anno quarto. Roma.

FALISCIS.

9

Va 5

Qvo-

QVONIAM renuntiatum nobis est, Pœnorum, qui Piraticam exercent, non parvam classem in mari nostro esse, vestraq₃ ad littora atq₃ ad Centuncellas cui sum tenere, mando vobis, vt omnibus in rebus, quæ à Francisco Pittæ Hetruriæ Prolegato vobis imperabuntur, sine vlla ei mora pareatis, non secus, ac si ipsis à nobis presentibus iuberemini: ad vestram enim & vestrarum rerum incolumitatem salutemq₃ pertinebunt. Dat. sexto Cal. Maias. Anno quarto. Roma.

GRAVISCIS.

IO

ALLATVM est ad me satis magnam Piratarum classem à vestris littoribus non multum abesse. Quare vobis mando, & vt oppidum istud, quo celerius fieri poterit: communicatis, ne imparati ab hostibus paratissimis offendamini: & vt Francisco Pittæ Hetruriæ Prolegato omnibus in rebus vestram operam nauandam statuatis, quis ille per vos fieri iusserit, non secus, ac mihi ipsi. Volo autem vos bono animo esse. Eorum enim quæ ad vos oppidumq₃ vestrum defendendum pertinebunt, nihil prætermittam: vt intelligere possitis vestram incolumitatem mihi magnæ curæ esse. Dat. sexto Cal. Maias. Anno quarto. Roma.

FRANCISCO PITTÆ HETRURIAE PROLEGATO. II

QVOD me de Piratarum Classe celeriter monuisti, quam appropinquare nostris littoribus scribis, diligentiaq₃ tua & vigilantia, quam adhibes, ne imparati offendamur, mihi vehementer probatur. Scribimus autem ad ea municipia, quæ in Legatione sunt Marci Cardinalis Cornely: vt quoniam eiusmodi classis in mari nostro est,

est, primum se premuniant, prouideantq³ ne offendi possint: deinde tibi omnibus in rebus, quas fieri per eos & curari voles, ita praesto sint, vt mihi essent, si à me presente iuberentur. Te verò hortor: nam mandare tibi, cum omnia per te facias, nihil debeo: vt pergas quemadmodum quidem coepisti, nulla in re deesse ad istorū popularum salutem incolumitatemq³ protegendam: sic enim & praestabis ipse mihi fidem tuam, & ego te chariorem habebo, et plurius pluriusq³ faciam. Dat. sexto Cal. Maias. Anno quarto. Roma.

FEDERICO FREGOSIO

ARCHIEPISCOPO SA-

LERNITANORVM.

12

GRATAE mihi tuae literae fuerunt, quibus ostendis, si quid aggredi contra Piratarum classem velim eam, quae Italiae oram nuper insedit, infestatq³ Tyrrheni maris littora, te paratum animatumq³ esse cum nauibus longis quatuor, quas ista vrbs deductas & ornatas habet, quod oporteat quoque iubeam accedere: neque vereri, quin ipsa ciuitas nihil sit mihi eiusmodi pro sua in me obseruantia & cultu recusatura. Deq³ ista tui animi propensione & studio mehercule gaudeo. Video enim bonorum ciuium & fortium virorum prouentu hanc Remp. non prorsus inopem factā: cum vigere adhuc quidē in nostris hominibus eiusmodi sensus et cogitationes intelligo. Erit autem eo mihi tua hac liberalitas opportunior, quo celeritate opus est ad rem recte atq³ vt volumus conficiendā. Scribo itaq³ ad Octavianum fratrem tuum Praefectū Genuae eiusq³ oppidi decuriones, velint mihi et eas, quas dis-
sis, quaeq³ in anchoris sunt, triremes nauibus commodare,
& or-

et ornare alteras totidem, ad nosq² mittere: vt communes hosteis nostros eo & tutius aggredi, & celerius opprimere possimus. Te verò etiam atque etiam hortor, rem apud ciues tuos inuies: atq³ in eo multum infumas opera, vt quæ comparanda erunt, quam celerrime comparentur. Erit id mihi apprime atq³ summopere gratum. Reliqua ex literis Petri Bembi familiaris mei ab epistolis, qui te plurimum diligit, cognosces. Dat. tertio Non. Maias. Anno quarto. Roma.

OCTAVIANO FREGOSIO

PRAEFECTO ET DECVRIONI

BVS GENVAE.

13

APPVLISSE ad Italia insulas & littora vobis viri in Punicam Piratarum classem non spernendam, eaq³ infestissima reddere, deripere, depopulari, intellexisse vos aliquando etiam, quàm me temporius arbitror. Eam ad classem vel repellendam, vel si fieri poterit, conterendam, omnem meam curam & cogitationem adhibeo. Sed quoniam ad id & magna classe opus est, & quæ celerrime conficiatur: pro vestra vetere in Rom. Pontifices & Dei ecclesiam pietate proq³ meo in vos paterno amore culto à vobis diligentissime etiam à vobis peto, vt ad hanc rem, quam paro, Italis quidem omnibus in primis honorificam, vobis certe propter periculi societatem etiam salutarem, & eas vestras triremes, quæ instructæ paratæq³ sunt commodetis, & simul ornari alteras totidem quam celerrime imperetis: quibus nauibus cum nostra classe societatis communes omnium nostrum hosteis nobis turpiter insultantes aggredi atq³ opprimere possimus. Ea res vt facilius, confici possit, si me admonueritis, partem

partem stipis ad vos mittam in nautas & milites cogen-
dos nauiusq³ imponendos. Toto vero in apparatu atque
negotio vos oportet vnos tum diligentiam & studium,
tum maxime celeritatē adhibere. Si enim praestolabimur
nihil est cur illos, qui omnia temporū momentis men-
tiuntur, posse nos consequi spem vllam habeamus. Id au-
tem vt animis alacrioribus vobis esse faciendum statue-
retis, petijt à Francisco Gallorum Rege per lueras non
hoc ipsum modo, vt vestras naueis permitteret mihi pra-
sto esse, sed illud etiam vt suam ipse classē cum nostra
classe coniungeret quoad aliquid actum & confectum
esset. Quod quidem illum confido pro nostra coniunctio-
ne, proq³ suo intuenda Christiana re studio libentissimē
esse facturum. Datum tertio Non. Maias. Anno quarto.
Roma.

ABBATI SANCTI

BERTINI.

14

MITTIMVS ad Carolum Hispania Regem Pir-
darum Santesium familiarem nostrum: eiq³ mandavi-
mus, vt Rege salutato te inuiseret, tibiq³ significaret, me
tui memoriam crebro libenterq³ repetere, vt pote boni
hominis et religione pradi, et mei obseruantis, et quem
ego vnice atq³ summo pere amo. Itaq³ ei te meis verbis
alloquenti, deq³ mea in te voluntate plura & certiora
deferenti fidem habebis, tibiq³ persuadebis gratissimum
mihi fore, si te & recte valere, & bene agere intellexe-
ro. Datum sexto Id. Maias. M. D. XVI. Anno quarto.
Roma.

PROSPERO COLUMNAE

CAVIO.

15

LITERAS

LITERAS tuas Decurionibus municipij Acutini & Vicario Episcopi Agnanini scriptas, quibus literis demortui Episcopi bona tuis procuratoribus dari postulas, legi missas ab ipsis mihi, non illas quidem dignas, quæ à te proficiscerentur, & cum iniquas, tum contumeliosas, præsertim in hominem mihi charissimum, quiq; à latere meo nunquam discedit. An tu vnus nesciebas Acutum oppidum & Episcoporum bona non ad te, sed ad nos pertinere? Quamobrem primum quidem paterne te hortor, deinde mando etiam atque impero, ne te causa vlla, modo vllò, colore vllò illis in bonis immisceas, neque animum addas Episcopi aduersarijs male in eum cogitandi: faueas etiam potius præstog; sis eius procuratoribus, qui has tibi meas literas reddiderunt. Quod si ius tibi aliquod ijs in bonis competere existimas, id à me postulato: qui tibi quod rectum honestumq; sit, nulla ex parte deero. Datum tertio Id. Maias. Anno quarto. Roma.

CAROLO HISPAN

NIAE REGI.

16

PROFICISCENTEM ad te Antonium Stunigam Castellæ Priorem dimittere sine meis literis nolui: in quo cum ad generis nobilitatem animi etiam magnitudinem, prudentiam, continentiam, plurimas egregias excellentesq; virtutes adiunctas et consociatas agnouerim: apud nos enim prope biennium in sui prioratus controuersia dum sibi ius fieri postulat, summa cum temperantia & equanimitate, versatus est, : eum dignum existimaui, quem & mea beneuolentia vnica complecterer, et tua pietati diligentissime commendarem. Moram autem

tem eam, quam iudiciorum praeſtituta tempora ſibi de-
poſcunt, illud etiam auxit, quod Ferdinando Rege au-
to quotidianis prope poſtulationibus agente apud me, vt
rem illius et cauſam paululum protrahi permittere: fore
enim propterea, vt dilatione aliqua iudicij interpoſita
Prior ipſe ad concordiam adduceretur: ſententiam iudi-
ciumq; differri aliquantisper rogatu Regis paſſus ſum exi-
ſtimas ipſum concordiae conditiones, quae Regis et aduer-
ſariorum ei nomine proponebantur, non recuſaturum.
Quamquam quidem poſtea cum illū nullas paſſiones ac-
cipere, nullas ſibi leges velle dari cognouiſſem, neq; vllis
conditionibus adduci poſſe, vt ad concordiam ſeſe demit-
teret, iuſi vt cauſa liſq; omnis terminaretur, ad exitūq;
perduceretur. Iis vero in actionibus omnibus biennioq;
toto planè perſpexi id quod mihi gratiſimū proſecto ac-
cidit, ipſum quidem obſeruantiffimū tui eſſe, tuumq; no-
men maxime colere, maximiq; facere nutus ſingulos vo-
luntatis tuae. Itaq; tibi illum commendare iuſtiſſime ſanè
videor tum morum optimorum hominem eximiaq; con-
ſtantia atq; virtutis, tum fidei explorata erga te plana-
q; ſingularis. Gratiſſimum igitur mihi feceris: ſi prater id,
quod Antonium diligere merito eius debes, habebis il-
lum mea cauſa etiam chariorem. Vale, noſq; dilige.
Dat. Id. Maij. Anno quarto. Roma.

L A V R E N T I O M E D I C I

F R A T R I S F I L I O. 17

IOANNIS Iordani Vrſini propinqui noſtri precibus
adductus, charitate etiam, qua illam gentem, vt ſcis, at-
que familiam proſequor, me impellēte, te hortor, vt Vir-
ginum Vrſinum Anguillariae Dominum iſtius Reipubl.

Preſe-

- Praefectum equitum in ea, qua nunc est, conditione dignitateq; retineas, neq; cum missum facias: quem quidem etiam in meliore esse apud te remq; illam pub loco, si fieri posset, magnopere vellem: meamq; hanc voluntatem ipsi quidem exploratissimam esse scio. Itaque sic velim tibi persuadeas, te mihi rem pergratam esse facturum, si curabis, ut Virginii, quam in me spem adhuc quidem positam habuit, ea ne deferatur. Datum XVII. Cal. Iunias. M. D. XVI. Anno quarto. Roma.

IOANNI PAVLO BALIONI,
ET SIPITIANI Dominis.

CUM mihi, quem quidem pacis atq; concordiae suaforem autoremq; esse maxime omnium conuenit, non mediocrem molestiam attulisset ea controuersia, quam de Petri & Grassiani oppidulis obstinata nimis animorum contentione inter vos aliquot iam annos exercuistis: ne semper ysdem in disceptationibus versaremini: quod sine vestro magno mehercule malo, nostri verò prope, ut verissime dicam, contemptu fieri non potest: Laurentium Medicem fratris mei filium Florentinorum exercitus imperatorem delegi quo viriq; arbitro vestrarum disceptationum uteremini: quicq; interea, dum de iure vestro cognoscit, illorum oppidorum possessionem meo nomine capiat: ne peioribus in dies malis grauioribusq; impentis implicemini. Quamobrem vobis singulis mando atq; impero, ut sine vel mora, vel recusatione vlla Matthæo Caurio Laurentij procuratori eorum oppidorum possessionem tradatis, ab sq; ipsi recedatis, sponsonemq; faciatis, per illud iudicio vos staturos & quieturos.

*turos. Secus si feceritis, quo maiore charitate vos ample-
ctor, eo cogar & diligentius & celerius dare operam, ut
meam dignitatem tuear. Dat. XVII. Cal. iun. Anno
quarto. Roma.*

THOMAE FELTRINORVM

EPISCOPO LEGATO. 19

PVTO te non latere quanto studio cum Venetis e-
gerim, ut Christophorum Friapanem Matthæi Cardina-
lis Gurcensis sororis virum captum ab eis sui redime-
rent. Quod quoniam parum successit, neq; velle Venetos
intelligo missum illum propterea facere, quod Iulium
Manfronum eorum Praefectum equitum hostes captum
item à suis, si id fiat, missum se facturos recipiant: multo-
rum valde mihi & gratorum & probatorum hominum
precibus adductus mando tibi, ut tum apud Maximilia-
num, tum cum Cardinale ipso agas, contendas, efficias,
ut conditione aliqua neutri parti graui Iulium liberent
missumq; faciant hostatu meo. Dat. XV. Calend. iun.
M. D. XVI. Anno quarto. Roma.

BOIORVM DVCI PRAE-

FECTO MEDIO-

lanensium.

20

SCRIBITVR mihi non parvam militum manum
extra regis tui ditionem abs te mitti. Ea de re cum nihil
mihi significaueris, non potui non moleste ferre me à te
ijs de rebus esse celatum, praesertim cum intelligerem eos
milites iamprimum ad conturbandum Carpi & Miran-
dula statum tendere, municipiorum multi imprimis com-
mendatorum, nostraq; in tutela etiose atque imparate
quiescentium. Quamobrem cum existinem pro summa

xx

nostra

nostra beneuolentia regem ipsum, ad quem quidem ea de re literas dedi, non permitturum, ut ij, qui nobis commendati sunt ab eius militibus diripiantur: peto à te etiam, primum quidem, ut ab illorum oppidorum impressione tuos milites contineas, quoad aliquid ab rege afferatur: deinde ut de militum itinere, si tibi videretur, cogitationibusq; tuis. quemadmodum quidem nostra coniunctioni valde conuenit, aliquid nobis impartiare. Dat. XII. Cal. Iun. Anno quarto. Roma.

FRANCISCO GALLO.

RVM REGI.

21

RENUNTIATVM nobis est non exiguam tuorum militum manum extra tuæ ditionis fines transgredieremur iter facere. De eo cum neq; ad me scripseris ipse, neque tui qui quidem in Italia sunt, mihi quicquam ministri significarint, affectus molestia sum propterea quod est sane rumor eos tuos milites ad peruertendas Carpi & Mirandulæ res contendere: quæ quidem municipia aliquot anni sunt, cum in meam clientelam tutelamq; sunt recepta. Quare te hortor, ne permittas eos, qui se mihi dediderunt, à tuis militibus vexari, præsertim cum illos constet nulla in re contra te dignitatemq; tuam vel egisse vnquam, vel omnino cogitauisse. Id erit & te dignum, & à coniunctione nostra postulatum, & mihi gratissimum. Dat. XIII. Calend. Iun. Anno quarto. Roma.

BOIORVM DVCI.

22

HERI ad te scripsimus, ut, quoniam rumor erat tuos milites ad Carpi atq; Mirandulæ municipia lacescenda iter facere, velles eos continere, dum sciri posset, quid

quid Rex tuus ea de re fieri vellet. Eas meas literas tametsi confidimus tantum, quantum profecto debent pro mea summa in regem beneuolentia proq; nostra coniunctione, apud te ponderis habituras: tamen increbrescente magis magisq; horis singulis rumore illo & sermone hominum statui Latinum Iuvenalem familiarem meum magnis itineribus ad te mittere, qui coram tota de re diligentius tecum ageret meis verbis. Ei tu igitur fidem habebis, pacemq; & pacis studia, si me audias, plus diliges bellis & turbis omnibus. Dat. ad XII. Cal. Iun. Anno quarto. Roma.

EPISCOPO VESPRI-

MIENSI.

23

REVERTENTI ad te Thomæ Nigro Vicario tuo, qui non solum apud me, sed etiam apud fratres meos E. R. Cardinales publice oppidorum eorum, quæ à Turcis obsidentur, regniq; istius causam, atque in primis tuam grauitè & accurate egit, mandauit, vt te meis verbis saluaret: ac primum tibi significaret, quòd plurimos pro re Christiana labores pertuleris, grauià omnia periculisq; adieris, impensas maximas feceris, nos te efferre maximis et verissimis laudibus, deq; ea optime esse meritum libentissime profiteri. Deinde tibi cognitam faceret diligentiam meam, quam adhibeo, vt tibi tantum auxilij, quantum satis sit ad illa oppida munienda hostesq; propulsandos communi consilio atque opibus quamcelerrime mittatur: vt tuam & istius Regni Christianaq; Reip. dignitatem defendere ac tueri possis. Demum te hortaretur, vt pro tua virtute animiq; magnitudine hostium furorem tandiu sustineres, dum hæc conficerentur, quod

quidem paucis diebus confidebamus fore. Itaq³ bono animo es, optimamq³ spem alere populos istos fortissimos & constantissimos iube, breui se incolumes futuros. Reliqua ex ipso cognosces. Dat. octauo Calen. Iun. Anno quarto. Roma.

FRANCISCO GALLO-

R. V M R E G I.

24

BINAS iam ad te literas dedi, quibus te literis sum cohortatus, vt fessis atq³ labantibus Pannonia rebus propter assiduam in Dalmatas Turcarum impressionem diuturnaq³ nimis bella pecunia auxilio mecum & cum ceteris nostris Regibus pro tua liberalitate succureres. Et quoniam ea res magna sanè diligentia celeritatisq³ indigebat, commonui in primis te, vt quæ tibi agenda esse ea de causa putares, ageres efficeressq³ quamprimum: neq³ committeres, vt elapsa rei bene gerenda occasione, quæ quidem erat perbreuis, tueri postea ab audacissimis hostibus nostris Regnum illud, cum velles, non posses. Eas ad literas postulataq³ nostra, quod te dignum erat, rescripsisti, te scilicet velle facere, quæ proponebantur: itaque ei te rei pro tua portione non defuturum. Quod quidem ego statim Regi Pannonia Principib³q³ illius Regni viris significauī, acciditq³ eis omnibus plane gratissimum. Verum cum nouissime per literas Episcopi Vespri-
miensis Præfecti Croacia Pannoniaq³ Proregis optimi atque fortissimi viri certior factus sim, ipsum quidem in exigua spe esse, posse se vltius Turcarum vim atq³ impetum sustinere: ipsius autem Episcopi Vicarius coram mecum & cum meis fratribus E. R. Cardinalibus prostratus ante meos pedes illorumq³ genibus aduolutus
flens,

flens, fidemq₃ nostram atque omnium Christianorum Regum implorans obtestansq₃ Deos & homines egerit, ne Regnum illud, quod quidem adhuc hostium gladios nostris à iugulis atque cernicibus semper repulit, iri perditum nostra ignavia atque segnitia sineremus: oppidorum enim eorum, quæ à Turcis hoc tempore obsiderentur premerenturq₃ modis omnibus, Iaiæ, Tininij, Clisij, Scardona, eam naturam esse cum propter portus, quos haberent maximos atque tutissimos, tum propter materiam ad naueis adificandas idoneam, qua abundarent, demum etiam propter ipsorum situs atq₃ positus, ita Pannonia atq₃ Italiae opportunos imminenteisq₃, ut vno eorum aliquo in Turcarum potestatem redacto, Pannonia quidem ipsa se tueri nullo modo possit: Italiae autem ora, quæ ad mare Adriaticum est, noctis vnius navigatione eorum clasibus pateat, quibus diripi atque incendi possit. Hæc itaque cum ita se haberent, de eorundem fratrum meorum sententia statui ad te scribere, teq₃ hortari, & rogare, ut quamprimumquamq₃ celerissime saltem quindecies mille nummum aureorum ad nos mitteres: qui vna cum meis alteris totidem illuc transmitteretur: quibus se opibus illa municipia communirent, ne nostris hostibus sese dedere fame ac rerum omnium egestate atque inopia magno cum nostro, nostro inquam te coniungens, reliquorumq₃ Regum nostrorum dedecore et ignominia cogerentur. Plura me ad te scribere hac de re fortasse res ipsa postulat: quæ quidem secum maximum in vtramq₃ partem rerum omnium motum atque faciem trahit. Sed persona, quam sustines, nomenq₃, quod geris, planè non postulat. Ea te mouere etiam tacentibus nobis debent, ut

non magis verbo, quam re tuendiꝫ Christi populis & esse & haberi velis Rex & maximus & Christianus maxime. Quod quidem te facturum & pro animi tui magnitudine, quam et omnes prædicant & ipse agnoui, prog³ tua prudentia, religione, pietate, liberalitate sanè confido. Hæc vero ipsa, quæ ad te scribo, scribo item cæteris Regibus: quos quidem in eo non defuturos puto. Sed te decet: qui & illis maior es, & vobis cum vicinus, tum coniunctus magis, ad tui partes muneris peragendas etiam priorem & alacriorem accedere: ex quo tamen & vberior à Dijs immortalibus gratia & clarior ab hominibus gloria te sequetur. Fratres mei tibi salutem ascribunt. Vale. Dat. Id. Mays. M. D. XVI. Anno quarto, Roma.

MAXIMILIANO ROM.

IMP. DESIG.

25

PROXIMIS diebus à te cum venisset Sigismundus Alberti Legati tui familiaris multa nobis narrauit, quæ libentissime audiuimus quæq; nobis pro summa nostra in te beneuolentia gratissima & iucundissima fuerunt. Quamquam quidem, quod ad te attinet, nunquam sanè dubitauimus, te, qualem consilimus decetq; esse, talem futurum. Sed pupugerant me quorundam hominum voces non tam maleuolorum, quam timidorum, & omnia sua ipsorum natura moribusq; metientium. Quos tamen ipsos nunc valde pœnitet minus recte de animi tui magnitudine, quā par erat, cogitauisse. Sed hæc quidem hæcenus. Sigismundo vero ipsi ad te reuertenti multa mandauit, multa etiam cum Legato tuo sum loquutus, quæ ad te præferri volo. Quare & illius sermoni et huius

lueris

literis semihoram dabis: tibiq₃ persuadebis, dignitatem
amplitudinemq₃ tuam mihi magna cura esse. Vale no-
strorum hominum Imperator vere maxime atque opti-
me. Dat. Cal. Iun. Anno quarto. Roma.

V R B I N A T I B V S.

26

INTELLEXI vestris ex literis id, quod mihi pro
ea, qua urbem istam omni sum tempore benevolentia
charitateq₃ prosequutus, iucundissimum sanè fuit, vos ad
meum & huius Reip. Imperium libenti animo rediisse.
Equidem vos ea de re vehementer laudo: qui tempesta-
tibus huc illuc diu iactati post longos atque multos labo-
res in Reip. pia optimaq₃ matris sinu tanquam in portu,
conquiescere voluistis. Itaq₃ municipium istud vosq₃ om-
nes in meam curam atque fidem libentissime recipio:
daboq₃ operam, ut in mea erga vos tum benevolentia,
tum studio & diligentia securè pacateq₃ degatis. Atque
aliquem ex intimis charissimisq₃ mihi perspectaq₃ probi-
tate & virtute virum propediem istuc mittam ad vos
non solum regendos, sed maxime etiam & fouendos &
omni pietate complectendos. Neque interea vobis deerit
Laurentij Medicij fratris mei filij vestri Ducis industria:
qui suis vos opibus amantissime tuebitur. Hortor autem
vos, ut quàm vobis nuper Dominus in recuperanda huius
Reip. benevolentia mentem dedit, eam in posterum pie-
tate fide studijsq₃ vestris etiam augeatis. Dat. Cal. Iun.
Anno quarto. Roma.

G E N V E N S I B V S.

27

QVESTI apud me sunt per literas VIII. viri
Reipub. Florentinae grauer illi quidem, & plus do-
lore, quam atramento illitis codicillis: cum scriberent

nauem quandam Cypriam à Florentinis mercatoribus
 conductam, onustamq₃ sale Ebusitano in ciuitatis ipso-
 rum vsum Pisano in portu à vestrarum quatuor trire-
 mium Praefectis captam fuisse, perductamq₃ istuc, inquit-
 entibus ita sibi facere per vetustissimas Romanorum Im-
 peratorum concessiones licere, velleq₃ se eo detractò sale
 nauem comburere iactantibus praeq₃ se ferentibus. Quod
 quidem mihi, vt vere dicam, quod sentio, molestissimum
 accidit, visumq₃ est valde mehercule indignum vestra
 maiorumq₃ vestrorum equitate ac frugalitate, addo et-
 iam vrbs vestra dignitate & nomine, eoq₃ magis, quod
 quibus à ciuibus vestris se defensum iri Florentini ciues
 contra Poenorum Piratarum classem existimabant, idq₃
 ab ipsis predicabatur, quosq₃ ciues vestros ea de causa
 suo in portu amicissime receperant, rebus omnibus iue-
 rant, illis ipsis eorum fortunas praedae atque ludibrio esse,
 speciem quandam habet insolita vel perfidia, vel auari-
 tia, vel sceleris. Quid enim hostes ipsi Poeni vi atque ar-
 mis illos aggressi durius in eos atque crudelius statuif-
 sent: Aut quis vobis posthac fidem vllam habendam exi-
 stimabit, si quos ab alijs tuendos ipsi palam suscepistis,
 quiq₃ vos sanè liberaliter atque etiam verius hilariter,
 tanquam bonos hospites, amicos quidem certe atque so-
 cios suis in terris atque portubus exceperant, ij à vobis
 capiuntur, diripiuntur, incenduntur, eiusmodiq₃ haben-
 tur, in quos exempla crudelitatis exercentis? Quam-
 obrem statui vos magnopere hortari, ne pluris antiquas
 vllas vestras Imperatorias concessiones, quàm ius gen-
 tium, quàm bonum & equum, quàm humanitatē ipsam
 faciatis: iubeatisq₃ vt mercatoribus Florentinis, vel reip.

potius,

potius, (ea enim me hoc rogat,) tam quidem mecum & cum re hac p. coniuncta atq; consociata, ut vna atq; eadem ambæ esse videantur, ablata per vestros Praefectos omni sine mora sineq; impendio restituantur. Quod erit & iustitia modestiaq; vestra, duas enim has praclaras maximeq; vrbibus populisq; salutare adhuc in vobis virtutes agnoui, magnopere proprium, & mihi vehementissime gratum. Sed tota de re Franciscus Ghibertus fisci Romani minister, ad quem longiores literas dedi, mentem vobis meam diligentius exponet. Dat. VIII. Id. Iun.

M. D. XVI. Anno quarto. Roma.

CAROLO HISPAN-

NI AE REGI.

28

MVLTO ante, quàm ab hominibus emigraret Ferdinandus Rex avus tuus, literas ad me dedit: quibus se literis Hieronymo Vicco Legato apud me suo pollicitum fuisse narrabat, quem quidem virum optime de se meritum fatebatur, daturum se operam, ut qua primum Ecclesia boni prouentus suis in regnis Episcopo deficeretur, ei nos Ecclesiae Vicci fratrem praefereremus. Qua de re mecum Hieronymus non semel legit, quippe qui ea spe plurimum fouebatur, nec verebatur, quin rex quemadmodum quidem & sibi receperat, & mihi scripserat, primo quoque tempore esset factururus. Hac mea commemoratio quam vim habeat, per te ipse facile iudicabis. Nunc autem, cum Hieronymus mihi significarit Ludovicum Episcopum Dertucensem vita functum esse, testis vero ipse sim non solum promissi regis, ut dixi, sed Vicci etiam in Regem fidei, diligentiae, meritorum: probo & prudenti homini, & eximia in Reges suos obser-

uantia, & cum summa illorum laude maximisq³ suis laboribus decem totos annos Roma versato, optime de auo ipso tuo, bene de te merito, mihi propter eius excellentem virtutem in primis grato deesse plane volui. Itaque non solum te hortor, sed etiam atque etiam abs te peto, velis ut ei Ecclesie Pontificis cura atq³ solatio destituta frater Hieronymi praeferatur, cum propterea, ut tu, qui fortunarum aui tui & Regnorum tot atque tantorum hereditate Dei Opt. Max. munere creuisti, illius etiam fidei & promissorum, ratione praesertim meritoq³ factorum, heredem velle agere videare: tum vel maxime ut Legati tui, qui tuorum Regnorum negotia tam diligenter tantaq³ cum dignitate totq³ annos apud Romanos Pontifices procurauit, laborum & vigiliarium rationem te habuisse omnes homines intelligant. In quo cum illud egeris, quod facere tua sponte sanè debes, quodq³ tibi & laudi & gratiae apud tuos est futurum, qui hoc exemplo ad bene de te merendum excitari poterunt. Mihi quidem ipsi tam gratum feceris, quam si tantundem aut eo amplius alicui ex meis familiaribus mihi charioribus & coniunctioribus contulisses. Dat. XIII. Cal. Quintilis. Anno quarto. Roma.

A G N E S I N A E M O N T I S F E -

R E T R I A N A E F A B R I T I I

Columnæ vxori.

29

A F F E R T V R ad nos multa quotidie latrocinia multasq³ cedes in Algidi sylua fieri, impeditiq³ itinera sic, ut iam à viatoribus non frequententur. Quod cum mihi & permolestum sit, & cum Reip. indignitate magnopere coniunctum: peto à te, des operam, mandesq³

tuis

tuis hominibus, vt latrones intercipient : vt & eiusmodi
 scelera reprimantur, & itinera purgentur. Ea in re cum
 id, quod, tametsi fœmina es, à tua tamen virtute postu-
 latur, teq; maxime dignum est, facies tum viri tui ab-
 sentis optimi hominis atque fortissimi desiderium mihi
 & Reipub. lenies. Dat. XI. Cal. Quintil. Anno quarto.
 Roma.

PETRI BEMBI EPI-
 STOLARVM LEONIS DECI-
 MI PONT. MAX. NOMINE
 scriptarum.

LIBER XIII.

THOMAE CARDINALI
 STRIGONIENSI. I

ECTIS tuis literis, quas binas vno tem-
 pore accepi, alteris ad decimum, alteris
 sexto Cal. Iunias datis, statim fratres
 meos E. R. Cardinales adhibui: vt vnà,
 quid tibi ad illas respondere nos oportere-
 ret, matura consuleremus. Itaque de communi nostrum
 omnium sententia tibi respondeo: vt ar autem ordine, ad
 priorem scilicet epistolam prius: Gratissimum nobis acci-
 disse, quod in conuentu Pannonico nuper habito omnia
 tranquille atque pacate acta confecta transactaq; sint.
 Nam cum proxime propter recentem Vladislai Regis
 mortem,

mortem, imbecillamq³, Ludouici eius filij ad regendos populos atatem ne turba seditionesq³, inter istos Principes existerent, magnoperè timuissēmus: nunc, cum res aliter ceciderit, iamq³, omnia per vos & prudenter & temperate administrantur, magna certe voluptate tua nos litera affecerunt. Valde enim fore credimus, vt si vos in tractandis Regnorum istorum explicandiq³, negotijs idem atque vnum omnes respicietis, magna cum pacis & quietis, tum dignitatis & commodorum incrementa publicè atq³, priuatim vestris rebus sint accessura. Pacis enim atq³, concordia cupidos et retinenteis protegit augetq³, pacificus & mitissimus Dominus. Quare eo de consensu et voluntate maximis vos singulos et studijs prosequimur & laudibus. Hortamur autem, vt in instituendo Rege puero, atateq³, illa tenera & flectenda, & dirigenda eundem consensum eandem curam adhibeatis, quoad Rex se atq³, sua regere per atatem possit. Nam vt arborum semina, dum pusilla sunt, palis indigent, quibus nitantur, ne ventis & tempestatibus incuruescant, obliquitatemq³, ducant crescentia, sic puerorum ingenijs moderatore opus est & magistro, qui ea regat atq³, contineat, ne flectere in vitia malasq³, artes possint: ad quas tenera omnis & infirma etas pronos maximeq³, lubricos lapsus habet. Rescripsi ad priorem epistolam tuam, nunc ad postremam venio: qua me de aduentu ad vos Turcarum Regis Legati certiores facis induciarum cum Rege tuo conficiendarum causa: consiliumq³, requiris meum: vt quid vobis faciendum sit, scire possis. Quod quidem nullum habeo, tibi quod dem, prater illud, de quo ad te non vnis literis scripsi. Quod idem nunc scribo: nobis sci-

his scilicet eandem esse mentem, eundem animum, qui antea fuit, quiq; semper est futurus. Cupimus enim ut debemus, ne cum perpetuis nostris hostibus vlli Reges nostri, vllaimperia se coniungant. Qui non id postulant propterea quod pacem & otium velint, cum nihil, nisi bella meditentur: vel quod vlllo vos commodo affici non agerrime molestissimeq; ferant, quorum oppida ditiorumq; ipsas inducias flagitantes depopulantur et prote-runt: sed ut à vobis populisq; istis bellicosissimis atq; fortissimis securi tantisper sint, dum vel alia, quæ sibi cordi sunt, explicent aliosq; Reges opprimant, vel sibi opes comparent ad vos postea, quibus maxime inhiant, validus integrisq; viribus aggrediendos planeq; conficiendos. Itaq; non possumus assentiri ijs conditionibus, quas in vestras ceruices atq; perniciem credimus reuersuras. Eam ob rem, ut scis, diligentissime ad omnes Christianos Reges non semel scripsimus: multisq; precibus contendimus ab ijs, ut Regi Regnisq; istis ad hostium conatus repellendos vnà nobiscum opem atque suppetias ferant. Id etsi serius sit, quam volumus, quamq; decebat, futurum tamen in tempore confidimus: utq; fiat, damus nunc quoque ad eos ipsos eadem de re literas, monemusq; singulos, longiorem mittendo auxilio moram ne addant: ne dum ipsi cunctabundi sedent, ad id vos necessitas compellat, quod postea factum recidere in maximum vniuersa Christiana Reipub. damnum atque dedecus facile possit. Qui si, quod petimus, in tempore fecerint, vobis ante omnes erit utile, nihil cum Turcis stauisse: quibus fortasse veteres etiam eorum in vos iniurias vlciscendi occasio propterea dabitur. Nos quidem
certe

certe pro vestra dignitate tuenda Regnoq₃ defendendo omnes nostras opes, sanguinem etiam nostrum, si expediat, sumus libentissime profusuri: quemadmodum cum Francisco Marsupino familiari ab epistolis tuo latius & ipse loquutus sum, & meorum fratrum plurimi idem fecerunt: cuius te ad literas referes. Dat. oct. Cal. Quinil. M. D. XVI. Anno quarto. Roma.

HOMINIBVS SANCTI MARTINI IN FINES

Ariminensium.

2

IULIANVM ordinis Franciscum theologicis studiis magistrum internuntium vestrum libenter audiui grataq₃ mihi eius oratio fuit. Intellexi enim cognouiq₃ ex ipso nostrum vos exercitum proximis diebus & vicina vobis loca missum, omni ope copiaq₃ vestra iuuisse: de quo etiam Laurentij Medicis fratris mei filij literis sum certior factus: qui mihi vos ysdem ipsis literis diligentissime commendauit. Ea de re studiisq₃ vestris vos & laudo vehementer & probo. Volo etiam considerare, posse vos aqua honestaq₃ omnia vobis ipsis de me polliceri. Atque vt primas postulationes vestras me non neglexisse intelligatis, in meam vos iam nunc curam tutelamq₃ recipio. Dat. octauo Cal. Quintil. Anno quarto. Roma.

PETRO IOANNI GALLI

CAE CLASSIS PRAEFECTO. 3

GRATA mihi fuit voluntas & alacritas tua, quam tuis ex literis perspexi, Francisci Regis tui iussu in nostra contra Piratas Pænos classe operam studiumq₃ tuum mihi nauandi. Qua in re quoniam me consulis, quarisq₃

quarūq; quid per te maxime fieri velim : nihil sanè,
præter vnum , vt Federico Archiepiscopo Salernita-
norum , quem classi nostræ legavi , præstò sis , eiq; pareas
rebus in omnibus . Ille enim is est vir , eaq; tum prudentia,
& rerum gerendarum experientia , tum facilitate
temperantiq; præditus , vt mihi dubium non sit , quin
huius belli administrandæ eam , quam debet , & curam
sit & rationem habiturus , tibiq; in primis satisfactu-
rus . Caterum quoniam accidere poterit , vt cum Ca-
roli Regis Hispaniæ classe , quæ quidem etiam præxi-
me Neapoli ad Pænos persequendos est solutura , no-
stra classis se coniungat : te hortor , vt cum eius classis
Præfectis omnia amici hominis officia exerceas , teq;
ijs facilem atque beneuolum prabeas : sic enim Regis
ministriis recepi , te reliquosq; nostros & Præfectos
& ministros omnes esse facturos . Itaque meam in eo
fidem vt præstes , etiam atque etiam abs te peto . Quod
attinet ad morte multandos Piratas illos , si capien-
tur , vt magis ceteri à locorum nostrorum vastatione
absterreantur : eius rei deliberationem , quemadmo-
dum reliqua omnia , ipsi Legato Remisi : quem scio tuis
consilijs multum semper tributurum . Perge modo ipse :
& quæ tuæ erunt partes , hoc in bello fortem te & di-
ligentem præsta : vt bene de me addo etiam ceteris
de populis , quorum interest , quosq; defendes atque
rueberis , bene agendo beneque consulendo mereare .
À me certe tuorum & laborum & meritorum pater-
no animo ratio semper habebitur . Datum septimo
Calend. Quintilis . M. D. X V I . Anno quarto .
Roma .

PETRI BEMBI
PHILIBERTAE ALLOBRO-
GI IULIANI FRATRIS
demortui vxori.

4

EA, quæ cum Bauno internuntio tuo de tuis meisq;
rebus loquutus sum, ab ipso intelliges. Vnum hoc te volo
ex me cognoscere. Ego cum te semel in filia mihi charis-
sime loco collocarim atque habuerim, et si is, cuius te cau-
sa impensius amabam, frater meus optimus & suavis-
simus decedens è vita me atque te moerentes reliquit, tui
tamen curam, rationem, beneuolentiam, amorem deni-
que paternum meum nunquam reijciam. Id virtus, pro-
bitas, religio tua, optimi tui castissimiq; mores atque no-
bilitas postulant. Dat. prid. Cal. Quintil. Anno quarto.
Roma.

DVCI ALLOBROGV M 5

BAVNVS Philiberta sororis tuæ interpres, quæ
mecum egerit, ipse ad te veniens tibi significabit, men-
temq; meam atque animum explicabit: qui quidem ani-
mus ad tuam sororisq; tuæ dignitatem commodaratio-
nes & fuit præsto antea, & erit posthac, quoad vixero.
Dat. prid. Cal. Quintil. Anno quarto. Roma.

FRANCISCO GALLO-
RVM REGI. 6

QVAM mihi grata & probata sit Ludouici Episco-
pi Tricaricensium egregia in me obseruantia, probitas,
virtus, ea res præbere tibi argumentum potest, quod esse
illum apud te volui, quo internuntio tractandis tecum
meis rebus vterer. Eo in munere obeundo cum ille ita
se gesserit, atque adhuc quidem gerat, vt cum nobis ma-
xime satisfaciât, tua etiam beneuolentia tuaq; libera-
litate

litate dignus esse magnopere videatur: æquum esse duximus, ut ad ipsum, qui quidem Episcopatum satis tenuem habet, pro virtutum dignitate fortunis amplificandum te socium adiutoremq³ haberemus. Quare te hortor, vel etiam pro meo iure abs te peto (est autem beneuolentiæ atq³ amoris ius omnium optimum atque maximum): ut cum primum Ecclesia aliqua, aut omnino sacerdotium aliquod eiusmodi, quod prouentus liberales habeat, tuis in regnis vel Pontifice vel curatore destitueretur, Ludouicum velis esse, cui illud, quicquid erit, conferatur. Equidem si exploratum non haberem vel pro animi tui munificentia, vel etiam pro ea familiaritate, qua is tecum iam est biennium prope totum versatus, id, quod opto, te libenter esse facturum, vterer pluribus verbis. Valde enim cupio, in eo me homine ornando habere te, qui esse mecum non abnuas eius muneris atque oneris particeps. Sed cum nihil minus necesse putem esse, quàm me ad te hac de re multa scribere: finem faciam scribendi. Addam tamen illud: si ei commode feceris, tuum te beneficium optime atq³ pulcherrime positurum. Dat. Cal. Quintil. Anno quarto. Roma.

OCTAVIANO FREGOSIO

PRAEFECTO ET DECVRIO-

nibus Genuæ.

7

SANE QUAM pro mea vetere in vos beneuolentia moleste tuli, de naui à Florentinis mercatoribus conductæ atque à vestris triremium Praefectis in eorum portu capta, post acceptas meas ea de re literas vos ea statuisse, quæ maximam illis fraudem atque iacturam afferrent. Nam & meam apud vos auctoritatem alicuius esse

Ty

ponderis

ponderis existimabam: & equitatem atque bonos mo-
res iusq; ipsum gentium nibili à vobis fieri non crede-
bam, ea præsertim in re, quæ vicinæ vobis atque amicæ,
neque spernendarum opum urbis & reip. animos maxi-
me laderet atque exulceraret. Sed hac quamifaciendū
vobis sint, ipsi videritis, quorum interest recte dissicere
atque cognoscere, quid, cuiq; tribuendum aut negan-
dum sit. Ego, cum Octoniri Reip. Florentina iterum à
me postularint, vt vellem suis ciuibus non deesse, hac di-
ctui ambulans, cum me dolor, quem ea de re capio, qui-
escere non pateretur. Itaque & planè & bene Romane
vos moneo, vt mercatoribus Florentinis dependi & re-
poni ablata omnia, damna omnia iubeatis sic, vt sacrtos
rectosq; quod dicitur se videant: ne si ij sapius apud me
eadem de re conquerentur, cogar ipse aliter, ac mea fert
voluntas, eorum incommodis mederi. Cupio autem, vt
debeo, pacate potius atq; amantius de rebus statui in-
ter vos: quàm ea fieri, quibus odij & inimicitiarum se-
mina subnascantur. Id ne fiat, vestra in manu est. Meo
ipse munere & functus adhuc quidem sum, & deinceps
fungar: neque meos ciues, male à vestris ciuibus acce-
ptos, atque à vobis indigne habitos deferam: Dat. prid.
Id. Quint. Anno quarto. Roma.

DECVRIONIBVS EVGVBINIS. 7

CAROLVM Gabrielem Ecclesia vestra Præposi-
tum et Hieronymum Acora bonum doctum hominem
& philosophiæ studijs illustrem optimūq; medicum ci-
ues internuntiosq; vestros otiōse audiui: quaq; mihi ij
vestris verbis accurrate & prudenter exposuerunt, ex-
cepi auribus libentissimis. Itaque vos de vestra in me pie-
tate

tate etiam atque etiam laudo. Quod vero ad postulatio-
nem vestram attinet optimis illam quidem sultam cau-
sis & rationibus, dabo operam, ut id, quod petitis, breui
consequamini. Reliqua omnia, quibus de rebus iſdem ve-
ſtri mecum interpretes egerunt, aliud in tempus distuli
eo consilio, ut vobis plenius atq; vberius satisfaceret. Dat.
Id. Quintil. Anno quarto. Roma.

M A T T H A E O S T R O Z Z A E

C I V I F L O R E N -

tino.

9

C V M ex Aenea Pio Alfonsi Ducis Ferrariensium
procuratore intellexissem nolle te ei gemmas illas resti-
tuere, quas apud te esse ipse Dux voluit propterea, ut
mibi item eius nomine sponſionem quandam faceres:
nisi ego ea de re tuam fidem libero: has ad te literas iuſſi
dari, quibus ſciri omnibus ab hominibus volo, tuam me
fidem, quam mihi Ducis nomine dederas, liberam solu-
tamq; fecisse: quodq; ſponſor mihi fueris Alfonsi Ducis
verbis, tibi fraudi nulla in re aut iudicio eſſe debere. Ita-
que eas illi gemmas per me quidem reddes, cum voles.
Dat. Id. Quint. Anno quarto. Roma.

B E R N A R D O B I B I E N A E

C A R D I N A L I .

IO

E T S I per mihi gratum atque iucundum eſt pro eo
amore, quo Iacobum epiſcopum Albanum Cardinalem
Arborenſem proſequor, ipſi melius eſſe de ea valetudi-
ne, qua omnes ei medici mortem allatum iri exiſtima-
bant, maximeq; illum cupiam conualeſcere: a gre tamen
fero, commodare tibi me non potuiſſe de ea domo, quam
is in Vaticano adibusq; noſtris habet. Nam quoniam

domo illa, quam adhuc quidem inhabitasti, ipse uti volebam: est enim maxime apta ad letitiam animi & exhilarationem propter mirificam porticum speculasque, quas habet multas atque bellissimas: eam ipsam Cardinalis domum, is si vita functus esset, cogitabam tuam facere: quam esse percommodam perque amplam sciebam latis spatiosisque & thalamis et atrio festiuam etiam & sumptuosam aureis laquearibus & pauimento tessellato: tibi que magno illam & vsui & voluptati putabam fore: vel propter confluentem ad te omnibus horis populi multitudinem: vel propter ingrauescentem iam etatem tuam, qua natura etiam sua letitijs & hilaritatibus gaudet. Quare non potest mihi non molestum esse, inuideri tibi eam commoditatem. Sed profecto tibi nos non deerimus: dabimusque operam, ut qua prior nostrarum adium pars elegans vacua erit, ea tua sit. Interea cura ut valeas: ut te saluum et sospitem quamprimum videre possimus. Dat. tertio Id. Quint. Anno quarto. Roma.

DVCI GRAVINAE.

II

SCRIPSIT ad me Magistratus meus ex ijs, qui in Latium sunt, te nescio quibus Andrea atque Massentio, qui ob suas disceptationes armis dimicaturi sunt, in oppido tuo Nerula locum certamini concessisse. Id cum à Domini nostri voluntate atque preceptis valde abhorreat, qui pacem, qui animorum concordiam, qui amorem nobis mutuum ante omnia commendauit: magnopere te hortor, aut si minus hortatu meo commouebere, mando tibi pro eo, quanti me facis, duellum istud tuis in locis fieri ne permittas: sed illorum potius animos, qui dissident auoces ab ea re autoritate sententiaque tua, componasque si poteris.

teris. Id à virtute tua postulatur, & omnes æquum est facere, & mihi erit gratum. Datum Id. Quintil. Anno quarto. Roma.

FABRITIO MAGNO RHODI MAGISTRO. 12

QVOD tuis me literis de Turcarum Regis apparatu bellico certiolem fecisti, valde mihi gratum fuit, idq; vt quam creberrime facias, neque solum quid speculatores tibi tui referant, aut amicorum literis ad te perfecturatur, sed quæ rumor ipse dubius sape iactet, ea vt mihi significes abs te peto; vt quid ille agat, quid paret, quo cogitationes intendat suas, ex te sciri & cognosci possit. Equidem quod assequi coniectura possum, sic existimo, in Asiam illum potius hoc tempore, quam istuc aut nostras in oras cogitare. Itaque aut contra Sultanum Aegypti Regem, aut contra Sophim Regem Armeniae puto illum suos exercitus moturum: vt eos, à quibus fere singulis annis premitur, prius aggrediatur atque opprimat: quibus integris nullum tibi, nullum Christiana Reipubl. periculum impendere magnopere arbitror. Nam nisi illos, quos habet hostes paratissimos atque audacissimos, & quibuscum bello ferè semper est implicitus, antea vel deuicerit, vel debilitarit, vel inducias cum ijs inierit, vires suas in nos atque furorem exercere satis commode profecto non poterit. Tibi tamen sum autor, Insulam vt istam atque oppidum, quod tanquam in ore atque in faucibus est nostrorum hostium, commeatibus, apparatu reliquo, rebusq; omnibus ad repellendum & ad sustinendum bellum idoneis iam nunc fulcias, teq; ante compares atque præmunias, ne imparatus offendi

possis.

possis. Neque tamen recusō, quin, si accadat ut te Turca velit aggredi, omnes meas opes tibi praeſto futuras putes. Volo enim te ſcire, me pro collegio iſto bene de re Roma. optime de re Chriſtiana merito omni tempore omnia, pro tua verò & ſalute & dignitate, vii & prudentis hominis, & optimi fortiſſimiq; viri, & mihi ami- ciſſimi, plurima atq; maxima eſſe facturum. Itaq; bono animo es: valetudinemq; tuā cura: meq; ut facis, dilige, ſi te ſcis à me & amari, & fieri plurimi. Dat. vnde- cimo Calend. Septemb. M. D. Xvi. Anno quarto. Roma.

FRANCISCO GALLO-
RVM REGI. 13

QVOD Ludouicum Episcopum Tricaricenſium Le- gatum meum honeſtaueris Eccleſia Bellouacorum & locuplete & honeſta, valde lator. Nam cum illum, ut proxime ad te ſcripſi, magnopere diligam, ſitq; is in meis ſummis atque intimis familiaribus, hac eius fortunarum acceſſio, praſertim abs te proſecta, mihi magna volupta- ti fuit. Itaque ſic exiſtimes velim, non te quidem mi- nimum recentis amoris cumulum ad meam veterem in te beneuolentia tua iſta liberalitate addidiſſe. Qua in re cum mea de illo apud te commendatio tantum valuerit, quantum ego eam valiturā conſidebam: efficiam proſe- cto, ut tua item autoritas in tuis familiaribus mihi com- mendandis, vel potius omnibus in rebus tantum habere ponderis cognoscatur, ut & ipſe videar vinci abs te in officio noluiſſe, & tu latere meo in homine ornando mu- niſcum & liberalem te fuiſſe. Dat. nono Cal. Septemb. Anno quarto. Roma.

LVDO-

LVDOVICO CANOSSAE TRI-
CARICENSIVM ET BELLO-
uacorum Episcopo. 14

SANE mihi pergratum & periacundum fuit, Regem istum in te augendo voluntatem & liberalitatem suam contulisse. Nam cum te propter tuam excellentem virtutem, nostramq; veterem necessitudinem, & plurima tua in me officia, non solum tuendum mihi, sed etiam honestandum amplificandumq; susceperim: tam illustri & fortunarum tuarum accessione, & Regis in te benevolentiae ostensione, mirifice sum delectatus: à quo me beneficium accepisse existimo, tibi cum dederit, teq; ornauerit nec exiguis prouentibus & honesta dignitate. Itaq; & contuli tibi Ecclesiam Bellouacorum libentissime, & reliqua, quae habes sacerdotia tibi manere volui: ut intelligeres te mihi esse charissimum, excitareq; ad bene, ut soles, de me in posteram etiam atq; etiam promerendum. Ages autem Regi gratias eo de munere meis verbis, ostendesq; id mihi planè ac vere grati accidisse: quod ei tamen ipse & nunc ijs libenter ostendi, quas ad illum dedi, literis, & sapere cum potero libentius declarabo. Datum nono Cal. Septemb. M. D. X V I. Anno quarto. Roma.

FRANCISCO GALLORVM

REGI.

15

REDIT ad te Villabramius, quem ad me miserat, quemq; libenter vidi, ut diligentem hominem, & familiarem tuum. Et sum omnia, quae à me petijt, sic elargitus, ut ab ipso intelliges. Reuerti autem hominem ad te nolui sine meis literis, quibus tibi significarem me in

optimam in te voluntatem magis magisq³ indies singulos augeri. Dat. octauo Cal. Sept. Anno quarto Roma.

LEONARDO LAVREDANO

VENETIARVM PRINCIPI. 16

PROFICISCENTI Venetias Ioanni Georgio Trissino ciui Vicentino, quem quidem propter bonarum artium doctrinam & politiones literas excellentemq³ virtutem vnice diligo, mandani vt tibi salutem nuntiaret meis verbis, tecumq³ certis de rebus ageret, quæ cum mihi cordi sunt, tum nostra vtriusq³ interest ea consieri: tibi verò etiam honestati atque gloriæ sunt futura. Dat. prid. Non. Septemb. Anno quarto. Roma.

FEDERICO ARCHIEPISCO-

PO SALERNITANORVM. 17

ET SI antea de rebus tuis classe ea, cui meo nomine præsuisi, contra Pœnos gestis abundè ex alijs intellexi: tuæ tamen literæ, quibus ad me singula è bello domum rediens ordine perscripsisti, me magnopere delectarunt. Aliquanto enim plenius ex ijs et liquidius consilia, actiones, impressiones in hostem tuas, difficultates, euentusq³ singulorum cognoui. Quæ quidem omnia quoniam magno constantiq³ animo, multoq³ tuo labore ex nostra dignitate sunt confecta: te de ijs vehementer collaudo, meoq³ te benedicto plurimo optimisq³ verbis impartior. Hortor autem te ciuitatemq³ istam præclaram & fortem: quæ sanè omnibus in maritimis artibus semper excelluit: eundem vt animum eandem alacritatem parandæ contra eosdem hostes clasiss in æstatem insequentem retineatis, vt si erit opus, Christiani nominis offensam atque illusam ab illis dignitatem, nostrasq³ & nostrorum

*strorum iniurias communi consilio vindicemus. Dat. x.
Cal. Oct. M. D. XVI. Anno quarto. Viterbio.*

FRANCISCO GALLO-
RVM REGI. 18

IOANNEM Iordanum vrsinum propinquum me-
um, hominem istius Regni atque Regum omnium Ita-
lorum studiosissimum, tibi deditissimum mihi, certe mul-
to charissimum, omnibus in rebus, quas impetrare abs te
non minus confidit pro tua liberalitate animiq; magni-
tudine, quàm cupiat, ita tibi commendo, vt quicquid vel
commodi vel dignitatis in illum contuleris, id omne
tam mihi gratum sit futurum, quàm si tantundem in
me ipsum contulisses. Itaque vt eius postulationes libe-
raliter excipias, tuaq; bonitate eum iuues, etiam atque
etiam abs te peto. Dat. prid. Calen. Oct. Anno quarto.
Viterbio.

PROCVRATORI CARDI-
NALIS SEDVNI. 19

IOANNES Lascaris Byzantinus homo Gracis lite-
ris pereruditus, nostrarum non ignarus, omnium bona-
rum artium appetens, bonus planè vir, cupit commodari
abs te de ea domo, quam Cardinalis Sedunus herus tuus
in Esquilijs habet, hoc tantummodo tempore, quo is Ro-
ma est absfuturus: Idq; ea de causa vult, vt dum ego hic
autumni calores & Romanum cœlum deuoto, ipse istic
& pulcherrimarum ædium elegantia, & hortorum a-
mœnitate & sylua viridissima suis cum libris oblectare
sese possit. In eo si illum inueris, erit mihi gratum: idq; vt
facias te hortor. Dat. prid. Non. Octob. Anno quarto.
Viterbio.

PERDIU est, cum Rolandum Palauicinum hospitem meum rectum & probum hominem valde diligo. Eiquoniam intelligo negotium & molestiam per tuos ministros parari in possessione oppidorum Zibelli & Roche Blanche, te hortor vel etiam abs te peto, mandes, nequid ei aut damni aut laboris contra equum & fas inferatur: habeasq; hominem tum hac, tum ceteris eius in rebus commendatum mea causa. Datum tertio Non. Octob. Anno quarto. De Faliscis.

PETRO NAVARRO

CANTABRO.

21

EX Ferrandi familiaris tui oratione intellexi te magno desiderio teneri contra Christiani hostes nominis virtutem tuam mihi nauandi, rogareq; ea de causa nos, ut in paranda ad id classe opem tibi nostram subministremus. Equidem valde lator te tam laudabili voluptate curaq; affici, ut de omni Christiano homine bene mereri studeas: teq; de eo & prestantiam istam egregiam in rebus bellicis tuam, mirificamq; pietatem & religionem summopere et amandam & collaudandam puto: nihilq; profecto est, quod tibi publice non deberi existimem. Quod verò ad petitionem tuam attinet: scire te volo, id ipsum nos hoc anno summo studio & diligentia curauisse, duasq; classes magna impensa Neapoli alteram, Genua alteram parauisse. Quòd si alio tempore hanc aggredi prouinciam statueris, & commonesceris, dabo operam, ut tibi, quantum fieri poterit, satisfiat. Datum Non. Octob. Anno quarto. De Faliscis.

GVIL-

QVOD me certiozem feceris nosse te locum quendam in agro Centuncellarum, in quo thesaurus sit absconditus per antiquus, pollicerisq; te mihi illum reperturum, si tibi & terram fodiendi potestatem & eius thesauri partem aliquam fecero: eisi agnosco credulitatem inanemq; spem tuam, neq; me fugit, quàm hæc leuia fallaciaq; sint: tamen vt ijs, qui me pro te hoc rogant, magnis illis quidem & claris viris mihiq; charissimis satisfaciam: fodiendi vbi voles eo in agro tibi facultas esto edicto meo, quo valere mensem integrum volo, tecumq; dum fodies, Centuncellarum Decuriones bini sunt. Dat. sexto Id. Octob. Thuscianella.

ODONI LAVTRECHAE PRAEFECTO MEDIOLANENSIVM. 23

MVLTII ad nos detulerunt in Francisci Mantuae domini ditionem eo, quo Veronam spectat, latere à Regijs militibus vastitatem iam prope inductam esse casis arboribus, incensis villis, comprehensis & multatis colonis, ciuibus aut magno pretio redemptis, aut in custodias abductis, eaq; de causa cum Franciscum ipsum, tum eius municipium omne magno in luctu atq; mærore versari. Quam quidem indignitatem eo iniquiore animo ferimus, quod te atque illos non latebat & ipsum & eius populos dudum sub nostra & reipub. tutela esse receptos: vt facile appareat à Regijs & Praefectis & ministris nullam nostri, nullam Reipub. habitam fuisse rationem. Sed acta quæ sunt, ea reprehendi facile possunt: reuocari & restitui non possunt. Itaque quod superest, si cura-

ficurabis vt à Regis tui exercitu nullum vltius damnum, nulla iniuria Mantuanis inferatur: & quod te decet, feceris, & mihi minus magnam ansam dederis vel de te atque illis apud Regem, vel de Rege tuo apud Reges reliquos conquirendi. Dat. Id. Octob. Anno quarto. Grauisis.

RAPHAELO MEDICI. 24

*QVONIAM certior factus sum Carolum Regem, qui adhuc in Gallia se continuit, profectionem ad Hispanias suam in prima veris tempora distulisse: ne is inter-
nuntio nostro diutius careat, mando tibi, cuius prudentiam facile perspexi, vt meum hominem apud illum agas, tractesq; mea negotia ea fide atq; diligentia, quam & abs te amor in te meus postulat, & te allaturum pro tua probitate & nostra proquinquitate planè confido.
Dat. XI. Cal. Nouemb. Anno quarto. Palo.*

CAROLO HISPANIAE

REGI.

25

COGITANTEM me quidem certe iam inde ab initio regni tui mittere certum aliquem ad te meum interpretem, qui & tibi de adeptis abs te Regnis Regioq; nomine meis verbis gratularetur, & apud te, qui mihi es, vti debes, planè charissimus, mea negotia tractaret, quaeq; ad te et ornandum et amplificandum pertinerent, in ijs autoritate mea fultus esset: ea res tenuit, quod statim te in Hispaniam transmissurum & nuntij literis & rumore ipso afferebatur prope quotidie. Itaque cum ibi nostros homines probatos nobis viros haberemus, eu mandauimus, vt cum ad Hispaniam appropinquare te intelligerent, tibi obuiam progressi eo apud te munere
funge-

fungerentur. Nunc autem cum intelligamus eam te profectionem in prima veris tempora reiecisse : ne diutius, quam & ipsi volumus, & amor in te meus postulat, homine nostro careas, Raphaëlo Medici propinquo meo viro mihi & grato et probato, qui nunc istic est, versaturq₃ tua in aula familiariter, scribo, vt quoad tu proficiscare, internuntium meum apud te agat : quem quidem propterea quod est obseruantissimus & studiosissimus tui, gratum tibi & optatum fore confido, vtq₃ sit, si adhuc fortasse minus est, aut si est, vt multo sit magis, & ei meis verbis alloquenti fidem habeas, als te peto. Dat. xi. Cal. Oct. Anno quarto. Palo.

B R I X E L L A N I S. 26

INTELLEXERAM his diebus proximis magnas inter vos & Fisci Mediolanensis Magistros altercationes extitisse ijs de rebus, quarum illi rerum pretia fisco deberi existimabant. Earum controuersiarum cum me arbitrum vtrique delegeritis, hoc statuo, vos municipiumq₃ vestrum ripamq₃ istam Padi ad earum rerum solutionem fisco teneri, de quibus Atestini Regni tempore more atque consuetudine tenebamini, sic, vt aut ad plus eo fisci nomine prastandum et fisco inferendum cogi, aut minoris absolui nequeatis : quoad aliud per nos mandabitur. Dat. xii. Calen. Nouemb. Anno quarto. de Centumcellis.

CARDINALI TOLETANO. 27

MAGNA molestia tua nos literæ affecerunt : quibus scripsisti eum, quem contra communeis nostros hostes in Aphricam exercitum transmiseras, ab Aphris atque Turcis reiectum & fugatum magnam plagam apud Alzarem

Alzarem accepiſſe. Te tamen animo fractum non eſſe, neq₃ quicquam de tuo ardore & diligentia eam ob cauſam eſſe detractum : qua quidem tua conſtantia & fortitudo dolorem meum multa leuiorem fecit. Sic enim exiſtimabam, ſi te ipſe non contraxiſſes, et ſpem vincendi nō abiec iſſes, fore, vt breui hāc ipſa res ſecundior multo maiorem luctum & diuturniorem tuis hoſtibus pareret. Sed auxit eundem illum ſtatim dolorem meum atq₃ moleſtiam Turcarum Regis contra Sultanum Aegypti regem recens mirificaq₃ victoria : de qua & te arbitror cognouiſſe, & ipſe his diebus cognoui: tum eiſdem Regis ducentarum longarum nauium claſſis, quam illum habere paratam dicunt, qui illinc veniunt. Sed hāc Dominus moderabitur. Te autem etiam atq₃ etiam hortor, vt quando hoc tuo parando mittendoq₃ exercitu magna tua diligentia, maiore impenſa confecto maximam veriſimamq₃ gloriam apud omnes homines optimi fortiſſimiq₃ principis, apud noſq₃ in primis tibi ipſe comparauiſti, magis etiam ad eoſdem hoſtes opprimendos & profligandos, Remq₃ pub. Chriſtianam iuuandam pro virili tua iterum atq₃ ſapius te accendas & pares: atq₃ in hac quidem cauſa dignum te, dignum tua virtute, dignum etiam autoritate ea, quam tibi Reſp. dat animum, quid dicam ſumas, qui tam aīam rem egeris? ſed tamen illum ipſum, quem ſumpſiſti multo antea, magnum & fortem animum vel retineas diutiſſime, vel augeas. Nam quod ad inſequentem annum atinet, eſſe nobis exploratum poteſt, vere into mare noſtrum omne Turcarum claſſibus plenum fore. Itaq₃ nos neq₃ deſiſtimus reliquos Chriſtianos Principes magnopere hortari, vt ſe ad capeſſendum

dum contra Turcas bellum in tempore comparent: neq;
 si quid erit, in quo iuuare ipsi causam tam sanctā boni q;
 omnibus tam expetitā possumus, non id sumus libentis-
 sine iam nunc, si expediat, praestaturi: modo vnum om-
 nes sentiant: vnum sibi & tentandum & conandum &
 persiciendum putent. Sed vt ad te exercitūq; tuum re-
 deam, & doleo tuas cogitationes atq; conatus in com-
 munem vtilitatem susceptos non multum profuisse, &
 lator tui te studiū & voluntatis hoc accepto incommodo
 nihil remississe. Dat. 4. Non. Nouemb. Anno 4. Roma.

LVDOVICO FIRMANO

ET HIERONYMO BRAN-

CADORIAE.

28

QVAE ad me perferri de Praefecto Hispano curau-
 istis, qui à vobis captus accepto in femore vulnere in ve-
 stra custodia est: ea libenter cognoui. Is cum eiusmodi
 sit, vt quari ab eo facinoris causa recte possit, mando vo-
 bis, & vt in eo curando nihil opera aut diligentia ab vllō
 vestrum pratermittatur sic, vt ad sanationem quanto
 celerius fieri potest, si modo potest, perueniat: & vt re-
 stitutus elabi vestris è manibus non possit, cautio per vos
 adhibeatur. Quod si isto in loco atq; custodia seruari tu-
 tissime non potest: volo, vt aliquò, vbi nihil eiusmodi ti-
 meatur, perferri hominem iubeatis. Virūq; enim &
 viuere, & custodiri illum valde cupio. Dat. tertio Non.
 Nouemb. Anno quarto Roma.

PALAVICINO ANTO-

NI MARIAE PALA-

uicini filio.

29

QVOD

QVOD patrem tuum magnum & clarum virum
proximis diebus amiseris, tum tua causa vehementer do-
leo, tum mehercule etiam mea. Nam & tu illius viui hoc
ipso tempore maxime indigebas: & ego cum summope-
re amabam, & ille me colebat plurimum. Omnino neq₃
vir melior, nec mei amantior quisquam fuit. Ita et tu
patre optimo, & ipse homine amicissimo priuatus sum:
vt te separatim consolari cum magnopere cupiam, non
possim. Sed est profecto illa consolatio proposita omnibus,
qua nobis non vti turpissimum est, vt quando Deus Opt.
Max. hunc illi vita finem atque laborum voluit esse: no-
men quidem atque memoriam optimi clarissimiq₃ viri
& retineatis ipsi, & posteritati etiam mandandam lite-
ris & monumentis statuatis. Nihil autem cum illo mali
actum existimetis, quem Dominus tanquam è carcere,
sic ex hac corporis compagine atque vinculis euolare
iusserit ad sese. Nobiscum si male actum est, id feramus
aquo animo, & Dei voluntate, quinihil mali vult, no-
strum desiderium leniamus. Quod te in primis facere sa-
nè velim. Ego si quid est, quo mederi tuo vulnere, aut re-
ponere parte aliqua iacturam istam possim, id tibi omne
polliceor: amoremq₃, quo patrem tuum sum vita fruen-
tem prosequutus, in te libenter transfero. Tu modo &
tanto patre te & amore meo dignum presta. Da.
Calend. Decemb. M. D. X V I. Anno quarto. Ro-
ma.

GALEATIO PALA-

VICINO.

30

ANTONIVM Mariam Palauicinum fratrem
tuum egregium praestantemq₃ hominem cum alijs mul-
tis de

tis de causis planè doleo vita functum esse: tum propterea quod quanti te facerem, vnus ipse optime omnium intelligebat. Nam cum mihi tecum neque vetus neque magna familiaritas intercessisset propterea quod non sæpe neque multum vnà fuimus, cum illo qui Romam ad me crebro veniebat, sum de te sæpenumero ea loquutus, quibus illi ostenderem te mihi esse charissimum, dignitatemq₃ iuam à me fieri plurimi. Itaque graui teste priuatus sum amoris summi erga te mei sum mag₃ beneuolentia illo mortuo. Sed hoc leuius. Non enim vereor, ne tibi sæpe declaraturus sim per me ipse meam in te voluntatem meumq₃ animum. Illud grauius, multum te, multum eius filium Palauicinum, multum propinquos reliquos gentemq₃ omnem vestram atque familiam in eo viro, praesidij, multum etiam splendoris amisisse. Sed hac ipsa etiam propterea quod humana sunt, a quo & forti animo sunt ferenda homini praesertim magno, vt tu es, & multarum rerum atque euentorum experientia praedito. Quod sane facit, vt in te consolando minus operæ insumendum putem, quod te existimo pro tua prudentia & magnitudine animi Deorum immortalium voluntatem, tuam ipsius voluntatem iam fecisse. Reliquum erat, vt tibi pollicerer, quæ fratre tuo, si viueret, petente & rogante facerem, ea me omnia vel eius filij, vel tua causa omni tempore esse facturum, amoremq₃ meum, quo illum complectebam; in vos an hos conuersurum. Sed id malo vos re, quam verbis cognoscere. Exirenum est, vt Palauicinum ipsum orbem patre maximo fratre tuo filij loco tibi habendum putes. Ita enim ei quod te decei, feceris, & quod prestare amor fraterne debet,

& quo mihi esse gratius atq; probatius nihil potest. Da.
tertio Non. Decemb. Anno quarto. Roma.

MARCHIONI MON.

TISFERRATI.

31

QVOD me rogas, vt tibi permittam, vt Iulium Medicem Cardinalem fratrem patruelem meum tuarum rerum procuratorem apud me facere possis, & illi mandem, vt eam curam suscipiat: alterum tibi do, vt cum voles, facias, alterum perfeci ipse hodie bene mans, cum me ille, vt quotidie solet, prima luce salutauisset, in siq; eum procuratorem tuum agere. Neque enim decet quicquam te à me rogantem nō impetrare. Id tua tuorumq; maiorum virtus, atque in me meamq; familiam fides studium beneuolentia postulant. Dat. oct. Id. Decemb. Anno quarto. Roma.

FOCARIS MERCATORI-

BVS GERMANIS.

32

ALIQUANDIV est, cum ad nos non tantum infecti argenti transmittitis, quantum soletis, quantiq; indigemus. Ita saepe fit, vt cum ad cudendos nummos, tum ad alia publice priuatimq; conficienda ea materia urbem deficiat. Quare hortor vos operam adhibeatis, vt infecti & probi argenti plus ad nos, quàm nunc sit, & quantum opus est afferatur. Erit id vobis perutile, quibus precia sine dilatione à Quaestoribus Urbanis curabuntur: & nobis qui in vestra diligentia conquiescimus, planè gratum. Dat. prid. Id. Decemb. M. D. XVI. Anno quarto. Roma.

ODONI LAVTRECHAE PRAE-

FECTO MEDIOLANENSIVM.

33

QV E

QVESTVS est apud me per Legatum suum Leonardus Lauredanus Venetiarum Princeps, sex naues sale onustas, quod is ad suas in Gallia vrbes mittebat, à Regis tuis ministris in Padi ripa detentas esse. Qua in re, quod ad me attinet, scire te plane volo, mihi id displicuisse, neque me vnquam voluisse vt ea naues retinerentur. Itaque si procedere illas sine vllò impendio permiseris, erit mihi gratum: idq; vt facias, te hortor. Dat. decimo Calend. Ianuar. M. D. XV I. Anno quarto. Roma.

E. N.

GRATAE mihi vestra tua litera fuerunt bis iam ad me per tabellarios vestros allata: quibus me de Turcarum Regis bello Aegyptiaco deq; rebus ijs certiolem fecistis. Grata etiam ea, quae ad Dominicum Allegretum super eisdem rebus scripsistis, quae quidem ille statim omnia, vt iusseratis, ad me detulit. Itaq; de ea vestra diligentia atque officio planè vos collaudandos censeo. Hortor etiam, vt ea in re studia vestra ne remittatis: vt quid ille agat, quid cogitet, quo se vertat, quid moliat, per vos, vt adhuc quidem fecistis, scire deinceps possim. Nam ea mihi & vera & certa erunt, quae à vobis afferentur. Caterum quod res vestras mihi summo studio commendatis, dabo operam, vt, quod ex Reip. dignitate fieri possit, eas commendationes vestras & ratas & probatas me habuisse intelligatis. Dat. tertio Non. Ianuar. M. D. XVII. Anno quarto. Roma.

IOANNI GEORGIO TRIS-
SINIO VICENTINO.

35

QVONIAM opera & diligentia tua atque vir-

tute certis meis in meis & reip. rebus vti quamprimum volo, quarum rerum causa te vt alloquar, magnopere oportet: mando tibi, vt, quod tuo commodo fiat, Leonardo Lauredano Principe Venetiarum salutato ad me confestim reuertare. Dat. Non. Ian. M. D. XVII. Anno quarto. Roma.

CAROLO HISPANIAE

REGI.

36

AQVILAS quatuordecim auibus capiendis idoneas, quas mihi Adulphus Vandra familiaris tuus attulit, Regium sane munus libèter, vt debui, accepi. Et sunt enim mira pulchritudinis, & abs te, quem ego mihi filij loco esse duxi: eius præterea generis, quod omnium & nobilius est & rarius: vt neque multa vllis in locis capiantur: neque saps ad nos veniant. Tu vero vno munere tot misisti, vt existimem earum capiendarum artem aliquam te callere. Nisi forte ipsæ sponte sua omnibus è regionibus isto conuolant, vt abs te capiantur, tibiq; seruiant. Quod si est, tu eis male gratus fuisti, qui ad me miseris. Sed omnino extra iocum, malletm tibi eas retinisses, quam mihi misisses. Quippe, quæ tibi voluptati multo magis fuissent, quàm mihi erunt, qui tantummodo cum autumnî Romanum cœlum fugio, valetudinis interdum causa venatione aucupioq; me oblecto, vel eos potius, qui mecum sunt: vt iucundior per agros vagatio & delectabilior nos diutius in labore via teneat. Tu verò adolescens & Rex, vt multas horas omni tempore consumere arbitrato tuo possis, eis & sapius vsus fuisses, & vtilius, ad id etiam & decentius. Quod mihi tamen munus ipsum tuum multo charius atq; amabilius facit, cum
eo te

eo te defraudes ipse, qui vti recte potes, vt mihi des, qui non possum. Et quoniam bellissima, vt dixi, sunt: dabo operam, vt aliquo te remunerer munere. Interea valebis, nosq; vt facis diliges. Datum quarto. Id. Ianuarij. M, D. XVII. Anno quarto. Roma.

PETRI BEMBI EPI
STOLARVM LEONIS DECI
MI PONT. MAX. NOMINE
scriptarum.

LIBER XIIII.

ALFONSO DUCI FER-
RARIENSIVM. I



INTELLEXIMVS Franciscum Ma-
riam Ruuerem, Vrbinatum olim Du-
cem, cui sacris interdictum est, Hispano-
rum peditum manu coacta iter per tuam
ditionem esse facturum, vt ad nostra
municipia perturbanda noua; q; res moliendas pertenden-
dat. Ego tametsi te pro tui muneris partibus id ei non
permisurum puto volui tamen ad te scribere, monereq;
te vt Francisco Maria Hispanisq; peditibus loca nostra
tentaturis nihil opis des, nullum prorsus cōmeatum prae-
beas, sed itinera potius claudas, arceasq; illos à Padi ri-
pa, tum abductis nauibus, tum flumine communito: nec
eos sinas opportunitatem vllam tuis ex locis ad tam sce-
lestos ausus exercendos Remq; pub. perturbandam

ZZ 3 posse

posse nancisci. Id si feceris, quod te facturum confido, erit nobis vehementer gratum: dabimusq³ operam, vt bene te de nobis esse meritum latere atq³ gaudeas. Sin aliter statues tibi esse faciendum, scire te volumus nos id agerrime molestissimeq³ laturos. Quemadmodum ab interuntio tuo, qui cum his de rebus loquuti sumus, latius intelliges. Dat. XIII. Cal. Febr. M. D. XVII. Anno quarto. Roma.

MAXIMILIANO ROM.
IMPER. DESIG. 2

ET ex Legati tui literis, & ex mei sermone, qua hoc tempore Franciscus Maria Vrbinatium olim Dux, cui quidem igni & aqua interdictum est, in nos Remq³ pub. molietur, intelliges. Ea tamen si existimem eum exitum habitura, quem par est tam scelestia initia consequi: omnem tamen meam cogitationem, omnem curam adhibeo, vt ne quid ab illo incommodi Resp. accipiat. Itaq³ etiam atq³ etiam te & hortor & rogo, vt quando ipse primariam aduocationem rerum Romanarum sustines, quibus opibus melius atq³ celerius potes, & nobis prestes, & nostris hostibus ire obuiam pares. Plura non dicam, ne vel docere te videar hominem summa prudentia summaq³ rerum experientia praeeditum, vel diffidere prohibitati tuae, quo nemo melior vir, nemo sanctior vnquam fuit. Vnum dicam, si ad priora tua multo maxima atq³ plurima in Remp. officia hoc adiunxeris, vt ei hoc tempore opem atq³ auxilium feras: & ipsam tibi magnopere obstrictum & deuinctum iri, & te ex eo fructus vberimos atq³ pulcherrimos esse capturum, hominum laudem &

dem & gloriam sempiternam. Datum nono Cal. Febr.
M. D. XVII. Anno quarto. Roma.

PRAEFECTO MILITVM
HISPANORVM. 3

Ex sermone Stephani Camporemiri de optimo vestro in nos animo quæ volebamus ferè percepimus. Quæ de re etiam atque etiam vos collaudamus, scireq; volumus istud vestrum in nos studium mirificamq; voluntatum propensionem nobis planè gratam accidisse. Itaque quoniam vestrarum rerum & petitionum causam Laurentio Medici fratris mei filio Urbinatium Duci tractandam & cognoscendam remisi: hæc adscripsi, ut sciretis, quicquid ab eo ijs de rebus postulationibusq; vestris statuatur, id mihi omne ratum & probatum fore. Datum octavo Cal. Feb. M. D. XVII. Anno quarto. Roma.

EPISCOPO PACENSI. 4

SCRIBIMVS Carolo Hispania Regi de Francisci Mariæ Ruueis, olim Urbinatium Ducis subita in Reip. vrbes impressione ea, quæ scribenda sunt, quaq; tu ex ipsis nostris ad eum literis intelliges. Cum verò te propter tuas plurimas excellentesq; virtutes summo opere amem, putemq; cum Episcopus sis, atq; huius Reip. magistratum geras, eam tibi eiusq; dignitatem & maiestatem pro tua probitate & fide magna cura esse: peto abs te, ut eiusdem Reipub. apud Regem tuum tuendæ atque defendendæ causam suscipias: desq; operam, ut quanto celerius quamòq; fauorabilius fieri potest, negotium transigatur, nobisq; respondeatur. Id erit nobis vni-
ce atque summo opere gratum: teq; ipse bene officium

Et diligentiam tuam posuisse, cum se occasio dederit, facile cognoscēs. Sed si me amas, age, cura, perfice, ut res ne differatur. Hoc in te, atque in tua erga nos voluntate pietateq₃ reponimus. Dat. nono Cal. Feb. M. D. XVII. Anno quarto Roma.

FRANCISCO GONZAGAE
MARCHIONI MANTVAE. 5

ETSI tua in nos fides plurimis maximiq₃ in rebus multo ante nobis perspecta est & cognita: tamen qua nouissime perstitisti officia fidei amoris diligentiaq₃ plenissima, ea nobis multo maxime & grata et iucunda acciderunt: deq₃ ijs, quantum plurimum laudari quis & recte sentiens & honesta persequens debet, tantum te effero meritis atque verissimis laudibus. Itaq₃ has ad te literas dedi, cum ut scires te ad vetera tua de nobis merita magnum cumulum nouorum officiorum adiecisse, tum ut te hortarer, etsi id minus necesse est, ut insisteres, qua nunc quidem pergis, viam: adderesq₃ tibi ipse quasi stimulum ad ea, qua cogitas, quaq₃ facis, etiam ardentius & constantius vsquequaque persequenda. Id erit mihi tam gratum, ut eius rei memoria meo ex animo deleri nunquam possit. Quod re, cum opus erit, cognoscēs. Reliqua ex Alexandri procuratoris tui literis intelligēs. Dat. octauo Calend. Febr. M. D. XVII. Anno quarto, Roma.

OCTOVIRIS REIP.

FLORENTIAE.

6

*ETSI ex Laurentio Medice fratris mei filio, quam nobis grata, quamq₃ iucunda fuerit diligentia alacritasq₃ vestra in parandis promendiq₃ ijs, qua opus erant
ad re-*

ad repellendos comprimendosq; nepharios Francisci
 Mariae conatus atque impetus, cognoscere potuistis: ta-
 men cum postea & quidem singulis prope horis intelle-
 xissem & diligentiores vos & ardentiores ea in re quo-
 tidie fieri, ac nihil pratermittere eorum, quæ ad vestram
 primum, deinde nostram dignitatem tuendam pertine-
 rent: non potui, aut etiam non debui continere me, quin
 is apud vos literis testarer, probari à me vehementer of-
 ficia omnia studiâq; vestra: nihilq; esse tam magnum at-
 que arduum, quod non se à me impetraturam ciuitas ve-
 stra confidere facile possit. Quod cum ita sit, hortor iam
 liberius vos, vt, quod superest, pergatis etiam reliqua,
 quo cœpistis animo atque ardore persequi: existimetisq;
 nostras res dignitatem, auctoritatem vobis maxime om-
 nium sustinendas & tuendas esse. Quemadmodum non
 quidem certe vestras res ita tuemur, semperq; tuebi-
 mur, ac si nostræ ipsorum essent. Neque enim secundum
 Dei Ecclesiam Remq; hanc publ. vel esse in vita quic-
 quam nobis debet, vel planè potest nostra patria charius.
 Dat. septimo Calend. Feb. M. D. XVII. Anno quarto.
 Roma.

FRANCISCO GALLO-
 RV M R E G I. 7

EXPLORATVM tibi puto esse, quo amore atque
 beneuolentia ferimus in Antonium Mariam Palauici-
 num: quamq; illum in arctam atque intimam domus
 nostræ familiaritatem & necessitudinem admiserimus.
 Eo ab humanis sublato meam in illum charitatem ad Pa-
 lauicinum eius filium, quem quidem vnicum reliquit, li-
 bentissime traduxi, eumq; et tuendum, et fovendum. &

ornandum mihi omni genere et officij et liberalitatis & planè benevolentia suscepi. Quod cum ita sit: Ille aut̃ fortunas suas omnes in ditione tua Ducatūq; Mediolanēsi habeat: & si prope compertum nobis est pro tuo magno regioq; animo, proq; patris in te sui studio & fide, proq; laboribus plurimis atq; maximis te mandate susceptis, illum tibi per sese satis iam commendatum esse: volui tamen pro mea etiam pietatis officio à te diligenter petere, ut omnibus illum in rebus, quibus in rebus opus ei erit, gratia auxilio liberalitate tua, habeas mea causa & rogatu etiam commendatiorem. Erit id cum mihi mirandum in modum gratum, tum tibi etiam laudi, necessarium & familiarem meum, tuum hominem, cuius pater, dum tibi obtemperat ac præsto est, mortem obierit, tua te liberalitate atq; benevolentia in primis tueri. Dat. v Cal. Feb. M. D. XVII. Anno quarto. Roma.

C E V R I O.

8

Ex meis ad Carolum Regem tuum literis, quàm mihi gratum fuerit in despondenda Maria Constantia Maneriana Annibali Rangoni equitum cohortis nostræ Præfecto voluntatem illum suam adhibuisse, facile perspicies. Id tu quoq; illi non solum ut confirmes, sed etiam ut augeas, abs te requiro. Veruntamen quoniam à Regijs, qui apud me sunt, Legatis ei rei mora quedam interponitur, neq; possumus qua de causa id fiat, interpretari: petimus more nostro abs te, agas apud Regem, atq; efficias, ut quod semel velle se per literas mihi significavit, id aliorum inductu ne mutet. Effet enim eiusmodi voluntatis illius commutatio mihi multas ob causas apprime atque summopere molesta. Pluribus tecum verbis

non

non agam: ne vel Regiæ fidei, vel tuæ virtuti videar diffidere. Si quid autem præterea erit, quod te scire opus sit, de Raphaëlo Medice familiari meo id cognoscēs. Dat. prid. Calend. Februa. M. D. XVI. Anno quarto. Roma.

FABRITIO MAGNO RHODI MAGISTRO.

9

ET gratum mihi tuum studium fuit, quod, ut mihi notos faceres Turcarum Regis inopinatos progressus, scribendis ad nos literis adhibuisti ijs, quas ad diem xv. Cal. Nouemb. dederas: & cura vigilantiaq; tua in munienda ista insula, de qua me certiores facis, vehementer mihi probatur. Enimuero nec abs te quicquam optatius contingere nobis potest, quam ita te animatum esse ad societatem istam atque ordinem vnà cum Rhodio ipsa contra illorum conatus, si acciderit, fortiter atque viriliter defendendum: nec minora de te quidem nobis ipsi pollicebamur, cum ad ea mentem & cogitationem nostram conuertebamus. Perge igitur magno erectoq; animo, ut facis, de vniuerso Christiano nomine bene mereri. Nam etsi existimem hoc sanè tempore Turcarum regem aliò vires suas conuersurum: est tamen tuæ prudentiæ ea comparare, ita te instruere, quasi ille ad te opprimendū neruos omnes intendat suos, omnes cogitationes isto conferant, omnem conatum: ut si quis casus in tua damna Turcas armauerit, ij te imparatum non offendant: teq; Dominus tanquā vigilantem agricolam suæ isti colendæ vineæ arcendisq; ab ea furibus cum cognouerit, meritos tibi laborum tuorum fructus vindemiamq; affluentē paret. Quod ad me attinet: omnibus ijs in rebus, quas ad res
opem

opem auxiliumq³ meum expetis, quoad fieri recte poterit, libentissime satisfaciam : quemadmodum ab ijs, qui apud me sunt, procuratoribus tuis latius intelliges. Tuam enim societatisq³ tuæ salutem, incolumitatem, dignitatem proxime facio, facturusk³ semper sum, ac huius ipsius reip. atq³ nostram. Idq³ & scire te, & collegio isti tuo meis verbis polliceri sane volo. Quod autem me hortaris, vt ad omnium Christianorum Regum pacem conciliandam animum adhibeam, vt possimus in communes nostros hostes nobis acriter imminentes aliquando tandem arma nostra conuertere : scire te plane volo, nihil me aliud dies atq³ noctes cogitare, nihil omni mea cura, diligentia contentione precibus denique omnibus moliri ac niti, quàm vt hoc ab illis consequar : sperare etiam moderatore & adiutore Deo cogitationes eiusmodi et contentiones meas in tempore profuturas. Tu velim mecum de Turcarum molitionibus tum de tuis rebus, quantum quidem locorum longinquitas & traiiciendi tempestates patientur, quam creberrime certiores facias.

Dat. prid. Cal. Febr. M. D. XVII. Anno quarto. Roma.

C A R O L O H I S P A N I A E

R E G I,

IO

Cum intellexisses superioribus mensibus cupere nos, vt quæ prima Ecclesia vberior tuis in regnis Pontificem amisisset, de ea Bernardus Bibiena Cardinalis honestaretur, per nosq³ aueretur : liberalissime nobis per literas significauisti, si, quod cupiebamus, confecissemus, id tibi ratum & probatum fore : præsertim cum scires Ferdinando Regi auo tuo idem etiam placuisse, nobisq³ illum significauisse. Hac tua liberalitas eo nobis gratior fuit,

quod

quodd primis nostris ea de re sermonibus cum Legato tuo habitis id, quod dico, tribuisti: neq₃ voluisti nos multum operæ eo petendo beneficio insumere. Quæ cum ita sint Ecclesiæq₃ Cauriensis, quæ in tuo Hispaniæ regno est, Pontifex mortem obierit: de fratrum nostrorum E. R. Cardinalium consilio ecclesiam Cauriensem Bernardo Cardinali contulimus existimantes te, vt pollicitus fuisti, quicquid egissemus, libentissime comprobaturum. Id si ita, vt volumus acciderit, erit nobis tam gratum, vt nihil possit esse gratius: sin aliter se res habuerit, vt quidam non belliam homines dictitant, mirabor: præsertim cum scias ea nos in re pro Cardinali optime de nobis merito, neq₃ solum vetere vsu beneuolentia fide studijs officijs coniuncto, sed etiam ab ineunte atate nobiscum educato laborare, quiq₃ præterea duorum clarissimorum hominum auorum tuorum Maximiliani & Ferdinandi studiosissimus amantissimusq₃ semper fuerit, non secus ac si ipse vnus ex vestra gente fuisset: vt iam non te modo id mihi permissurum facile quilibet non ineptus existimarit, sed plane etiam gauisurum fuisse occasionem tibi dari magnum & prudentem & summo ingenio summis facultatibus virum, deq₃ vobis optime meritum, maximèq₃ gratum hominem promerendi. Quæ cum ita se habeant, tu minus vereor, ne sis fidem mihi tuam præstaturus. Itaq₃ familiaris iam abs te peto, mandes, vt Episcopatus Cauriensis possessio Bernardi procuratoribus sine mora tradatur: vt tua & in illum liberalitas illustrior, & in me obseruantia testatior appareat, & ego tibi amplius atq₃ prolixius debeam. Datum 3. Id. Febr. M. D. XVII. Anno quarto. Roma.

EA, quæ à Carolo Rege tuo in re Bernardi Bibiena Cardinalis peto, ipse de meis Legatis intelliges. In ijs cum & ipsius Regis fides interposita sit, & voluntas maxima atque iustissima versetur mea, non dubito, quin ab eo sim facile omnia & sine vlla mora impetraturus. Sin verò aliter se res habuerit, te hortor ita apud illum agas, vt impedimenta omnia ea in causa reijciatur. De eo tibi ego haud multo certe minus, quàm ipse Cardinalis debebo: qui tibi tamen omnia sane debet: vel vtrique potius debebimus. Dat. tertio Id. Feb. M. D. XVII. Anno quarto. Roma.

MAXIMILIANO IMP.

DESIG.

12

AGET tecum meis verbis Thomas Legatus meus in re Bernardi Bibiena Cardinalis cum magni certe præstantisq; hominis, & mihi familiarissimi planeq; coniunctissimi, tum tui, vt scis tam cupidi, nihil vt illo possit esse in te amando & colendo ardentius. Plura me ad te scribere non oportet: qui quamleuissima tuorum familiarium commendatione omnia tua causa facio. Totam rem ita tibi commendo, vt me abs te beneficium accepisse sim existimaturus, si is id; quod petit, à Rege Carolo nepote tuo per te consequetur. Datum tertio Id. Febr. M. D. XVI. Anno quarto. Roma.

MATHAEO CARDINALI

GVRCENSI.

13

ET SI existimem non necesse esse, vt res & fortunas Bernardi Bibiena Cardinalis Maximiliano magno-
pere

pere commendem : cuius percelebris perq̃, vetus in illum
 obseruantia studium amor exposcere iure prope suo vi-
 dentur, vt ipse aliorum commendationis apud Casa-
 rem non egeat: Feci tamen id per literas diligenter, per
 Legatos autem meos multo etiam diligentius: cum cu-
 perem, vt si quis casus ferret, vt Cardinalis in Ecclesia
 Cauriensis, cui hodie illum preposui, possessione à Carolo
 Hispania Rege assequenda difficultatis aliquid experire-
 tur, Caesar in eo interponeret autoritatem apud nepotem
 suum, remq̃, ex mea & Cardinalis voluntate confice-
 ret. Nunc autem, quod super est, & si minus necesse est
 pro homine tibi deditissimo, tui studiosissimo, tuorum bo-
 norum cupientissimo, tui præterea ordinis me apud te a-
 gere: tamen quantum maxime possum, te hortor, velis,
 si erit opus atq̃, vbi erit, eius causam apud illum tueri at-
 que suscipere, quoad is voti compos per te fiat. In quo
 tum Cardinali Caesar maximum beneficium fecerit:
 tum sibi ipse apud omnes homines beneuolentia pluri-
 mum compararit. Nemo est enim cui non cognita per-
 spectaq̃, sit Bibiena in illum obseruantia plurimis maxi-
 musq̃, officiorum testata generibus, planeq̃, comprobata.
 Ego verò viriq̃, vestrum debere me facile profitebor,
 ipsi, apud Carolum Regem, tibi, qui apud illum egeris,
 vt fieret vtriq̃, nostrum satus. Dat. tertio Id. Feb. M. D.
 XVII. Anno quarto. Roma.

C A R O L O H I S P A N I A E
 R E G I.

14

VENIT ad te Ioannes Bernardinus Montorius ho-
 mo tuus pro fortunis quibusdam suis abs te recuperandis.
 Is quoniam existimat paruo se negotio, quæ cupit, mea
 commen-


commendatione abs te impetraturum, facile pro meo in se amore mihi persuasit, ut se tibi commendarem. Quare erit mihi certe gratum, si te is liberalem suis in rebus experietur. In quo etiam illud consequere, ut hominem tibi iam tum sua sponte, tum quod in imperio tuo est, sanè deditum, tuo beneficio tibi deuincies. Dat. prid. Id. Feb. M. D. XVII. Anno quarto. Roma.


R A I M V N D O C A R D O -
N A E P R O R E G I N E -
A P O L I S. 15

Ex Caroli Regis tui literis cognoui id, quod cum mihi vnice gratum accidit, tum fuit nostræ in illum beneuolentiæ & spei, quam de illo conceperam, magnopere consentaneum, velle illum scilicet, tibiq; mandare, ut quibuscunq; in rebus ipse auxilium tuum requirerem ad nepharios Francisci Mariæ in nos Remig; pub. conatus atq; impetus compefcendos, mihi præstò esses: quemadmodum ex ipsius ad te Regis, Legatorumq; regionum literis intelliges. Quamobrem te horior, ut quod iam tua sponte faciebas, in quo mihi fides diligentiaq; tua valde mehercule, probabatur, id nunc eo libentius facias, vel perficias potius, quod ad tuam in me propensorem & studium Regis tui voluntas atque imperium acescit: ut quos milites mihi parabas, eos itineri des, ut cum nostris militibus se coniungere, & nobis vsui esse in tempore possint. Sed hac & reliqua, qua te sine opus est, de Iuliano Rodulpho Priore Capuæ, quem ad te his de rebus mitto, melius & planius intelliges. Dat. XIII. Cal. Mart. M. D. XVII. Anno quarto. Roma.

FRAN-

Def.





B 1327